


Lerérún Búngiu To
Lánina Iséri Darádu



New Testament in Garifuna (HO:cab:Garifuna)

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 4 Mar 2019 from source files dated 29 Nov 2017
df8e4807-f4f9-5f4a-ab14-d1f7ffe98b0a

Contents

SAN MATEO	1
SAN MARCOS	54
SAN LUCAS	88
SAN JUAN	143
HECHOS	184
ROMANOS	232
1 CORINTIOS	254
2 CORINTIOS	276
GÁLATAS	290
EFESIOS	298
FILIPENSES	305
COLOSENSES	310
1 TESALONICENSES	315
2 TESALONICENSES	319
1 TIMOTEO	322
2 TIMOTEO	328
TITO	332
FILEMÓN	335
HEBREOS	337
SANTIAGO	354
1 PEDRO	359
2 PEDRO	365
1 JUAN	369
2 JUAN	375
3 JUAN	376
JUDAS	377
APOCALIPSIS	379

UGÁNU BUÍTI LE LABÚRÜJABEI MATÉO LUÁGU JESÚSU

Linébaanfaangu Jesúsu

(Lc 3.23-38)

¹ Niján jíri linébaanfaangu Jesucrístu le jádaangiñebei meja ladúgawagun Davíd lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu, ³ Judá lúguchi Fáres lúma Zára, Tamar tugúya jáguchu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isaí, ⁶ Isaí lúguchi urúei Davíd, urúei Davíd túma tó meja lúmari Urías, jagía lagúbüriegubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácaz, Ácaz lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél, ¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagúriajoún Crístu.

Lagúriajoún Crístu

(Lc 2.1-7)

¹⁸ Ítara líña ligáburi lagúriajoún Jesucrístu. María to lúguchu, gadáraduñoun lúma José lun tamáriedun lúma, lubáragiñeti jaganoún jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubeí wügúri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰ Dan le niján lubeí arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladúgawagun Davíd, manúfudebá lun berésibirunun María queísi búmari, ladúga irájü le lúnbei tagáraüduni, lúmagiñe Sífiri Sándu liábin. ²¹ Tagáraüduba ában irájü, ábame bíchuguni líri Jesúsu. Ítara lúba líri ladúga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdüun ában irájü, Emanuél, ligíaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladúgüni le lubeíbei ánjeli ligía lun, ába lerésibirunun María queísi lúmari, ²⁵ masúbudirúngaloún queísi wúri darí tagúriajani furúmiñeti tiraú, ába líchuguni líri Jesúsu.

2

Jachúlürün chu táu aríjei Jesús

¹ Lídan fulásu le gíribei Belén, lumúanrugu Judéa, ñi lagúriajouá Jesús dan meja le Heródes lan urúeibeí lídan jageíra juríu. Ábati jachúlürün fiú wügúriña chu táu ubúrugin Jerusalén lueígiñe oúbaü le ñígiñe lubeí laboucha wéyu. ² Ába jálügüdajan.

—Jageísan jarúeite juríu le agúriajoubei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábati lagúarun joun sun jábutigu fádirigu lídan jafíñen juríu, jáma ja arúfudajabalin lilúruden Moisés joun gürígia, ába lálügüdaguniña jalábei lan libíti fulásu lagúriajouá Crístu. ⁵ Ába jaríñagun lun.

—Belén, le lumúanrugubei Judéa, ladúga ítara líña labúrüdüni proféta.

⁶ Amúrü Belén, lumúanruguna Judéa, amúrü ában lídaangiñe ubúrugu weírigutimaati lídan múa le, láu sun biñúraü, ladúga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun. ⁸ Ábati loúnajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñúdün námuga gíñe ájuduragua lun.

⁹ Lárigiñe jagáambuni chu táu lerérun urúei, ába jóudin. Warúguma bugáti to jaríjuboun le ñígiñe lubeí láfuara wéyu, ába tídin jabá jabá, darí taráramun loúgiñe fulásu le ñí lubei irájü le. ¹⁰ Dan le jaríjinun chu táu ja warúguma, ába jagúndaaragun sarágu. ¹¹ Dánti le jebélurun tídoun múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti. ¹² Lárigiñe, ába jawísarúniwa lídan jawémedi lun magíríbudun jamá ñígiñe lubeí Heródes, ába jagíríbudun jageíroun lídaangiñe ámu úma.

Anúrajani lun Ejíptoun

¹³ Lárigiñe jóudin chu táu jagía, ába larúfudagun ába láni Búngiu ánjeli lúngua lun José lídan luwémedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladúga láluajaali Heródes irájü le lun láfaruni jilágubei.

¹⁴ Ábati lásaarun José, ába lanúgüni irájü táu sun lúguchu áriebe ligía, ába lídin jáu Ejíptoun. ¹⁵ Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmulugugiñe proféta. “Sagá numuti Niraú Ejíptogiñe.”

Láfaraguagüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagáñidun, ába loúnajan áfaraguaña sun irájüñü ja biáma tíña irúmu jáu lun únabun, ja aganoúbaña Belén lúma sun fulásu geyégu láu, según dan le jaríñagubei chu táu luágu lagúriajouniwa irájü ligía. ¹⁷ Ítara líña lagúnfulirun le labúrújabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raquél, to ayájuboun járigi tirájüñü, mabúseeruntu lun támalijoun ladúga jilágua jamá.

¹⁹ Lárigiñe loúnwen Heródes, ába liábin ába láni Búngiu ánjeli lun José lídan luwémedi yágüta Ejípto, ába laríñagun lun.

²⁰ —Sarába, barúbei irájü le táu sun lúguchu, giríbu jumá jageíroun Israelítagu ladúga jilágua ja abúseerubaña meja jáfaruni irájü le.

²¹ Ába lásaarun José, ába lanúgüni irájü táu sun lúguchu jageíroun Israelítagu. ²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñijin, ába laríñawagúniwa lun lídan uwénedi lun lídin Galiléoun. ²³ Lachúlürün ñi, ába lídin agánawa lídan fulásu le gíríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jaríñagubei profétagu luágu Nazarétna lan Jesúsu.

3

Lapúrichijan Juan le abásteragüdjabei lídan fulásu mageírawati (Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa, ² ába laríñagun lídan lapúrichijan.

—Sáansi jumei jóuserun, ladúga yaráfaali larúeijan Búngiu.

³ Juan le, ligía le uágubei meja labúrüja proféta Isaías ítara. Agaambúati lumálali ában gürígia agúaraja lídan fulásu mageírawati ítara. “Aráanse jumóun janígi lubá liábin Wabúreme, queísi ladárarúniwa úma surúti.”

⁴ Lanáangun Juan, láutu lúra caméyu, liábin lagúruga liránaagua, guéru, chigángaru leígubaña lúma síruudu le áraabuna. ⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambej lapúrichijan, ⁶ dántija le jagúfesseruni jafígoun, ába labásteragüdüniña lídan dúna le gíríbei Jordán.

⁷ Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu ñúbintiña lun jabásterun, ába laríñagun joun.

—¿Jarásan jéwe jugúya le! ¿Ca awísarubadün lun janúrajan lueí lanárime afáyeiragülei luágu figoú le lúnbei liábin? ⁸ Oúsera jumá buídu, arijúa lámuga furáangu luágu sáansigua lan ligáburi jóuserun. ⁹ Mapántajan jugúyame, aríñaga jídaangua. “Linébaanfaangu Abrahám wagía”, ladúga naríñajare jun luágu gayára lan ladúgün Búngiu linébaanfaangu Abrahám lídaangiñe dúbü le. ¹⁰ Madíseeli lagúnfulirun le laríñagubei Búngiu, luágu yaráfaali lan lidáani abeichúni luágu figoú, aráanseeru jaráwa lun lánchujóun wéwe, áni sun wéwe le mabuídunti lin, chaúnwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáli lan ligáburi jóuserun, ánjeinti le lúnbei liábin nárígi, labásteragüdübadün láu Sífiri Sándu, áni lafáyeiragüdübadün luágu figoú queísi láu wátu geméti. Gabáfuti nueí darí lun madúna nan ni lun narágachunun ligeídin. ¹² Nújeinjaru lichóbulin lújaburugu, larúmadagüdübei türígu, ábame lanúadiruni lídaangiñe sagádi mábeijali. Ábame lareíduni türígu, ábame laguduni sagádi le mábeijali lídan wátu geméti le méñeguchadíbei.

Labásterun Jesúsu (Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachúlürün luágun dúna le gíríbei Jordán le ñi lubei Juan lun labásteragüdüni. ¹⁴ Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdüni, ¿amúrü lubeí ñúbin nun lun nabásteragüdüniibu?

¹⁵ Ába laríñagun Jesúsu lun.

—Ítara lúba guetó, ladúga lúnti wadúgüni le lubeíbei Búngiu.

Ába labásteragüdüni Juan Jesúsu, ¹⁶ lárigiñe labásterun Jesúsu, ába láfuridun dú-narugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷ Ába lagaambún ába umálali siélugiñe le aríñagubei.

—Niraú le jínsiñebei nun le, le áubei oúnwenbun lan nugúndan.

4

Loúchaguni Máfia Jesúsu

(Mr 1.12-13; Lc 4.1-13)

¹ Ába lanúgüni Sífiri Sándu Jesúsu lídoun fulásu mageírawati lun loúchaguni Máfia.

² Lárigiñe leréderun Jesúsu bián-wein wéyu lúma bián-wein áriebeu meíginga, ába lálámachun. ³ Ábati liábin Máfia lubádu, ába laríñagun lun lun loúchaguni.

—Ánjein liraú bubei Búngiu, salíguagüdadei dúbü le feínme.

⁴ Ába loúnabun Jesúsu.

—Tariñajare Lerérun Búngiu. “Mámarügübei táu fein labágarida güriña, labágariduba giñe láu sun dimúrei le laríñagubei Búngiu.”

⁵ Ábati lanúgüni Máfia Jesúsu Jerusaléoun, ubúrugú le sándubei joun jurú, ába laweínragüdüni tábulugun témpulu, ⁶ ába laríñagun lun.

—Ánjein liraú bubei Búngiu, chubába yágiñe lun únabun, ladúga tariñajare Lerérun Búngiu.

Laríñaguba Búngiu joun láni ánjeligu lun jounigirunibu.

Janúgübadibu jájaburugu lun machúgeragun lan bugúdi luágu dúbü.

⁷ Ába loúnabuni Jesúsu.

—Aríñagatu giñe Lerérun Búngiu. “Móuchaguabei Babúreme Búngiu.”

⁸ Ába lanúgüni Máfia Jesúsu luágun ában wúbü íñuti, ába larúfuduni sun arúejani le ubouagubei lun, lúma buri luweírigun, ⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábati laríñagun Jesúsu lun.

—¡Beíba nueí, Máfia! ladúga tariñajare Lerérun Búngiu. “Lúnrüguaba Babúreme Búngiu bájuduragua, lúnrüguaba giñe besériwida.”

¹¹ Ábati ladisedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun. ¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí. ¹⁴ Lasúseredunbei sun le lun lagúnfulirun le labúrüjabei meja Isaías, lé meja proféta.

¹⁵ Lageíra Zabulón lúma Neftalí,

lídan úma lubádu barána, lueígiñe oubáü le nígiñe lubei láfuara wéyu libíti Jordán, Galiléa le ní lubei jagánawa ja mámabaña jurú.

¹⁶ Jugúya lé meja lídaanbei lubúriga aríjaadün ában oúnwenbun larúgounga, jugúya lé meja lídaanbei lamúñounga le lánina ouweni,

jarúgoungagüdwawaali jáu.

¹⁷ Lúmagiñe dan ligía, ába lagúmeserun Jesúsu apúrichija ñi ítara.

—Sáansi jumeí jigáburi, ladúga yaráfaali larúejan Búngiu.

Lagúarun Jesúsu joun gádürü esénijatiña lun lánime disípulugu

(Mr 1.16-20; Lc 5.1-11)

¹⁸ Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme gíribei Pédro, le ában, Andrés. Esénijani jabágaribei, jáguruñati. ¹⁹ Ábati laríñagun Jesúsu joun.

—Falá jumana, ábame mesénijanjadün lan úduraü, anájarügaadünme güriquia nun lun nánigume.

²⁰ Furése furése ába jígirunun jasénin, ába jóúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámajoun jasénin. Ába lagúarun Jesúsu joun lun lánime disípulugu, ²² lídan óra ligía ába jígirunun ugúnein, ígira jáguchi, ába jóúdin lúma Jesúsu.

*Larúfudajan Jesúsu joun sarágu güriquia
(Lc 6.17-19)*

²³ Ábajei leíbuguni Jesúsu sun Galiléa arúfudajeina tídan buri jalígílisin juríu to lídaan-boun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti güriquia. ²⁴ Ába lagaambúniwa luágu Jesúsu lídan sun Síria, ába janúgüniña sun ja asúfurirubaña láu ámuñegueinarügü sándi, igárigu, ja gawágubaña lagúbüri espíritu, ja goúwejadibaña, jáma ja derégüdaaña úgubu, ába lareídaguagüdüniña. ²⁵ Sarágu jáña güriquia afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígiñe lubeí laboucha wéyu libíti Jordán.

5

Lapúrichijan Jesúsu wúbüwaügügiñe

¹ Dan le laríjinbaliña Jesúsu sun güriquia jagía, ába laweínrun luágun ában wúbü, ába lañúurun ñi. Ábati jóúndaragun láni disípulugu geyégua láu, ² ába lagúmeserun arúfudaja joun ítara.

³ —Fuleíseiwatün jugúya le asúbudirubalin luágu mégei jumáni lídejan Búngiu lun jadúgüni le labúseerubei, ladúga méreengunbei jun lun jebélurun lídoun larúeijan Búngiu siélu.

⁴ ‘Fuleíseiwatün jugúya le jírubei, ladúga líchuguba Búngiu gurásu jun.

⁵ ‘Fuleíseiwatün jugúya le únabugubei, ladúga jerésibirubei le uágubei laríñaga Búngiu luágu líchugubei lan jun.

⁶ ‘Fuleíseiwatün jugúya le weírubei jabúseerun lúaradagun jabágaridun, ladúga líder-agubadün Búngiu lun jadúgüni.

⁷ ‘Fuleíseiwatün jugúya le gudémejabubei, ladúga gudémebadün gíñe lun Búngiu.

⁸ ‘Fuleíseiwatün jugúya le jarúmabei anígi, ladúga jaríjubei Búngiu.

⁹ ‘Fuleíseiwatün jugúya le áfaagubei lun jámalijan sun cátei, ladúga lagúarubadün Búngiu queísi lirájüñü.

¹⁰ ‘Fuleíseiwatün jugúya le asúfurirubei eíbaajoúni luágu lúaragun jibágari, ladúga jebéluruba lídoun larúeijan Búngiu siélu.

¹¹ ‘Fuleíseiwatün dan le janábagonün güriquia, eíbaaja jamaún, aríñaga jagía sun luwúyeri iyéeni juágu, nueígiñe. ¹² Gúndaañu jumá, ladúga jerésibiruba ában oúnwenbun fáyeiti siélu, ítara liñá meja gíñe jeíbaajoúniwa profétagu ja ñúbinbaña jubáragiñe.

*Ítara jíña queísi sálu lúma lámpu lun ubouí
(Mr 9.50; Lc 14.34-35)*

¹³ Ába lasígirun Jesúsu aríñaga.

—Ítara jíña quei sálu joun lílana ubouí le lun jeréderuniña lueí jagádeirun, ánjein lefériDIRA sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadúgüraguni güriquia.

¹⁴ ‘Ítara jíña quei lámpu joun lílana ubouí le. Ában ubúrugü le luáguti ában wúbü siñáti larámudagun, furánguti larijoúniwa. ¹⁵ Mebedúnti gíñe ában lámpu lun líchugúniwa

tábugiñe ában gáfu, luágu dábulá líchugúa lun larúgoungadágüdüün jáu sun ja múnadabaña. ¹⁶ Ítara jumá gíñe, durúnguagüda jumeí jilámpun jádan gürígia, lun dánme lan jarjini buíti le jadúgübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷ ‘Marítagua jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímatimaati. ¹⁸ Ninárün lubeíti jáu luágu níjeingua rügáali ligía lan siélu lúma ubouú, magídarúnwabei ni ában púntu, ni ában létüra lídaangiñe lilúrudun Moisés daríme suséreele le lúnbei lasúseredun. ¹⁹ Ligía, le lubeí íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadúgüni líbe le ladúgübei, ñúraüraübei lanügüniwa yágüta siélu lídan larúeijan Búngiu. Ánjeinti le ñúdünbei láu sún buri gumádi lídan lúaragun, ítara gíñe larúfudajan, weíribei lanügüniwa yágüta siélu. ²⁰ Nariñajare jun luágu ánjein lan mabuídun ligáburí jóuserun sarágu weíyaasu jaweí arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi

(Lc 12.57-59)

²¹ ‘Agáamba jumáali luágu aríñawagúa lán meja joun binádu jagúbürigu lun máfarajan jamá, ladúga furúmiegurügü lan le áfarajati, lagúseragüdúwaba. ²² Wel, nariñajare jun luágu furúmiegurügü lan le agáñiduti lúma gürígia líledi lagúseragüdúwaba. Le anábuti gürígia líledi lagúseragüdúbei luweírin-ágei lúrudu, le aríñaguti lun gürígia líledi, “íbidiougua táu”, luáguñein úma lun máfiougatin. ²³ Ítara líña lubeíti, ánjein banúga bedéweejan luágun lání Búngiu latárü, báu ñi ába barítaguni luágu níjein lan cátei lídan furúmiegurügü gürígia bubá, ²⁴ ígirabeí le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárigiñemeti, gayáraajalíme bagíribudun luágun latárü íchigei bedéweejan.

²⁵ ‘Ánjein abúseera ában gürígia lanügünibu ligíbugiñoun lúrudu, belúba lídoun úarani lúma luágu jeíbuguniwagu lueí ledéregerunibu lun agúseragüdüti, ledéregerabume agúseragüdüti lun polisía, ábame badaürün. ²⁶ Ninárün báu, máfuridunbadibu ñígíñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷ ‘Agáambaadün luágu aríñawagúa lán meja. “Magámarida jumá jámari ámu, adultériu líra.” ²⁸ Áu nariñajare jun luágu furúmiegurügü lan le awámadirutu ában wúri, adúgaali adultériu túma tídan lanígi.

²⁹ ‘Ánjabu lubeíti lafígoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügú láu bídin láu sun búgubu máfiougatin. ³⁰ Ánjein bújabu lubeí le boúnwenren afígoungüdúbadibu, dürúbei, fíbei díse, buítimaati lun leféridirun ában lídaangiñe umégeguni le buágubei sügú láu bídin láu sun búgubu máfiougatin.

Larúfudajan Jesúsu luágu ígiraguni

(Mt 19.9; Mr 10.11-12; Lc 16.18)

³¹ ‘Aríñawagúati meja gíñe luágu furúmiegurügü lan le ígirutu lúmari lúnti líchugun gárada lánina ígiraguni tun. ³² Áu nariñajare jun luágu furúmiegurügü lan wügüri ígirutu lúmari, ánjein máma lubeí ladúga tagámaridun ligíbuagun, ába taganoún lúma ámu wügüri, adúgagüda lumútu furúmiñeti wügüri adultériu. Le gíñe agámaridutu wúri ígiraguaaru ladúgüña gíñe adultériu.

Larúfudajan Jesúsu luágu áfiñuruni

³³ ‘Agáambaadün gíñe luágu aríñawagúa lán meja joun binádu agúbürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴ Áu naríñajare jun luágu moún lumuti lan jáfiñurun ni ca uágu—ni luágu siélu ladúga ñi lan lañúura Búngiu, ³⁵ ni luágu múa ladúga ñi lan líchigei Búngiu lugúdi, ni luágu Jerusalén ladúga ligía lubúrugutebei Warúeite Búngiu le weírigubei, ³⁶ ni luágu jichúgü ladúga siñáti ni jájarudagüdün ni jáuridagüdün ában ídiburi. ³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmágiñeti Máfia.

Larúfudajan Jesúsu luágu láguyugüdüniwa wuríbani
(Lc 6.29-30)

³⁸ ‘Agáambaadün luágu aríñawagúa lán meja. “Águu luágu águu, ári luágu ári.” ³⁹ Áu naríñajare jun lun máguyugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában loúba jigíbu, rúya jumeí le ában oúbaü lun. ⁴⁰ Le áluguti lanúgünün ligíbugiñoun lúrudu tueígiñe jisímisin, ígira jumeí lun gíñe lanúgünun jabíte. ⁴¹ Ánjaün lafósura ában gürígia lun janúgün ában anúgüni ában máili, barújumei bián máili. ⁴² Furúmiegurügü le amúriajati ában cátei júma, rújumei lun, míchiga jumeí gíñe janágan luágun le afúredeijati júma.

Ísiñejabuni joun áganiñu
(Lc 6.27-28, 32-36)

⁴³ ‘Agáambaadün gíñe luágu aríñawagúa lán meja. “Jínsiñelá bumáda bun, liyéreegudame bágani bun.” ⁴⁴ Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabei jayúmajan jubá, adúga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei oúserunün. ⁴⁵ Ítara lúba jagáburiduña lan queísi lirájüñü Júguchi Búngiu le siélubei, ligía oúnaja lumúti wéyu joun buítiña jáma wuríbatiña, oúnajaleí júya dándu joun múaraantiña queísi joun úaratiña. ⁴⁶ Ánjein já rügúbaña lubeí jínsiñejabúbaña jun ínsiñeda jun, ¿cábagi fáyeiti jerésibira luágu líra? Adúga jamúti gíñe ja agúburajabalin liseínsuna gumádi ítara. ⁴⁷ Ánjein jóun rügúñein lubeí jumádagu jayóuragua, ¿ca buíti jadúgübei láu líra? Íbini ja ibídiñejabubaña lun Búngiu adúga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

6

Larúfudajan Jesúsu luágu ladügün cátei buíti

¹ Ába lasígirun Jesúsu arúfudaja joun gürígia wúbüwaügügiñe, laríñaga. —Toúnigi jumá lueí jadúgün cátei buíti jagíbugiñe gürígia lúnrügü jaríjinün. Ánjein jadúga ítara, míchubei Júguchi Búngiu le siélubei fáyeiti buíti jun. ² Ligía, dánme lubeí jíderagun ában gudémeti, masúbudiragüda jumeí lun sun uboú quei jadúga ja biánguabaña igíbu ligílisirugu lúma úmadarugu. Jagía, jadúgüni líra lúnrügü jadímurejan gürígia buídu jawágu. Ninárün jáu luágu láu lan jadúgüni líra, ibíja jamáali jafáyeiruája. ³ Dan le jíchugun ában cátei lun gudémeti, masúbudiraleí ni lubuídun-ágei jumáda, ⁴ adúga jumeí lábugiñe libídiñewa. Júguchi Búngiu le aríjubalin le jadúgübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburi ayúmuraguni lun Búngiu
(Lc 11.2-4)

⁵ ‘Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebei joun lun jayúmuragun rára tídan jalígilisin juríu lúma lídan legéyedun úma lun jaríjiniña gürígia. Ninárün jáu luágu láu lan jadúgüni líra ibíja jamáali jafáyeiruája.

⁶ Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjbalin le jadúgübei lídan límanin, líchuguba jafáyeiruája. ⁷ Lídan le jayúmura-
gun, máguyuaguagüda jumá luágu dimúrei le málati quei jadúga ja ibídiñejabubaña
lun Búngiu, jarítaguatiñati luágu lagáambubaña lan Búngiu ladúga líbe jadímurejan.
⁸ Mítaran jumá lubeíti quei jagía, ladúga lubáragiñe jayúmuragun lun Búngiu subúdi láali
ca lan jabúseerubei. ⁹ Ítara lúba lubeíti jayúmuragun.

Wáguchi Búngiu le siélubei,
inébewalá bíri.

¹⁰ Núbinlá bidáani lun barúeijan ya ubouágu,
adúgúwalá bugúndan ubouágu quei ladúgúniwa bugúndan siélu.

¹¹ Rúba fein buídurügütu woun lun wéyu le ugúñebei,

¹² ferúdunabei wuríbati le adúga wamáalibei quei ferúduna wamániña ja adúgübaña
wuríbati woun.

¹³ Mígira báwa lun wáburujan lídoun wuríbani,
dísegüdarügü báwa lueí,

ladúga amúrü le arúejabei, amúrü le Súntibei Gabáfu, amúrü le weírigubei lun sun dan.
Ítaralá.

¹⁴ ‘Ítara líña lubeíti, ánjaña ferúduna jumá ámu luágu wuríbati le adúga jamáalibei jun,
ferúduna lubádün gíñe Júguchi Búngiu le siélubei, ¹⁵ ánjein úa ferúduna jumá ámu, úabei
gíñe ferúduna láani Júguchi Búngiu jifígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.

—Jugúya, dánme le jayúnarun, marúfuda jumá lírun igíbu quei jadúga biángua tigíbu,
jagía jadúgünbalin ítara lun jaríjini gürígia luágu jayúnaruña lan. Ninárün jáu luágu láu
lan jadúgüni líra ibíja jamáali jafáyeiruája. ¹⁷ Ánjein jugúya, dan le jayúnarun, amúriga
jumeí jídíburu, chibá jumeíme jigíbu, ¹⁸ meféen jamámuga gürígia luágu jayúnaruña lan.
Júguchirügüba Búngiu le júmabei ñi geféen luágu jayúnaruña lan, ábameti líchugun
jafáyeiruája.

Írisini siélu (Lc 12.33-34)

¹⁹ ‘Moúndaragua jumá írisini ya ubouágu le ñí lubei gayára lan jájüchün jamútiri áni
gayára ligía lagájüdüñ ámu luwúyeri írisini, le gíñe ñíjin lubei gayára lan jebélurun
jíwerutiña lun jíwerujan. ²⁰ Oúndaragua jumá írisini siélu, le ñí lubei siñá lan jájüchün
jamútiri, magájüdadu ni cáta, mebélú jagía jíwerutiña íweruja ñi. ²¹ Le ñí lumuti jirísini,
ñíñoun gíñe janígi.

Lilámpun úgubu (Lc 11.34-36)

²² ‘Ítara líña bágu quei ában lámpu lun búgubu, ánjein lubeíti buídu lubei bágu, aríja
ligía luágun írisini siélu, camá jamuga jarúgoungabei gíñe láu sun búgubu, áni buídubei
gíñe sun bigáburi. ²³ Ánjein sándi lubei bágu, aríja ligía luágun írisini ya ubouágu,
camá jamuga lídaanbei lubúriga sun búgubu, áni wuríbabei gíñe bigáburi. Ánjein núbin
larúgounga le bídaanbei lun lubúrigame, ¡luweírin méfuna líwurin lubúriga ligía!

Búngiu lúma seínsu (Lc 16.13)

²⁴ ‘Úati ni ában gayáraati lesériwidun joun biáma iyúbudirigu, ladúga lísiñeduba ában
jádaangiñe lun, liyéreegudáme le ában lun, úaraguabei lúma ában jádaangiñe, líchigame
mebéreseni luágu le ában. Siñáti lesériwidúniwa lun Búngiu lúma lun seínsu.

Toúnigi lumútiña Búngiu lirájüñü
(Lc 12.22-31)

²⁵ ‘Naríñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáürunun. ¿Máfunagi gebégitimaati ibágari sügú láu eíginí, gebégi úgubu sügú táu anáanguni? ²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eíginí joun. ¡Sarágu gebégitima jumá sügú jáu dunúru! ²⁷ ¿Cáteigi jídaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸ ‘¿Ca uágu jadíjerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madúgün ligía gamísa, ²⁹ ni méja urúei Salomón láu sun luwéndegun, mawéndentí meja ladáüragun quei fulúri. ³⁰ Ánjeinti daúguagüda lubálin Búngiu jíduru ítara le ugúñebei lájücha, jarúgabei yebe lagudúña, ¿gúbumesan líderaguajün lougua tafíñen jugúya le? ³¹ Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáura?” ³² Gürígia ja lánigu ubou le, luágu rügüñeín buri cátei le jarítagua, ánjein jugúya, níjein júguchi Búngiu siélu le subúdíjabúbei cátei lan jemegeirubei. ³³ Seríwi jumá lun Búngiu furúmiñe, áluaja jumeí ibágari surúti le áubei lagúndaara, ábame líchuguni sun le jemegeirubei jun. ³⁴ Madíjerida jumá lubeíti luágu jarúga, ladúga barú lumuti gíñe jarúga lidíjeridüna lúmagua. Ságü ában wéyu gíbeti cátei lun.

7

Míchiga jumá jadúnrun ámu
(Lc 6.37-38, 41-42)

¹ Ába lasígirun Jesúsu aríñaga joun gürígia wúbüwaügügiñe.

—Míchiga jumá jadúnrun ámu, míchugun lámuga gíñe Búngiu jidúnrun, ² ladúga quei ligáburi jíchugun jadúnrun ámu, ítara lúba gíñe líchugun Búngiu jidúnrun, le áubei jamísuraja, láuba gíñe lamísurajaün Búngiu. ³ ¿Ída lubásan gayára lan jaríjini liraúraü ífei le lídaanbei lágu jamúlen áni masándi jumúti durúsu le lídaanbei jágu? ⁴ ¿O ída lúba gayára lan jaríñagun lun jamúlen. “Sagáneí liraúraü ífei le lídaanbei bágu,” áni níjein ában durúsu lídan jágu? ⁵ ¡Biángua tigíbu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraúraü ífei le lídaanbei lágu jamúlen.

⁶ ‘Míchiga jumeí arúfudajani luáguti asálbaruni joun gürígia ja gáñitiña, garábagua jáñein juágun quei oúnli lun jágürünün. Míchiga jumeí gíñe arúfudajani ligía le gebégibeí sarágu joun gürígia ja búirujuduátiña, dügúgua jañálin.

Agáamba lumúti Búngiu wamúriajan lúma
(Lc 11.9-13, 6.31)

⁷ ‘Jamúriaja lúma Búngiu, ábame líchugun jun, jáluaja, ábame jadárirun, daúnjuma luágu béna, ábame lánjunrenchún jun. ⁸ Ladúga le amúriajati, abíjati, le áluguti, daríti, le adaúnjati luágu béna, jurénwati lun.

⁹ ‘¿Níjein funági ában jídaangiñe gayáraati líchugun ában dübü lun lisáni dan le lamúriajan fein lúma? ¹⁰ ¿o líchugun lan ában jéwe lun dan le lamúriajan úduraü lúma? ¹¹ Ánjein lubeíti láu lubeí sun wuríba jumá, gíchigaditün cátei buíti joun jisáanigu, ¿gúbumetí líchiga Júguchi Búngiu le siélubei cátei buíti joun ja amúriajatiña lúma!

¹² ‘Súnwandanlá lubeíti jadúgün joun ámu quei le jabúseerubei lun jadúgüni jun, ladúga ligía laríñagubei lilúrudun Moisés túma jalíburun profétagu.

Bürúraüti lubéneri siélu
(Lc 13.24)

¹³ ‘Belújuma lídaangiñe béna le bürúraübei. Béna lúma úma le anúgübei gürígia lídoun fériidi, tuléburi líña, gabáranouga ñi, áni sarágu jáña ebélurutiña lídaangiñe. ¹⁴ Ánjeinti béna lúma úma le anúgübei gürígia lídoun ibágari le magúmuchaditi, bürúraü líña, murúgua, míbetiñati adáriruti.

Luágu cátei le wadúgübei lasúbudirúa cátawa lan
(Lc 6.43-44)

¹⁵ ‘Toúnigi jumá jaweí yéetiña ja aríñagubaña luágu lerérun lan Búngiu jadímureja. Jayábin jun quei mudún bougudigiñe jabíti, ánjein múnadagiñe, ítara jáña quei anímaalu gáñitiña. ¹⁶ Jugúya, gayáraabei jasúbudiruniña luágu le jadúgübei, malúbajoúntu beíbei lídaangiñe jíyu, ni ígo lídaangiñe gurbiyuwa. ¹⁷ Sun lubeíti wéwe le buíti, buíti lin, wéwe le wuríbati, wuríbati lin. ¹⁸ Wéwe le buíti, siñáti wuríba lan lin, wéwe le wuríbati, siñáti gíñe buídu lan lin. ¹⁹ Sun wéwe le mabuídunti lin, chaúnwati, ába lágudúniwa. ²⁰ Jasúbudirubaña lubeíti yéetiña jagía luágu le jadúgübei.

Másubaña ebélura lídoun arúejani le siélubei
(Lc 13.25-27)

²¹ ‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesúsu. ‘Ja rügúbaña adúgübalin lugúndan Nóguchi Búngiu le siélubei ebélura. ²² Dánme lachúlürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatiña lídan bíri, adúga wagía sarágu miláguru lídan bíri.” ²³ Ábamei naríñagun joun. “Íbidiñegubeiñadün nun, díse jumá nueí, jugúya le adúga jumáalibe le wuríbabei.”

Jawúyeri gürígia ja agáambubalin lerérun Búngiu
(Lc 6.47-49; Mr 1.22)

²⁴ ‘Le agáambutina, adúgaleí le nubeíbei, ítara líña quei ában wügúri gunfaráandati le adúgübei lúban ligíbuagu dúbü. ²⁵ Ába liábingua júya, ába liñúrún dúna, fúgua garábali tuágun múna tugúya, meíguaduntu ladúga luáguñein lan dúbü tuágaburi. ²⁶ Ánjeinti le agáambutina, madúgün lumúti le nubeíbei, ában wügúri íbidiougua táu ligía, le ábunagubei ligíbuagu ságoun. ²⁷ Ába liábingua júya, iñúra dúna, fúgua garábali tuágun múna tugúya, jma lanárime táburujan!

²⁸ Dan lásurun ladímurejan Jesúsu, jma luweírin janígi gürígia láu le larúfudajabei! ²⁹ ladúga láu lan ubáfu larúfudaja, máma quei arúfudajatiña lilúrudun Moisés.

8

Lareídaguagüdüni Jesúsu ában gawáguti gumeín le mareídaguadibe
(Mr 1.40-45; Lc 5.12-16)

¹ Dan le larárirunbei Jesúsu lueígiñe wúbü, sarágu jáña gürígia afálaruti. ² Ába liábin ában wügúri gawáguti gumeín le mareídaguadibe, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguagüdüni.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía. ⁴ Ába laríñagun Jesúsu lun.

—Maríñaga beítia ni ca un, ñúdünrügübá arúfudagua búngua lun fádiri, rúbéme edéweejani le uágubei laríñaga Moisés, lun jaríjini gürígia luágu areídaguadibu lan.

Lareídaguagüdüni Jesúsu lumúsun ában gumándan Rómána
(Lc 7.1-10)

⁵ Dan le lebélorun Jesúsu lídoun fulásu le gíribei Capernaúm, ába liábin ában gumándan Rómána lubároun, ⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába laríñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madúnatina lun bebélurun núbiñoun, aríñagarügübeí dimúrei, ábame lareídagun numúsun. ⁹ Naríñagubaalin líra ladúga nugúya lábugiñeñadina gíñe gumádi le ínutimaati, áni añájein gíñe súdaara lábugiñe nagúmadijan. Dan le naríñagun lun ában jádaangiñe lun lídin, ñúdünti, dan le naríñagun lun ában lun liábin, ñúbinti, dan le naríñagun lun numúsun lun ladúgün furúmieguarügü cátei, adúga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Ninárün jáu luágu madárigidina lan wügúri weíri taffñen ni jádan numútuniña Israelítagu quei wügúri le. ¹¹ Naríñajare jun luágu sarágujaba lan já meja ibídiñejabubaña lun Búngiu ñúbintiña lueígiñe oúbaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu. ¹² Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírin-ágei lubúriga, ábame jayájuajan, ábame lacúnrinjan jári le luweírin jagárigu.

¹³ Ába laríñagun Jesúsu lun gumándan ligía.

—Beíba búbiñoun, le uágubei bafíñera, ladügúba bun.

Ába lareídagun músu ligía lídan óra ligía.

Lareídaguagüdünun Jesúsu límenidi Pédro

(Mr 1.29-31; Lc 4.38-39)

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü.

¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

Lareídaguagüdün Jesúsu sarágu sánditiña

(Mr 1.32-34; Lc 4.40-41)

¹⁶ Dan le lagúnedunbei, ába janúgün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jaweí láurügü ában dimúrei, areídaguagüda láña sun ja sándibaña. ¹⁷ Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barú lumuti wadébilin, gidálei wasándigu.”

Já yebe abúseerubaña jafálaruni Jesúsu

(Lc 9.57-62)

¹⁸ Dan le laríjin Jesúsu luágu sarágu jáña lan gürígia geyégu láu, ába líchugun dimúrei lun jájiñuragun ligía jáma láni disípulugu loubáfurugun dúna. ¹⁹ Ába layárafadun ában arúfudajati lilúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

²⁰ Ába loúnabuni Jesúsu.

—Darítiña gasígamu júyu lun jaganoún ñi, gádibutiña gíñe dunúru, ánjeinti áu le Wügúri Garaúwarügüti, madáritina ni jalába lan nabálachagüdei nichúgü.

²¹ Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen nóguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúejan Búngiu lun jábununiña jegéburi.

Lagálumaruni Jesúsu garábali lúma lugúdi barána
(Mr 4.35-41; Lc 8.22-25)

²³ Ába ladinun Jesúsu tídon ugúnein, ába jóúdin láni disípulugu lúma. ²⁴ Sódini ába láfuragun ában garábali jéreti, ába lebélujan lugúdi barána tídon ugúnein. Larúmuguñati Jesúsu. ²⁵ Ába jagágudajani láni disípulugu, ába jaríñagun lun.

—¡Wabúreme, séfu báwa! ¡Wadíbiragua!

²⁶ Ába loúnabuniña.

—¿Cásan uágu janúfudeda? ¡Lougua taffínen jugúya le!

Ába lásaarun, ába ladeínjan lun garábali lúma barána, ába lagálumadun. ²⁷ Ába laweíridun janígi, ába jaríñagun.

—¿Cáteisan wügúri le, agáamba lubálin garábali lúma barána?

Laságarun Jesúsu espíritugu wuríbatíña jádaangiñe bián wügúriña Gadárana
(Mr 5.1-20; Lc 8.26-39)

²⁸ Dan le lachúlürün Jesúsu loubáfurugu dúna, jageíroun Gadárana, ába jáfuridun bián wügúriña lídaangiñe buri umúajaiü achigíti luágu dúbü, ába jayábin luágun. Biángubei jagía, jáuñanu espíritugu wuríbatíña áni janárimetiti jagáñi darí lun siñá lan jáségürün gürígia lídaangiñe úma ligía. ²⁹ Ábati jagúarajan ítara.

—¿Cásan uágu bemétera wámoun, Jesúsu Liraú Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰ Níñanu sarágu büüruju eíga madíse ñígiñe, ³¹ ába jayúmuragun espíritugu wuríbatíña ja lun Jesúsu, jaríñaga lun.

—Ánjawa baságara, ígirabá lun webélurun jádoun büüruju ja.

³² Ába laríñagun Jesúsu joun.

—¡Jeíbatí jádoun!

Ába jáfuridun espíritugu wuríbatíña jagía jádaangiñe wügúriña jagía, ába jebélurun jádoun büüruju, ába jáguragun büüruju jagía jóúngua lueígiñe ában gudúungu, ába jáburujan dúnarugun, ába jañáradagun.

³³ Ába janúfudedagun ja ónigirubaliña büüruju, ába jeíbaagun, jachúlün aúdübü, ába jabájüdaguni le asúseredubei joun büüruju lúma joun wügúriña já buga jáubaña espíritugu wuríbatíña. ³⁴ Ábati jayábin sun lílana fulásu ligía lúmoun Jesúsu, ába jayúmuragun lun lun láfuridun jageíragiñe.

9

Lareídagua güdün Jesúsu ában wügúri derégüdaali
(Mr 2.1-12; Lc 5.17-26)

¹ Ábati ladinun Jesúsu tídon ugúnein tugúya, ába lánjiñuragun loubáfurugun dúna, ába lachúlürün lageíroun. ² Ába janúgün ában wügúri derégüdaali lun, roun tídan lubárari. Dan le laríjínbalin Jesúsu luweírín jaffínen, ába laríñagun lun sánditi ligía.

—Ragúba gurásu, niraú, ferúdunawati bifígoun.

³ Níñanutí jádaangiñe arúfudajatiña lilúrudun Moisés, aríñagutiña jóúnguarügü. “Lanábaguñeigan wügúri le Búngiu láu dimúrei le laríñagubei.” ⁴ Queíti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? ⁵ ¿Cátimasan ménreengúnbei laríñawagúniwa. “Ferúdunawati bifígoun”, ódi “Sarába, beíbuga”? ⁶ Narúfudaaliti jun luágu gabáfu nan, áu le Wügúri Garaúwarügüti, lun ferúduna nan figóu.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun. ⁸ Dan le jaríjinbaalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügúriña.

Lagúarun Jesúsu lun Matéo lun lánime disípulu

(Mr 2.13-17; Lc 5.27-32)

⁹ Ába lídin Jesúsu ñígiñe, ába laríjinina, áu le gíribei Matéo, le abúrújabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu ñígiñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰ Lárígiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gaffígountiña eíga lúma úara jáma láni disípulugu. ¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

—¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gaffígountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia.

¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdün anímaalu nun.” Máma niábiña áluajaña ja magádiebaña ligíbugiñe Búngiu, niábiña áluajaña gaffígountiña lun jasáansiruni ligáburi jóuserun.

Jálügüdüni Jesúsu libúgürü ayúnaruni

(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdejabei disípulugu, ába jaríñagun lun Jesúsu. —¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga. —¿Gayáraati funági jíruñu jamá ja amísurajoúbaña lídoun ában maríei dan le niján lan adári jáma ñi? Lachúlürüba wéyu lun lúadun adári jáma, ligíaalime jayúnarun.

¹⁶ ‘Siñáti táfadajoun gamísa ñulújaru táu murúsun to derégiru ladúga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíríti. ¹⁷ Siñáti gíñe léserúniwa bínu le isérigili lídoun guéru le binádujali, ánjein adügúwa ítara, ábame lafaúunchün guéru dánme le liñúrun bínu, féridiwa ligíameti guéru, féridiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraú Jáiro túma wúri to agúurubarun lanáangun Jesúsu

(Mr 5.21-43; Lc 8.40-56)

¹⁸ Dan ñíñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñúdüun lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu. ²⁰ Níñounti ában wúri úmada sánditu, dúusu irúmu táu láu lésejan jítaü tídaangiñe, ába tayárafadun lun Jesúsu lanáangiñe, ába tagúurun luágu táru lanáangun, ²¹ taríñaga túnguarügü. “Láurügü nagúurun tuágu lanáangun nareídaguba.” ²² Ába lagáragun Jesúsu, ába laríjinun, ába laríñagun tun.

—Ragúba gurásu niraú, areídaguaadibu ladúga baffínen.

Lúmagiñe óra ligía ába tareídagun.

²³ Dan le lachúlürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábunajani, añája gürígia areíncha, ²⁴ ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu. ²⁵ Dan le furígüda láaña sun güri-gia, ába lebé-lurun, ába lárügüdüni tújabu irájü tugúya, ába tásaarun. ²⁶ Ába labúruchagun luágu le asúseredubei lídan sun fulásu ligía.

Lareidaguagüdün Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügúriña maríjintiña lárigi, agúara-jeina ítara.

—¡Gudéme wamá bun, amúrü le ladúgawagun Davíd!

²⁸ Dan lebé-lurun Jesúsu múnadoun, ába jachúlürün maríjintiña jagía lúmoun, ába laríñagun joun.

—¿Affíñetün luágu gayára lan nareidaguagüdünün?

Ába jaríñagun.

—Ánja, affíñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburi jaffínen.

³⁰ Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹ Quei jáfuridun ñígiñe, ába jabájüdaguni le ladúgübei Jesúsu lídan sun fulásu geyégua láu.

Lareidaguagüdün Jesúsu ában meréngaditi

³² Dan le áfurideina jamá, ligía jayábin fiú güri-gia láu ában wügúri meréngaditi, gawáguti ában espíritu wuríbati, ába jayábin láu lun Jesúsu. ³³ Lárigiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi güri-gia, ába jaríñagun.

—Maríjiñajágidiwa líbe le jageíra Israelítagu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun güri-gia

³⁵ Eíbuga lumúti meja Jesúsu sun fulásu arúfudajeina tídan jalígilisin juríu, apúrichijei ugánu buíti luáguti arúeijani le lánina siélu, areidaguagüdeina sun luwúyeri sándi lúma gáriti. ³⁶ Dan laríjiniña güri-gia, ába jagúdemedagun lun, ladúga nidíjeri jamá, magúraasun jagía, camá mudún ja moúniritiña. ³⁷ Ába laríñagun joun láni disípulugu jabúgürü güri-gia jagía.

—Sarágu jáña güri-gia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni louguatiña ñadágimeintiña. ³⁸ Lúnti lubefti jamúriajan lúma Labúreme nádü lun loúnajan ñadágimeintiña lun japúrichijan joun.

10

Láni Jesúsu dúusu disípulugu

(Mr 3.13-19; Lc 6.12-16)

¹ Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatiña jaweí güri-gia lúma lun jareidaguagüdün sun luwúyeri sándi lúma gáriti. ² Niján jíri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³ Felípe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraú Álfeo, Lébeo, le méme gíribei Tadéo, ⁴ Simón—ában meja wügúri áfaaguti lun jawáanserun juríu, lúma Júdas Iscarióte, le alúgurubalin Jesúsu.

Loúnajaniña Jesúsu disípulugu apúrichija
(Mr 6.7-13; Lc 9.1-6)

⁵ Dan loúnajabaliña Jesúsu dúusu ja apúrichija, ába larínagun joun ítara.

—Mídin jumá le ní jamuti ja mámabaña juríu, mebélú jugúyame lídoun buri fulásu le lání Samária, ⁶ jabúgürülá gürígia féridijaña ja Israelítagu jídin. ⁷ Jeíba, apúrichijeina luágu yaráfaali lan larúeijan Búngiu. ⁸ Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹ Manúga jumá seínsu, ¹⁰ manúgün jugúyame lágei ni cáta. Ábanrügütá simísi janúga, manúgün jugúyame sabádu ni bádun, ladúga le ñadágimeinbei garíchatí lun leigin lídaangiñe luwádigimari.

¹¹ ‘Dánme le jachúlürün lídoun ában ubúruo o ában lan liraúraü fulásu, ábame jálugun gürígia ja ánjatiña lun jerésibirunün ní, ábame jeréderun jáma jábiñe darí jídin.

¹² Dánme jebélurun tídoun ában múna, ábame jabúsurun, ayúmuragueina magádiei jawágu tílana múna tugúya. ¹³ Ánjaün jerésibira tílana múna tugúya, ígira jumeí jabúsurun jáma, ánjaün merésibirun jamá, giríbugüda jumeí busúguauí ligía lun úa lan magádiei joun. ¹⁴ Ánjaüti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun jóungua. ¹⁵ Ninárün jáu luágu dánme lan le lachúlürün wéyu lánina agúseruni, weírítimaabei jasúfurirun lílana fulásu ligía sügú láu jasúfurirun lílana Sodóma lúma Gomórra.

Eíbaajóuni le lúnbei jasúfuriruni lání Jesúsu disípulugu

¹⁶ ‘Noúnajaadüntia quei mudún jagánaguóun anímaalu gáñitiña. Aráanseñu jumá lubeíti ítara quei jéwe, áni ítara jumá quei únjun madúgünga wuríbani. ¹⁷ Toúnigi jumá ladúga j juríu. ¹⁸ Janúgúwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámabaña juríu. ¹⁹ Dánme le jedéregerúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladúga dánme lachúlürün óra lun jadímurejan, líchugubei Búngiu le lúnbei jaríñaguni jun. ²⁰ Mámaba jugúya adímureja, lání Júguchi Búngiu Espíritu, ligíaba adímureja jídaangiñe.

²¹ ‘Jalúgurubaña wügúriña jabíriña guánarü lun jafarún jilágubei, alúgura jamáñame agúbürigu jasáanigu, garábagua jagíame isáanigu jawágun jagúbürigu lun jáfaragüdüniña. ²² Jeyéreegudúba lun sun ubouú nueígiñe, áni le derégüdaguati darí lúmoun lagúmuchun libágari, lebéloruba siélun. ²³ Dánme le jeíbaajóun lídan ában fulásu, ábame janúrajan lídoun ámu, ninárün jáu, niábinyaba, áu le Wügúri Garaúwarügüti, lubáragiñe jeíbuguni sún buri jabúrugute Israelítagu.

²⁴ ‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun. ²⁵ Lúnti gúndan lan disípulu láu lachúlürün ítarada quei lumáesturun, lúma músu quei liyúbudiri. Ánjein aríñawagúa lubeí nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa
(Lc 12.2-9)

²⁶ ‘Ligía manúfueda jumá lubeí jaweí gürígia,’ líña Jesúsu joun lání disípulugu lubáragiñe loúnajaniña apúrichija. ‘Úati cátei darúguati láu lun machúlaagunbei lan, úa ni cáta le arámudagúati lun masúbudirúnwabei lan. ²⁷ Le naríñagubei jun lídan lubúriga aríñaga jumeí lídan larúgouna, le naríñagubei jun ibídiñoun joun ámu, wágua jumeí íñugiñe tibíti múna. ²⁸ Manúfueda jumá jaweí ja gayáraabei jáfaruni úgubu jilágubei

áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

²⁹ ‘¿Malúgurúntiña funági bián jarájüñü dunúru luágu ában liraúraü seínsu? Áni máburujantu ni ában jádaangiñe múarugun ánjein mabúseerun lubeí Júguchi Búngiu. ³⁰ Ásta ídiburi le jábulugubei, abájüdúwati ában ában. ³¹ Manúfude jumá lubeíti, gebégitün sügú jáu dunúru.

Ja mayédagúnbaña láu Jesúsu jagíbugiñe güriña
(Lc 12.8-9)

³² ‘Sun ja arúfudagutiña jóungua jagíbugiñe güriña luágu númagiñeñánu lan, naríñaguba gíñe ligíbugiñe Núguchi Búngiu le siélubei luágu nánigu jamá. ³³ Ja ayédagutiña náu jagíbugiñe güriña, nayédaguba gíñe jáu ligíbugiñe Núguchi Búngiu le siélubei.

Le busénbei lun lafálaruni Jesúsu
(Lc 12.51-53, 14.26-27)

³⁴ ‘Marítagua jumátia luágu niábiña lan lúnrüğü níchugun gáluma ubouágu, máma niábiña íchiga gáluma, niábiña íchiga wuríbu. ³⁵ Láu niábin, jafánreinraguba ja maffínebaña nuágu jáma ja affínebaña nuágu, lawúribujaba wügúri lúma lúguchi, isáni túma túguchu, ídiñu túma tágürü, ³⁶ lagáganiraguba cáda ában jáma lidújeñu.

³⁷ ‘Le jínsiñejabuti lun lúguchi o lúguchu sügú láu nísíñe lun, madúna lumúti nánigu lan, le jínsiñejabuti joun lirájüñü sügú láu nísíñe lun, madúna lumúti gíñe nánigu lan. ³⁸ Le mawándunti asúfuriruni líbe lasúfurirúniwa luágu gurúwa lun lafálarunina, madúna lumúti nánigu lan. ³⁹ Le busénbei leséfuragun lúngua ya ubouágu leféridirubei ibágari le magúmuchadibei siélu, ánjein le ánjabei leféridiragun lúngua ya ubouágu nueígiñe, libíjubei ibágari magúmuchaditi siélu.

Ja lúnbaña jerésibiruni jafáyeiruaña lúmagiñe Búngiu
(Mr 9.41)

⁴⁰ ‘Le erésibirutün resíbi lumútina, le erésibirutina resíbi lumúti le oúnajabalina. ⁴¹ Le erésibiruti ában proféta ladúga liábin láu líri Búngiu, lerésibirubei afáyeiruaña le libíjubei ában proféta, le erésibiruti ában wügúri buíti ladúga lubuídun, lerésibirubei afáyeiruaña le lerésibirubei ában wügúri buíti. ⁴² Furúmiegurügü le íchuguti ában wéru dúna dilíti lun ában jádaangiñe únabugutiña ja ladúga nánigu jamá, libíjuba lafáyeiruaña lúmagiñe Búngiu.

11

Ja lounajabaña Juan le abásteragüdañabei adímureja lúma Jesúsu
(Lc 7.18-35)

¹ Dan le lásurunbei laríñaguni Jesúsu le lúnbei jadúgüni láni disípulugu, ába lídin ñígiñe lun larúfudajan, apúrichija ligíame lídan buri fulásu geyégua láu ubúru gu le Capernaúm.

² Dan ligía, furísunruguein Juan, ába lagáambun luágu sun le ladúgübei Crístu. ³ Ába lounajan biáma jádaangiñe láni disípulugu aríjei Jesúsu lun jálügüdüni ítara.

—¿Amúrü Crístubei le lúnbei liábin ódi lúnti wagúrabajan ámu?

⁴ Ába laríñagun Jesúsu joun.

—Jeíba jaríñageime le jaríjubei lúma le jagáambubei lun Juan. ⁵ Jabájüdagúame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoua luágu ugánu buíti le lánina asálbaruni joun gudémetiña. ⁶ Áni fuleíseiwati le meféridirunbalin lafíñen nuágu.

⁷ Dan le jóúdin, ába lagúmeserun Jesúsu adímureja joun gürrígia luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügúri le medéraaguagüdünti larítagnun queísi ában mabúru le lánjingichun garábali? ⁸ Ánjein máma lubeí líña, ¿cáti jídinbei aríja? ¿Ában wügúri wéndeti ladáüragun? Subúsi jun luágu ja lan wéndebaña adáüragun, tídaañanu lan jában urúeigu. ⁹ ¿Cáteiti jídinbei aríja? ¿Ában proféta? Ánja, ligía, áni ában wügúri weíriguti sügú láu ában proféta Juan. ¹⁰ Ligía le uágubei tariñaga Lerérun Búngiu.

Noúnajañein noúnagüle bubáragiñe,

lun laráansejani úma bubá.

¹¹ Ninárün jáu, jádan sun gürrígia, úagili ni ában weíriguti lueí Juan le abásteragü-dajabei, láu sun líra, le únabutimaabei lídan arúejani le siélubei weíritimaati lueí le anúgarügübalin ugánu luágu arúejani ligía.

¹² ‘Lúmagiñe dan le liábinbei Juan le abásteragü-dajabei darí lúmoun dan le, murúgu jáña gürrígia áluga jebélurun lídoun larúejan Búngiu. Ja ebélurubaña, ragú jamuti jabára ñi queísi ában cátei le gebégiti sarágu. ¹³ Lilúrudun Moisés jáma sun profétagu, adímurejatiñá meja luágu larúejan Búngiu, láu liábin Juan, ába lagúmeserun jerérun profétagu jagía luágu larúejan Búngiu agúnfulira. ¹⁴ Ánjeinti busén jubeí jafíñerun, Juan ligía proféta Elías lé meja lúnbei liábin lubáragiñe liábin arúejani ligía. ¹⁵ Ja garígeirugubaña lun jagáambun, agáamba jamá.

¹⁶ ‘¿Cábasan úma núaradaguágüdaña gürrígia ja lánina dan le? Magúndaatiña ni ca áu, ítara jáña quei irájüñü ja añúurubaña adíbirija mágidirugu, ába jagúarajan joun jíbiriugu ítara. ¹⁷ “Íñaajatiwa fídu jun, mabínajantün, erémuja wagía urému jírtu jun, mayájuntün.” ¹⁸ Ladúga liábin Juan meígin líña buídu quei leígin furúmieguarügü, mátun, ába jaríñagun luágu níjein lan espíritu wuríbati lídan. ¹⁹ Lárigiñe, ába niábin, áu le Wügúri Garaúwarügüti, jou áu quei leígin furúmieguarügü, gurá, ába jaríñagun luágu geígadi nan, gátadi, jamáda áu gafígountiña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Lílana buri fulásu ja magáambadibaña
(Lc 10.13-15)

²⁰ Ábati lagúmeserun Jesúsu adeínja joun gürrígia lídan fulásu buri le ñi lubeí meja ladúgei líbe-ágei láni miláguru, ladúga masáansirun jamágili lan jóuserun. Ába laríñagun.

²¹ —¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúruugu le gírubei Tíro lúma Sidón ladúgüwa miláguru buri le adügübei jagánagua, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi. ²² Naríñajare jun luágu dánme lan lachúlürün wéyu lánina agúseraguni, weíritimaabei jabeichún sügú jáu ja Tírobaña jáma ja Sidónbaña. ²³ Amúrüti ubúruugu le Capernaúm, ¿jarítaguatibu luágu weírigubadibu lan queísi siélu? Maweírigúnbadibu ítara quei maweírigun lan máfiougati. Ladúga lun jamúga lídan lan ubúruugu Sodóma ladúgüwa miláguru le adügübei bídan, níjeingua jamúga fulásu ligía lúmoun dan le. ²⁴ Naríñajare jun luágu lídan lánme wéyu lánina agúseraguni, weíritimaabei jabeichún sügú jáu Sodómana.

Jigoúgu lun Jesúsu, eméraagua jumámuga
(Lc 10.21-22)

²⁵ Lídan dan ligía, ába laríñagun Jesúsu lun Búngiu.

—Adímurejatina buíti buágu, Núguchi le Labúremebei siélu lúma ubouú, ladúga barámuduni buri cátei le jaweí chu táu jáma gunfaráandatiña, ába barúfuduni joun

ja mafúnrendeirungiñabaña queísi irájüñü. ²⁶ Ánja, Núguchi, ladúga ítara líña lan babúseeruni.

²⁷ ‘Derége láali Núguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni. ²⁸ Jigoúgu númoun, sun jugúya ja bucháañabaña uágu lárige juwádigimari lúma lijúrú janúgün, eméraaguagüda námugaün. ²⁹ Resíbi jumeí narúfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraaguni tun juwáni. ³⁰ Ménreengunti lun jesériwidun nun, juáliti gíñe anúgüni le níchugubei jun lun janúgüni.

12

Játünjan disípulugu türígu lídan wéyu le eméraaguagülei (Mr 2.23-28; Lc 6.1-5)

¹ Luágu ában wéyu le eméraaguagülei eíbugeina líña Jesúsu jáma láni disípulugu labádinagua nádü. Ába jalámachun láni disípulugu, ába játünjan lílewe türígu, ába jeígini líla. ² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adúga wadágimanu le moún lumuti ladügün lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei Davíd luágu ában dan, dan le lálámachunbei, ligía jáma ja úarabaña lúma? ⁴ Ába lebélorun tídoun lúban Búngiu, ába leígin tídaangiñe fein to sagraúboun to moun luboún yebe leíginun, ni ligía ni ja úarabaña lúma, fádirigu rügüñanu lun jeíginun fein tugúya según lilúrudun Moisés, áni mámati figoú le ladügübei Davíd ligíbugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádirigu tídan lúban Búngiu lídan wéyu le eméraaguagülei áni máma figoú? ⁶ Naríñajare jun luágu níjein lan ában weíriguti sügú táu lúban Búngiu ya, áu. ⁷ Jugúya, úagili gunfaráanda jumáni le laríñagubei Búngiu tídan Lerérun. “Jímein numúti lun gudémejabu jumá sügú láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbatí jawágu gürígia ja madügünbaña ni cáta wuríbatí. ⁸ Gabáfutina gíñe, áu le Wügúri Garaúwarügüti, lun naríñagun cába lan gayára ladügüniwa lídan wéyu le eméraaguagülei.

Wügúri le jiláalibei ában lújabu (Mr 3.1-6; Lc 6.6-11)

⁹ Ába lídin Jesúsu ñígiñe, ába lebélorun tídoun jalígilisin juríu. ¹⁰ Ñíñein ában wügúri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijoún lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galúgün lubeí ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun? ¹² ¿Ma gebégitimaati ában wügúri sügú táu ában mudún! Gayáraati lubeíti ladügün buíti lídan wéyu le eméraaguagülei.

¹³ Ába laríñagun lun wügúri ligía.

—Tulébei bújabu.

Dan le látuleruni, ába lareídagun quei le ában. ¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jílagubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu güriña, ába lareídaguagüdüniña sun sánditiña. ¹⁶ Ábaja laríñagun joun lun maríñagun jamáni cáteiñein lan. ¹⁷ Lasúseredunbei líra lun lagúnfulirun lé meja laríñagubei proféta Isaías. ¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu, ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun, mareínjabei úmada.

²⁰ Gudémebabubei joun güriña ja gudémebaña queísi ában mabúru le barúguaali, lúma joun ja débilibaña lídan jafíñen queísi ában lámpu le ñegúmemeeli.

Ítara méme lúba daríme adúga láali larúeijan le úraguabei.

²¹ Ábame jíchuguni ja mámabaña juríu jeménigi luágu.

Laríñawagún luágu lubáfu lan Máfia lúmabei Jesúsu

(Mr 3.19-30; Lc 11.14-23, 12.10)

²² Ábati lanúgúniwa ában wügúri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía. ²³ Ába laweíridun janígi sun ja ñíbaña, ába jaríñagun.

—¿Niján funásan ladúgawagunbei Davíd?

²⁴ Dan le jagáambunbalin fariséogu cátei le, ába jaríñagun.

—Wügúri le, láu lubáfu Beelzebú, le Máfia, le jábuti espíritugu wuríbatiña laságajaña.

²⁵ Quei subúdi láani Jesúsu le jarítagubei, ába laríñagun joun.

—Furúmieguaarügü arúeijan le afánreinraguti lun jageíndagun jámagua, lagúnrinchaguba, ánjaña gíñe afáreinragua lílana ában ubúru o ában lan famíliá ladúga wuríbu, siñábei jadúraran. ²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrarun lubáfu ítara? ²⁷ Jugúya, aríñagatün luágu láu lan lubáfu Beelzebú, o Máfia, naságaja espíritugu wuríbatiña, ánjein ítara líña lubei, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá. ²⁸ Áu, láu lubáfu láni Búngiu Espíritu naságaja espíritugu wuríbatiña. Arúfuda lumúti líra luágu chülújali lan larúeijan Búngiu jídoun.

²⁹ ‘¿Ída lubági gayára lan lebélorun ában güriña lúbiñoun ában wügúri jéreti lun lanúgüni lílagu ánjein magúragun lan furúmiñe? Ítara rügúñein lun gayára lan lanúgüni lílagu.

³⁰ ‘Le mámabei númagiñe, náganiñein, le míderagun lumútina, güriñgua lumúti le nadúgübei.

³¹ ‘Jugúya aríñagatün luágu láu lan lubáfu Máfia naságaja espíritugu wuríbatiña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdunawa lan sun figou lúma sun wuríbati le jaríñagubei güriña, ánjein lun jadímurejan wuríbati luágu Sífiri Sándu, siñábei ferúdunawa lan figou líra. ³² Furúmieguaarügü gíñe le aríñaguti furúmieguaarügü cátei wuríbati nuágu, áu le Wügúri Garaúwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdunawa lan ni lídan ubou le, ni lídan le ában.

Luágu lin ídibu lasúbudirúa ca lan luwúyeribe

(Lc 6.43-45)

³³ ‘Ánjein buídu lubei ídibu, buídubei gíñe lin, ánjein mabuídun lubei ídibu, mabuídunbei gíñe lin. Luágu lin ídibu lasúbudirúa ca lan luwúyeribe. ³⁴ ¡Jarásan jéwe jugúya le! Siñáti jadímurejan cátei buíti, wuríbatüngan. Cátei le buínbei tídan anígi, ligía laríñagubei iyúmaü. ³⁵ Wügúri le buídubei, cátei buíti laríñagubei ladúga tídaañein lan

lanígi ubuíduni, wügúri le wuríbabei, cátei wuríbati laríñagubei ladúga tídaañein lanígi wuríbani. ³⁶ Naríñajare jun luágu dánme lan lachúlürün luwéyuri agúseruni, sun gürígia geféenbaña luágu sun dimúrei málati le jaríñagubei, ³⁷ ladúga luáguba le baríñagubei bagúseragüdúwa, ligíaba arúfudei ánjein gadúnrun bubeí lúmoun madúnrun ban.

Jamúriajan gürígia wuríbatiña seíni láuti miláguru
(Mr 8.12; Lc 11.29-32)

³⁸ Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.
—Maésturu, buséntiwa waríjin badúgün ában seíni le láuti miláguru luágu lúmagiñe lan Búngiu biábin.

³⁹ Ába laríñagun Jesúsu joun.

—Gürígia wuríbatiña áni magúnfuliruntiña amúriajatiña seíni láuti miláguru, míchugúnbei ámu seíni joun lueí le asúseredubei lun proféta Jonás. ⁴⁰ Ladúga queí leréderun Jonás úruwa wéyu úruwa áriebe lurágeirugu údu, ítara lúba gíñe neréderun, áu le Wügúri Garaúwarügüti, lídan numúaja úruwa wéyu, úruwa áriebe, según ligáburu jabájüdüni juríu dan. ⁴¹ Já meja aganoúbaña Nínive jásaaruba lídan luwéyuri agúseruni dánme jagúseragüdúniwa gürígia ja lánina dan le, ábame jíchugun jadúnrun ladúga sáansiguati jagáburu Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügú láu Jonás, áni májatün jagáambunina. ⁴² Tásaaruba gíñe lurúeitena Súru lídan luwéyuri agúseruni dánme le jagúseragüdúniwa gürígia ja lánina dan le, ábame tíchugun jadúnrun, ladúga ñúbintu lídaangiñe lidíse-ágei ubou lun tagáambuni lichú láu Salomón, áni anája áu, ában weíriguti sügú láu Salomón, áni májatün jagáambunina.

Espíritu wuríbati le agíribuduti
(Lc 11.24-26)

⁴³ “Dan le láfuridun ában espíritu wuríbati lídaangiñe ában gürígia, ába ebugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíribuda tídoun núban to ñígiñe lubeí náfurida.” Dan le lagíribudun, ába ladáriruni gürígia buga ligía queísi ában múna to málatu, abuídajouáaru, aráanserúa. ⁴⁵ Ábati lídin, ába liábin jáu sédü espíritugu wuríbatimaatiña sügú láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügú láu meja furúmiñe. Ítara lúba giñéti lasúseredun joun gürígia wuríbatiña ja lánina dan le.

Lúguchu Jesúsu jáma lamúlen
(Mr 3.31-35; Lc 8.19-21)

⁴⁶ Nígili Jesúsu adímureja joun gürígia, ligía tiábin lúguchu jáu lamúlen. Ába jeréderun bougudi, buséntiña yébe jadímurejan lúma. ⁴⁷ Ába laríñawagún lun Jesúsu.
—Nuján búguchu jáma bamúlen ya bougudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹ Ába larúfudun jawágun láni disípulugu, ába laríñagun.

—Añaja nóguchubaña, jagía gíñe namúlenubaña, ⁵⁰ ladúga furúmieguarügü le adúgüti lugúndan Nóguchi le siélubei, ligía namúlenbei, nítu, nóguchu.

Jémpulu luáguti ábunaguti
(Mr 4.1-9; Lc 8.4-8)

¹ Wéyu ligía, ába láfuridun Jesúsu múnadagiñe, ába lañúurun láru dúna. ² Queí jagíbedagun gürígia le ní lubei, ába ládinun tídoun ában ugúnein, ába lañúurun, ába

jeréderun sun gürígia láru dúna. ³ Ába larúfudajan sarágu cátei joun láu jémpulu, ába laríñagun.

—Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburojan lídaangiñe luágun úma, ába jayábin dunúru, ába jeígini. ⁵ Líbiri, ába láburojan labádinaguouún dúbü le ní lumuti úa lan sarágu múa, ába labouúchun furése ladúga majúlilin lan múa. ⁶ Dan le lásüdün wéyu, ába lásaurün queíti málagüle lan, ába louñwen. ⁷ Líbiri ílaü, ába láburojan labádinaguouún jíyu, ába laweínamudun jíyu úara lúma, ába láfaruni. ⁸ Ñíñein lídaangiñe, áburujati lídoun múa buíti, alúbajouáti buídu, níjein lídaangiñe, íchuguti san águu luágu cáda ában águu, líbiri rúti úrüwa-wein, líbiri daráandi. ⁹ Jugúya le garígeirugubei lun jagáambun, agáamba jumána.

*Ca lan laníchigubei jémpulu le
(Mr 4.10-12; Lc 8.9-10)*

¹⁰ Ábati jayábin disípulugu, ába jaríñagun lun Jesúsu.

—¿Cásan uágu badímureja joun gürígia láu jémpulu?

¹¹ Ába laríñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni. ¹² Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí. ¹³ Ligía nadímurejanbei joun láu jémpulu ladúga aríja jamáni le nadúgübei, ába jeréderun camá maríjintiña, agáamba jameí le naríñagubei, ába jeréderun úaga gunfaráanda jamá camá jamuga magáambuntiña. ¹⁴ Jawágu lagúnfulira lé meja laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá, jaríjuba, ibídiñebei jun ca lan lílabei le jaríjubei,

¹⁵ ladúga deréeru janígi,

wuríbaaliti jagáambun,

murúñu líña jágu,

lun maríjin jumá láu,

magáambun láu jarígeirugu,

úa gunfaráanda jumá táu janígi,

magáararagun jugúyame nun lun nareídaguagüdünün.

¹⁶ ‘Ánjeinti jugúya le nánigubei, fuleíseiwatün ladúga aríjatün láu jágu, agáamba jugúya láu jarígeirugu. ¹⁷ Ninárün jáu, sarágu jañá meja profétagu jáma ámu gürígia gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

*Lafúnraanguagüdüni Jesúsu jémpulu luágu ábunaguti
(Mr 4.13-20; Lc 8.11-15)*

¹⁸ ‘Agáamba jumeíti le lílabei jémpulu luágu ábunaguti. ¹⁹ Ja agáambubalin ugánu luágu arúeijani le lánina siélu áni úati gunfaráanda jamáni, ítara jáña quei úma le ídounbei láburoja lídaangiñe líla nádü, ába liábin Máfia, ába laságaruni ugánu buíti le ábunúbei tídaangiñe janígi. ²⁰ Dúbü le ñíjin lubeí láburoja ílaü, ítara líña quei gürígia ja agáambubalin ugánu, ába jerésibiruni láu ugúndani, ²¹ quei márügüdün lubeí buídu tídan janígi, madúrati jádan. Dánti le lachúlürün dan lun jóuchawagún lúma jeíbaajoún lueígiñe ugánu ligía, ába leíguadun jarúna. ²² Jíyu le ñíjin lubeí láburoja ílaü, ítara líña quei gürígia ja agáambubalin ugánu, weíritimaati jafúudun luágu cátei le lánina ibágari le, ába leyéeduniña irisini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía. ²³ Múa buíti le ñíjin lubeí láburoja ílaü, ítara líña quei gürígia ja agáambubalin ugánu, ába gunfaráanda jamáni, ába jíchugun ában alúbajouáni

buíti. Añájein, ítara jáña quei ílaü le íchugubei san águu luágu ában, jíbiri quei le íchugubei úruwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴ Ábaya líchuguni Jesúsu jémpulu le joun.

—Arúejani le lánina siélu, ítara líña quei ában wügúri le ábunagubei ílaü buíti lídan lufúlasun, ²⁵ dan añája lan sun ja ñíbaña arúmuga, ába lebélorun ában lágani labúreme fulásu ligía, ába lábunun jíduru wuríbati labádinagua türígu, ába lídin. ²⁶ Dan le laweínamudun türígu ába legélewejan, ába gíñe lachúlaagun jíduru wuríbati. ²⁷ Ába jóudin músu, ába jaríñagun lun jayúbudiri. “Wayúbudiri, ánjein buídu lubeí ílaü le bábunagubei bumúanrugu, ¿jalíagiñésan lasálira jíduru wuríbati le?” ²⁸ Ába laríñagun iyúbudiri joun. “Ladúga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?” ²⁹ Ába laríñagun joun. “Uá, ladúga dánme jájulajani jíduru wuríbati, julá jíñein lin gíñe türígu úara lúma. ³⁰ Ígiragubei jumeí lun laweínamudun úara daríme lidáani alúbajani, ábame naríñagun joun ñadágimeintiña lun jájulajani jíduru wuríbati furúmiñe, ábame jagúraguni lun lágudúniwa, lárigiñeme, ábame jareíduni türígu tídan lágei.”

Jémpulu luáguti tíla mostása

(Mr 4.30-32; Lc 13.18-19)

³¹ Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügúri lufúlasunrugu. ³² Tíla mostása, ligía ílaü ñúraütimaabei lídaangiñe sun ílaü, áni dan labouúchun, ligía weíritimaabei lídaangiñe sun nádü, ába liábin lun ábanbei lan wéwe weíriri darí lun jayábin dunúru adúga jádibu luágu lílímun.

Jémpulu luáguti ísi

(Lc 13.20-21)

³³ Rúlumuti gíñe jémpulu le joun.

—Ítara líña arúejani le lánina siélu quei ísi le tagúbudubei ában wúri tídan úruwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr 4.33-34)

³⁴ Láu jémpulu laríñagei Jesúsu sun cátei le joun güri-gia, maríñagunti ni cáta joun mayúsurunga jémpulu. ³⁵ Sun cátei le, lun lagúnfulirun le laríñagubei meja Búngiu liyúmulugugiñe proféta.

Nadímurejaba láu jémpulu jun,

nafúnraanguagüdübei cátei lé buri meja arámudaguabei jun lúmagiñe nadúgüni ubou.

Lafúnraanguagüdüni Jesúsu jémpulu le luáguti jíduru wuríbati labádinagua türígu

³⁶ Ába louñajaniña Jesúsu güri-gia jábiñoun, ába lebélorun múnadoun, ába jayábin lání disípulugu, ába jaríñagun lun.

—Furáanguagüdübei jémpulu le luáguti jíduru wuríbati woun.

³⁷ Ába laríñagun Jesúsu joun.

—Áu le Wügúri Garaúwarügüti, áu le ábunagubalin ílaü buíti, ³⁸ múa, ligía uboubei, ílaü buíti, jagía güri-gia ja lílana larúejan Búngiu, jíduru wuríbati, jagía güri-gia ja lánigu Máfia, ³⁹ áganiti le ábunubalin jíduru wuríbati, Máfia méme, alúbajani, ligía lagúmuchunbei ubou, ja alúbajabaña, ánjeligu. ⁴⁰ Ítara quei labúdajouniwa jíduru wuríbati ába lágurún wáturugun lun lágudun, ítara lúba gíñe lasúseredun dánme lagúmuchun ubou, ⁴¹ áu le Wügúri Garaúwarügüti, nouñajabaña nání ánjeligu aságaraña sun ja afígoungüdübaña ámu, jáma ja adúgübaña wuríbati, lídaangiñe narúejan, ⁴² ábame jácharaguniña lídoun

wátu geméti lánina máfiougati. Ábame jayájuaan ñi, ábame lacúnrinjan jári. ⁴³ Jámeti adúgübalin le lubeíbei Búngiu, ábame jámiridun quei wéyu lídan larúeijan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

⁴⁴ ‘Ítara líña arúeijani le lánina siélu quei irísini le arámudúañubei lábugiñe múa. Ladárierei ában wügúri irísini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérla le weírubei ebégi

⁴⁵ ‘Ítara líña arúeijani le lánina siélu quei ában alúgurajati le eíbugañajabei áluaja pérla fínuti, ⁴⁶ dánti ladárirun ában le weíruti lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

⁴⁷ ‘Ítara líña gíñe arúeijani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸ Dan tabuínchun, ába jacháwarunun esénijatiña lárún béya, ába jañúurun ñi anúadajaña úduraü, ába jareíduniña ja buídubaña, ába jachágaruniña ja wuríbabaña. ⁴⁹ Ítara lúba dánme lagúmuchun ubouú, jayábiba ánjeligu lun jafánreinruniña ja buídubaña jádaangiñe ja wuríbabaña. ⁵⁰ Ábame jádaruniña ja wuríbabaña lídoun wátu geméti lánina máfiougati, ñíba lubeí jayájuaaja, acúnrijame jári.

Irísini buri iséri lúma binádu

⁵¹ Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúeijani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísini lun líchuguni joun tílana lúban dan le jemégeiruni, queígubeirügü, gayáraati larúfudajan joun güriñe luágu lilúrudun Moisés lúma gíñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr 6.1-6; Lc 4.16-30)

⁵³ Dan lagúmuchunbei líchuguni Jesúsu jémpulu buri le, ába lídin ñígiñe, ⁵⁴ ába lachúlürün lageíroun. Ába lagúmeserun arúfudaja tídan jalígilisin juríu to lídaanboun fulásu ligía, ába laweíridun janígi güriñe, ába jaríñagun.

—¿Jalíasan lafúnrendeirei wügúri le sun lichú áu le? ¿Ída liñásan gayára láani miláguru buri le adúga? ⁵⁵ Liraúga saráfangei le, María lúguchuboun, líbugaña Jacóbo, José, Simón lúma Júdas, ⁵⁶ ya gíñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsu joun.

—Sun güriñe jínsiñeti ában proféta joun, mámarügaali ligía lídaangiñeti fulásu le ñí jabeí o tílana lan jában.

⁵⁸ Madúgüntiti sarágu miláguru ñi ladúga mafíñen jamá luágu.

Loúnwen Juan le abásteragüdjabei

(Mr 6.14-29; Lc 9.7-9)

—Juan le abásteragüdajabei le, sará jádaangiñe jiláaña, ligía gabáfu lubeí lun ladáagun miláguru.

³ Lé meja suséelibeí, daulumuti meja Heródes Juan, ába lagúraguágüdüni láu güríngüri tueígiñe Heródias tó meja lúmari Felípe, le lamúlen. ⁴ Aríñagaalí meja Juan lun Heródes luágu moun láni lagámaridunun lúmari lamúlen, madúgünti Heródes gásu láu.

⁵ Busénti yebéti Heródes láfaruni Juan jilágubeí, ladúga lanúfude jaweí gürígia, madúgun lumúti ladúga sun lan gürígia afñetiña luágu proféta lan Juan. ⁶ Dánti le efédujani luágu lagúnfulirun Heródes irúmu, ába tíabin tiraú Heródias, ába tabínajan jagíbugiñe amísurajoútiña, léti línsiñe tabínajan lun Heródes, ⁷ ába laríñagun tun láu fiñún luágu líchugubeí lan furúmieguarügü cátei le tamúriajan luma tun. ⁸ Ábati taríñagun tóguchu tun lun tamúriajani lóbulugu Juan le abáste jilágubeí, ladúga, lun jíchuguni tun lídan ában asíedu, ába tamúriajani luma ítara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jameí amísurajoútiña, ába laríñagun lun líchugúniwa tun. ¹⁰ Ábati laríñagun lun ladúrürúniwa lóbulugu Juan furísunrugu, ¹¹ ába janúgüni lídan ában asíedu, ába líchugúniwa tun irájü tugúya, ába tíchuguni tun tóguchu.

¹² Ábati jayábin l-íñagun tun láu fiñún luágu lanigu Juan, ába janúgüni lógubu, ába jábununi, lárigiñe, ába jóúdin awísarei Jesúsü.

Líchugun Jesúsü eíginí joun seíngü mílu wügúriña
(Mr 6.30-44; Lc 9.10-17; Jn 6.1-14)

¹³ Dan lagáambuni Jesúsü cátei le, ába lídin ñígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni gürígia, ába jáfuridun lídaangiñe buri aúdü, ába jóúdin lárigi, eíbu. ¹⁴ Dan larárirun Jesúsü tídaangiñe ugúnein, ába laríjin luágu sarágu jaña lan gürígia jagía, ába jagúdemedagun lun, ába lareídaguagüdüniña ja sándibaña jádan. ¹⁵ Queíti agúñedeinaali lubeí, ába jaríñagun láni Jesúsü disípulugu lun.

—Dárüjalitia áni úatiña gürígia aganoútiña lídan fulásu le. Oúnaja báña gürígia ja, ñúdün jamámuga lídoun buri lirájüñü fulásu yaráfa agáñija eíginí lun jeígin.

¹⁶ Ába laríñagun Jesúsü joun.

—Mídinbaña, rújuma eíginí joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsü joun.

—Barújumoun nun ñájoun.

¹⁹ Ába laríñagun joun gürígia lun jañúurun luágu jíduru. Ába lanúgünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsü tídaangiñe ugúneidisípulugu, ába jafánreinjanun jádan gürígia. ²⁰ Sun jagía joútiña quimúle, lárigiñe, ába jabuínchagüdün dúusu faníñe táu to ígiragutu. ²¹ Seíngüñanu mílu wügúriña eígitíña, mabájüdünga würiña jáma irájüñü.

Leíbugun Jesúsü ligíbuagu dúna
(Mr 6.45-52; Jn 6.16-21)

²² Ába loúnajaniña Jesúsü láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña gürígia águyu. ²³ Lásun loúnajaniña, ába laweínrun lóbugua luágun wúbü ayúmuragua lun Búngiu. Dan le lagúñedunbei, ñíñein Jesúsü lóbugua, ²⁴ sun núnguran tan ugúnein lamídan dúna. Ába láfarajan lugúdi barána tuágu ugúnein ladúga tubárouñein lan garábali. ²⁵ Ába líabin Jesúsü jawágun lubá larúgan,

eíbuageina ligíbuagu dúna. ²⁶ Dan jaríjini láni disípulugu eíbuageina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

²⁷ Ába ladímurejan Jesúsu joun, ába laríñagun joun.

—¡Ragújuma anígi, áu le, manúfudeda jumá!

²⁸ Ába laríñagun Pédro lun.

—Nabúreme, ánjein amúrü lubeí, eíbugagüda bána gíñe ligíbuagu dúna chülú le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna. ³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügüdüni Jesúsu lújabu, ába laríñagun lun.

—¡Louguati gíñe bafíñen! ¿Ca uágu lalouguada bafíñen?

³² Dan jádinun tídoun ugúnein, ába lagálumadun garábali. ³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraú ban Búngiu.

*Lareídaguagüdüniña Jesúsu sánditiña Genésaret
(Mr 6.53-56)*

³⁴ Ába jánjiñuraguni dúna, ába jachúlürün Genésaret. ³⁵ Dan le jíchugunbei lílana fulásu fe luágu Jesúsu lan, ába jabúruchaguagüdüni lídan sun fulásu ligía, ába janügüniña sun sánditiña le ñíjin lubeí. ³⁶ Ába jayúmuragun lun lun lígirun lúnrügu jagúuruni táru lanáangun, sun ja agúurubarun, areídaguátiña.

15

*Cátei le marúmadagüdünbaliña güriquia ligíbugiñe Búngiu
(Mr 7.1-23)*

¹ Ába jayábin fiú fariséogu jáma arúfudajatiña lilúrudun Moisés, ñúbintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti gíñe jájalachagunbalin lerérun Búngiu lun jafálaruni binádu jigáburi?

⁴ Laríñajare Búngiu. “Inébe jamá bagúbürigu bun, le anábagubaliña lagúbürigu, jilála.”

⁵ Ánjeinti jugúya, aríñagatün luágu gayára lan laríñagun ában güriquia lun lúguchi o tun lúguchu. “Siñáti níderagunibu ladúga sun le nómabei, aríñagaadina luágu lun lan níchuguni lun Búngiu”, ⁶ luágu furúmieguarügü lan le aríñaguti ítara, mámaali lan lúnti líderaguniña lagúbürigu. Láu líra mebégigüda jumáli lagúmadijan Búngiu lun jafálaruni binádu jigáburi. ⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárurügü güriquia ja jíchiga inébesi nun, líña Búngiu, ánjein tídan janígi, mebéresentiña náu.

⁹ Málati jájuduragun nun,

ladúga le rügúñein jagúmadijan wügúriña jarúfudaja.

¹⁰ Ábati lagúarun joun güriquia, ába laríñagun joun.

—Agáamba jumá, gunfaráanda jugúyame. ¹¹ Máma eǵini le leǵubei gürígia adúgübalin lun marúman lan ligíbugiñe Búngiu, dimúrei wuríbatí le laríñagubei wügúri, ligía adúgübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburujan dimúrei le baríñagubei joun fariséogu?

¹³ Ába laríñagun joun.

—Furúmiegurügü nádü to máma lábunun Núguchi Búngiu le siélubei, lájulúba láu sun lílagüle. ¹⁴ Ígira jumáña, maríjintiña ja adúndejetiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangugüdabeí jémpulu le woun.

¹⁶ Ába laríñagun Jesúsu.

—¿Úati gíñe gunfaráanda jumá? ¹⁷ ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸ Ánjein dimúrei le áfuridubei lídaangiñe iyúmaü, tídaangiñe anígi liábin, ligíati adúgübalin wügúri lun marúman lan ligíbugiñe Búngiu, ¹⁹ ladúga tídaangiñe anígi láfurida samínaü wuríbatí, áfarajani, adultériu, salúfuri, íweru, iyéeni, marásualugu. ²⁰ Ligía buri cátei le adúgübalin wügúri lun marúman lan, ánjeinti leigíniwa machibúnga újabu según jagáburi juríu marúmadagüdün lumúti ligíbugiñe Búngiu.

Ában wúri teréncha to afíñeruboun luágu Jesúsu

(Mr 7.24-30)

²¹ Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón. ²² Ñíñoun ában wúri jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladúgawagun Davíd, gudémená bun! Níjein ában espíritu wuríbatí tuágu nisáani, weírítí tasúfurirun lurúma.

²³ Moúnabun lumútu Jesúsu. Ábati jayábin disípulugu, ába jayúmragun lun, ába jaríñagun.

—Adúgabeí le tamúriajabei búma, ladúga nuteíntia agúarajeina wárigi.

²⁴ Ába laríñagun Jesúsu.

—Joun rügúñein gürígia féridijaña ja Israelítagu loúnajana Búngiu lun níderaguniña.

²⁵ Ába tiábin wúri tugúya, ába tájuduragun ligíbugiñe, ába taríñagun.

—¡Nabúreme, íderagua bána!

²⁶ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

²⁷ Ába taríñagun.

—Ánja, Nabúreme, láu sun líra, gayáraati jeíginí oúnli ífei le áburujati lueígiñe jadábulan jabúriña.

²⁸ Ábati laríñagun Jesúsu tun.

—Wúri, ¡weírítí gíñe bafíñen! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdün Jesúsu sarágu sánditiña

²⁹ Ába láfuridun Jesúsu ñígiñe, ába lachúlürün lárún dúna Galiléa, lárigiñe, ába laweínrun luágun ában wúbü, ába lañúurun ñi. ³⁰ Ába jayábin sarágu gürígia le ñíjin lubeí barúina jagía meíbuguntiña, maríjintiña, maríñaguntiña, danímaati jarúna, jáma sarágu

jawúyeri sánditiña. Ába jíchuguniña lubádu lugúdi Jesúsu, ába lareídaguagüdüniña.
³¹ Ába laweíridun janígi güri-gia láu jaríjin adímurejaña jamá já meja maríñagadibaña, areídagua ja danímaabaña arúna, eíbuga ja meíbuguñajabaña, aríja ja maríjiñajabaña. Ába jagúmeserun adímureja weírigu luágu Jabúngiute Israelítagu.

Líchugun Jesúsu eíginí joun gádürü mílu wügüríña
 (Mr 8.1-10)

³² Ábati lagúarun Jesúsu joun láni disípulugu, ába laríñagun joun.

—Gudémetiña güri-gia ja nun ladúga úruwaali wéyu jáu núma ya áni úaali ni cáta jáma lun jeígin. Mabúseeruntina nouñajaniña jábiñoun meíginga, dagá líñein falálaü jawágu úmada.

³³ Ábati jaríñagun láni disípulugu lun.

—¿Ída lubáti wadárirun eíginí joun sarágu güri-gia ya lídan fulásu le ñí lumuti úa jamá aganóutiña?

³⁴ Ába lálügüdüniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

³⁵ Ába laríñagun joun güri-gia lun jañúurun múarugu, ³⁶ ába lanúgünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun güri-gia. ³⁷ Joutiña súngubei quimúle, buíngüda gíñe sédü faníñe táu to ígiraguboun. ³⁸ ¿Gádürüñanu mílu wügüríña eígitíña, mabájüdünga würíña jáma irájüñü! ³⁹ Lári-giñe, ába loúnajaniña Jesúsu güri-gia águyu, ába ladinun tídoun ugúnein, ába lídin louábawagun Mágdala.

16

Jamúriajan fariséogu jáma saduséogu ában seíni le láuti miláguru
 (Mr 8.11-13; Lc 12.54-56)

¹ Ába jóudin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, affíñe jamámuga luágu lúmagiñe lan Búngiu liábin. ² Ába laríñagun joun.

—Rábounwéyu, ába jaríñagun. “Buídubei dan ladúga funáti siélu.” ³ Bináafin, ába jaríñagun. “Wuríbabei dan ugúñe ladúga funáñu líña siélu áni jamúñounga.” ¿Biángua tigíbu jugúya le! Subúdiiti luáguti ligáburi dan jun, áni ibídiñeti jun luágu chúlújali lan lidáni asálbaruni. ⁴ Güri-gia wuríbatíña, múaraantiña ja, amúriajatiña seíni láuti miláguru lun jafíñerun luágu áu lan anúgübei asálbaruni joun güri-gia. Wel, marúfudúnbei ámu seíni joun lueí liseíni Jonás.

Ába lígiruniña, ába lídin.

Ítara líña jarúfudajan fariséogu quei ísi
 (Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulfei jamúti janúgün fein. ⁶ Ábati laríñagun Jesúsu joun.

—Toúnigigua jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladúgatia manúgün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¿Louguati gíñe jafíñen! ⁹ ¿Úagili gunfaráanda jumá, marítagnun jugúya tuágu seíngü fein to nafánreinjaboun jádan seíngü

mílu wügúriña lúma átiriñein lan faníñe táu ígiragutu? ¹⁰ ¿Bulíeiguatün funásan tuágu sédü fein to nafánreinjaboun jádan gádürü mílu wügúriña lúma átiriñein lan faníñe táu ígiragutu? ¹¹ ¿Ída liñági meféen jubeí luágu máma lan tuágu fein nadímureja dan le naríñagunbei jun lun jounigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsú lan Crístubei

(Mr 8.27-30; Lc 9.18-21)

¹³ Dan le lachúlürün Jesúsú ubúruyu Cesaréa le Filípo ába lálügüdüniña láni disípulugu.

—¿Cátanatan lídán jarítágun gürígia, áu le Wügúri Garaúwarügüti?

¹⁴ Ába jaríñagun.

—Añájein aríñagutiña luágu Juan lan lé meja abásteragüdajabei amúrü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídán jarítágun?

¹⁶ Ába laríñagun Simón Pédro lun.

—Crístu le Liraú Búngiu le wínwanbei amúrü, le ñúbinbei asálbaraña gürígia ubouágu.

¹⁷ Ába laríñagun Jesúsú lun.

—Fuleiseiwatibu Simón, liraú Jonás, ladúga máma lasúbudirágüdün ni ába gürígia cátei le bun, lasúbudirágüdün Núguchi Búngiu le siélubei bun. ¹⁸ Naríñajare bun luágu Pédro lan amúrü, líla íri ligía, “dúbü”, luáguba ébuu le nábunaguoun nilígílin, áni ni íbini ouweni mabáfubei tuágu. ¹⁹ Níchugubei ligélen arúejani le lánina siélu bun, le cátei le uáguti baríñaga luágu moun lan jadúgüni afíñetiña, ligía gíñe uágubei laríñaga Búngiu luágu siñá lan ladügúniwa, le cátei le uáguti baríñaga luágu gayára lan ladügúniwa, ligía gíñe le uágubei laríñaga Búngiu luágu gayára lan ladügúniwa.

²⁰ Ábati laríñagun Jesúsú joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsú luágu louñwen

(Mr 8.31-9.1; Lc 9.22-27)

²¹ Lúmagiñe dan ligía, ába lagúmeserun Jesúsú aríñaga joun láni disípulugu furáangu luágu lúnti lan lídin Jerusalén, luágu gíñe jasúfurirágüdübei lan wügúriña weirigutiña lídán jafíñen jurú, jáma jábutigu jafádirigun jurú, jáma arúfudajatiña lilürudun Moisés. Aríñagati joun luágu láfarúba lan jilágubei, áni lásaaruba lan luágu lürüwan wéyu. ²² Ába ladíñurun Pédro láu Jesúsú ñígiñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáragun Jesúsú, ába laríñagun lun Pédro.

—¡Dísebá nueí, Máfia! Babúseerúña beréderuni ladügúniwa lugúndan Búngiu. Masáminaruntibu quei Búngiu, basáminarun quei wügúri.

²⁴ Ábati laríñagun Jesúsú joun láni disípulugu.

—Le busénti lafálarunina, bulíeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanúgüni ában wügúri lugúruwan, falálana. ²⁵ Ladúga le abúseeruti leséfuragun lúngua ya ubouágu lefériðirubei íbágarí le magúmuchaditi, ánjein le ánjabei lefériðiruni libágarí ya ubouágu nueígiñe, libíjubei íbágarí le magúmuchaditi siélu. ²⁶ ¿Cági ju lan lun gürígia lagáñeiruni sun le lánina ubou le, lefériðireime lubára siélu? Úati ni cáta lánina ubou le áuti gayára lan lagáñijan gürígia ubáraü siélu.

²⁷ Nagríbuduba, áu le Wügúri Garaúwarügüti, úara jáma náni ánjeligu, niábinba láu uweiriguni le meme láni Núguchi. Ábamei nafáyeiruniña gürígia quei ligáburi le adúga

jamáalibei. ²⁸ Ninárün jáu luágu añájein lan jádaangiñe ja yábaña guetó, moúnwenbaña daríme jaríjini liábin narúeijan, áu le Wügúri Garaúwarügüti.

17

Lámuñedagun laríjín Jesúsu

(Mr 9.2-13; Lc 9.28-36)

¹ Sísi wéyu lárigiñe, ába lanúgüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wúbü ññuti, jagía rügúñanu ñi. ² Ába lámuñedagun laríjín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jaríjini Moisés lúma Elías (já meja abágaridubaña lídan dan le sügújalibei) ayánuja lúma Jesúsu. ⁴ Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adúga wagíame úruwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába louburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraú le jínsiñebei nun, le aúbei oúnwenbun lan nugúndan, adúga jumeí le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírin janúfude. ⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jaríjinbei, maríjinjaña ámu lueídügü Jesúsu.

⁹ Dan le arárireina jamáni wúbü, ába laríñagun Jesúsu joun.

—Mabájudagua jumeítia cátei le aríja jumáalibei lun ni ában daríme saráadina, áu le Wügúri Garaúwarügüti, lídaangiñe ouweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágu amúrü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹² áni naríñajare jun luágu ñúbinjali lan Elías, masúbudirun jamúti gürígia, adúgarügü jamúti sun le jabúseerubei láu. Ítara lúba gíñe jasúfuriragüdünina, áu le Wügúri Garaúwarügüti.

¹³ Ábati jasúbudirun disípulugu luágu Juan lan lé meja abásteragüdajabei, ligía lan Elíasbei le uágubei ladímureja Jesúsu.

Lareídaguagüdün Jesúsu ában irájü goúwejaditi

(Mr 9.14-29; Lc 9.37-43)

¹⁴ Dan le jachúlürünbei le ñíjin jabeí gürígia, ába liábin ában wügúri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudémelá nisáani bun, goúwejaditi, weírititi lasúfurirun, níjein dan jeíguati waturugun, níjein dan dúnarugun. ¹⁶ Barú numuti ñájoun joun báni disípulugu, siñá jamuti areídaguagüda.

¹⁷ Ába louñabun Jesúsu.

—¿Gürígia mafíñeraditiña, gürígia wuríbatiña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barújumei irájü ligía ñájoun.

¹⁸ Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmagiñe óra ligía, ába lareídagun irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladúga liloúguan jaffínen. Ninárün jáu luágu ánjein lan ibíja jubeí fe fbini ñúraüraü lan quei ában tágu mostása, jaríñaguba lun wúbü le. “Gidába yágiñe, beíba lídoun ámu fulásu”, ábame lagídarun wúbü ligía. Úabei ni cáta jásiñerun ánjein ibíja jubeí fe le tímatimaati. ²¹ Ánjeinti jibe espíritugu ja, láu rügúñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu loúnwen

(Mr 9.30-32; Lc 9.43-45)

²² Dan le efbugeina jamá úara loúbawagu Galiléa, ába laríñagun Jesúsu joun luágu ledéregerúaba lan, ligía le Wügúri Garaúwarügüti, jájaburugun wügúriña wuríbatíña, ²³ ábame jáfaruni jilágubei, áni lásaaruba lan lídaangiñe ouweni luágu lúruwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachúlürün Jesúsu jáma láni disípulugu Capernaúm, ába jóudin ja agúburaja-balin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélurun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraú Búngiu, moún lumuti nafáyeijan tiseínsuna lúban Nóguchi. ²⁷ Lun magáñidagüdün wamá ni ában, beíba, ábame bachúrunun bürúnjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

18

¿Cáteisan weírigutimaabei lídan larúeijan Búngiu?

(Mr 9.33-37; Lc 9.46-48)

¹ Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisan weírigutimaabei lídan larúeijan Búngiu?

² Ába lanúgün Jesúsu ában irájü, ába líchuguni jamídan jámagua, ³ ába laríñagun.

—Ninárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu. ⁴ Ítara líña lubeíti, le ñúraüti lanáangun lúngua, ñúbin ligía lun ítarabei lan quei ában irájü, ligía weírigutimaabei lídan arúejani le lánina siélu. ⁵ Gürígia gíñe le erésibiruti ában irájü lídan níri resíbi lumútina gíñe.

Luríban lafígoungüdüniwa ában gürígia

(Mr 9.42-48; Lc 17.1-2)

⁶ ‘Furúmieguarügü le afígoungüdüti ában jádaangiñe ja isérigiñabaña lídan jaffínen nuágu, buítimaati jamúga lun lun lagurúniwa baránajoún láu ában oúnwenbun dúbü le amúligüleí güráñu luágu ligíina sügú láu ladúgüni cátei líra. ⁷ ¡Wuríbatí lun ubou, njein lán buri cátei le afígoungüdúbaliña gürígia! Súnwandan ñíbei lan, áni ¡fugiábu le wügúri le lébunabei!

⁸ ‘Ligía ánjein lubeí lafigoungüdúbadibu lubeí bújabu o bugúdi lan, dūrúbei, fíbei díse buáriuua, buítimaati lun bebélurun siélun májbuga o magúdiga, sügú láu badarún láu biángubei bújabu lúma biángubei bugúdi máfiougatin le ñí lubei wátu le méneguchadibei. ⁹ Ánjein bágu lubeí afigoungüdúbadibu, sagábei, fíbei díse buáriuua, buítimaati lun bebélurun siélun máguga sügú láu badarún láu biángubei bágu máfiougatin.

Jémpulu tuáguti mudún to eféridiruboun
(Lc 15.3-7)

¹⁰ ‘Manúga jumá ni ában jádaangiñe ja únabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu affíñetiña ja súnwandan. ¹¹ Ladúga asálbarei le féridijalibei yebe niábin, áu le Wügúri Garaúwarügüti.

¹² ‘¿Ída líña jaríjin lun? Ánjein añajein lubeí san mudún lúma ában wügúri, teféridira ában jádaangiñe, ¿ma lígirubaña jíbiri luágu wúbü, ábame lídin áluajoun to ayúridaguboun? ¹³ Ánjounti ladárira, choúruti luágu gúndaabei lan táu sügú jáu ja mayúridagunbaña. ¹⁴ Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe únabugutiña ja.

Ligáburi ferúdunawa jamá idújeñu lueígiñe Jesucristu
(Lc 17.3)

¹⁵ ‘Ánjein adúga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adúga gásu báu, gamádaguayáadün. ¹⁶ Ánjein madúgün gásu báu, ábame banúgün ában o bián gürígia jánwoun lun sun lan le aríñawagúti, añajein jamámuga ámu geféentiña luágu. ¹⁷ Ánjein madúgün gásu jáu, ábame baríñaguni lun jadámurin affíñetiña, ánjein madúgün gásu láu adámurini, ábame banúgüni quei ában maffíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

¹⁸ ‘Ninárün jáu luágu le lan cátei le uáguti jaríñaga jugúya disípulugu luágu moun lan jadúgüni affíñetiña, ligía gíñe uágubei laríñaga Búngiu luágu siñá lan ladügúniwa, le cátei le uágubei jaríñaga luágu gayára lan ladügúniwa, ligía gíñe le uágubei laríñaga Búngiu luágu gayára lan ladügúniwa.

¹⁹ ‘Naríñajare gíñe jun luágu ánjaña lan úarada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun, ²⁰ ladúga le ñí jamuti biáma o úrüwa oúndaragu lídan níri, anájein ñi jamídaangua.

²¹ Ába layárafadun Pédro lun Jesús, ába laríñagun lun.

—Nabúreme, ¿átiribeísan weíyaasu ladúgün nibíri ában wuríbani nun lun ferúduna méme náani? Darí sédü weíyaasu?

²² Ába laríñagun Jesús lun.

—Maríñaguntina bun luágu darí lan sédü weíyaasu lúnti ferúduna báani, darí úrüwa-wein-díisi weíyaasu sédü.

Jémpulu luáguti músu le májabei ferúduna lan

²³ ‘Ligía ítara líña lubeí arúejani le lánina siélu quei ában urúei le ñúbinbei lun laráansejan luágu seínsu jáma lumúsuniña. ²⁴ Lagúmesera adúgei, ába janúgün ában le adúweirubalin sarágu míñun fiádürü, ²⁵ quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan. ²⁶ Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷ Ába lagúdemedagun lun urúei, ába ferúduna láani ladúweiruni, ába lígiragüdüni. ²⁸ Quei láfuridun músu ligía ñígiñe, ítara ladúnragun lúma ában músu

líledi le adúweirubalin átiri fiádürü. Ába lárügüdüni lueígiñe ligína, ába lagúmeserun achócrei, ába laríñagun lun. “Fáyeibeí le badúweirubalina.” ²⁹ Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰ Májati le ában, ñúdünrügü ligía ába ládaruni furísunrugun darí lafáyeiruni ladúweijan. ³¹ Dan le jaríjinbaalin ja jíbiri músu cátei le, ába lagáridun joun sarágu, ába jóudin, ába jabájüdaguni lun urúei. ³² Ába loúnajan urúei oúgei, ába laríñagun lun. “¡Músu wuríbatí! Ferúduna numúti sun badúweijan ladúga bayúmuragun nun. ³³ Lúnti yebe gíñe gudéme lan bouba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba gíñe ladúga Núguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfudajan Jesúsu libúgürü ígiraguni
(Mr 10.1-12; Lc 16.18)

¹ Lárigiñe laríñaguni Jesúsu sun cátei le, ába lídin Galiléagiñe lun loúbawagun Judéa le lueígiñebei oúbaü le ñígiñe lubeí laboucha wéyu libíti Jordán. ² Sarágu jáña gürígia afálaruti, ába lareídaguagüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburugüdüni tídoun sádara, ába jálügüdüni.

—¿Según barítangun, gayáratísan lígurunun gürígia lúmari lueígiñe furúmieguaügü cátei?

⁴ Ába loúnabun Jesúsu.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladügünbaliña Búngiu gürígia, adúga lumúti wügúri, adúga wúri? ⁵ Aríñagati gíñe. “Ligía lígirubei lubeí wügúri lúguchi túma lúguchu lun laganoúniwa túma lúmari, ábame jeréderun quei ábanrügü.” ⁶ Mámaaña lubeíti biáma, ábanrúgaaña. Ligía moún lubei lafánreinraguni wügúri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun wúri lun tigrún?

⁸ Ába laríñagun Jesúsu joun.

—Ladúga tidére janígi lánjarunbei Búngiu lun jígiragun jáma júmarigu, máma líña meja furúmiñe. ⁹ Naríñajare jun luágu furúmieguaügü lan le ígirutu lúmari ába lagámaridun ámu, ladügüña adultériu, mámarügaali ligía ladúga tagámaridun ligíbuagun, le gíñe agámariduti wúri to ígiraguaaru, ladügüña gíñe adultériu.

¹⁰ Ábati jaríñagun láni disípulugu lun.

—Ánjein ítara líña lubeí luáguti wügúri túma lúmari, buítimaati lubeí lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügúñanu únbaña rújali lan Búngiu ubáfu. ¹² Ámuñegueinarügüti lébuna magámaridun jamá wügúriña, añájein, ítaragubeíñanu lúmagiñe jagúriajoún, jíbiri, adügúwarügüti joun, jíbiri, reídeitiña magámaridunga lun jedéregeregagun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü
(Mr 10.13-16; Lc 18.15-17)

¹³ Ába janügúniwa irájüñü lun Jesúsu lun líchuguni lújabu jawágu lúma lun layúmura-gun lun Búngiu jawágu, ába jagúmeserun disípulugu adeínja joun ja anáajabaliña. ¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladúga ja jarúmabaña affíne quei irájüñü, jagía lílana arúejani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

Ladímurejan ában wügúri ñúraügili lúma Jesúsu
(Mr 10.17-31; Lc 18.18-30)

¹⁶ Ába lídin ában wügúri ñúraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadúgüni lun nibjini ibágari le magúmuchaditi?

¹⁷ Ába laríñagun Jesúsu lun.

—¿Ca uágu bariñaga nun “buíti”? Ában rügúñein buíti, Búngiu. Ánjein busén bubei bibjini ibágari magúmuchaditi, gúnfulibá lúma gumádi.

¹⁸ Ába laríñagun wügúri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá wúri gámaritu, míwerujabá, madímurejabá iyéeni luágu ni ában, ¹⁹ inébe jamá bagúbürigu bun, jínsiñe jagíame gürígia bíledigu bun quei bínsiñegua búngua.

²⁰ Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabeí, ábame bíchuguni lebégi joun gudémetiña, ábame bibjini irisini siélu, ábamei bíabin, ábame bafálarunina.

²² Dan lagáambunbalin wügúri ligía cátei le, májati, ladúga weíribalin Jesúsu cába lan ladúgti lirísini, ába lídin láu íruni.

²³ Ábati laríñagun Jesúsu joun láni disípulugu.

—Ninárün jáu luágu jénreengu lan lun lebéllurun ában rísiti lídoun arúejani le lánina siélu. ²⁴ Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügú láu lebéllurun ában rísiti lídoun arúejani le lánina siélu.

²⁵ Dan jagáambuni disípulugu cátei le, ába laweíridun jan-balin Jesúsu cába lan ladúgigi sarágu, ába jálügdagun jámagua.

—¿Cáteiti gayáraabei lasálbarun?

²⁶ Ába laríaguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayára lumúti sun cátei adúga.

²⁷ Ábati laríñagun Pédro lun.

—Nabúreme, wagía, ígira wamáali sun lé meja wámabeí lun wafálarunibu. ¿Cábasanti wabíja?

²⁸ Ába laríñagun Jesúsu joun.

—Ninárün jáu luágu lídan lánme dan ligía dánme iséri lan sun cátei, dánme le nañúurun, áu le Wügúri Garaúwarügüti luágu nála yágüta siélu lun narúejan láu sun nuweírigun, jugúya le afálarubalina jañúuruba gíñe luágu dúusu jalaú lun jagúser-agüdüniña dúusugubei láni Israél türíbu. ²⁹ Sunti ja ígiraañábaña jában, o jamúlenu, o játunu, o jagúbürigu, o jasáanigu, o jamúan, nuágu, jerésibiruba san weíyaasu lánwoun, resíbi jameíme ibágari magúmuchaditi. ³⁰ Áni sarágu jáña ja furúmiñetiñábaña guetó, jagíaba agúmujóuni, sarágu ja agúmujóunibaña guetó, jagíaba furúmiñe.

20

Jémpulu jawáguti ñadágimeintiña

¹ Ába laríñagun Jesúsu.

—Ítara líña arúejani le lánina siélu quei ában labúreme ichári le áfuridubei bináafin-gua áluaja ñadágimeintiña lun talúbajoún linádirigu. ² Ába ladúgün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu. ³ Lárigiñe, ábaya láfuridun quei buri ladaúnrún néfu bináafin, ábaya ladárirun ámu wügúriña mafsiutetiña, mágidirugu. ⁴ Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába jóúdin. ⁵ Ábaya láfuridun amídirugu, furí ligía ladaúnrún úrüwa rábounwéyu, ligía méme ladúga. ⁶ Quei buri ladaúnrún seíngü rábounwéyu, ábaya lídin mágidirugu, ábaya ladárirun wügúriña mafsiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷ Ába jaríñagun lun. “Úagili ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.” ⁹ Ábati jayábin ja atátirubaña ñadágimein quei buri ladaúnrún seíngü rábounwéyu, ába jibíjin fiádürü cáda ában. ¹⁰ Lárigiñe, dan le lachúlürün jadáani ja atátirubaña furúmiñe, ába jarítangun luágu gíbetimaabei lan jabíjin. Ába gíñe jabíjin fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñúbinbaña agúmujoúni, ában rügúñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísuga sun wéyu.” ¹³ Ába loúnabun labúreme ichári, ába laríñagun lun ában jádaangiñe. “Numáda, máma nadúgüña ni murúsun maríchaü jun. ¿Ma funági luágu ában fiádürü jadúga darádu núma? ¹⁴ Barújumei jiseínsun, jeíba. Nafáyeiruñanu ja atátirubaña agúmujoúni quei nafáyeirunün ladúga ítara líña lan nabúseerun. ¹⁵ ¿Maríchatina funági lun nadúgüni le nabúseerun láu niseínsun? ¿Ódi gimúgatün ladúga nubuídun?” ¹⁶ Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñábaña guetó, jagíaba agúmujoúni. Ladúga sarágu jáña agúarútiña áni míbetiña anúadirútiña.

Ladímurejaanya Jesúsu luágu loúnwen

(Mr 10.32-34; Lc 18.31-34)

¹⁷ Dan le niján lan Jesúsu luágu úma lun Jerusaléoun, ába ladíñurun jáu láni dúusu dispulugu jaweí ja jíbiri gürígia ja luágubaña úma úara jáma, ába laríñagun joun.

¹⁸ —Quei lubeí jaríjini, aweínreina wáña Jerusaléoun le ñíba lubeí nedéregerúa, áu le Wügúri Garaúwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasíadirunína lun noúnwen. ¹⁹ Ábame jedéregerunina joun ja mámabaña juríu lun jéjerajan náu, áfara jamáname, ábame jádarangunina luágu gurúwa, áni násaaruba lídaangiñe ouweni luágu lúrüwan wéyu.

Le tamúriajabei jáguchu Jacóbo láu Juan lúma Jesúsu

(Mr 10.35-45)

²⁰ Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleísei lúma. ²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe bouwenren, ában lueígiñe bubaúna yágüta lídan barúejan.

²² Ába laríñagun Jesúsu joun.

—Íbidiñeti jun ca lan jamúriajabei. ¿Gayáraati jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe noúnwenren lúma lueígiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalín jíbiri dísi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña jurú arúfudaguatiña joungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ ítara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu.

Lareidaguagüdün Jesúsu bián maríjintiña

(Mr 10.46-52; Lc 18.35-43)

²⁹ Dan le áfurideina jabeí Jesúsu jáma láni disípulugu Jericógiñe, sarágu jáña güriquia afálaruti Jesúsu. ³⁰ Níñanu bián maríjintiña ñun lárú úma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladúgawagun Davíd, gudéme wamá bun!

³¹ Ába jadeínjan güriquia joun lun jámanichun, ligíatima jagúaragun.

—¡Wabúreme, ladúgawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadúgün jun?

³³ Ába jaríñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebélurun Jesúsu Jerusaléoun

(Mr 11.1-11; Lc 19.28-40; Jn 12.12-19)

¹ Dan le yaráfaaña lubeí lun Jerusalén, ába jachúlürün ligíbugiñe fulásu le gíribei Betfajé, le únabubei libíti wúbü le Olívos, ² ába laríñagun Jesúsu joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, jadáriruba ában burígü güiráñu ñi láu ában liraúraü burígü túma, ábame jafáragaduniña, ábame janúgüniña nun. ³ Ánjein ñi adímurejati jun lueígiñe jadúgüni, ábame jaríñagun lun luágu busén lániña Jesúsu, luágu láguyugüdübaña lan.

⁴ Lasúseredunbei líra lun lagúnfulirun lé meja laríñagubei proféta dan le labürüjanbei ítara.

⁵ Aríñaga jumá lun ubúrugü Sión.

“Niteín Burúeite bun láu únabuni, waríñu lanágawagu ában burígü,

waríñu luágu ában liraúraü burígü, anímaalu anáajati ílaü.”

⁶ Ába jóudin disípulugu, ába jadúgüni quei laríñaguni Jesúsu joun. ⁷ Ába janúgünun burígü tugúya láu sun tiraú, ába jíchugunun janáangun jawágu, ába lawárirun Jesúsu. ⁸ Sarágu jañáti gürígia, ába jábudunun janáangun luágu úma, jíbiri, ába jáchujan tilímun wéwe, ába jíchaajani luágu úma. ⁹ Dánda gürígia ja ubáraübaña quei ja árigibaña, ába jagúmeserun agúaraja.

—¡Uweíriguni lun ladúgawagun urúei Davíd! ¡Biníwati wügúri le ñúbinbei lídan líri Wabúreme Búngiu! ¡Uweíriguni lun Búngiu!

¹⁰ Dan lebélorun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisán gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu

(Mr 11.15-19; Lc 19.45-48; Jn 2.13-22)

¹² Lárígiñe, ába lebélorun Jesúsu tídon lání Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáraguni dábulá buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába laríñagun joun.

—Laríñajare Búngiu tídan Lerérun. “Núban fulásu le ñí lubei gayára lan jayúmragun gürígia nun”, ánjein jugúya, barú jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña. ¹⁵ Dan le jaríjinbaalin jábutigu fádirigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweíriguni lun ladúgawagun urúei Davíd!”, ába jagáñidun.

¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ñí lubei laríñawagúa lun Búngiu.

Adúgaadibu lun jerémujan ñúbürigiña jáma irájüñü ja machúlaagiña, cátei buíti buágu?

¹⁷ Ába lígiruniña, ába lídin ubúrugugiñe lun Betánioun, ába lásügürüni áriebe ñi.

Líñaragunun Jesúsu tídibu ígo to múnboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lalámachun. ¹⁹ Ába laríjin ában tídibu ígo láru úma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaürün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída líñasan tásaürübei tídibu ígo to ítara oúfun?

²¹ Ába laríñagun Jesúsu joun.

—Nínárün jáu, ánjaün affíne le gumúti, mámarügübei líbe le nadúgübei tun tídibu ígo to gayára jumá adúga, gayáraabei jaríñagun lun wúbü le. “Gidába yágiñe, dabúba baránajoun”, ábame lasúseredun. ²² Súnme gíñe cátei le jamúriajan lúma Búngiu, ánjein affíne jubei, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügúriña ábutigu lídan jafñen juríu, ába jaríñagun lun.

—¿Aríñagabei woun ca lan biríchabei lun badúgüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün gíñe ában cátei, ánjein jóunaba nun, ábame naríñaguni jun ca lan áu ubáfu nadúgei buri cátei le. ²⁵ ¿Ca óunajabalin Juan abásteragüdaja? ¿Búngiu, ódi wügúriña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu mafñerun wabei lun. ²⁶ Ánjawa aríñaga luágu jóunajan lan wügúriña, jóuserubadiwa gürígia wuríba ladúga súngebui affñetiña luágu proféta lán.

²⁷ Ábati jaríñagun lun Jesúsu.

—Ibídiñeti woun.

Ába giñeti laríñagun joun.

—Maríñagun nubeí giñeti jun ca lan áu ubáfu nadúgei buri cátei le.

Jémpulu jawáguti bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Ñíñein ában wügúri, biámananu lisáanigu. Ába laríñagun lun ában jádaangiñe. “Niraú, beíba ñadágimein ugúñe lídan talúbajóun ninádirigu.” ²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítangun, ába lídin ñadágimein. ³⁰ Lárigiñe, ába lídin úguchili aríjei le ában, aríñageinaleí le méme laríñagubei buga lun le furúmiñeti lun. Ába loúnabun le. “Ánja, nídiba.” Mídinti. ³¹ Aríñaga jumeí nun, ¿cági jádaangiñe biángubei adúgübalin le labúseerubei úguchili?

Ába jaríñagun.

—Le furúmiñebeí.

Ábati laríñagun Jesúsu joun.

—Nínárün jáu luágu choúrutima lan jebélorun agúburajatiña liseínsuna gumádi jáma jóru gu lídoun larúeijan Búngiu sügú jáu, ³² ladúga ñúbinti Juan le abásteragüdajabei arúfudaja jun ída lúba lan ligáburi jabágaridun, mafñeruntün lun, ánjañati ja agúburajabaña liseínsuna gumádi jáma jóru gu, affñeratiña lun. Jugúya, láu sun aríja jumáni sun líra, masáansiragunti jigáburi lun jafñerun lun.

Jémpulu jawáguti ñadágimeintiña ja wuríbabaña

(Mr 12.1-12; Lc 20.9-19)

³³ ‘Agáamba jumeí ábaya jémpulu le. Luáguti ában wügúri labúreme ában ichári, ában lábunagun tídibu beíbei lichárirugu, ába ladúgün baríeru láu, adúga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adúga weíyaasu. ³⁴ Dan le lachúlürün dan lun alúbajani, ába loúnajan jádaangiñe lumúsuniña amúria jei lufánran jámagiñe ñadágimeintiña. ³⁵ Ábarüga járugüdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dúbü luágu le ában. ³⁶ Ábaya loúnajan labúreme ichári gíbetimaajaña sügú jáu ja loúnajabaña furúmiñe, ligía méme jadúga ñadágimeintiña joun.

³⁷ ‘Agúmujóuni, ába loúnajani liraú, ába laríñagun lúnguarügü. “Inébebei niraú joun.” ³⁸ Dan le jaríjinbaalin ñadágimeintiña liraú, ába jaríñagun jámagua. “Nijánba le

erésibirei alágan, wáfaraali jilágubei, reídei wamámuga láu alágan.”³⁹ Ábati járügüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti liábin labúreme ichári, ¿cábagi ladúga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatiña jagía jilágubei, magúdemedagúnbaña lun, ábame lájajajani ichári joun ámu ñadágimeintiña ja lúntiña jedéregeruni lufánran lun lídaangiñe alúbajani lídan dan.

⁴² Ábati laríñagun Jesúsu joun.

—¿Malíjañaja jumágiru Lerérun Búngiu? Taríñajare nuágu.

Le meja dúbü le mabúseerun jabeí ábunagutiña, ligíaali furúmiñeti.

Wabúreme Búngiu adúgübalin lun furúmiñebei lan, áni aríja wamúti quei ában cátei weíríguti.

⁴³ Ligía naríñagunbei jun luágu lagídarúaba lan larúeijan Búngiu jueí, jugúya le weírígubei lídan jafíñen juríu, ábame líchugúniwa joun gürígia ja edéregeruti alúbajani le lání larúeijan Búngiu. ⁴⁴ Ánjeinti áu, le dúbü ligía, furúmieguarügü le eíguaduti nuágun lañaúrudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. ⁴⁶ Ábati jabúseerún yebe járügüdüni, madúgün jamúti ladúga janúfude jaweí gürígia, ladúga affíne jamá gürígia luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába laríñagun joun.

² —Níjánya ában jémpulu luáguti arúejani le lánina siélu. Níñein ában urúei adúgüti ában fédu lubá lamárieidun lisáani. ³ Ába loúnajaniña lumúsuniña ougaña amísurajoútiña, májatiña amísurajoútiña jayábin. ⁴ Ábaya loúnajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eígini. Áfaragüda náaña bágasu jáma nilúgüniña anímaalugu dibúnetiña, aráanseeli sun cátei, lun jayábin maríeirugu.” ⁵ Madúgüntiña amísurajoútiña gásu. Ába lídin ában jádaangiñe lichárigu, ñúdün ában adúga ámu wadágimanu, ⁶ ja jíbiri, ába járügüdüniña lumúsuniña urúei, ába jóuseruniña wuríba, ába jáfaraguniña jilágubei. ⁷ Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸ Ába laríñagun joun lumúsuniña. “Aráanseeli sun cátei lun maríei, áni amísurajoútiña jagúra madúnamatiña lun jamísurajoúniwa. ⁹ Jeíba lubeíti luágu buri larígei úma, ábame jamísurajaniña sun ja úmatiña jadúnragua.” ¹⁰ Ába jóúdin músu luágu buri úma, ába jóúndaruniña sun ja úmabaña jadúnragua, buítiña jáma wuríbatiña, ába tabuínchun múna jáu gürígia.

¹¹ ‘Ábati lebélorun urúei aríjaña amísurajoútiña, ába laríjin ában wügüri le madáüragunti quei lun ában maríei ñi. ¹² Ába laríñagun lun. “Numáda, ¿ída liñági bebélorunbei ñájoun madáüragunga quei lun ában maríei?” Maní ligía. ¹³ Ába laríñagun urúei joun ja eténirubaña lún buri dábula. “Gürágua jumeí lugúdi lúma lújabu, fíjumeí lídoun lubúriga le bougudibei, le ñíba lubeí layájuaaja, acúnrijame lári.” ¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebélorun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi
(Mr 12.13-17; Lc 20.20-26)

¹⁵ Ába jóúdin fariséogu, ába júaradun aríja cába lan gayára lan jadúgün lun jaríña-gagüdüni Jesúsu cátei le uáguti gayára lan jadárirun lidúnrun. ¹⁶ Ábati jóúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladúga ni cáta lan luweírigun güriña bun. ¹⁷ Rúbei lubeíti barítangun woun. ¿Buítisan lun lafáyeirúniwa seínsu lun urúei Rómána ódi mabuídunti?

¹⁸ Aríagu líña Jesúsu lun luríba jayúmajan, ába laríñangun joun.

—¿Bíangua tigíbu jugúya le! ¿Ca uágu jíchaaja sádara nubá? ¹⁹ Arúfuda jumeí seínsu le áubei lafáyeijóua liseínsuna gumádi nun.

Ába janúgün ában seínsu le denáriu lun. ²⁰ Dan laríjini, ába lálügüdüniña.

—¿Ca iyáwa le luágubei seínsu le, lúma íri le bürúwañubei luágu?

²¹ Ába jaríñangun lun.

—Láni urúei Rómána.

Ábati laríñangun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába jóúdin.

Álügüdjani libügürü ásaaruni lídaangiñe ouweni
(Mr 12.18-27; Lc 20.27-40)

²³ Wéyu méme ligía, ába jóúdin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe ouweni. Ábati jaríñangun lun Jesúsu.

²⁴ —Maésturu, aríñagatí meja Moisés luágu ánjein lan ouwe ában wügüri le maríeiti masáaniguga táu lúmari, lúnti lan lamárieidun lamúlen túma wúri to ueíoun louwe, lun gasáanigu lan táu lun líbugaña le ouwebei. ²⁵ Wel, níñanu méjati sédü gamúlenuguátiña ya wádan, ába lamárieidun le furúmiñeti, ába lounwen. Quei masáanigu lubeí táu lúmari, ába lígirunun lun lamúlen. ²⁶ Ligía méme suséreti lun jabíaman, lárigiñe lun júrüwan darí lúmoun jasédün. ²⁷ Lárigiñe, ába gíñe toúnwen wúri. ²⁸ Dánmeti jásaarun lídaangiñe ouweni, ¿cábatí úmari wúri tugúya jádaangiñe sédü gamúlenuguátiña ja, lárigiñe maríei jamá sun jagía túma?

²⁹ Ába laríñangun Jesúsu joun.

—Bulíeiguatün ladúga libídiñe tuáguti Lerérun Búngiu jun, ni luáguti lubáfu Búngiu.

³⁰ Dánme le jásaarun jiláaña lúnya jabágaridun, ámujalime jabágarí, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

³¹ Ánjeinti luágu sará jamá jiláaña lúnya jabágaridun, ¿malíjan jumágili le laríñagubei Búngiu gúanarü jun? Ítara líña laríñangun. ³² “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeíti, ánjein jamúga jiláañu jáña lubeí wügüriña jagía lun sun dan, maríñagunti jamúgati Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wínwangiña.

³³ Dan jagáambunbalin güriña cátei le, ába laweíridun janígi láu le larúfudajabei.

Gumádi le weírigutimaabei
(Mr 12.28-34)

³⁴ Dan le jasúbudirunbalin fariséogu luágu manígüda láaña lan Jesúsu saduséogu, ába jóúndaragun, ³⁵ níñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñangun lun.

³⁶ —Maésturu, ¿cásan gumádi weírigutimaabei lídan lilúrudun Búngiu?

³⁷ Ába laríñangun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.”
³⁸ Niján gumádi weírigutimaabei, furúmiñeti gíñe lídaangiñe sun lugúmadin Búngiu.
³⁹ Áni le libíaman lídan uweíriguni lenége le, ítara líña. “Jínsiñe jamá b́birigu bun quei b́nsiñegua búngua.” ⁴⁰ Bián gumádi le, ligía ébuubei lun sun lilúrudun Moisés lúma jarúfudajan profétagu.

¿Ca adúgawagun Crístu?

(Mr 12.35-37; Lc 20.41-44)

⁴¹ Sun añája lan fariséogu oúndaragu, ⁴² ába laríñagun Jesúsu joun.

—¿Cásan jarítagebei libúgürü Crístu le lanúadirubei Búngiu lun lasálbaruniña gürígia?
 ¿Cásan adúgawagun?

Ába jaríñagun lun.

—Ladúgawagun Davíd.

⁴³ Ábati laríñagun Jesúsu joun.

—¿Ída liñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴ Laríñajare Búngiu lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

⁴⁵ ¿Ída lubáti ladúgawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

23

Líchugun Jesúsu jadúnrun fariséogu jáma arúfudajatiña lilúrudun Moisés

(Mr 12.38-40; Lc 11.37-54, 20.45-47)

¹ Ábati laríñagun Jesúsu joun lani disípulugu jáma j́biri gürígia ja ñíbaña.

²—Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeíti, adúga jumeíme sun le jaríñagunbei jun, le jadúgübei, mafálara jumeí ladúga aríñagatiña ában cátei, jadúga ámu. ⁴ Rújamuti gumádi joun gürígia queísi anúgüni júrüti le siñábei lanügúniwa, ánjein jagía, madúgüntiña ni cáta lun jíderaguniña gürígia luágu buri anúgüni lánina lúrudu le jíchugubei jawágu. ⁵ Jadúgüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarúna, lúma lun jadáuragun anáanguni to durúrutu. ⁶ Buséntiña járügüdüni lubuídun-ágei ubáraü lídan eíginí lúma jalaú le jála weírigutiña tídan jalígilisin. ⁷ Buséntiña lun jabúsurun gürígia joun láu sarágu inébesei úmada, lun gíñe lagúarúniwa joun, “maésturugu”.

⁸ ‘Ánjein jugúya, mígira jumá lun laríñawagúniwa jun, “maésturugu”, ladúga sun jugúya ában jáu, áni ában rügúñein gíñe Jumaésturun, áu le Crístubei. ⁹ Maríñaga jumá gíñe “núguchi” lun ni ában wügúri ubouágu lídan ligáburí jagúaruni Búngiu le siélubei “Núguchi”. ¹⁰ Mígirun jugúyame lun laríñawagúniwa jun “ábutigu” ladúga Crístu rügúñein Jábuti. ¹¹ Le esériwidubei joun j́biri, ligía weírigutimaabei jídan, ¹² ladúga le anáanguti lúngua weíri, lúnabudagüdüwaba, ánjein le anáanguti lúngua únabu, laweíridagüdüwaba.

¹³ ¡Fugíábugu jugúya arúfudajatiña lilúrudun Moisés jáma fariséogu! ¡Biángua tigíbul, ladúga darú jumuti lubéneri arúejani le lánina siélu lueí jebélurun ámu, mebélú jugúyati, mígirun lun jebélurun ja busénbaña jebélurun.

¹⁴ ¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gidá jumutu jában würiña ja jiláaña úmari jaweí, lúnti ibídiñewa lan, ába jadáagun ayúmuraguni lun Búngiu le migínaguti. Ligía weíritimaabei lubeí jasúfurirun lueígiñe.

¹⁵ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja güriña lun jánigume, dánti le ibíja jumáali le jabúseerubei, ába jadúgüniña güriña jagía bián weíyaasu lúntima jóudin máfiougati sügú jáu.

¹⁶ ¡Fugiábugu jugúya, adúndejetiña maríjintiña! Aríñagatün luágu le lan güriña íchuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan lagúnfulirun. ¹⁷ ¡Ibídiougua líña jáu, maríjin! ¿Cági weírigutimaabei, gólu ódi témpulu to adúgúboun lun sagráubei lan gólu? ¹⁸ Aríñagatün gíñe luágu ánjein lan íchiga güriña dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdúwabei luágu latárü, aná lan líra, lúnti lan lagúnfulirun. ¹⁹ ¡Ibídiougua líña jáu, maríjin! ¿Cági weírigutimaabei, cátei le luágubei latárü ódi latárü le adúgúbalin cátei ligía lun sagráubei lan? ²⁰ Le áfiñurubei luágu latárü, máma rügúñein luágu latárü láfiñurun, láfiñuruña gíñe luágu sun le ligíbuagubei latárü. ²¹ Le gíñe áfiñurubei tuágu témpulu, máma rügúñein gíñe tuágu témpulu láfiñura, láfiñuruña gíñe luágu Búngiu le aganoúbei tídan. ²² Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaú ligía.

²³ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebésentün láu arúfudajani le weírigutimaabei lídan lilúrudun Búngiu, queí buri lun jadúgüni sun cátei láu úraguni, lúma lun jagúdemedun güriña jun, lúma lun jagúnfulirun lúma Búngiu. Ligía buri cátei le lúnbei jadúgüni, mígirunga jumeíme jadúgüni le líbiri. ²⁴ ¡Jugúya, adúndejetiña maríjintiña jugúya le, áseija jumúti ában minímini áni julútün ában caméyu!

²⁵ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün lun jarítagan güriña luágu buídu lan jigáburí. Ítara jíña quei wéru lúma asíedu le jachíbubei bougudigiñe libíti, ánjein múnadagiñe jibíti, buin jíña láu buri luweínamu-águu lúma íweruni. ²⁶ Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame gíñe larúmadun bougudigiñe libíti.

²⁷ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijoúti láu jarúti bougudigiñe libíti, buídumeraüti larijín, ánjein lurágeirugugiñe, buin líña láu jábu jiláaña lúma sun luwúyeri iwíyei. ²⁸ Ítara jíña, bougudigiñe jibíti, ma lubuídun jarijiniwa jagíbugiñe güriña, ánjein múnadagiñe, buin jíña láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dúbü arítaguagüleime luágu jamúaja profétagu, wéndegüda jumeí umúajaü le jáni güriña já meja buídubaña. ³⁰ Ábati jaríñagan. “Lun jamúga meja awánjeinjadiwa lan le jadáni binádu wagúbürigu, míderagan wamútiña jamúga áfaraguaña profétagu.” ³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía. ³² ¡Gumújumeiti jadúgüni lé meja jagúmeserubei binádu jagúbürigu adúga!

³³ ¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati? ³⁴ Ligía noúnajaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tídan jalígilisin jurúu, eíbaaja jumáñame lídan sun fulásu. ³⁵ Ítara lúba láburuan dúru juágun luágu sun jítaü le áwiurubei jádaangiñe sun wügúriña buítiña ja jáfarawagúbaña, lúmagiñe meja Abél le richáguabei darí lúmoun Zacarías,

liraú Berequías lé meja jáfarubei tabádinagua témpulu lúma latárü. ³⁶ Ninárün jáu luágu lábुरुjaba lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén
(Lc 13.34-35)

³⁷ ¡O jugúya Jerusalénna! ¡Áfaragua jumáaña profétagu, chúgua jugúya dúbü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁸ Ígira láadün Búngiu, ³⁹ áni naríñajare jun luágu maríjindügüya jumáadina lan queísi jasálbaragüle daríme lachúlürün dan lun jaríñagun. “Biníwati le ñúbinbei lídan líri Wabúreme Búngiu.”

24

Laríñagun Jesúsu luágu tagúnrinchawagúba lan témpulu
(Mr 13.1-2; Lc 21.5-6)

¹ Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarífudun tuágun témpulu lun. ² Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuagu dúbü, tagúnrichawagúba sun to.

Seíni buri lubáragiñe lagúmuchun ubou
(Mr 13.3-23; Lc 21.7-24, 17.22-24)

³ Ábati jóudin luágu wúbü Olívos, dánti ñun lan Jesúsu ñi, ába jóudin láni disípulugu agúlülüja lúma, ába jaríñagun lun.

—Busétiwa lun baríñaguni woun ídaba lan tagúnrinchawagúba témpulu. ¿Cába liseíni bagíribudun ubouágun, lúma lagúmuchagüle?

⁴ Ába laríñagun Jesúsu joun.

—Toúnigi jumá lun úa lan ayéedutün, ⁵ ladúga sarágujaba ñúbintiña aríñageina. “Áu Crístubei”, áni sarágujaba jayéedun. ⁶ Jugúya jagáambuba lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle ubou líra. ⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, jarabaganáli lídan sarágu fulásu. ⁸ Sun líra lagúmesejarügügli le lúnbei lasúfurirúniwa.

⁹ Jugúyati, jederegerúaba lun lúru du lun jasúfurirawagüdün, lun gíñe jáfarawagúniwa jilágubei, jiyéeregudúba lun sun ubou nueígiñe. ¹⁰ Lídaanme dan ligía, sarágujaba eféridiruti jaffñen nuágu, ábame jeyéeregudün jóuniwagua, ábame jalúguragun jóuniwagua. ¹¹ Jachúlaaguba sarágu yéetiña aríñaga luágu profétagu jamá áni sarágujaba gürígia jayéedun. ¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua. ¹³ Le asígiruti derégüdagü darí lúmoun lagúmujoun, lasálbarúba. ¹⁴ Lapúrichijouba ugánu buíti le luáguti larúeijan Búngiu lídan sun ubou lun lasúbudirúniwa lídan sun fulásu, ligíaalímeti lagúmuchun ubou.

¹⁵ ‘Abúrújatí meja proféta Daniél luágu cátei iyéereguti le gagúnrinchaguagüdadibei, dánme le jaríjin chúlújali lan cátei le lídoun fulásu le sánduti—le alíijabei, gunfaráandalá —, ¹⁶ jámeti Judéabaña, lúntime janúrajan luágun buri wúbü. ¹⁷ Léme tábulugubei lúban wéyu ligía, maráriralá aságara ni cáta múnadagiñe, ¹⁸ le áraabubei, magíribudalá ni abúdoun lanáangun. ¹⁹ ¡Fugiábugume wúriña ja dageínatiña o ja lan gasáanigutiña ja gurágiña lídounme wéyu ligía! ²⁰ Amúriaja jumá lúma Búngiu lun máma lan lídan lidíliga ni lídan luwéyuri eméraaguni janúraja. ²¹ Ladúga ñíbei sarágu súfuri le úagili líbe lúmagiñe lagúmeserun ubou, úabei gíñe lárigiñe. ²² Lun jamúga madúraagun lubei lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ ‘Ánjein lubeíti aríñawagua jun. “Niján Crístu” o “Ningítan lan”, maffíñera jumá, ²⁴ ladúga jayábinba ayéejatiña lun jarúfudagun jóungua camá Crístu, camá buri profétagu, áni jadáaguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára. ²⁵ Aríñaga náali le jun lubáragiñe lasúseredun, ²⁶ ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, maffíñera jumá. ²⁷ Quei laríjiniwa labírichagun lueígiñe ában oúbaü libíti siélu lun luágun le ában, ítara lúba dánme le niábin, aú le Wügúri Garaúwarügüti. ²⁸ Ábame lábुरुjan ligáñi Búngiu jawágun gafígountiña quei wadúbi luágun úgubu jiláali.

Seíni buri lubáragiñe lagíribudun Crístu ubouágun

(Mr 13.24-37; Lc 21.25-33, 17.26-30, 34-36)

²⁹ ‘Lárigiñerügüme lásügürün wéyu buri lánina sáfuri ligía, ábame labúrigadun wéyu, marúnjalime játi, ábame jeíguadúnga warúguma ja siélubaña, ábame ladádagarun sun siélu. ³⁰ Ábameti jaríjini niseíni siélu, súnme gürígia wuríbatíña ubouágu, jayájua jaba láu jaríjini niábinya, áu le Wügúri Garaúwarügüti, lídan juánriñu siélugiñe láu oúnwenbun ubáfu lúma uweírighuni. ³¹ Dánme línwirúniwa fídu rein, ábame noúnajaniña náni ánjeligu ja siélubaña lun jóundaruniña nánigu ja anúadira náañabaña lídaangiñe gádürü larígei ubou.

³² ‘Furéndei jumeí jémpulu le tuáguti tídibu ígo. Dan le ñulúgili tilímun, ába labouúchun tubána, subúdi jumúti luágu yaráfaali lan lubáchouga. ³³ Ítara méme, dánme gíñe jaríjini sún buri cátei le, subúdi jumeí luágu yaráfaali lan niábin. ³⁴ Ninárün jáu, luágu lagúnrinchawagúba lan sun ubúru le Jerusalén lubáragiñe jówegun gürígia ja lánina dan le. ³⁵ Lagúmuchaguba siélu lúma ubou, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun ubouágun, ibídiñeti ni ca un, ni joun ánjeligu ja siélubaña, ni nun, áu le Liraú Búngiu, Búngiu rügúñein Úguchili asúbudirei.

³⁷ ‘Ítara quei meja lasúseredun lídan meja lidáani Noé, ítara lúba gíñe dánme le niábin, áu le Wügúri Garaúwarügüti. ³⁸ Lídan meja dan ligía, lubáragiñe ladíbirun ubou, jerédera meja gürígia eíga, áta, amárieidagua, íchaajaña jasáanigu lun maríei, darí wéyu le lebélorunbei Noé tídoun ugúnein. ³⁹ Meféentiña, darí ladíbirun ubou, ába jañaradagun súngebui. Ítara lúba gíñe dánme niábinya, áu le Wügúri Garaúwarügüti ubouágun. ⁴⁰ Lídaanme dan ligía, ñíbaña bián wügúriña áraabu, lanügúba ában, igirúame le ában según jafíñen nuágu. ⁴¹ Ñíbaña bián wúríña amúlíja, tanügúba ában, igirúame to ában.

⁴² ‘Agágudúañu jumá, ladúga ibídiñeti jun cába lan óra niábin, áu le Jabúreme. ⁴³ Subúdi jumeí le, luágu ánjein lan jamúga lasúbudira tabúreme ában múna cába lan óra liábin jíweruti áriebe, leréderuña jamúga marúmugunga, mígirunti jamúga lun lebélorúniwa íweruja lúbiñe. ⁴⁴ Ligía aráanseñu jumá lubeí, ladúga léme óra magáradajan jumá, ligíame niábin, áu le Wügúri Garaúwarügüti.

Músu le úaraguabei, lúma le múaragúnbei

(Lc 12.41-48)

⁴⁵ ‘Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eíginí joun lídan dan. ⁴⁶ Gúndaabei músu le dánme le liábin liyúbudiri ánjein ladárra agúnfulira lúma lifísiute. ⁴⁷ Ninárün jáu luágu líchugubei lan liyúbudiri lun laríjin láu sun lumégen. ⁴⁸ Ánjein ában lubeí wügúri wuríbati músu ligía, ábame laríttagun luágu lúguli lan liábin liyúbudiri, ⁴⁹ ábame lagúmeserun ouseraña jíbiri músu wuríba, reídei ligíame eíga lúma áta jáma bacháruatiña, ⁵⁰ ábameti liábin liyúbudiri lídan wéyu le magúrabun láani, lídan óra le ibídiñeti lun. ⁵¹ Ábame líchuguni luweírín-ágei abeichúni luágu, lasíadireime lun máfiougatin úara jáma biángua tigíbu, ábame layájun, acúnrijame lári.

25

Jémpulu jawáguti díisi würíña irájüñü

¹ Ába laríñagun Jesúsu.

—Ítara lubáti arúejani le lánina siélu quei díisi würíña irájüñü ja anúgübaña jalámpun le gálati gási, ába jáfuridun lun jadúnragun lúma adári, ñúdüñ jamámuga úara lúma maríeirugun. ² Seíngü jádaangiñe, maráanseruntiña, seíngü aráansetiña. ³ Ja maráanserunbaña, dan le janúgünbalin jalámpun, manúgüntiña ámu gási lueí le lídaanbei jalámpun, ⁴ ánjañati ja aráansebaña, barútiña jabúdein láu gási bougudin lueí le lídaanbei jalámpun. ⁵ Queísiti ladárasarun adári, ába ladábudunga jágu súnqubei, ába jarúmugun. ⁶ Queí buri luágu amídi árieibu, ligía lagaambúniwa agúaraguni. “Niteín adári, furíjuma adúnraguei.” ⁷ Sun würíña irájüñü jagía, ába jásaarunga, ába jagúmeserun aráansejei jalámpun. ⁸ Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladúga léneguchuña walámpun.” ⁹ Ába jaríñagun ja aráansebaña joun. “Siñáti, ladúga loúguabei woun, loúguame jun. Jeíbagubei le ñí lubei lalúgurajouá agáñija jumámuga júngua.” ¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma maríeirugun, ába ladaurúniwa béna. ¹¹ Lárigiñe, ligía jachúlürün jíbiri würíña irájüñü jagía, ába jaríñagun. “¡Wabúreme, wabúreme, darábei béna wabá! ¹² Ába laríñagun joun. “Nínárün jáu, ibídiñetün nun.”

¹³ Ábati laríñagun Jesúsu joun.

—Agágudúañu jumá, ladúga ibídiñeti jun cába lan wéyu, ni cába lan óra nagíribudun, áu le Wügúri Garaúwarügüti, ubouágun.

Jémpulu luáguti seínsu

¹⁴ Ítara líña arúejani le lánina siélu quei ában wügúri le dan lébei laráansejan lun ladúgün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaaan.

¹⁵ ‘Lun ában jádaangiñe, rúti queí buri seíngü-mílu fiádürü, queí buri bián-mílu lun ában, queí buri mílu lun ában. Lafánreinjani joun queí jabáfu lun jawádigimariduni. Ábati lídin luágu luweíyasun. ¹⁶ Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun. ¹⁷ Ítara méme le erésibirubei bián-mílu, gáñeiti bián-mílu lánwoun. ¹⁸ Ánjeinti le erésibirubei mílu, ába lídin, ába lachígín ában júyu, ába larámuduni liseínsun liyúbudiri ñi.

¹⁹ ‘Sarágu dan lárigiñe, ába lagíribudun iyúbudiri, ába jagúmeserun aráanseja jáma luágu seínsu. ²⁰ Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.” ²¹ Ába laríñagun iyúbudiri lun. “Buíti, ában músu buíti amúrü, úaragua, quei úaragua bubeí lídan le murúsunrügüti, níchiga gíbetimaati lábugiñe baríaaan. Queímoun, gúnda amúrüme úara núma.” ²² Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.” ²³ Ába laríñagun liyúbudiri lun. “Buíti, ában músu buíti amúrü, úaragua, quei úaragua bubeí lídan le murúsunrügüti, níchiga gíbetei lábugiñe baríaaan. Queímoun, gúnda amúrüme úara núma.” ²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügúri ban jéreguti, alúbaja ban le ñí lumuti mábunagun ban, abúdaja amúrü le ñí lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le báni.” ²⁶ Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei

machágajan nan ni cáta. ²⁷ Ligía lúnti lubeí jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.” ²⁸ Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei dísi-mílu, ²⁹ ladúga le adúgübei buíti láu le lúmabei, líchugúba lánwoun lun, ábanme lígiragun lun, ánjein le madúgübei buíti láu murúsun le lúmabei, lagídarúaba lueí. ³⁰ Músuti moúnti le, fíjumei lídoun lubúriga le boúgudibei, le ñíba lubeí layájuaja, acúnrijame lári.”

Jagúseragüdúniwa sun gürígia

³¹ ‘Dánme nagíribudun, áu le Wügúri Garaúwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweíríguni lun nagúseragüdúniña sun gürígia. ³² Ábame jóundaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóuniri mudún, mudún jádaangiñe gábara. ³³ Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaúna. ³⁴ Naríñagame joun ja lueígiñebaña noúnwenren. “Jigoúgu, jugúya le biní laalíbei Nóguchi, resíbi jumeí arúejani le aráanserúbei jubá lúmagiñe ladúgüni Búngiu ubou. ³⁵ Ladúga dan le nalámachunbei, rúttün eígini nun, dan le namágürabudunbei, rúttün dúna nun, dan le eíbugañaja nubeí quei chülúdügüti, rúttün múna nun. ³⁶ Dagáti manáanguni nuágu, rúttün anáanguni nun, dan le nasándirunbei, ñúdüntün aríjana, dan le nadaürünbei, ñúdüntün aríjana.” ³⁷ Ábameti jaríñagun richáguatiña jagía nun. “Wabúreme, ¿ída bugagí waríjabu láu ilámaü, ába wíchugun eígini bun? ¿ída bugagí waríjabu láu mágürabu, ába wíchugun dúna bun? ³⁸ ¿Ída bugagí waríjabu quei chülúdügüti, ába wíchugun múna bun? ¿o manáangunga, ába wíchugun anáanguni bun? ³⁹ ¿Ída bugagí waríjabu láu sándi o furísunrugu, ába wouádin aríjabu?” ⁴⁰ Ábame naríñagun joun. “Nínárün jáu, furúmieguarügü cátei le jadúgübei lun ában jádaangiñe namúlenu, ca lan lúnabunbei, nun méme jadúgei.”

⁴¹ ‘Naríñagameti joun ja lueígiñebaña nubaúna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méñeguchadibei, le aráanserúbei lubá Máfia jáu lánigu. ⁴² Ladúga dan le nalámachunbei, míchutün eígini nun, dan le namágürabudunbei, míchutün dúna nun. ⁴³ Eíbugatina quei chülúdügüti, míchutün múna nun, mégeitina anáanguni, míchutün nun, sánditina, daúwa áu, mídintün aríjana.” ⁴⁴ Ábame jaríñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chülúdügüti, o manáangunga, o láu sándi, o furísunrugu, míderagun wamútibu?” ⁴⁵ Naríñagame joun. “Nínárün jáu, luágu furúmieguarügü lan cátei le madúgün jubeí joun gürígia, ca lan lúnabunbei, madúgün jumúti gíñe nun.” ⁴⁶ Ábameti jóúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame jóúdin siélun lun jagúndaarun ñi lun sun dan.

26

Aráansejani lun lárügüdúniwa Jesúsu (Mr 14.1-2; Lc 22.1-2; Jn 11.45-53)

¹ Dan aríñaga láali Jesúsu sun cátei le, ába laríñagun joun láni disípulugu.

²—Quei jasúbudiruni, bián wéyu lárigiñe le, ligíame fédu le páscua, áni nedéregerúaba, áu le Wügúri Garaúwarügüti, lun nádarawagún luágu gurúwa.

³ Ába jóundaragun jábutigu fádirigu, arúfudajatiña lilúrudun Moisés, jáma wügúriña weírígutiña lídan jafíñen juríu tigíbugiñe lúban Gáifasi, fádiri le íñutimaabei. ⁴ Ñi jaráanseja luágu Jesúsu lun járügüdüni láu yéguau, lun jáfaruni jilágubei. ⁵ Jaríñagati.

—Máma látia fédurugu lueí jachágaragun gürígia.

Tájuduraguni ában wúri lábulugu Jesús
(Mr 14.3-9; Jn 12.1-8)

⁶ Betániañein Jesús, lúbiñe Simón lé meja gawágubei gumeín luágu sun lúra, ⁷ ába tiábin ában wúri luágun, gámeina tugúya ában lágei ibíñei le weíruti lisérun. Dan luáguñein lan dábula Jesús, ába téseruni ibíñei ligía lábulugun. ⁸ Dan jaríjinbaalin disípulugu cátei le, ába jamágundarun, ába jaríñagun.

—¿Cámesan lefériDIRÚA le Ítara? ⁹ Gayáraati jamúgagu lalúgurúniwa le luágu sarágu seínsu lun jíderawagún gudémetiña.

¹⁰ Ába lagáambuni Jesús le jaríñagubei, ába laríñagun joun.

—¿Ca uágu jañáwuriya tun wúri to? Cátei buíti le tadúgübei. ¹¹ Súnwandan yábaña lan gudémetiña júma, ánjein áu, mámaba súnwandan júma nan. ¹² Le tadúgübei wúri to láu téseruni ibíñei le nuágun, taráanseruñádina lubá nábulunúniwa. ¹³ Ninárün jáu luágu le lan ñí lumuti lapúrichijouá ugánu luáguti asálbaruni lídan sun ubou, labájüdawagúaba gíñe le tadúgübei wúri to, lun larítawagún tuágu.

Lalúguruni Júdas Jesús
(Mr 14.10-11; Lc 22.3-6)

¹⁴ Ába lídin ában jádaangiñe dúusu disípulugu, le gírubei Júdas Iscarióte, adímureja jáma jábutigu fádirigu. ¹⁵ Ába laríñagun joun.

—¿Atiribeí jíchugun nun ánjein nedéregera Jesús jun?

Ába jíchugun darándi murusun pláta lun. ¹⁶ Lúmagiñeti óra ligía, ába lálujan Júdas ída lúba lan luwúyeri ledéregeruni Jesús joun.

Lagúmujoún leigin Jesús jáma lánigu
(Mr 14.12-25; Lc 22.7-23; Jn 13.21-30, 1 Co 11.23-26)

¹⁷ Le furúmiñeti wéyu lídan fédu le ñí lubei teigúa fein magánatu ísi, ába jayábin disípulugu lúmoun Jesús, ába jaríñagun lun.

—¿Jalía babúseera waráanserun lun ñíba lan wadúgei eígini le lánina páscua?

¹⁸ Ába laríñagun joun.

—Jeíba ubúruyu, lúbiñe ítaga wügúri, ábame jaríñagun lun. “Ítara líña laríñagun Maésturu. Yaráaali nórate, búbiñeba nefédujei páscua jáma náni disípulugu.”

¹⁹ Ába jadúgüni disípulugu quei laríñaguni Jesús joun, ába jaráanseruni eígini le lánina páscua.

²⁰ Dan le lagúñedunbei, ába lañúurun Jesús luágu dábula jáma láni dúusu disípulugu, ²¹ súnti añája lan eíga, ába laríñagun joun.

—Ninárün jáu luágu lalúgurubadina lan ában jídaangiñe.

²² Ábati jajírudagun, ába jagúmeserun álügüdei ában ában.

—Nabúreme, ¿nugúya funásan?

²³ Ába laríñagun joun.

—Le éderutu leígan fein núma lídan asiedu, ligiába alúgurana. ²⁴ Nídiña, áu le Wügúri Garaúwarügüti, luágu úma le uágubei taríñaga Lerérun Búngiu, áni ¡fugíabutia wügúri le alúgurutina! Buítimaati jamúga lun magúriajouágubei lan.

²⁵ Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesús lun.

—Ánja, bugúya.

²⁶ Dan añája lan eíga, ába lanúgünun Jesús fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joujúma, núgubu le.

²⁷ Láriñe, ába lárügüdün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. ²⁸ Níta le, le añúuragüdübalin iséri darádu, le gíñe áwiyurubei joun sarágu gürígia lun ferúdunawa lan jafígoun. ²⁹ Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Núguchi Búngiu yágüta siélu.

Laríñaguni Jesúsu luágu leyéedaguba lan Pédro láu
(Mr 14.26-31; Lc 22.31-34; Jn 13.36-38)

³⁰ Lárigiñe jerémujani urému luágu Búngiu, ába jóudin luágu wúbü Olívos. ³¹ Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebe le, ladúga laríñajare tídan Lerérun Búngiu. “Náfarubei jóuniri mudún jilágubei, ábame jeréderun mudún chagágu.” ³² Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

³³ Ába laríñagun Pédro lun.

—Gayáraati járgüdüün súngubei magúraasuni buágu, nugúya no.

³⁴ Ábati laríñagun Jesúsu lun.

—Ninárün báu luágu áriebe méme lan le, lubáragiñe layúgurujan gáyu, beyéedaguba náu úrüwa weíyaasu.

³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligía méme gíñe jaríñaga sun disípulugu.

Layúmuragun Jesúsu lun Búngiu, Getsemaní
(Mr 14.32-42; Lc 22.39-46)

³⁶ Ábati lachúlürün Jesúsu jáu láni disípulugu lídoun ában fulásu gíríti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanúgüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi. ³⁸ Ábati laríñagun joun.

—Sandítina ában íruni le lánina ouweni tídan nuwáni. Reídei jumá ya, agágudúañu jugúyame núma.

³⁹ Ábati lídin Jesúsu lubáruaguouñ mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubei, adúgabá lun masúfurirun náani cátei le lúnbei nasúfuriruni, mámalá quei nabúseerun, queílá babúseerun.

⁴⁰ Ábati lagíribudun le ñíjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátisán buga jeréderun agágudúañu núma ni ában óra? ⁴¹ Agágudúañu jumá, ayúmuragua jugúyame, máburujan jumámuga lídoun ínchajoúni lun jeféridiruni jafíñen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Núguchi, ánjein siñá lubei masúfurirun náani le lúnbei nasúfuriruni, adügúwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladúga weírjali lidábu jágu. ⁴⁴ Ába lígiruniña, ábaya lídin ayúmuragua luágu lúrüwan weíyaasu, aríñageina méme dimúrei ligía. ⁴⁵ Ábati lídin le ñíjin jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chülújali óra lun nedéregeruníwa, áu le Wügúri Garaúwarügüti, jájaburugun gafígountiña. ⁴⁶ Sarájuma, queímoun lubároun le lúnbei lalúgurunina, níteeli.

*Janúgüni Jesúsu adáüra**(Mr 14.43-50; Lc 22.47-53; Jn 18.2-11)*

⁴⁷ Nígili Jesúsu adímureja, ligía líabin Júdas, le ábanbei jádaangiñe dúusu disípulugu, jáu sarágu güriña táu efeín lúma wéwe. Jayábin lueígiñe joubadina jábutigu fádirigu jáma wügüriña weirigutiña lídan jafínen juríu. ⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layarafadun lun Jesúsu, ába laríñagun.

—¡Buíti güñoun, maésturu!

Ába lachúuruni. ⁵⁰ Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janúgüni adáüra.

⁵¹ Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵² Ába laríñagun Jesúsu lun.

—Areídaboun befeínte, ladúga sun ja áfarajatiña táu efeín, táuba gíñe efeín jáfarúa.

⁵³ ¿Ibidiñeti bun luágu ánjana lan jamúga busén, gayára lan namúriajan úrüwa-weindísi-mílu jádaangiñe láni Núguchi ánjeligu, áni loúnajañanu lan jamúga? ⁵⁴ Lun jamúga nadúgüni ítara, ¿ida lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

⁵⁵ Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdüni camá jamuga jíwerutina? Ságüñaja wéyu nañúurun témpulurugu jagánagua arúfudaja, madaú jumútina. ⁵⁶ Wel, lasúsere-dunbei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

*Jesúsu ligíbugiñe líñun-ágei lúrudu**(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Ja adáürübalin Jesúsu, ába janúgüni ligíbugiñoun Gáifasi, fádiri le íñutimaabei, le ní lubei adámurigu jamá arúfudajatiña lilúrudun Moisés jáma wügüriña weirigutiña lídan jafínen juríu. ⁵⁸ Ánjeinti Pédro, falá lumuti dísegiñe darí tübürürurugun lúban fádiri le íñutimaabei le níjin lubei lebélera, ába leréderun ñun jáma oúnigirutiña témpulu lun laríjin jalába lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasiadiruni lun loúnwen, ⁶⁰ madáritiña, láu sun sarágu jáña lan güriña ñúdüntiña aríñaga iyéeni luágu. Agúmujóuni, ligía jayábin bíama yéetiña íchiga fe luágu, ⁶¹ ába jaríñagun.

—Aríñagati wügüri le luágu gayára lan lagúnrichagunun láni Búngiu témpulu, ábaya lánme laráramagüdünnun lídan úrüwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntibusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabeí woun ánjein amúrü lubei Crístubei le Liraú Búngiu, le lanúadirubei Búngiu lun lasálbaruniña güriña ubouágu.

⁶⁴ Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjubadina lan, áu le Wügüri Garaúwarügüti, ñun lueígiñe loúnwenren Búngiu le Súnti Gabáfu, jaríjubei gíñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügúri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶ ¿ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuereguni ligíbu, buleísei jameí, jíbiri, ába jagáyuajan ligíbuagun, ⁶⁸ ába jaríñagun lun.

—Quei amúrú lan Crístubei, jaríñaga beígia ca lan agáyuajabei buágu!

Jaríñagunbei lun ítara ladúga gürágu líña lan lágu.

Laríñagun Pédro luágu ibídiñe lan Jesúsu lun

(Mr 14.66-72; Lc 22.56-62; Jn 18.15-18, 25-27)

⁶⁹ Súnti lasúseredun sun cátei le, ñun líña Pédro bougudi túbúrürürugu lúban fádiri le ínutimaabei, ába tiábin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súnugubei, ába laríñagun.

—Ibídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein gíñe Jesúsu le Nazarétna.

⁷² Ábaya leyéedagun Pédro láu fiñún, ába laríñagun.

—Ibídiñeti wügúri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amúrú, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibídiñeti gürígia ligía nun!

Lídan méme óra ligía, ába layúgurujan ában gáyu. ⁷⁵ Ábati larítangun Pédro luágu le laríñagubei Jesúsu lun. “Beyéedaguba náu úrüwa weíyaasu lubáragiñe layúgurujan gáyu.” Ába láfuridun Pédro ñígiñe, ába layájuajan láu igárigu.

27

Ledéregerúniwa Jesúsu lun Piláto

(Mr 15.1; Lc 23.1-2; Jn 18.28-32)

¹ Dan larúgadunbei, ába jadámuridagun sun jábutigu fádorigu jáma wügúriña weírigutiña lídan jafíñen juríu aríja cába lan jadúga lun lasíadirúniwa Jesúsu. ² Ába janúgüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáali lan Jesúsu lun loúnwen, ába laságüríjan, ába láguyugüdüni darándi murúsun pláta ligía joun jábutigu fádorigu lúma joun wügúriña weírigutiña, ⁴ ába laríñagun joun.

—Afigounjaadina láu nedéregerun ában wügúri madúnrunti lun loúnwen.

Ába jaríñagun lun.

—¿Cámegi le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádorigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladúga lebégi ouweni.

⁷ Ába júaradun lun lagáñijóun lufúlasun ában wügúri le adáagubei barámbi láu seínsu ligía lun jábunajóun teréncha ñi. ⁸ Ligía Lufúlasun Jítaü lubeí líribei fulásu ligía chülú lúmoun dan le. ⁹ Ítara líña lagúnfulirun lé meja laríñagubei proféta Jeremías. “Barú jamuti darándi murúsun pláta ligía, ebégi le jíchugubei Israelítagu luágu wügúri ligía,

¹⁰ ába jagáñijani lufúlasun ában wügúri le adágubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr 15.2-5; Lc 23.3-5; Jn 18.33-38)

¹¹ Barúwati Jesúsu ligíbugiñoun gumádimati, le gíribei Piláto, le álügüdúbalin.

—¿Amúrúsan Jarúeitebei Jurú?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügúriña weírigutiña lidúnrun, moúnabuntija Jesúsu ni cáta. ¹³ Ábati laríñagun Piláto lun.

—¿Magáambun bumútisan le jaríñagubei buágu?

¹⁴ Moúnabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen

(Mr 15.6-20; Lc 23.13-25; Jn 18.38-19.16)

¹⁵ Gagáburi lumúti mejáti gumádimati lígiragüdún ában adaürúti joun gürígia lídan fédu, furúmieguaügü adaürúti le jamúriajan lúma. ¹⁶ Níñeinti ában adaürúti, díseti leibaajan líri, gíríti Barabási, ¹⁷ dánti le adámuriñujaña lan sun gürígia, ába lálügüdüniña Piláto.

—¿Ca jabúseerubei nígiragüdün jun, Barabási, ódi Jesúsu le únbei laríñawagua Crístu?

¹⁸ Líridubalin gíñe Jesúsu ladúga subúdi láali lan luágu ladúga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madúgabá ni cáta láu gürígia úraguati le, ladúga gewéneditina buga ában uwénedi wuríbati áriebu buga ladúga gürígia le.”

²⁰ Ába jádaruni jábutigu fádirigu jáma wügúriña weírigutiña jádoun gürígia lun jamúriajan lun láfuridun Barabási, lun lafarún Jesúsu. ²¹ Ábaya ladímurejan gumádimati joun sun gürígia jagía, ába laríñagun joun.

—¿Ca jádaangiñe bíangubei jabúseerubei lun nígiragüdüni jun?

Ába jaríñagun.

—Barabási.

²² Ába laríñagun Piláto joun.

—¿Cábatí nadúga láu Jesúsu le únbei laríñawagúa Crístu?

Ába jóunabun súnigubei.

—¡Dáguabeí luágu gurúwa!

²³ Ába laríñagun Piláto joun.

—¿Cáti wuríbati ladúgübei?

Ábatima jagúaragun.

—¡Dáguabeí luágu gurúwa!

²⁴ Dan le laríjinbalin Piláto luágu siñá lan ladúgün ni cáta lueídügüya chagáguaü, ába lamúriajan dúna, ába lachíbuni lújabu jagíbugiñe gürígia, aríñageina.

—Máma áu lúnbei naríjin láu loúnwen wügúri madúnrunti le, jugúya lun jaríjini ñi.

²⁵ Ába jaríñagun sun gürígia.

—¡Wagía jáma warájüñü, wanúgüba furúmieguaügü dúru wawóuguoun luágu loúnwen!

²⁶ Ábati lígiragüdüni Piláto Barabási, ába loúnajan abeíchei Jesúsu, ába ledégeruni lun ládarawagún luágu gurúwa.

²⁷ Lárigiñe, ába janúgüni lisúdaaranigu gumádimati Jesúsu tídoun lúban Piláto, ába jóundaraguagüdüniña sun súdaara geyégua láu. ²⁸ Ába jarágachunun lanáangun, ába jíchugun ában anáangun funátu luágu, ²⁹ ába jíchugun ában rídi láuti jíyu lábulugu, lúma

ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába gíñe jásuereguni, janúgeija mabúru ligía, jíchaaguei lúblugu. ³¹ Lárigiñe jéjerajan láu ítara, ába jagídarunun anáanguni funátu lueí, ába jadáürünun lanáangun luágu. Ába janúgüni lun ládarawagún luágu gurúwa.

Ládarawagún Jesúsú luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnragun lúma ában wügúri Cirénena, gíriti Simón, ába jafósuruni lun lanúgüni lugúruwan Jesúsú.

³³ Ítara líña jachúlürün lídoun ában fulásu gíriti Gólgota, líla líra, Lufúlasun Lábu Ichúgü. ³⁴ Ñi jíchiga diweín láu árani tídan lun Jesúsú lun látunun, jóucharügü lumútu, mátun lumútu.

³⁵ Dan le dágua jamáali luágu gurúwa, ába jájurerun súdeara ubúnuruni lun jafánreinjanun lanáangun Jesúsú jádaangua. Ítara líña lagúnfulirun lé meja labúrújabei proféta. “Ájureratiña ubúnuruni lun jaríjin cába lan jádaangiñe erédera táu nanáangun.” ³⁶ Ába jañúurun ñi lun jóunigiruni. ³⁷ Ába jíchugun ában abúrújóuni loúgiñe lichúgü le ñi lubei laríñaga ca lan lidúnrunbei. Abúrújóuni ligía ítara líña. “Jesúsú le, le jarúeitebei juríu.”

³⁸ Dáwaguatiña gíñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúna. ³⁹ Já buriti ásügürübaña ñígiñe, ába janábuni, ába jánjingichuni jachúgü, ⁴⁰ aríñageina.

—Bugúya le gayáraabei bágurunun témpulu ábaya baráramagüdünun lídan úrüwa wéyu, sálbaguabá búngua. Ánjein Liraú bubei Búngiu, raríba lueígiñe gurúwa.

⁴¹ Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügúriña weírigutiña, láu, ábaja jaríñagun jámagua.

⁴² —Sálbati ámu, ánjein lúngua, siñáti lasálbaragun. Ánjein ligía lubeí Jarúeitebei Israelítagu, raríla lueígiñe gurúwa, affíne wamámuga luágu. ⁴³ Rúlaali lafíñen luágu Búngiu, sálbaleíti Búngiu guetó ánjein inárüni lubeí luágu jínsiñe lan lun, quei aríñagaali lan woun luágu Liraú lan Búngiu.

⁴⁴ Anába jamúti gíñe jíwerutiña ja dáwaguñubaña luágu jagúruwan úara lúma.

Loúnwen Jesúsú

(Mr 15.33-41; Lc 23.44-49; Jn 19.28-30)

⁴⁵ Ábati labúrigadun sun fulásu lúmagiñe amídirugu darí ladaúnrün úrüwa rábounwéyu. ⁴⁶ Queí buri óra méme ligía, ába lagúaragun Jesúsú jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Níñanu agáambuti jádaangiñe ja ñíbaña, ába jaríñagun.

—Lagúajaña wügúri le lun proféta Elías.

⁴⁸ Ába lídin ában jádaangiñe eíbaagueina anúga ában mudúsi, lárigiñe ladúdüragüdüni táu diweín garújütu ába líchuguni luágu ában wéwe, ába línchunun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabeí, waríja ánjein ñúbin Elías asálbarei.

⁵⁰ Ábaya ladúgün Jesúsú ában agúaraguni jéreti, ábati loúnwen. ⁵¹ Lídan óra ligía, ába tajeíridagun tubélun témpulu lídan bián murúsun, íñugiñe lun únabun. Ába ladágarun ában járabaganáli, ába láwarajan dúbü. ⁵² Ába lánjunrenchúnga umúajaü, águyuguatiña sarágu jádaangiñe affíñetiña luágu Búngiu já meja jiláguaañábaña. ⁵³ Ába jáfuridunga lídaangiñe jamúaja lárigiñe lásaarun Jesúsú lídaangiñe óuweni. Ába jebélurun lídoun ubúragu Jerusalén le biníwabei, le ñi lubei jaríjaña sarágu gürígia.

⁵⁴ Léti jábuti súaara jáma súaara ja oúnigirubalin Jesúsu, dan jasándirunbalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraú Búngiu wügúri le.

⁵⁵ Níñanu sarágu würíña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶ Níñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr 15.42-47; Lc 23.50-56; Jn 19.38-42)

⁵⁷ Dan le agúñedeina líña lubeí, ába liábin ában wügúri rísiti gíriti José, lídaangiñeti fulásu le gíribei Arimatéa, jádaangiñeti giñe ja afálarubalin Jesúsu. ⁵⁸ Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun, ⁵⁹ ába lanúgüni José, ába loúburaguni tídan ában gamísa jarúmatu. ⁶⁰ Ába líchuguni lídoun lumúaja iséri lé yebe lachígagüdübei lubárua luágu dúbü. Lárigiñe ladáuruni umúajaü láu ában dúbü weíriri luágu lubéneri, ába lídin. ⁶¹ Níñounti María Magdaléna túma to ában María ñun ligíbugiñe umúajaü.

Oúnigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraguni, ába jóudin jábutigu fádirigu jáma fariséogu aríjei Piláto, ⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja moúnwengili luágu lásaaruba lan luágu lúruwan wéyu lárigiñe loúnwen. ⁶⁴ Oúnajagubeibá achoúruri umúajaü daríme lúruwan wéyu, mayábin jamámuga láni disípulugu áriebe íwerujei lúgubu, ábame jaríñagun joun gürígia luágu saráli lan. Weírítimaajalímeti lagúmujóun iyéeni le sügú láu le furúmiñeti.

⁶⁵ Ába laríñagun Piláto joun.

—Barújuma fiú súaara, jeíba choúru jumeí umúajaü le lubuídun-ágei juáraati.

⁶⁶ Ábati jóudin, ába jachóururuni dúbü le luágubei umúajaü, ába jígiruniña súaara lun jóunigiruni.

28

Lásaarun Jesúsu lídaangiñe oúweni

(Mr 16.1-8; Lc 24.1-12; Jn 20.1-10)

¹ Dan le lásügürünbei luwéyuri eméraguni áni arúgadeina líña dimáasu, ába jóudin María Magdaléna túma to ában María aríjei umúajaü. ² Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siélugiñe, ába liábin luágun umúajaü, ába lagídaruni dúbü le áubei ladaurúa, ába lañúurun luágu. ³ Miríti ánjeli ligía quei ában labírijanoúga, tiábin lanáangun, jarú jarú. ⁴ Dan le jaríjinbalin súaara, ába jadádagarun láu anúfudei, ába jeréderun camá jiláguaaña. ⁵ Ábati laríñagun ánjeli ligía joun würíña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶ Úati ya, saráli quei laríñaguni. Jigoúgu jaríjei fulásu le ñíjin lubeí líchugúa, ⁷ ábame jídin furése, ábame jaríñagun joun láni disípulugu luágu saráli lan, luágu níngiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába jóudin würíña jagía oúfudagueina, láu anúfudei lúma sarágu ugúndani, ába jóudin eíbaagueina aríñagei joun disípulugu. ⁹ Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóuburuni lugúdi. ¹⁰ Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súaara

¹¹ Dan le jóúdiña lubeí würiña, ligía jóúdin jádaangiñe súaara ja oúnigirubaña, ába jóúdin ubúругu, ába jabájüdaguni le asúseredubei joun jábutigu fádirigu. ¹² Ába jóúdin ábutigu ja adímureja jáma wügúriña weírigutiña lídan jafíñen juríu lun jebélurun jáma lídoun ában úarani, ába jíchugun sarágu seínsu joun súaara, ¹³ ába jaríñagun joun.

—Jaríñagame luágu dan lan le anjúnja lan arúmuga árieбу, ába lan jayábin láni Jesúsú disípulugu, ába jíwerujani lúgubu. ¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madügún lan ni cáta jáu.

¹⁵ Ábati jerésibiruni súaara jagía seínsu, ába jóúdin adúgei le uágubei laríñawagúa joun. Ítara liñáti jaríñaguni juríu chülú lúmoun dan le.

Líchugun Jesúsú jadásin disípulugu

(Mr 16.14-18; Lc 24.36-49; Jn 20.19-23)

¹⁶ Ába lubeíti jóúdin únsu disípulugu Galiléoun luágu wúbü lé meja uágubei laríñaga Jesúsú joun lun jóúdin. ¹⁷ Dánti le jaríjinbalin Jesúsú, ába jájuduragun lun, láu sun añájein lan jádaangiñe, loúguati jafíñen luágu ligía lan. ¹⁸ Ába liábin Jesúsú jawágun, ába laríñagun joun.

—Rúaali sun ubáfu nun siélu lúma uboúagu. ¹⁹ Jeíbati jabúgürü güriña ja lílana sun fulásu, adúga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumeí luágu anájein lan júma ságü wéyu daríme lagúmuchun uboú. Ítaralá.

UGÁNU BUÍTI LE LABÚRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucristu, le Liraú Búngiu, ² latátira láu lagúnfulirúniwa dimúrei lé meja labúrüjabei proféta Isaías, laríñaga.

Niján noúnagüle, líña Búngiu, noúnajañein bubáragiñe, amúru le Niraú, lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa úma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñúbinbaña lun luágu lúnti lan jasáansiruni ligáburí jóuserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambeí lapúrichijan. Dántija le jagúfesaruni jafígoun, ábajeí labásteragüdúniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagúruga lamídan, guéru, chigángaru leígibaña lúma síruudu le áraabuna. ⁷ Laríñagaja joun gürígia lídan lapúrichijan.

—Liábinba ában le gabáfutimaati nárigiñe, weíríti lubáfu nueí darí lun madúna nan ni lun nélemuchun afáragadeí tagúruga ligeídin. ⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdúni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu queí jamúga ában únjun. ¹¹ Ában lagaambúniwa ában umálali siélugiñe aríñaguti.

—Amúru niraú le jínsiñebei nun, gúndaatina báu.

Louíchaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanúgüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába louíchaguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíribei Galiléa

(Mt 4.12-17; Lc 4.14-15)

¹⁴ Lárigiñe ladaürúniwa Juan, ába lídin Jesúsu Galiléa apúrichijeí ugánu buíti lúmag-iñeti Búngiu. ¹⁵ Ába laríñagun.

—Chülújali dan lun lagúmeserun larúeijan Búngiu, sáansi jumeí ligáburí jóuserun, afíñe jumá luágu ugánu le lánina asálbaruni lídaangiñe figou.

Lagúarun Jesúsu joun gádürü esénijatiña lun jafálaruni

(Mt 4.18-22; Lc 5.1-11)

¹⁶ Luágu ában wéyu, eíbugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribeí, jáguruñati óra ligía.

¹⁷ Ába laríñagun joun.

—Jigoúgu nárigi, falá jumana, madíajanjadünme úduraü, gürígiajañame jadája nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraú Zebedéo, láu sun Juan le lamúlen, tídaañanu ában ugúnein arámadajoun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóudin lúma Jesúsu.

Ában gürígia gawáguti ában espíritu wuríbati

(Lc 4.31-37)

²¹ Ába jachúlürün lídoun fulásu le gíríbei Capernaúm lídan wéyu le eméraaguagülei, ába lebélorun Jesúsu tídoun jalígílisin juríu, ába lagúmeserun arúfudaja joun. ²² Weírítí janígi gürígia láu sun le laríñagubei Jesúsu joun ladúga larúfudajan joun láu ubáfu, máma quei arúfudajatiña lílürudun Moisés. ²³ Níñein ában wügúri tídan ligílisi tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagúnricha-guníwa? Subúdi numúti cátabu lan, láu amúrú lan Búngiu Irájü le sándubei.

²⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

²⁶ Ába louwejugüdüni espíritu wuríbati gürígia ligía, ába láfuridun lídaangiñe, wágueina. ²⁷ Sun ja ñíbaña, ába laweíridun janígi, ába jalügüdagun jámagua.

—¿Cáteisan le? ¿Cáteisan iséri arúfudajani le? ¿Gürígia le, gabáfuti lun gíñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

Lareídaguagüdünnun Jesúsu límenidi Simón Pédro

(Mt 8.14-15; Lc 4.38-39)

²⁹ Dan le jáfuridunbei tídaangiñe ligílisi tugúya, ába lídin Jesúsu lúma Jacóbo láu Juan jábiñe Simón lúma Andrés. ³⁰ Roun tiñáti límenidi Simón, tabíruajaña, ába jaríñagun lun Jesúsu luágu sándiñoun lan. ³¹ Ábati lídin tuágun, ába lárügüdüni tújabu, ába liñuragunun, lídan meme óra ligía ába tareídagun, ába tásaarun, ába teténirun joun.

Lareídaguagüdünnun Jesúsu sarágu sánditiña

(Mt 8.16-17; Lc 4.40-41)

³² Dan le lálüdünnun wéyu, gúñeeli, ába janügúniwa sun sánditiña jáma sun ja gawágubaña espíritugu wuríbatiña lun Jesúsu, ³³ ába jóundaragun sun lílana fulásu lubádu béna. ³⁴ Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatiña jaweí gürígia. Mígiruntijati lun jadímurejan espíritugu jagía, ladúga subúdi jamáni cáteñein lan.

Lapúrichijan Jesúsu Galiléa

(Lc 4.42-44)

³⁵ Lubá larúgan, dan le búrigagili, ába lásaarun Jesúsu, ába láfuridun boúgudin lueí ubúrugü lídoun ában fulásu le mageírawati lun layúmuragun lun Búngiu ñi. ³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladúga lun napúrichijan lídan sun fulásu niábin ubouágun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígílisin juríu lídan sun fulásu, aságajeina ligía espíritugu wuríbatiña jaweí gürígia.

Lareídaguagüdünnun Jesúsu ában gawáguti gumeín luágu sun lúra

(Mt 8.1-4; Lc 5.12-16)

⁴⁰ Ába liábin ában gürígia sánditi láu gumeín luágu sun lúra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdünnunina ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía. ⁴³ Ábati loúnajani Jesúsu ñígiñe láu ában furése, aríñageina lun.

⁴⁴ —Mabájüdaguabeítia lun ni ában, ñúdünrügübá arúfudagua búngua lun jafádirin juríu, ábame bíchuguni badágaragüdün luágu barúmadun queísi laríñaguni lilúrudun Moisés. Ítara lúba jaríjini gürígia luágu areídaguadibu lan.

⁴⁵ Ábarüga lídin, ába labájüdaguni sun le asúseredubei lun joun sun gürígia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürígia. Láu sun líra, ñúbin mémetiña lídaangiñe sun fulásu aríjei.

2

Lareídaguagüdüni Jesúsu ában wügúri le derégüdaali lúgubu

(Mt 9.1-8; Lc 5.17-26)

¹ Átiri wéyu lárigiñe, ába lagíribudun Jesúsu Capernaúm, ába jagáambun gürígia luágu giríbujaali lan. ² Ába jóundaragun sarágu gürígia darí lun mabáraaña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun. ³ Ñíñein apúrichija, ligía jayábin gádürü wügúriña barúina jagía ában wügúri le derégüdaali lúgubu. ⁴ Queísiti siñá lubei jachúlürün le ñí lubei Jesúsu ladúga jíbe gürígia, ába jagídarun murúsun lueígiñe tábulugu múna lougiñe le ñí lubei Jesúsu, ába jarárigüdüni sánditi ñígiñe tídan lubárari. ⁵ Dan le laríjinbalin Jesúsu jafíñen, ába laríñagun lun le sándibe.

—Niraú, ferúdunawaali bifígoun.

⁶ Ñíñanu jádaangiñe arúfudajatiña lilúrudun Moisés ja ñúnbaña ñi, ába jasáminarun.

⁷ “¿Cásan uágu ladímureja gürígia le ítara? Lanábaguñeiga le Búngiu, ladúga úati ni ában gayáraati ferúduna lan figoú lueídügüya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferúdunawaali bifígoun”, o laríñawagún lun. “Sarába, budáboun bubárari, beíba”? ¹⁰ Narúfudaaliti jun luágu gabáfu nan, áu le Wügúri Garaúwarügüti lun ferúduna nan figoú.

Ába laríñagun lun sánditi.

¹¹ —Sarába, budáboun bubárari, beíba águyu.

¹² Ába lásaarun sánditi lídan óra ligía, ába labúdunun lubárari, ába láfuridun ñígiñe, aríagu sun ja ñíbaña lun. Weíríti janígi ja ñíbaña luágu cátei le, ába jíchugun uweíriguni lun Búngiu, aríñageina.

—¡Maríjiñajágidiwa cátei ítara buriti!

Lagúarun Jesúsu lun Leví lun lánigume

(Mt 9.9-13; Lc 5.27-32)

¹³ Ñígiñe, ábaya lídin Jesúsu lárú dúna, dan le jayárafadun sarágu gürígia lubádun, ába larúfudajan joun. ¹⁴ Lásun larúfudajan joun, ába lasígiruni leíbugun, ába laríjini Leví, le liraú Álfeo, ñun líña le ñí lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

¹⁵ Murúsun óra lárigiñe, ñíñein Jesúsu eíga lúbiñe Leví, ñíñanu gíñeti sarágu agúburaajatiña liseínsuna gumádi, jáma ámu gaffigountiña ñun luágu dábula úara lúma, jáma láni disípulugu, ladúga sarágu jáña afálaruti. ¹⁶ Ja arúfudajatiña lilúrudun Moisés, jáma fariséogu, dan le jaríjinbalin eíga jáma sun wuríbatíña jagía (según jagía), ába jaríñagun joun láni disípulugu.

—¿Ída liñasan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígountiña?

¹⁷ Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti niábiña áluaja gürígia buítiña ligíbugiñe Búngiu, niábiña áluajaña ja gafígounbaña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

¹⁸ Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú gürígia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

¹⁹ Ába loúnabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajóutiña lídan ában maríei dan le níjein lan adári ñi jáma? Ánjein níjein lubeí adári ñi, siñáti jayúnarun, lúnti jeígin. ²⁰ Lachúlürüba dan lun lanügüniwa adári jámagiñe, ligíameti jadáani lun jayúnarun.

²¹ ‘Máfadajóuntu anáanguni binádujaru táu gamísa to macháwaragungiru, ladúga le méme tife gamísa to macháwaragungiru tajeíridaguboun to binádujaruboun dánme le tacháwaragun, laweíridatimaabati jeíríti. ²² Meserúnwati gíñe bínu le isérigili lídoun ában ágei guéru le binádujali ladúga labouchagubei bínu iséri guéru binádu dánme le liñúrun. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei

(Mt 12.1-8; Lc 6.1-5)

²³ Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguauí, ába játüjan láni disípulugu türígu dan le jásügürün. ²⁴ Ába jaríñagun fariséogu lun Jesúsu.

—¡Aríjabá joun bánígu! ¿Cásan uágu jadúga wadágimanu le moún lumuti ladügüniwa lídan wéyu le eméraaguagülei?

²⁵ Ába laríñagun joun.

—¿Malíjangidün luágu le ladügübei Davíd luágu ában dan, dan le lálámachunbei, ligía jáu sun líbirigu? ²⁶ Ába lebélorun liglísirugun dan le Abiatár lan fádiri le ínútimaabei, ába leíginun fein to sagraúboun, to majouáboun jeíginun ámu gürígia jaweídügüya fádirigu según lilúrudun Moisés, áni ru ligía joun gürígia ja lúmabaña. Mámati figóu le ladügübei Davíd ligíbugiñe Búngiu.

²⁷ Ába gíñe laríñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía. ²⁸ Ligía gabáfutina gíñe, áu le Wügüri Garaúwarügüti, lun naríñagun cába lan gayára ladügüniwa lídan wéyu le eméraaguagülei.

3

Ában wügüri jiláali ában lújabu

(Mt 12.9-14; Lc 6.6-11)

¹ Ábaya lebélorun Jesúsu tídoun ában jalígilisin juríu, ñíñeinti ában wügüri jiláali ában lújabu. ² Jaríjati ja ñíbaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun. ³ Ába laríñagun Jesúsu lun le jiláalibeí újabu.

—Sarába, ráramabá ya jagíbugiñe súngebui.

⁴ Ába lálügüdüniña ja jíbiri.

—¿Cátei lúnbei ladügúniwa lídan wéyu le eméraaguagülei, lun jíderawagúniwa güriégia ódi lun ladügúniwa wuríbati joun, lun leséfurúniwa jabágari ódi lun jígirúniwa lun jóunwen?

Sun jagía, ába jámanichun. ⁵ Ábati laríaguniña Jesúsu láu igáñi lúma íruni ladúga tidére janígi. Ába laríñagun lun wügúri ligía.

—Tulébei bújabu.

Ába látuleruni, ába lareídagun. ⁶ Ába jáfuridun fariséogu, ába jagúmeserun adímureja jámagua jáma gíñe lánigu Heródes ída lúba lan jáfaruni Jesúsu jilágubei.

Sarágu güriégia lárú dúna

⁷ Ába lídin Jesúsu jáu lání disípulugu lárú dúna, ába jafálaruni sarágu güriégia Galiléana. ⁸ Dan le lagaambúnbei luágu óunwenbun buri cátei le ladügübei, ába jayábingua güriégia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini. ⁹ Ligía laríñagunbei Jesúsu joun lání disípulugu lun aráanseñu jamá ában ugúnein lubá luef jámuruduni sarágu güriégia jagía, ¹⁰ ladúga queí gíbeeña lan lareídaguagüdün, sun sánditiña, ába jáguragun jóungua luágun lúnrügi jagúuruni lun lareídaguagüdúniña. ¹¹ Dántija le jaríjini ja gawágubaña espíritugu wuríbatiña, ábaja jájuduragun ligíbugiñe, ába jagúaragun espíritugu jádaangiñe.

—Liraú Búngiu amúri.

¹² Ába lewéridiruniña Jesúsu lun maríñagun jamá cáteiñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágun ában wúbü ní lubei lagúara joun ja labúseerubaña queísi loúnagülegu, ába jayábin lun. ¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni. ¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatiña. ¹⁶ Niján jíri dúusu wügúriña jagía. Simón, le únbei lagúaja Jesúsu Pédro, ¹⁷ Jacóbo láu Juan le lamúlen, ja lirájüñü Zebedéo, ja únbaña lagúaja Jesúsu Boanérges—míni lan líra, Lirájüñü Wayújururu, ¹⁸ Andrés, Felípe, Bartolomé, Matéo, Tomás, Jacóbo le liraú Álfeo, Tadóo, Simón—ában meja wügúri le áfaaguti lun jawáanserun jurú, ¹⁹ lúma Júdas Iscarióte le alúgurubalin Jesúsu.

Aríñagatiña luágu lubáfu lan Máfia lúmabei Jesúsu

(Mt 12.22-32; Lc 11.14-23, 12.10)

Lárigiñe, ába jagíribudun járiógún, ába jebélurun tídoun ában múna, ²⁰ ábaya jóundaragun sarágu güriégia ñi darí lun madáani jamá ni lun jeígin. ²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janúgüni, ladúga jaríñagun güriégia luágu wuríbaali lan lichúgü.

²² Ñíñanu arúfudajatiña lilúrudun Moisés ja achúlürübaña Jerusaléngiñe, ába jaríñagun.

—Wügúri le, níjein Beelzebú, le Máfia, le jábuti espíritugu wuríbatiña, lúma, láu lubáfu Máfia laságaja espíritugu wuríbatiña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guánarügü? ²⁴ Furúmieguarügü arúejani le afánreinraguti lun jageíndagun jámagua, lagúnrinchaguba, ²⁵ áni ánjein fánreingujaña lubeí idújeñu ladúga wuríbu jádaangua, siñábei jadúrarun idújeñu jagía queísi idújeñu. ²⁶ Ánjein lubeí jamúgati afáreinragua Máfia, lageíndaguame lúmagua, siñábei ladúrarun, lagúmuhagülerügübei le.

²⁷ ‘Úati ni ában lun lebélorun lúbiñoun ában wügúri le jéreti lun lanúgüni lílagu ánjein magúragun lan wügúri jéreti ligía furúmiñe. Ítara rügúñein gayára lan lanúgüni lílagu.

²⁸ ‘Láu sun ninárün naríñagun jun luágu gayára lan ferúdunawa lan sun figoú lúma sun wuríbani le laríñagubei gürígia, ²⁹ lueídügüya lun jadímurejan wuríbati luágu Sífiri Sándu, siñábei ferúdunawa lan figoú líra, leréderuba lidúnrun lun sun dan.

³⁰ Laríñagunbalin Jesúsu líra, ladúga jaríñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu

(Mt 12.46-50; Lc 8.19-21)

³¹ Lárigiñe, ába tachúlürün lúguchu Jesúsu jáu lamúlenu tubádun múna to ñí lubei Jesúsu, ába jeréderun boúgudi, ába jounagüdün luágu. ³² Játí ñúnbaña geyégu láu Jesúsu, ába jaríñagun lun.

—Nurántia bóguchu jáu bamúlenu boúgudi, jáluajañádibu.

³³ Ába laríñagun joun.

—¿Cági nóguchuboun jáu namúlenu?

³⁴ Ába laríñagun jawágun ja ñúnbaña geyégu láu, ába laríñagun.

³⁵ —Añája nóguchu jáu namúlenu, ladúga furúmieguarügü ja adúgüti lugúndan Búngiu, jagía namúlenubaña, nítunu, nóguchu.

4

Jémpulu luáguti ábunaguti

(Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába joundaragun sarágu gürígia le ñí lubei. Quei gibeyaaña lan gürígia ñi, ába ladinun Jesúsu tídoun ában ugúnein to ñíboun dúnarugu. Ába lañúurun ñi, ába jeréderun sun gürígia láru béya. ² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburujan murúsun lídaangiñe luágun úma, ába jayábin dunúru, ába jeígini. ⁵ Líbiri, ába láburujan labádinaguouún dúbü le ñí lumuti úa lan sarágu múa, ába labouchun furése ladúga majúlilin lan múa. ⁶ Dan le lásüdün wéyu, ába lásaurün, queíti málagüle lan, ába loúnwen. ⁷ Líbiri ílaü, ába láburujan labádinaguouún jíyu, ába laweínamudun jíyu úara lúma, ába lañaradaguagüdüni, magíinduntiti nádü ligía. ⁸ Níjeinti lídaangiñe, áburujati lídoun múa buíti, ába labouchun, ába laweínamudun, ¡ma lubuídun alúbajoúti lídaangiñe! Níjein lídaangiñe, íchuguti darándi águu luágu cáda ában águu, líbiri rúti úrüwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun gürígia láu jémpulu

(Mt 13.10-17; Lc 8.9-10)

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun, ¹² lun dánme lan jaríjin, ibídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásiñerun jagíribudun lun Búngiu lun ferúdunawa lan jafígoun.

Lafúnraanguagüdüni Jesúsu jémpulu luáguti ábunaguti

(Mt 13.18-23; Lc 8.11-15)

¹³ Ába laríñagun joun.

—¿Úatisan gunfaráanda jumáni le? ¿Ída lubági gunfaráanda jumáni líbiri jémpulu?
¹⁴ Le ábunagubalin líla nádü, ítara líña quei le apúrichijabalin Lerérun Búngiu. ¹⁵ Añájein gürígia, ítara jáña quei úma le uágunbei láburuja lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi. ¹⁶ Jíbiri gürígia, ítara jáña quei dúbü le abádinaguounbei láburuja lídaangiñe líla nádü, ába jagáambuni Lerérun Búngiu, ába jerésibiruni láu ugúndani. ¹⁷ Quei márügüdün lubeí Lerérun Búngiu tídan janígi buídu, madúrati jádan, dánti le larijiniwa jábun, o jeíbaajoúniwa lan lueigiñe Lerérun Búngiu, magúraasuntiña. ¹⁸ Jayábin jíbiri, ítara jáña quei jýyu le abádinaguounbei láburuja lídaangiñe líla nádü, ába jagáambuni Lerérun Búngiu, ¹⁹ weíritimaati jafúudun luágu cátei le lánina ibágari le, ába leyéduniña irisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajoún jádan gürígia jagía. ²⁰ Añájein gíñe gürígia, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajoúati cátei buíti jádaangiñe. Buíti jagáburi quei líla nádü le íchugubei daránde águu luágu ában, o úriwa-wein, o san.

Jémpulu luáguti lámpu

(Lc 8.16-18)

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábulu líchugúa lun larúgoungadágüdün múnada. ²² Úati lubeíti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Toúnigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun. ²⁵ Ítara líña, gürígia le aténirubei buídu lun nerérun, gunfaráandatima lumúti, ánjeinti le meténibeí lun, labúlieidubei sun le agáamba láalibeí.

Jémpulu luáguti nádü le aweíridubei

²⁶ Aríñagati gíñe Jesúsu.

—Ítara líña larúeijan Búngiu quei le asúseredubei lun ában wügúri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülú dan ába labouúchun nádü, ába laweíridun, ibídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu íläü. ²⁹ Dánti le funáli líla nádü, ába látüjouniwa ladúga chülújali lan dan lun lalúbajoún.

Jémpulu luáguti tíla mostása

(Mt 13.31-32; Lc 13.18-19)

³⁰ Aríñagati gíñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun? ³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe íläü le ñúraütimaabei ubouágu, ³² dan le labunún, ába laweíridun, ligía weíritimaabei tídaangiñe sun nádü, weínamuti lilímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu

(Mt 13.34-35)

³³ Ítara liñájei larúfudajan Jesúsu luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá. ³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüdüni sun jémpulu joun láni disípulugu dan le jagíarügü lan lúma.

*Lagálumaruni Jesúsu garábali lúma lugúdi barána**(Mt 8.23-27; Lc 8.22-25)*

³⁵ Wéyu méme ligía, dan le lagúñedunbei, ába laríñagun Jesúsu joun láni disípulugu.
—Queímoun loubáfurugun dúna.

³⁶ Ábati jígiruniña bürúbünu gürígia jagía, ába janúgüni Jesúsu tídan ugúnein to gádaanbaliña. Níñoun buri gíñe ámu ugúnein úara jáma. ³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuínchun láu dúna. ³⁸ Larúmuguñati Jesúsu tiyúna ugúnein baláñu tuágu ában ichúgübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeínjan lun garábali, ába laríñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei. ⁴⁰ Ábati laríñagun joun láni disípulugu.

—¿Cásan uágu luweírınbei janúfude? ¿Cásan uágu maffínen jubeí?

⁴¹ Ába jeréderun láu luweírın janígi, ába jálügüdagun jámagua.

—¿Cátei funásan le, garábali lúma barána ñúdüntiña láu le lubeíbei?

5

*Ában wügüri Gadárana le gawágubei máfianu**(Mt 8.28-34; Lc 8.26-39)*

¹ Ába jachúlürün loubáfurugun dúna lídoun fulásu le gírıbei Gadára. ² Lárıgıñerügü láfurıdun Jesúsu tídaangiñe ugúnein, ába liábin ában gürıgia lídaangiñe ában umúajaü achıgıtı luágu dúbü luágun, wügüri ligía gawáguti ában espıritu wurıbati. ³ Lídan jabára jıláaña lagánoua áni úati ni ában gayáraati lagúraguni, ni láu gürıngüri. ⁴ Güráguañája jamáali láu gürıngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni. ⁵ Súnwandanja leıbugun áriebu wéyuagu agúarajeina luágu buri wúbü lúma buri lídan jabára jıláaña íbiagua lúngua láu dúbü. ⁶ Dan le larıjınbalın gürıgia ligía Jesúsu dísegiñein, ába leıbaagun lubároun, ába lájuduragun ligıbugıñe, ⁷ ába lagúaragun lun.

—¿Cásan uágu bemétera númoun, Jesúsu Liraú Búngıu le Íñutımaabei? Ayúmuraguatına bun luágu lírı Búngıu lun masúfurıragúdün bánına.

⁸ Larıñagunbei ítara ladúga guméseeli lan Jesúsu arıñaga lun.

—¡Espıritu wurıbati, ígirabeı gürıgia le!

⁹ Ába lálügüdüni Jesúsu.

—¿Ca bíri?

Ába louınabun.

—Lejıón níña ladúga gıbetıwa.

¹⁰ Ába jayúmuragun espıritugu jagía lun Jesúsu lun moúnajan lániña bougudın lueı fulásu ligía. ¹¹ Queıtı ñıñanu lan sarágu büıruju eıga ñı luágu wúbü, ¹² ába jayúmuragun espıritugu wurıbatiña jagía lun.

—Oúnaja báwa jádoun büıruju jára, rúba úma woun lun webélurun jádoun.

¹³ Ábati líchugun Jesúsu úma joun, ába jáfurıdun lueı gürıgia ligía, ába jebélurun jádoun büıruju. Nıñanu jawára bıán-mılu büıruju. Ába jáguragun büıruju jagía joúngua lueıgiñe ában gudúungu, ába jáburujan baránajoun, ába jañaradagun.

¹⁴ Ábati janúfudedagun ja oúnıgirubalıña büıruju jagía, ába jeıbaagun abájüdagueı le asúseredubeı ubúrugu lúma áraabu. Ába jayábingua gürıgia arıjeı ca lan asúseredubeı.

¹⁵ Dan le jachúlürınbei le ñı lubeı Jesúsu, ába jarıjını gürıgia lé meja gawágubeı espıritugu wurıbatiña ñun líña, táuñein gıñe lanáangun, areıdaguaali, ába janúfudedagun.

¹⁶ Játi aríjupalin, ába jabájüdaguni le asúseredubei lun güri-gia lé buga gawágubei espíritugu wuríbatíña lúma jawáguti büüruju, joun. ¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídon ugúnein, ába layúmuragun wügúri lé buga gawágubei espíritugu wuríbatíña lun lun lídin lúma, ¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladúgübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladúgübei Jesúsu láu lídan sun fulásu Decápolis, ába laweíridun janígi sún-gubei.

Liraú Jairo, túma wúri to agúurubarun lanáangun Jesúsu

(Mt 9.18-26; Lc 8.40-56)

²¹ Dan le lagíribudunbei Jesúsu tídan ugúnein loubáfurugun dúna, ába jayábingua бүрүбүну güri-gia le ñíjin lubeí, ába leréderun ñi láru dúna. ²² Ábati líabin ában jádaangiñe tábuti jalígilisin juríu, gíríti Jairo. Dan le laríjinalin wügúri le Jesúsu, ába lájuduragun lubádu lugúdi, ²³ ába layúmuragun lun ítara.

—Nújein niraú touwe, queímoun bíchigei bújabu tuágu, areídagua támuga, moúnwen támuga.

²⁴ Ába lídin Jesúsu lúma, sarágu jáña güri-gia afálarutiña, ába buriti jámurudaguni Jesúsu. ²⁵ Jádaanti sarágu güri-gia ja, ñíñoun ában wúri sánditu, dúusu irúmu táu láu lésejan jítaü tídaangiñe. ²⁶ Súfurijaru sarágu jámangiñe surúsiagu áni gásta táali sun le túmati, mareídaguntu, gáwoun gueínarügü. ²⁷ Ligía tagáambun ladímurejoún luágu Jesúsu, ába tiábin lanáangiñe jádan sarágu güri-gia, ába tagúurunun lanáangun, ²⁸ ladúga taríñagun túnguarügü. “Láurügüme nagúurunun lanáangun nareídaguba.” ²⁹ Lídan óra ligía, ába leréderun lésejan jítaü tueí, ába tasándiragun túngua luágu areídaguáaru lan. ³⁰ Ábati lasándiruni Jesúsu luágu areídaguagüdaali lan güri-gia láu lubáfu, ába lagáraragun jawágun güri-gia ja lanáangiñebaña, ába lálügüdajan.

—¿Ca agúurubei tuágu nanáangun?

³¹ Ába jaríñagun láni disípulugu lun.

—Aríagu biñátia lun jíbe güri-gia ya luágu murúgu jáña lan, ¿álügüdajágidibu ca lan agúurubei buágu?

³² Ába laríaajan Jesúsu áluaja ca lan agúurubei luágu. ³³ Ába tiábin wúri tugúya adádagareina láu anúfudei, subúdiñuteí le asúseredubei tun, ába tájuduragun ligíbugiñe, ába taríñaguni sun inárüni lun. ³⁴ Ába laríñagun Jesúsu tun.

—Niraú, areídaguaadibu ladúga baffínen. Beíba láu darángilaü, areídaguañu lídaangiñe bisánda.

³⁵ Ñígili Jesúsu adímureja, ligía jayábin lúbiñegiñe wügúri lé buga ñúdünbei oúgei luágu tisánda liraú, ába jaríñagun lun túguchi irájü tugúya.

—Jilátia biraú, ¿ca uágu bebéreseja lun maésturu guetó?

³⁶ Agáamba lumúti Jesúsu le jaríñagubei, ába laríñagun lun wügúri ligía.

—Manúfudedabá, affínerügübá.

³⁷ Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo. ³⁸ Dan le lachúlürünbei lúbiñoun wügúri ligía, ába laríjini chagáguau jáma güri-gia ja ayájubaña, agúaraja. ³⁹ Ába lebélorun, ába laríñagun joun.

—¿Cásan uágu jareíncha, ayájua buri jugúya ítara? Moúnwentutia irájü to, tarúmuguña.

⁴⁰ Ába jéjerajan láu. Ábati láfuridagüdúniña Jesúsu sún-gubei ñígiñe, ába lanúgüni túguchi irájü túma túguchu jáma ja ñúdünbaña lúma, ába lebélorun le ñíjin tubeí irájü.

⁴¹ Ába lárügüdüni tújabu, ába laríñagun tun.

—Talíta, cúmi—líla líra. Niraú, sarába.

⁴² Lídan óra ligía, ába tásaarun irájü tugúya, ába teľbugun. Weýaraüjaru, dúusu irúmu táu. Ába laweíridun janígi gürígia ja ñíbaña. ⁴³ Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun eíginini tun.

6

Jesúsu lídan fulásu le Nazarét

(Mt 13.53-58; Lc 4.16-30)

¹ Ába lídin Jesúsu ñígiñe, ába lagíribudun lageíroun, ába jóúdin láni disípulugu lúma.

² Dan lachúlürün wéyu le eméraaguagülei, ába larúfudajan tídan jalígílisin juríu, sarágu jáña gürígia agáambeí, ába laweíridun janígi láu larúfudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisan lichú áu le luágubei? ¿Ída liñásan gayára lubeí ladáagun miláguru? ³ Saráfangeiga le tiraú María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüdüni luágu. ⁴ Ába laríñagun Jesúsu joun.

—Sun gürígia, gúndaatiña láu ában proféta jaweídügüya ja lupaísanun jáma lidújeñu, jáma ja tílana lúban, jagía rügúñanu íchiga mabájüdüni luágu.

⁵ Ligía lásiñerunbei ladúgün ámu miláguru ñi lueídügüya líchugun lújabu jawágu biñáraü sánditiña, ába lareídaguagüdüniña. ⁶ Weírititi lanígi láu maffínen jamá. Lárígiñe, ába leľbuguni lirájüñü fulásu, arúfudajeina.

Loúnajaniña Jesúsu láni disípulugu apúrichija

(Mt 10.5-15; Lc 9.1-6)

⁷ Ába loúnajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatíña. ⁸ Rúti dimúrei joun lun manúgün jamá ni cáta luágu jeľbugun lueídügüya bádun, moún lumuti janúgün ni fein, ni ságü, ni seínsu, ⁹ lun geídi tan jasábadun, lun mabíaman tan jasímisin. ¹⁰ Ába gíñe laríñagun joun.

—Dánme le jebéľurun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía. ¹¹ Ánjaünti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachúlürün luwéyuri Búngiu lun lagúseragüdüniña sun gürígia, maweíribei jabeichúniwa Sodómana jáma Gomórrana quei lílana fulásu le merésibirunbalün.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburí jóuserun. ¹³ Sagátiña gíñe sarágu espíritugu wuríbatíña jaweí gürígia, jurúgua jagía aľli jawágu sarágu sánditiña, ába jareídaguagüdüniña.

Loúnwen Juan le abásteragüdjabei

(Mt 14.1-12; Lc 9.7-9)

¹⁴ Queíti eľbaajali lubeí luáguti Jesúsu lídan sun fulásu, ába gíñe lachúlürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabei lídaangiñe óuweni, ligía luweírinbei lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadúruragüdübei ichúgü, saráya lídaangiñe óuweni.

¹⁷ Lé meja asúseredubei, oúnajali meja Heródes adáürei Juan, ába lagúraguni láu güríngüri furísunrugu tadúga Heródias. Wúri tugúya, lúmari meja Felípe, le lamúlen Heródes, ába lanúgünun Heródes lúmarime. ¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéreegudun Juan tun Heródias, ába tabúseerun táfaruni jilágubei, ²⁰ siñá tumuti ladúga subúdi lan lun Heródes luágu ában lan wügúri le efbuguti buídu lúma Búngiu Juan, áni ában lan wügúri esériwiduti lun Búngiu, janúfudetiti lueí. Ligía mája lubei lun tadúgün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. ²¹ Ába tadáriruni Heródias ticháansin dan le lagúnfulirun Heródes irúmu, ába ladúgün fédu joun gumádimatiña jáma jábutigu súaara jáma ámu buri gürígia weírigitíña ja Galiléabaña. ²² Ába tebéllurun tiraú Heródias ní lubei fédu le, ába tabínajan, gúndaatiti Heródes jáma sun ja níbaña eíga lúma láu tabínajan irájü to, ába laríñagun tun.

—Amúriajabeí le babúseerun núma, níchugubei bun.

²³ Rúlumuti lerérun tun luágu líchugubei lan furúmieguarügü cátei le tamúriajan lúma tun, gayára lan lamídan lan fulásu le ní lubei larúeijan tamúriaja. ²⁴ Ába táfuridun, ába taríñagun tun tóguchu.

—¿Cábasan namúriaja lúma?

Ába taríñagun tun.

—Amúriajabeí lóbulugu Juan le abásteragüdjabeí lúma.

²⁵ Ába tebéllurun irájü to furése le níjin lubei urúei, ába taríñagun lun.

—Buséntina lun bíchuguni lóbulugu Juan le abásteragüdjabeí nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan lerérun áni agáambagu jáña amísura-jóutiña lun, májati lun míchu lubei lan le tamúriajabeí lúma tun. ²⁷ Furése furése, ába loúnajan urúei ában súaara láu dimúrei lun lanúgüni lóbulugu Juan lun. ²⁸ Ába lídin súaara ligía furísunrugu, ába ladúrürüni lóbulugu Juan, ába lanúgüni lídan ában asíedu. Ába líchuguni tun irájü tugúya, ába tíchuguni tun tóguchu.

²⁹ Dan le jagáambunbalin lánigu Juan, ába jayábin lun janúgüni lúgubu, ába jábununi.

Leíqagüdüñ Jesúsú seíngü mílu wügúriña

(Mt 14.13-21; Lc 9.10-17; Jn 6.1-14)

³⁰ Lárigiñe jagíríbudun lání Jesúsú apóstolugu, ába jóúndaragun lúma, ába jabájüdaguni sun le jadúgübeí lúma le jarúfudajabeí, lun. ³¹ Ába laríñagun Jesúsú joun.

—Jigoúgu, queímoun weméraagua lídan ában fulásu le mageírawati.

Laríñagubaalin líra ladúga níñanu sarágu gürígia, jíbiri nídüñ, jíbiri níúbin, darí lun madáani lan Jesúsú jáma lání disípulugu ni lun jeígin. ³² Ába jóúdin tídan ába ugúnein lídoun ában fulásu mageírawati. ³³ Sarágu jáña aríjiti jóúdin, dan le jasúbudiruni luágu níjein lan Jesúsú jádan, ába jeíbaagun geyégua láu lagúnu lídaangiñe sun lirájüñü fulásu, ába jachúlürün lubáragiñe lachúlürün Jesúsú jáu lání disípulugu. ³⁴ Dan le larárirunbei Jesúsú tídaangiñe ugúnein, ába laríjin sarágu gürígia jagúrabajañein, ába jagúdemedagun lun ladúga ítara jáña lan quei mudún ja moúniritiña. Ába lagúmeserun arúfudaja sarágu cátei joun. ³⁵ Dan le dárüjiali, ába jayábin lání disípulugu, ába jaríñagun lun.

—Dárüjalitia áni úatiña aganoútiña lídan fulásu le. ³⁶ Oúnaja báña gürígia ja lun jóúdin lídoun buri lirájüñü fulásu le yaráfabeí lun jagáñijan fein, ladúga úati ni cáta ya lun jeígin.

³⁷ Ába laríñagun Jesúsú.

—Rújuma eígini joun.

Ába jaríñagun lun.

—¿Gayáraati funági wóúdin agáñija fein joun? Busénwati jamúga lebégi bián-san wéyu wadágimanu lun wabjini seínsu lun wíchugun fein joun súngebui.

³⁸ Laríñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

³⁹ Ába lañúuragüdüniña gürígia sagádirugu. ⁴⁰ Ába jañúurun san san lúma dimí dimí san, queísi laríñagun joun. ⁴¹ Ába lanúgünun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan gürígia jagía, fánrein jamáña gíñe bián úduraü jagía jádan súngebui. ⁴² Joútiña sun jagía químule. ⁴³ Lárigiñe, ába jabuínchagüdün dúusu faníñe láu tife fein lúma úduraü ígiragúti. ⁴⁴ Seíngüñanu mílu wügúriña eígitiña, mabájüdünga würiña jáma irájüñü.

Leíbugun Jesúsu ligíbuagu dúna

(Mt 14.22-27; Jn 6.16-21)

⁴⁵ Ába ladinagüdüniña Jesúsu láni disípulugu tídoun ugúnein lun jánjiñuragun lubá lun jachúlürün Betsáida, sun niján lan ayoúragua joun gürígia. ⁴⁶ Dan le ñúdüñjaña, ába lídin luágu wúbü ayúmuragua lun Búngiu. ⁴⁷ Dan le lagúñedunbei, lamídaanjaru dúna ugúnein jáu disípulugu, Jesúsu rugáli lábugua múarugu. ⁴⁸ Ába laríjin luágu jénreenguja lan joun lun jénjunjan ladúga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu. ⁴⁹ Dan le jaríjini eíbuga ligíbuagu dúna, ába jarítangun luágu úfiaü lan, ába jagúaragun, ⁵⁰ ladúga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

⁵¹ Ába ladinun tídoun ugúnein jámoun, ába lagálumadun garábali. Ába laweíridun janígi láu, ⁵² ladúga úagili lan gunfaráanda jamáni miláguru le ladúgübei táu fein, luágu gabáfu lan lun sun cátei, derégili jachúgü.

Lareídaguagüdüniña Jesúsu sánditiña Genésaret

(Mt 14.34-36)

⁵³ Ába jánjiñuraguni dúna, ába jachúlürün Genésaret, ába jagúrünun ugúnein láru dúna. ⁵⁴ Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan. ⁵⁵ Ába jeíbaagun lídoun sun fulásu aríñaga luágu chúlújali lan, ába jagúmeserun gürígia anáaja sánditiña tídan jabárari le ñíjin lubeí jagáamba luágu níjein lan Jesúsu ñi. ⁵⁶ Súnti fulásu ñíjin lumúti lebélera, ubúrugú yebe, lirájüñü yebe fulásu, áraabu yebe, ába jíchaajóun sánditiña úmada, ába jamúriajan lúma lun lígiruniña lúnrügi jagúurun sánditiña jagía luágu táru lanáangun. Súnti ja agúurubaña luágu, areídaguatiña.

7

Cátei le adúgübalin gürígia lun marúman lan ligíbugiñe Búngiu

(Mt 15.1-20)

¹ Ába jayábin fariséogu jáma jádaangiñe arúfudajatiña lilúrudun Moisés ja ñúbinbaña Jerusaléngiñe, luágun Jesúsu. ² Ába jaríjin luágu añájein lan jádaangiñe disípulugu machíbun jamúti jájabu lubá jeígin según jagáburi juríu. ³ (Falá jamúti fariséogu jáma jíbiri juríu binádu jagáburi binádu jagúbürigu lun meígin jamá, machíbunga jameí jájabu sarágu weíyaasu. ⁴ Dan le jayábin mágídirugugiñe, meíginbaña magúnfulirunga jagía láu jachíbuni jájabu. Níjein buri gíñe sarágu luwúyerigu igáburi jafálarun, queí buri lachibúniwa wéru, soudíeru, boúlu, asíedu.) ⁵ Ábati jálügüdüni fariséogu jáma arúfudajatiña lilúrudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagúbürigu, jeíginbei láu liwíye jájabu?

⁶ Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi lueí le áubei jarúfudagua júngua. Aríñagati.

Gürígia ja, jayumárurügü jíchiga inébesei nun, líña Búngiu, ánjein tídan janígi, mebéresentiña náu.

⁷ Málati jájuduragun nun,

ladúga lé rügúñein jagúmadijan wügúriña jarúfudaja.

⁸ Ába laríñagun Jesúsu.

—Ígira jumáali lagúmadijan Búngiu lun jafálaruni binádu jagáburi binádu gürígia. lachibúniwa souúderu, wéru, lúma cátei líbeina líra. ⁹ ¡Maésturugu gíñe buítiña jugúya, ígira jumúti lagúmadijan Búngiu lun jafálaruni binádu jigáburi! ¹⁰ Aríñagatí meja Moisés. “Inébe jamá bagúbürigu bun, le anábagubaliña lagúbürigu, jilála.” ¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladúga sun le nómabei, aríñagaadina luágu lun lan níchuguni lun Búngiu”, ¹² luágu furúmiegurügü lan le aríñaguti ítara, mámaali lan lúnti líderaguniña lagúbürigu. ¹³ Láu líra, mebégigüda jumáali lagúmadijan Búngiu lun jafálaruni binádu jigáburi, adúga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja ñíbaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfuridubei tídaangiñe lanígi gürígia, ligía aríbadagüdübalin ligíbugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu gürígia jagía, ába lebélorun múnadoun, ába jálügüdüni láni disípulugu luágu jémpulu le. ¹⁸ Ába laríñagun joun.

—¿Úati lubeí gíñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun gürígia siñá lan laríbadagüdüni ¹⁹ ladúga mebéluti tídoun lanígi, lurágeirugun lebéloru, ñígiñe ábaya láfuridun lídaangiñe?

Láu líra laríñaguña luágu sun lan eígini, jarúmati. ²⁰ Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti, ²¹ ladúga lídaangiñe gürígia o tídaangiñe lanígi láfurida lagúbüri samínaü, adultériu, salúfuri, áfarajaní, ²² íwerujaní, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraguaguduni. ²³ Sún buri cátei wuríbati le, tídaangiñe lanígi gürígia liábin, ligíati mabuídundagüdübalin ligíbugiñe Búngiu.

*Ában wúri teréncha to afíñeruboun luágu Jesúsu
(Mt 15.21-28)*

²⁴ Ába lídin Jesúsu ñígiñe loúbawagun Tíro lúma Sidón. Ába lebélorun tídoun ában múna áni mabúseerunti yebe lun lasúbudiruni ni ában. Siñáti larámudagun, ²⁵ furése, ába tagáambun ában wúri luágu, túguchu ában irájü gawágutu ában espíritu wuríbati. Ába tiábin, ába tájuduragun ligíbugiñe Jesúsu. ²⁶ Wúri tugúya, máma juríu, Síro-Feniciana. Ába tamúriajan lúma Jesúsu lun laságaruni espíritu wuríbati le tueí tiraü. ²⁷ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

²⁸ Ába toúnabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

²⁹ Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbatí tídaangiñe biraú.

³⁰ Dan le tachúlürün múnada, ába tadárirunun irájü títan gabána, furíjali espíritu wuríbatí tídaangiñe.

Lareídaguagüdüni Jesúsu ában magáambaditi, mariñagadi

³¹ Ába láfuridun Jesúsu loúbawagugiñe Tíro, ába lásügürün Sidóngiñe lúma lídaangiñé buri fulásu lánina Decápolis, ába lachúlürün luágun barána Galiléa. ³² Ñi janúga ában wügüri magáambaditi, dagádaga lerérun lun, ába jamúriajan lúma lun líchuguni lújabu luágu lun lareídaguagüdüni. ³³ Ába ladíñurun Jesúsu ñígiñe láu jaweí güriquia, ába ládaruni bián lirájüñü lújabu larígeirugun, ába lásuerun, ába lájurudunun liñeñe láu arúrei. ³⁴ Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

³⁵ Ába lánjunrenchun larígeirugu magáambaditi ligía, ába tánjingichun liñeñe lun ladímurejan buídu. ³⁶ Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligíatima jabájüdaguni. ³⁷ Ábatí buri laweíridun janígi sarágu, ába jaríñagun.

—Adúga lumúti sun cátei buídu, darí lun lagáambagüdüniña magáambaditiña, adímuregüda láña mariñagaditiña.

8

Leígaagüdüni Jesúsu gádürü mílu güriquia

(Mt 15.32-39)

¹ Lídan dan ligía, ábaya jóundaragun sarágu güriquia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña güriquia ja nun ladúga úrüwa wéyu jáu núma ya áni úaali ni cáta jáma lun jeígin. ³ Ánjaña nouñaja águyu meíginga, ladágaruba falálaü jawágu úmada, ladúga añájein jádaangiñe, díseti ñígiñe lumúti jayábin.

⁴ Ába jóunabuni láni disípulugu.

—¿Ída lubáti jeígaagüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúuragüdüniña güriquia múarugu, ába lanúgünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan güriquia jagía. ⁷ Níñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña. ⁸ Jóutiña sun jagía químule, buíngüdagíña sédü faniñe táu tífe to ígiraguboun. ⁹ Yaráfañanu joun gádürü mílu wügüriña. Ába loúnajaniña Jesúsu águyu, ¹⁰ ába ladinun tídoun ugúnein jáma láni disípulugu, ába jóudin Dalmanutoún.

Jamúriajan fariséogu miláguru lúma Jesúsu

(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larífudun ában miláguru joun, siélugiñe. ¹² Ába lawáragun Jesúsu weíri, ába laríñagun.

—¿Cásan uágu jamúriaja güriquia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ladinun tídoun ugúnein, ába lídin loubáfurugun dúna.

Jarúfudajan fariséogu quei ísi
(Mt 16.5-12)

¹⁴ Bulíei jamútiti disípulugu janúgün eígini, ában rügúñoun fein jáma tídan ugúnein.

¹⁵ Ába lewéridiruniña Jesúsu, laríñaga joun.

—Toúnigi jumátia lueí jísite fariséogu lúma lísite Heródes.

¹⁶ Ába jaríñagun disípulugu jádaangua.

—Ladúgatia meígan wamá fein laríñagubei ítara.

¹⁷ Ába lasúbudiruni Jesúsu jarítangun, ába laríñagun joun.

—¿Ca uágu jaríñaga luágu meígan jumá fein? ¿Úagili gunfaráanda jumá, meféen jugúya? ¿Ítara lidére jichúgü? ¹⁸ ¿Maríjintün láu jágu, magáambun jugúya láu jarígeirugu? ¿Marítangun jumáali? ¹⁹ Dan le nafánreinjanbarun seíngü fein jádan seíngü mílu wügúriña, ¿átiriñoun faníñe táu tífe jabúdun?

Ába jaríñagun.

—Dúusu.

²⁰ —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jaríñagun.

—Sédü.

²¹ Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareídaguagüdün Jesúsu ában maríjinti Betsáida

²² Lárigiñe, ába jachúlürün Betsáidoun, ába lanügúniwa ában maríjinti lun Jesúsu, ába jayúmuragun lun lun lagúurun luágu. ²³ Ítara líña lárügüdüni Jesúsu maríjinti ligía, ába lanügüni bougudín lueí fulásu ligía. Ába lájurudagun arúrei luágu lágu, ába líchuguni lújabu luágu, ába lálügüdüni ánjein gayáraaraü lubeí laríjin. ²⁴ Ába laríjin, ába laríñagun.

—Aríja numútiña wügúriña, naríjiniña quei tídibu wéwe, eíbugeina.

²⁵ Ábaya líchuguni Jesúsu lújabu luágu lágu, ába laríjin gürígia ligía láu goúnigi, ába lareídagun, ába laríjini sun cátei furáangu. ²⁶ Ába loúnajani Jesúsu águyu, aríñageina lun.

—Mebélurabátia ubúrugun, maríñagunbeíme lun ni ában ñi.

Laríñaguni Pédro luágu Jesúsu lan Crístubei
(Mt 16.13-20; Lc 9.18-21)

²⁷ Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugun Cesaréa le Filípo. Úmada, ába lálügüdüniña láni disípulugu, laríñaga joun.

—¿Cátanatan jaríñagun gürígia?

²⁸ Ába jóunabun.

—Añájein aríñagutiña luágu Juan lan le abásteragüdjabei lan amúrü, jíbiri aríñaga proféta Elías ban, añájeingua aríñagutiña luágu ámu lan proféta amúrü.

²⁹ Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amúrü Crístubei, le loúnajabei Búngiu lun lasálbaruniña gürígia lídaangiñe jafígoun.

³⁰ Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen
(Mt 16.21-28; Lc 9.22-27)

³¹ Ába lagúmeserun Jesúsu, le Wügúri Garaúwarügüti, arúfudaja joun luágu lúnti lan lasúfurirun sarágu, luágu weírubei lan jíchugun wügúriña weírígutiña lídan jafíñen juríu

mebéreseni láu, ítara lúba gíñe jóuseruni jábutigu fádirigu jáma arúfudajatiña lilúrudun Moisés. Aríñagati joun luágu láfarúaba lan jilágubei, áni lásaaruba lan lídaangiñe ouweni lúnya labágaridun luágu lúruwan wéyu. ³² Furáanguti laríñaguni le joun. Ábati lanúgüni Pédro Jesúsú ñígiñe, ába lagúmeserun adeñja lun. ³³ Ába lagáragun Jesúsú, ába laríjin jawágun láni disípulugu, ába lébechuni Pédro, ába laríñagun lun.

—¡Díseba nueí, Máfia! Bugúya, masáminaruntibu quei Búngiu, basáminarun quei wügúriña.

³⁴ Ábati lagúarun Jesúsú joun láni disípulugu jáma jíbiri gürígia lun jayárafadun lun, ába laríñagun joun.

—Le buséti lafálarunina, buléileí cáteñein lan, awándaleí sun luwúyeri asúfuriruni le lúnbei liábin lun nueígiñe queísi lanúgüni ában wügúri lugúruwan, falálana. ³⁵ Ladúga le abúseeruti leséfuragun lúngua ya ubouágu leféri-dirubei ibágari le magúmuchaditi, ánjeinti le ánjabei leféri-diruni libágari ya ubouágu nueígiñe, libíjubei ibágari le magúmuchaditi siélu. ³⁶ ¿Cági ju lan lun gürígia lagáñeiruni sun le lánina ubou, leféri-direime lubára siélu? ³⁷ Úati ni cáta lánina ubou le áuti gayára lan lagáñijan gürígia lubára siélu. ³⁸ Le anúgüti busíganu nuágu lúma luágu nerérun jagíbugiñe gürígia múaraantiña áni gafígountiña ja, nanúgüba gíñe busíganu láu, áu le Wügúri Garaúwarügüti, dánme le niábin siéluigiñe láu luweírigun Núguchi, geyégu jáu ánjeligu ja sándubaña.

9

¹ Aríñagati gíñe Jesúsú joun.

—Nínarün jáu, luágu añájein lan jádaangiñe ja yábaña guetó, moúnwenbaña darí jaríjini lachúlürün larúeijan Búngiu láu ubáfu.

Lámuñedagun laríjin Jesúsú

(Mt 17.1-13; Lc 9.28-36)

² Sísi wéyu lárigiñe, ába lanúgüni Jesúsú Pédro, Jacóbo, lúma Juan, ába lídin jáu luágu ában wúbü íñuti le ñí lumuti gayára lan jábugua jamá, ába lámuñedagun laríjin ñi jagíbugiñe. ³ Ába támiridun lanáangun jarú quei jeméreedu, weíriti tíjarun chülú lúmoun úa jamá ni gürígia ubouágu gayáraati jachíbun gamísa lun tájarudun ítara. ⁴ Ába jaríjini Elías lúma Moisés ayánuja lúma Jesúsú, ⁵ ába laríñagun Pédro lun Jesúsú.

—Maésturu, ¡lídán dan awánja lan ya! Adúga wamá úruwa dibásein, ában bun, ában lun Moisés, ában lun Elías.

⁶ Laríñagubaalin líra ladúga janúfude disípulugu, áni ibídiñeti lun Pédro ca lan laríñagubei. ⁷ Ába larárirun ában juánriñu le ñíjin jabeí, ába ladáuragun jáu, ába lagaambúniwa ában umálali lídaangiñe juánriñu ligía le aríñagubei.

—Niján Niraú le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügüya Jesúsú.

⁹ Dan le arárireina jamá lueígiñe wúbü, ába léredun Jesúsú jawágu lun mabájüdagun jamáni le jaríjibebei lun ni ában daríme saráali lídaangiñe ouweni lúnya labágaridun, ligía le Wügúri Garaúwarügüti. ¹⁰ Ligía jareídunbalin jádaangua, álügüdajárügütiña jámagua cátei lán funa ásaarunibebei lídaangiñe ouweni. ¹¹ Ábati jálügüdüni Jesúsú.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñúbin furúmiñe áni laráanserubei lan sun cátei. ¿Cági taríñagubei Lerérun Búngiu nuágu, áu le Wügúri Garaúwarügüti? Aríñagatu luágu nasúfuriruba lan sarágu áni mabájüdüñbadina lan. ¹³ Naríñajare jun luágu ñúbinjali lan Elías, ába jadúgüni gürígia sun le jabúseerunbei láu, quei taríñaguni Lerérun Búngiu luágu ítara lúba lan lasúseredun lun.

Lareidaguagüdüün Jesúsu ában irájü gawáguti espíritu wuríbatí
(Mt 17.14-21; Lc 9.37-43)

¹⁴ Lárígiñe, ába jagíríbudun le ñíjin jabeí jíbiri disípulugu, ába jaríjin sarágu gürígia geyégu jáu. Ñíñanu gíñe arúfudajatiña lilúrudun Moisés asígeneja jáma. ¹⁵ Dan le jaríjinbalin Jesúsu, ába laweíridun janígi láu jaríjini ñi, ába jeíbaagun abúsura lun.

¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába loúnabun ában jádaangiñe ja ñíbaña, ába laríñagun.

—Maésturu, niján niraú nanúgün bun, níjein ában espíritu wuríbatí luágu, merérun-jali ladúga. ¹⁸ Ñí lumuti lárügüdei espíritu wuríbatí ligía, lájuchuruni múarugun, ába láfurijan jacútaü liyúmulugugiñe, ába lacúnrinjan lári. Ledébiliduñati ítara. Amúria-jadina jáma báni disípulugu lun jaságaruni espíritu wuríbatí le lueí, siñá jamuti.

¹⁹ Ába loúnabun Jesúsu, ába laríñagun.

—¿Gürígia maffíneraditiña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha maffíneni le jídaanbei? Barújumei irájü ligía ñájoun.

²⁰ Ába janúgüni lun. Dan le laríjinbalin espíritu wuríbatí ligía Jesúsu, ába louwe-jagüdüni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe. ²¹ Ába lálügüdüni Jesúsu lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe ñúraügili. ²² Gíbeeli weíyaasu lájuchuruni espíritu wuríbatí ligía wáturugun o dúnarugun lan lún yebe láfaruni jilágubei. Ánjein lubeíti níjein lubeí gayára bumúti adúga, gudéme wamá bun, íderagua báwa.

²³ Ába laríñagun Jesúsu lun.

—¿Ca uágu bariñaga ítara? Ináriini luágu gayára lan nadúgüni. Sun cátei gayáraati lun le affínebei.

²⁴ Ába lagúaragun lúguchi irájü ligía.

—¿Affíñetina, íderagua bána lúntima naffínerun!

²⁵ Dan le laríjinbei Jesúsu luágu furésetimájali lan jagíbedun gürígia, ába ladeínjan lun espíritu wuríbatí ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabeí irájü le áni mebéluradügüyabá lídoun.

²⁶ Ába lagúaragun espíritu, ábaya louwe-jagüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan. ²⁷ Ába lárügüdüni Jesúsu lueígiñe lújabu, ába liñúraguni, ába laráramun.

²⁸ Ábati lebélorun Jesúsu múnadoun, ába jálügüdüni láni disípulugu dan le jábuguarü-gaña lúma, ába jaríñagun lun.

—¿Cásan uágu siñá wabalin espíritu wuríbatí ligía aságara?

²⁹ Ába laríñagun joun.

—Ladúga líbe espíritu le, láu rügúñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsu luágu loúnwen
(Mt 17.22-23; Lc 9.43-45)

³⁰ Dan le jóudin ñígiñe, ába jáségürün Galiléagiñe, ³¹ mabúseeruntiti Jesúsu lun lasúbudirúniwa jalíñañein lan ladúga larúfudajaña lan joun láni disípulugu, aríñageina ligía luágu ledéregerúaba lan, ligía le Wügúri Garaúwarügüti, jájaburugun wügúriña wuríbatíña áni jáfarubei lan jilágubei, ábame lásaarun lídaangiñe oúweni luágu lúruwan

wéyu lúnya labágaridun. ³² Úati gunfaráanda jamáni le laríñagubei joun, áni janúfude-tiña lun jálügüdüni.

¿Cátima weírigubei?

(Mt 18.1-5; Lc 9.46-48)

³³ Ába jachúlürün ubúругu Capernaúm, múnada, ába lálügüdüniña Jesúsu.

—¿Cásan buga uágu jadímureja le eíbugeina jumá?

³⁴ Ába jeréderun maníñu ladúga úmada adímurejeina jañá buga luágu ca lan já-daangiñe weírigutimaabei. ³⁵ Ábati lañúurun Jesúsu, ába lagúarun joun dúusugubei disípulugu lubádun, ába laríñagun joun.

—Le abúsueruti ligía lan furúmiñeti, lúnti agúmujóuni lan jádan súnugubei, lun gíñe lesériwidun joun súnugubei.

³⁶ Ába lanúgün ában irájü, ába líchuguni jamídaangua, ába lanúgüni lújaburugu, ába laríñagun joun.

³⁷ —Gürígia le erésibiruti ában irájü quei le lídan níri, resíbi lumútina, áni máma rügúñein áu lerésibira, resíbi lumúti gíñe Núguchi le óunajabalina.

Le mámabei wágani, wámagiñeñein

(Lc 9.49-50; Mt 10.42)

³⁸ Ába laríñagun Juan lun.

—Maésturu, aríjatiwa ában wügúri aságajati espíritugu wuríbatiña lídan bíri, quei máma lan wámañein, ába wawéridiruni lun madúgüdügya láani.

³⁹ Ába laríñagun Jesúsu.

—Mawéridira jumeí, ladúga úati ni ában le adúgüti miláguru lídan níri lun ladímurejan wuríba nuágu. ⁴⁰ Le mámabei wágani, wámagiñeñein. ⁴¹ Ninárün jáu luágu furúmieguarügü lan le íchuguti ában wéru dúna jun lídan níri ladúga láni jumá Crístu, libíjuba afáyeiruañá buíti.

Góunigi lueí leíquadúniwa lídoun figóu

(Mt 18.6-9; Lc 17.1-2)

⁴² ‘Furúmieguarügü le afígoungüdüti ában jádaangiñe ja isérigiñabaña lídan jafíñen nuágu, buítimaati jamúga lun lún lágurúniwa baránajoún láu ában óunwenbun dúbü le amúligüleí güiráñu luágu ligína sügü láu ladúgüni cátei líra. ⁴³ Ánjabu lafígoungüda bújabu guánarü, buítimaati jamúga lun báchuguni, ladúga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin, ⁴⁴ ní lubei moúnwen jamá jéweraü ja eígibalin jágubu jiláaña, méneguchadi wátu. ⁴⁵ Ánjabu gíñe lafígoungüda bugúdi guánarü, buítimaati jamúga gíñe lun báchuguni, ladúga buítimaati jamúga bebélurun siélun láu ában ugúdi sügü láu badarún máfiougatin láu biángubei bugúdi, ⁴⁶ le ní lubei moúnwen jamá jéweraü, méneguchadi ligía wátu. ⁴⁷ Ánjabu gíñe lafígoungüda bágu, buítimaati lun baságaruni, ladúga buítimaati jamúga bebélurun lídoun larúejan Búngiu láu ában águu sügü láu jamúga badarún máfiougatin láu biángubei bágu, ⁴⁸ le ní lubei moúnwen jamá jéweraü, méneguchadi ligía wátu.

⁴⁹ ‘Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdüniwa, queísigubeirügü líchugúniwa sálu luágu cátei adágaragüdüwati lun Búngiu, arúfuda lámuga luágu jarúma lan, buídu ligía lun lareidúniwa. ⁵⁰ Buíti sálu, ánjein lefériðira lubásuan, ¿cábagi un ju lan? Ítara líña lubeíti, awánda jumeí sun uchúni lubá jarúmadun ligíbugiñe Búngiu, lídan jumá úraguni júmagua.

Larúfudajan Jesúsu luágu ígiraguni

(Mt 19.1-12; Lc 16.18)

¹ Ába láfuridun Jesúsu Capernaúmgiñe, ába lídin loúbawagun Judéa lúma luágun oúbaü le ñígiñe lubeí láfuacha wéyu libíti dúna le Jordán. Ábaya jóundaragun güriégia le ñí lubei, ábaya larúfudajan joun queññaja ligáburi. ² Ábati jayábin jádaangiñe fariséogu luágun Jesúsu áluga járügüdüni tídan jasáðaran láu jálügüdüni ánjein maríban lubeí lun lafánreinragun wügúri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladúga tidére janígi. ⁶ Ánjein méja, dan le ladúgünbalin Búngiu sun cátei, “adúga lumútiña wügúri túma wúri”. ⁷ “Ligía lígirubei lubeí wügúri lúguchi túma lúguchu lun laganoúniwa túma lúmari, ⁸ ábame jeréderun quei ábanrügü.” Mámána lubeíti biáma, ábanrügaaña. ⁹ Ligía moún lubei lafánreinraguni wügúri le ladúnraguagüdübei Búngiu.

¹⁰ Dan le múnada jamá, ábaya jálügüdüni disípulugu luágu cátei le, ¹¹ ába laríñagun Jesúsu joun.

—Le ígirutu lúmari, ába lagámaridun ámu, ladúgüña adultériu. ¹² Ánjein gíñe tígira wúri túmari, ába tagámaridun ámu, tadúgüña gíñe adultériu.

Labíniruniña Jesúsu irájüñü

(Mt 19.13-15; Lc 18.15-17)

¹³ Ába janáajan güriégia irájüñü lun Jesúsu lun lagúurun jawágu, ába jagúmeserun disípulugu adeñja joun ja anáajabaliña. ¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladúga ja jarúmabaña affñe quei irájüñü, jagía lílanabaña larúeijan Búngiu. ¹⁵ Ninárün jáu luágu le lan marúfudunti ában igáburi únabugubuti queísi ában irájü, siñábei lebélorun lídoun larúeijan Búngiu.

¹⁶ Ába lanúgüniña lújaburugu, ába labíniruniña láu lújabu jawágu.

Ladímurejan ában rísiti lúma Jesúsu

(Mt 19.16-30; Lc 18.18-30)

¹⁷ Dan le lasígirunbalin Jesúsu luweýyasun, ába liábin ában wügúri eíbaagueina lubároun, ába lájuduragun ligíbugiñe, ába lálügüdüni ítara.

—Maésturu buíti, ¿cásan cátei buíti lúnbei nadúgüni lun nibíjini ibágari le magúmuchaditi?

¹⁸ Ába laríñagun Jesúsu lun.

—¿Ca uágu bariñaga nun “buíti”? Ában rügúñein buíti, Búngiu. ¹⁹ Subúditi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña güriégia, inébe jamá bagúbürigu bun.”

²⁰ Ába laríñagun wügúri ligía.

—Maésturu, gúnfulitina láu sun le lúmagiñe ñúraügidina.

²¹ Ába laríaguni Jesúsu láu ínsiñeni, ába laríñagun lun.

—Ában cátei mégeibei lun badúgüni. beíba, alúgurabeí sun le búmabei, ábame bíchuguni lebégi joun gudémetiña, ábame bibíjin irísini siélu. Ábame bagíribudun, ábame bafálarunina.

²² Dan le lagáambunbalin güriégia le cátei le, ába lírudagun, ába lídin láu íruni ladúga rísiti buídu. ²³ Ába laríjin Jesúsu geyégu jawágun súngebui, ába laríñagun joun lání disípulugu.

—¿Jénreenguti lun jebélorun rísitiña lídoun larúeijan Búngiu!

²⁴ Ába laweíridun janígi disípulugu láu le laríñagubei, ábaya laríñagun joun.

—Nirájüñü, jénreenguti lun jebélurun ja íchubalin jafíñen luágu jarísin lídoun larúeijan Búngiu! ²⁵ Méreenguntimaati lun ában caméyu lun lásügürün lídaangiñe lujúyun ában agúsa sügú láu lebélorun ában rísiti lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába laríaguniña Jesúsu, ába laríñagun joun.

—Siñáti jasálbaragun güriquia jóungua, ánjein Búngiu, gayáraati, ladúga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsu.

—Ninárun jáu luágu furúmieguarügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni, ³⁰ lerésibiruba san weíyaasu sügú láu guetó lídan uboú le. múna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajoúniwa, resíbi ligíame íbágari magúmuchaditi siélu. ³¹ Sarágu jáña ja furúmiñetiñábaña guetó, jagíaba agúmujóuni yágüta siélu, áni sarágu ja agúmujóunibaña, jagíaba furúmiñetiña.

Ladímurejaanya Jesúsu luágu loúnwen

(Mt 20.17-19; Lc 18.31-34)

³² Luáguñanu úma lun Jerusaléoun, Jesúsu jabá jabá láni disípulugu, láuñanu luweírin anígi, áni jíbiri güriquia ja afálarubaliña, láuñanu anúfudei. Ábayati ladíñurun Jesúsu jáu láni dúusu disípulugu jaweí jíbiri güriquia, ába lagúmeserun aríñagei le lúnbei lasúseredun lun joun. ³³ Ába laríñagun joun.

—Quei lubeí jaríjini, luáguñadiwa úma lun Jerusaléoun, le ñíba lubeí nedéregerúa, áu le Wügúri Garaúwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiádirunina lun noúnwen. ³⁴ Ábame jedéregerunina joun ja mámabaña juríu lun jéjerajan náu, jabeíchubadina, jásueragubadina, ábame jáfarunina jilágubei, luágume lúrüwan wéyu, ábame násaarun lídaangiñe oúweni lúnya nabágaridun.

Jamúriajan Jacóbo lúma Juan ában fuleísei

(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badúgün ában fuleísei woun.

³⁶ Ábati laríñagun joun.

—¿Cági jabúseerubei lun nadúgün jun?

³⁷ Ába jaríñagun lun.

—Lun dánme lan barúeijan láu sun buweírigun, lun bañúragüdüníwa, ában lueígiñe boúnwenren, ában lueígiñe bubaúna.

³⁸ Ába laríñagun Jesúsu joun.

—Íbidiñeti jun ca lan jamúriajabei. ¿Gayáraabei jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

³⁹ Ába jóunabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun jañúurun ában lueígiñe noúnwenren, ában lueígiñe nubaúna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan.
⁴² Ába lagúarun Jesúsu joun súngebui lubádun, ába laríñagun joun.
 —Quei jasúbudirun, ja agúmadijabaña jádan ja mámabaña juríu, arúfudaguatiña jóun-gua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ⁴³ Ánjein jádan, máma lúba, le abúseeruti lun weíri lan jádan, lúnti lesériwiduniña jíbiri. ⁴⁴ Furúmieguarügü jádaangiñe le abúseeruti lun ligíaba lan furúmiñeti, lúnti idámuni lan joun jíbiri, ⁴⁵ ítara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu gürígia.

Lareídaguagüdüni Jesúsu Bartiméo, le maríjinbei
 (Mt 20.29-34; Lc 18.35-43)

⁴⁶ Ábati jachúlürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti gíríti Bartiméo, liraú Timéo, ñun láru úma amúriaja seínsu. ⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladúgawagun Davíd, gudémená bun!

⁴⁸ Sarágu jáña adeínjatiña lun lun lámanichun, ligíatima lagúaragun.

—¡Ladúgawagun Davíd, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun maríjinti ligía, ába jaríñagun lun.

—Ragúba gurásu, sarába, lagúajaña bun.

⁵⁰ Ába lachúürunun labíte, ába ladúgün ában chubaú, ába layárafadun lun Jesúsu.

⁵¹ Ába lálügüdüni Jesúsu.

—¿Ca babúseerubei nadúgün bun?

Ába louñabun maríjinti ligía.

—Maésturu, buséntina naríjin.

⁵² Ába laríñagun Jesúsu lun.

—Gayáraati bídin, areídaguaadibu ladúga afíneedibu nuágu.

Lídan óra ligía, ába gayára lan laríjin maríjinti ligía, ába lídin lárigi Jesúsu.

11

Lebélorun Jesúsu Jerusaléoun
 (Mt 21.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachúlürün ligíbugiñe fulásu buri le Betfajé lúma Betánia, le únabubei libíti wúbü le Olívos, ába laríñagun Jesúsu joun bíama jádaangiñe láni disípulugu.

² —Jeíba lídan liraúraü fulásu le wagíbugiñebei, dánme le jachúlürün ñi, jadáriruba ában burígü güráñu le maweinjoungili ni ában weíyaasu. Jafáragadeíme, ábame janúgüni ñájoun. ³ Ánjaün álügüdúwa ca lan uágu jadúgei le, jaríñagame lun luágu busén láni Jesúsu, luágu láguyugüdübei lan furése.

⁴ Ába jóudin, ába jadáriruni burígü ligía güráñu lubádu ában béna, boúgudi lídan úma, ába jafáragaduni. ⁵ Ába jaríñagun jádaangiñe ja ñíbaña úmadarugu joun.

—¿Ca jadúgübei? ¿Cáme jafáragadei burígü le?

⁶ Ába jóunabuniña quei laríñaguni Jesúsu joun, ába jígiruniña lun jóudin láu. ⁷ Ába janúgüni burígü lun Jesúsu, ába jíchugunun jabíte luágu burígü ligía, ába laweíruni Jesúsu. ⁸ Sarágu jáña átulerutu jabíte luágu úma, jíbiri, ába jánchuan tilímun wéwe, ába jachágajani luágu úma lubá lásügürün Jesúsu ligíbuagugiñe.

⁹ Ja ubáraübaña jáma ja árigibaña, ába jagúmeserun agúaraja.

¡Glória! ¡Biníwati wügúri le ñúbinbei lídan líri Wabúreme Búngiu!

¹⁰ Biníwati arúejani le ñúbinbei, le lúnbei ítara lan queísi meja larúeijan wáguchi Davíd. ¡Uweírighuni lun Búngiu lídan líñun-ágei siélu!

¹¹ Lárighne, ába lebélorun Jesúsu Jerusaléoun, belú ligía témpulurugun, lárighne laríjini sun cátei, ába lídin Betánia jáu dúusu disípulugu ladúga dárüjali lan.

Líñaraguni Jesúsu tídibu ígo to mínboun

(Mt 21.18-19)

¹² Larúgan, dan le jáfuridunbei Betániagiñe, ába lálámachun Jesúsu. ¹³ Dísegiñe, ába laríjin ában tídibu ígo gabánatu. Ába lídin aríja ánjein gin tubeí, ubánaü rügúñein ladárra tuágu ladúga mámagili lan tidáani ígo. ¹⁴ Ábati laríñagun Jesúsu lun tídibu ígo ligía.

—Magíindadügüyabá.

Ába jagáambuni láni disípulugu.

Larúmadagüdünnun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárighne, ába jachúlürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun. ¹⁶ Mígirun lumútu témpulu lun úmame. ¹⁷ Ába laríñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ní lubei gayára lan jayúmuragun sun gürígia nun, ánjein jugúya, barú jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jilágubei, ladúga janúfudetiña lueí, quei sun lan gürígia weíríti janígi luágu le larúfudajabei. ¹⁹ Dan le lagúñedunbei, ába láfuridun Jesúsu fulásurugugiñe.

Tídibu ígo to ásaürüboun

(Mt 21.20-22)

²⁰ Larúgan bináafin, sügúti Jesúsu jáma láni dúusu disípulugu lueígiñe méme úma ligía, ába jaríjinun tídibu ígo saúja lúmagiñe tílagüle. ²¹ Ába larítaguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saúja!

²² Ába laríñagun Jesúsu joun sùngubei.

—Affíne jumá luágu Búngiu. ²³ Ninárün jáu luágu furúmieguarügü lan le aríñaguti lun wúbü le. “Gidába yágiñe, dabúba baránajoun”, ánjein úa lubeí liloúguan affíneni tídan lanígi áni affíne ligía luágu lagúnfuliruba lan le laríñagubei, ítara lúba. ²⁴ Ligía naríñagunbei jun luágu sun lan le jamúriajan lúma Búngiu, ánjein affíne jubeí luágu resíbi jumáali lan, ítara lúba. ²⁵ Dan le jayúmuraguña lan lun Búngiu, ánjein níjein lubeí ladúga ában gürígia jun le mísiñeti jun, ferúduna jumeí lun gíñe ferúduna lánün Júguchi Búngiu le siélubei. ²⁶ Ánjein úa ferúduna jumá, úabei gíñe ferúduna láani Júguchi Búngiu le siélubei jífígoun.

Lugúmadin Jesúsu

(Mt 21.23-27; Lc 20.1-8)

²⁷ Ába jagíribudun Jerusaléoun. Dan le efbugeina lubeí Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügúriña ja weírighutiña lídan jafíñen juríu, ²⁸ ába jálügüdüni.

—¿Cáteisán biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóunaba, naríñagubei jun ca lan áu gumádi nadúgei buri cátei le. ³⁰ ¿Ca óunajabalin Juan abásteragüdaja? ¿Búngiu, ódi wügúriña?

³¹ Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu maffínerun wabeí lun Juan. ³² ¿Ódi waríñaguba funági luágu jóunajan lan wügúriña?

Lun jamúga jóunabun ítara, janúfudetiña jaweí gürígia, ladúga subúdi jamáni sun gürígia luágu proféta lán Juan. ³³ Ábati jaríñagun lun Jesúsu.

—Íbidiñeti woun.

Ábati gíñe laríñagun Jesúsu.

—Maríñagun nubeí gíñe jun ca lan áu gumádi nadúgei cátei le.

12

Jémpulu jawáguti ñadágimeintiña wuríbatíña

(Mt 21.33-46; Lc 20.9-19)

¹ Ábati lagúmeserun Jesúsu adímureja joun gürígia ja ñíbaña láu jémpulu, ába laríñagun joun.

—Ñíñein meja ában wügúri, ábunaguti tídi bu beíbei lufúlasunrugu. Ába ladúgün baríeru láu, adúga ligía ában ágei lun laríñichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adúga weíyaasu. ² Dan le lachúlürünbei dan lun alúbajani, ába loúnajan ában lumúsun amúriajei lufánran jámagiñe ñadágimeintiña. ³ Ábarüga járügüdüni músu ligía, ába jabúleiseiruni, ába jóunajani lárigoún, míchutiña ni cáta lun. ⁴ Ábaya loúnajan labúreme ichári ábanya músu, ába jíchaagun dúbü luágu, bougua jameí lábulugu, anába. ⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraú jínsiñeti lun buídu, lagúmujoún óra ába loúnajani, ába larítagun luágu inébebei lan joun ladúga liraú lan. ⁷ Ába jaríñagun ñadágimeintiña jámagua. “Niján le lúnbei libíjini alágan, wáfaraali jilágubei, wagía lámuga labúriña sun cátei.” ⁸ Ábati járügüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábati ladúga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérun Búngiu nuágu? Taríñajare.

Lé meja dúbü le mabúseerun jabeí ábunagutiña, ligíaali furúmiñeti.

¹¹ Wabúreme Búngiu adúgübalin lun furúmiñetibeí lan, áni aríja wamúti quei ában cátei weíriguti.

¹² Ába jabúseerún yebe jadáürüni Jesúsu ladúga jasúbudiruni luágu jawágu lan layúsurei jémpulu le. Quei janúfudebei jaweí gürígia, ába jígiruni lúngua, ába jóúdin.

Luáguti lafáyeijóun seínsu lun gumádi

(Mt 22.15-22; Lc 20.20-26)

¹³ Lárigiñe, ába jóunajóuniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lidúnrunme.

¹⁴ Ába jayábin, ába jaríñagun lun.

—Maésturu, subúditi woun luágu aríñaga báani inárüni, manúfudeiga lueí ni ában ladúga ni cáta lan luweírigun gürígia bun, áni barúfudajani lémeri Búngiu láu inárüni.

Áríñagabá ában cátei woun. ¿Búitisan lun lafáyeijoún seínsu lun warúeite le Rómana ódi mabuídunti?

¹⁵ Subúdi lumúti Jesúsu luágu biánguañein lan jagíbu, ába laríñagun joun.

—¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janúgüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jaríñagun lun.

—Láni urúei Rómana.

¹⁷ Ába laríñagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

Álügüdajani libúgürü ásaaruni lídaangiñe ouweni

(Mt 22.23-33; Lc 20.27-40)

¹⁸ Ába jóudín fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe ouweni. Ába lubeíti jaríñagun lun.

¹⁹ —Maésturu, aríñagatí meja Moisés luágu ánjein lan ouwe ában wügúri le maríeiti masáaniguga táu lúmari, lúnti lan lamárieidun lamúlen túma wúri to ueíboun loúwe, lun gasáanigu lan táu lun líbugaña le ouwebei. ²⁰ Níñanu mejati sédü gamúlenuguátiña, le furúmiñeti, ába lamárieidun, ába loúnwen marájüñüga. ²¹ Le jabíaman, ába lamárieidun túma wúri tó buga lúmari líbugaña, ába gíñe loúnwen marájüñütiña, ligía méme asúsereda lúma le júrüwan. ²² Maríeitiña sédügubei jagía túma, úati ni ában garaúti táu. Lagúmujoún óra, ába gíñe toúnwen wúri tugúya. ²³ Niján le uágubei wálügüdaja. Dánme le jásaarun jiláaña lídaangiñe ouweni lúnya gabágari jamá, ¿cábagi úmari wúri tugúya jádaangiñe sédü gamúlenuguátiña ja, lárigiñe maríei jamá sun jagía túma?

²⁴ Ába laríñagun Jesúsu joun.

—Bulfeiguatün ladúga libídiñe tuáguti Lerérun Búngiu jun, ni luáguti lubáfu Búngiu.

²⁵ Dánme le jásaarun jiláaña lúnya jabágaridun, ámujalime jabágarí, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

²⁶ Ánjeinti luágu sará jamá jiláaña lúnya jabágaridun, ¿malíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.” ²⁷ Ítara líña lubeíti, ánjein jamúgati jiláañu jáña wügúriña jagía lun sun dan, maríñagunti jamúga Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wínwangiña. Ítara líña lubeíti, jugúya weíriti jabúlieidágun.

Gumádi le weírigutimaabei

(Mt 22.34-40)

²⁸ Níñein ában jádaangiñe arúfudajatiña lilírudun Moisés le agáambubalin jadímurejan, queíti subúdi láani luágu ónaba lániña Jesúsu buídu, ába liábin lubároun, ába lálügüdüni.

—¿Cáteisan lídaangiñe lilírudun Búngiu weírigutimaabei?

²⁹ Ába laríñagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügúñein Abúremein. ³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei,

³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí bíama le.

³² Ába laríñagun arúfudajati ligía lun.

—Buíti baríñaguni, maésturu. Binárün luágu ában rügúñein lan Búngiu, luágu úa lan ámu, ³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun gíñe jínsiñe jamá wíbirigu woun queísi wínsiñegua woúngua. Gebégiti sun líra ligíbugiñe sügú láu sun wadágaragüdün lun lúma sun cátei le agudúbei luágu latáru.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

¿Ca adúgawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágu ladúgawagun lan David Crístu? ³⁶ David guánarügü láu lubáfu Sífiri Sándu aríñagati ítara.

Laríñajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladúgawagun lan David Crístu ánjein wa lubálin David guánarü Crístu, “Nabúreme”?

Ába jagáambuni bürúbünu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Toúnigi jumátia jaweí arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsurúniwa joun úmada láu sarágu inébesi.

³⁹ Áluaja jamúti jalaú le jála weírigutiña tídan jalígilisin juríu, lúma lubuídun-ágei ubaráü lídan eígni. ⁴⁰ Gídá jamutu jában würíña ja jiláaña úmari jaweí, lúnti jadáuragun láu sun líra, ába jadúgün afúrieiduni le migínaguti. Weíribei jasúfurirun luágu sun le jadúgübei.

Tedéweejan fugiábu wúri to jiláali túmari, lun Búngiu

(Lc 21.1-4)

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gíbetiña rísitiña íchugutiña sarágu seínsu.

⁴² Ligía tiábin ában fugiábu wúri to jiláali túmari, ába tíchugun bián gáwanün tídoun gáfu tugúya. ⁴³ Ába lagúarun Jesúsu joun láni disípulugu lubádu, ába laríñagun joun.

—Nínárün jáu luágu gíbetima lan tíchugun wúri to sügú jáu sun ja íchugubaña seínsu tídoun gáfu to, ⁴⁴ ladúga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawínwandun.

13

Laríñagun Jesúsu luágu tagúnrinchawagúba lan témpulu

(Mt 24.1-2; Lc 21.5-6)

¹ Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dúbü le áubei tadügúwa!
¡Máma tanárime buri!

² Ába loúnabuni Jesúsu.

—¿Aríagu jíña tun tanárime témpulu to? Merédebeítia ni ában dúbü ligíbuagu ában, lagúnrinchaguba sun le.

Seíni buri lubáragiñe lagúmuchun uboú
(Mt 24.3-28; Lc 21.7-24, 17.22-24)

³ Ábati jóúdin luágu wúbü le gíríbei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülújali lan dan lun lagúnfulirun sún buri cátei le?

⁵ Ába laríñagun Jesúsu joun.

—Toúnigi jumá, mayéedagualaún ni ában, ⁶ ladúga sarágujaba ñúbintiña, jaríñagame. “Áu Crístubei”, áni sarágujaba jayéedun.

⁷ Jugúya, dánme le jagáambuni lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá, ladúga ñíbei wuríbu súnwandan, mámagili lagúmuchun uboú líra. ⁸ Lageíndaguba ában fulásu lúma ában, awúribuja ligíame ában ageíraü lúma ámu. Ñíbei jarabaganáli lídan sarágu fulásu, ilámaü, chagáguauí, áni súnme buri cátei le, lagúmesejarügügilime le lúnbei lasúfurirúniwa.

⁹ ‘Toúnigigua jumá júngua ladúga jedéregerúaba lun lúrudu, ábame jabúleiseirunün tídan buri jalígílisin juríu, janügúba lun jagúseragüdúniwa jagíbugiñe gumádimatiña lúma jagíbugiñe urúeigu, nueígiñe, ítara lúba gayára lan jadímurejan nuágu, jagíbugiñe. ¹⁰ Lubáragiñe lagúmuchun uboú, lapúrichijóuba ugánu luágutí asálbaruni lídan sun fulásu. ¹¹ Dánmeti le janügúniwa lun jedéregerúniwa joun lúrudugu, magíbedalá jarítagun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladúga mámaba jugúya adímureja, Sífiri Sándu, ligíaba adímureja. ¹² Jedéregerubaña wügúriña jamúlenu jáma jábugaña lun jáfarúniwa jilágubei, deréga jamáñame agúbürigu jasáanigu, jagáraabaguba isáanigu jawágun jagúbürigu lun jedéregerúniwa lun jáfaruniwa jilágubei. ¹³ Jiyéereguduba lun sun uboú nueígiñe, le asígiruti úragu darí lúmoun lagúmujoún, lasálbaruba.

¹⁴ ‘Abúrújati proféta Daniél luágu cátei iyéereguti le gagúnrinchaguagüdadíbei, dánme le jaríjini cátei ligía le ñí lubei moun lan lun ñi lan—le alíjabei, gunfaráandalá—jámestia Judéabaña, lúntimétia janúrajan luágun wúbü. ¹⁵ Le gürígia le bougudíbei, mebélura látia múnadoun aságara ni cáta, ¹⁶ le áraabubei, magíribudalá águyu ni anúgoun lanáangun. ¹⁷ Fugiábugume wúríña ja dageínatiña lídoun wéyu ligía jáma ja garájüñütiña ja gurágiña. ¹⁸ Amúriaja jumá lúma Búngiu lun máma lan lídan lidáani lidíliga jeíbaagua, ¹⁹ ladúga lidáaníbei asúfuriruni quei le masúseredungili lúmagiñe ladúgüni Búngiu uboú, masúseredundügüyaalime giñe lárigiñe. ²⁰ Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

²¹ ‘Ánjeinti aríñawagua jun. “Aríja jumá, niján Crístubei”, o “Nirán”, maffñera jumá, ²² ladúga jayábiba eyéejatiña aríñaga jawóguá luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadúgüba seíni lúma miláguru lun jayéedaguniña ásta ja anúadaja láañabaña Búngiu ánjein gayára. ²³ Aráanseñu jumá, rúnaadün luágun jugúdi.

Ída lúba lan ligáburi lagíribudun Crístu uboúagun
(Mt 24.29-35, 42-44; Lc 21.25-36)

²⁴ ‘Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjalime játi. ²⁵ Jeíguaduba warúguma siélugiñe, ábame ladádagarun sun siélu. ²⁶ Ábameti naríjiniwa, áu le Wügúri Garaúwarügüti, niábin lídan juánriñu láu óunwenbun ubáfu lúma uweíriguni, ²⁷ ábame noúnajaniña ánjeligu oúndaraña sun ja nanúadajabaña lídaangiñe gádürü larígei uboú, lúmagiñe lidíse-ágei uboú darí lúmoun lidíse-ágei siélu.

²⁸ ‘Gunfaráanda jumeí jémpulu le tuáguti tídibu ígo. Dan le ñulúgili tilímun, ába labouchun tubána, subúdi jumúti luágu níteeli lan lidáani lubáchouga. ²⁹ Ítara meme, dánme gíñe jaríjini sún buri cátei le, subúdi jumeí luágu yaráfaali lan niábin. ³⁰ Ninárün jáu, luágu lagúnrinchawagúba lan sun ubúrugu le Jerusalén lubáragiñe jóúwegun gürígia ja lánina dan le. ³¹ Lagúmuchaguba siélu lúma ubou, ánjein nerérun, merédebei magúnfulirunga.

³² ‘Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraú, Búngiu rügúñein le Úguchili asúbudirei.

³³ Lúnti lubeíti agágudúañu jumá, aríaaja, ayúmuragua lun Búngiu, ladúga ibídiñeti jun ídame lan lachúlúra óra ligía. ³⁴ Ítara lúba quei ában wügúri le ñúdünbei luágu ában weíyaasu díse, lubáragiñe láfuridun lúbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun loúnigirun. ³⁵ Áu queísi tabúreme múna tugúya, furésebei nagíríbudun. Agágudúañu jumá lubeíti, ladúga ibídiñeti jun cába lan óra nachúlúra, ánjein gúñounba lubeí lúmoun áriebuba lan, o lubá lan larúgan o bináafin lan, ³⁶ ñúbindügü níñein sódini, ábame nadárirunün arúmuga. ³⁷ Le naríñagubei jun aríñaga numúti joun súngubei. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

¹ Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejíptona, máfarawaguntiña jarájüñü Israelítagu, lidáani gíñe fédu le ñí lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan járügüdüni Jesúsu láu eyéerawaguni lun jáfaruni jilágubei. ² Ába jaríñagun.

—Márügüda wameí fédurugu lueí jafúudun gürígia.

Tájurudaguni ában wúri Jesúsu

(Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábula, ába tiábin ában wúri láu ában budeín buin láu ibíñei le jémeti, le séruti. Ába tájalachuni ligíina budeín, ába téseruni ibíñei lábulugun Jesúsu. ⁴ Ába jagáñidun jádaangiñe ja ñíbaña, ába jaríñagun jámagua.

—¿Cámesan leféridirúa ibíñei jémeti le? ⁵ Gayáraati jamúgagu lalúgurun luágu sügü láu lebégi ában írúmu wadágimanu, lun jíderawagún gudémetiña.

Ába jébechunun, ⁶ ába laríñagun Jesúsu.

—Ígira jumouñ. ¿Ca uágu jañáwuriya tun? Ában cátei buíti le tadúgübei nun. ⁷ Súnwandan ñíbaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan. ⁸ Adúga táali wúri to le tíaraabei, jurúguaarun ibíñei luágu núgubu lubá nábunajoún, ⁹ áni ninárün jáu luágu lídan lan furúmieguaügü fulásu lídan sun ubou le ñí lumuti lapúrichijoúa ugánu le lánina asálbaruni labájüdawagúba gíñe le tadúgübei wúri to lun jarítagun tuágu.

Lalúguruni Júdas Jesúsu

(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladúgün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaaragun, ába jaríñagun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoún leigin Jesúsu jáma lánigu

(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jálügüdüni disípulugu Jesúsu.

—¿Jalíagi babúseera lun woúdin aráansera wabárua lun weígini eígini le lánina fédu?

¹³ Ába loúnajan biáma jádaangiñe lání disípulugu, ába laríñagun joun lubáragiñe jóúdin.

—Jeíba ubúrugú, jadúnraguba lúma ában wügúri ñi táu ában dináa láu dúna, ¹⁴ jídinme larigi le ñíjin lumúti lebélera, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígini le lánina fédu jáu lání disípulugu?” ¹⁵ Ábame larúfudun ában rúmu weíritu jun, tougiñegua múna, to aráanseñu tíña, ábame jaráanseruni eígini woun ñi.

¹⁶ Ába jáfuridun disípulugu, ába jachúlürün ubúrugun, ába jadáriruni súngebúei quei laríñaguni Jesúsu joun, ába jaráanseruni eígini lánina fédu ñi.

¹⁷ Dan le lagúñedunbei, ába lachúlürün Jesúsu jáu dúusu disípulugu. ¹⁸ Dánti le luágu jamá dábula eíga, ába laríñagun joun.

—Nínárün jáu luágu lalúgurubadina lan ában jídaangiñe le eígibei núma.

¹⁹ Ábati jajírudagun, ába jagúmeserun álügüdagúei ában ában.

—¿Áu funásan?

²⁰ Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asíedu. ²¹ Anángüraadina lubeíti, áu le Wügúri Garaúwarügüti, luágu úma le uágubúei taríñaga Lerérun Búngiu, áni ¿fugiábutia wügúri le alúgurutina! Buítimaati jamúga lun wügúri ligía lun magúria-jóúniwa lan.

²² Dan le añája lubeí eíga, ába lanúgünun Jesúsu jeígan fein lújaburugu, ába leteíngiruni Búngiu tuágu, larigiñe lagúbachagunun ába líchugunun joun, ába laríñagun joun.

—Jóújuma, nógubu le.

²³ Lárigiñe, ába lanúgün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya. ²⁴ Ába laríñagun joun.

—Níta le, le añúuragüdúbalin iséri darádu, le gíñe áwiwurúabei joun sarágu gürígia lun ferúduwawa lan jafígoun. ²⁵ Nínárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu síélu.

Laríñaguni Jesúsu luágu leyéedaguba lan Pédro láu

(Mt 26.30-35; Lc 22.31-34; Jn 13.36-38)

²⁶ Lásun jerémujani urému luágu Búngiu, ába jóúdin luágun wúbü le gírubei Olívos. ²⁷ Ábati laríñagun Jesúsu joun.

—Sun jugúya janúrajaba, ígira jumáname áriebu le, ladúga taríñajare Lerérun Búngiu. “Náfarubei jóúniri mudún jilágubúei, ábame jeréderun mudún chagágu.” ²⁸ Lárigiñeme násaarun lídaangiñe ouweni lúnya nabágaridun, níðiba Galiléa jubáragiñe.

²⁹ Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába laríñagun Jesúsu lun.

—Nínárün báu, áriebu meme le, lubáragiñe layúgurujan gáyu bián weíyaasu, úrüwaalime weíyaasu baríñagun luágu ibídiñe nan bun.

³¹ Ába laríñagun.

—Ni ánjein lun lubeí noúnwen búma, maríñagubadina luágu ibídiñe ban nun.

Ligía méme gíñe jaríñaga súngebúei.

Layúmuragun Jesúsu lun Búngiu, Getsemaní
(Mt 26.36-46; Lc 22.39-46)

³² Ábati jachúlürün lídoun ában fulásu gíriti Getsemaní, ába laríñagun Jesúsu joun láni disípulugu,

—Ñurújuma ya, neíbuga ayúmuragua lun Búngiu.

³³ Ába lanúgüniña Pédro, Jacóbo, lúma Juan lúmagua. Ába ladíjeridun laríttagun buídu, sandí ligía ában igárigu weíriri títan lanígi. ³⁴ Ába laríñagun.

—Sandítina ában íruni weíriri le lánina ouweni títan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguoun mémeraiü, ába labúluchagun múarugun, ába lamúriajan lúma Búngiu ánjein gayára lubeí masúfurirun láani le lúnbei lasúseredun lun lídan óra ligía. ³⁶ Ába laríñagun lídan layúmuragun.

—Núguchi, gayára bumúti sun cátei, séfu bána lueí nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisan buga beréderun ni ában óra agágudúañu?

³⁸ Agágudúañu jumá, ayúmuragua jugúyame lueí jeíguadun lídoun ínchajóuni lun jeféridiruni jafíñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaleí méme dimúrei le laríñagubei furúmiñe. ⁴⁰ Dánya lagíribudun, ábaya ladáriruniña arúmuga ladúga luweírin lidábu jágu. Ibídiñetiti joun cába lan jóunabagüle lun. ⁴¹ Ábaya lídin lúruwan weíyaasu, ába laríñagun joun.

—¿Jarúmuguña mémesan, eméragua jugúya? Buídürügaali, chúlúja óra lun nedéregerúniwa, áu le Wügúri Garaúwarügüti, jájaburugun gafígountiña. ⁴² Sarájuma, queímoun, níteeli le lúnbei ledéregerunina.

Janúgüni Jesúsu adáüra
(Mt 26.47-56; Lc 22.47-53; Jn 18.2-11)

⁴³ Nígili Jesúsu adímureja, ligía lachúlürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Jóunajan jábutigu fádorigu, arúfudajatiña lilúrudun Moisés, jáma ámu wügúriña weírigutiña lídan jafíñen juríu. ⁴⁴ Aríñagalíti buga Júdas joun ítara.

—Le wügúri le nachúurun, ligía, ábame járügüdüni, ábame janúgüni, jóunigireime buídu.

⁴⁵ Ítara líña lubeíti, dan le lachúlürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúuruni. ⁴⁶ Ábati járügüdüni Jesúsu, ába janúgüni adaürúwa.

⁴⁷ Níñein ában jádaangiñe ja níbaña, ába láluguchunun lefeínte, ába líbuguni ában larígei lumúsun fádiri le ínñutimaabei. ⁴⁸ Ábati laríñagun Jesúsu joun mútu jagía.

—¿Jiábin táu efeín lúma wéwe lun janúgünina adáüra, camá jamuga jíwerutina?

⁴⁹ Ságüñaja wéyu júma nan témpulurugu arúfudaja jun, madaú jumútina. Wel, lasúsere-dunbei le lun lagúnfulirun Lerérun Búngiu.

⁵⁰ Ábati jígiruni sun disípulugu Jesúsu lábugua, ába janúrajan.

Wügúri núraügili le anúrajabei

⁵¹ Níñein ában wügúri núraügili afálaruti Jesúsu, darúgu loúgua táurügü ában sídi, ában járügüdüni. ⁵² Ába lasáfarun jaweí, ába leíbaágun surúsu, ígira sídi.

Jesúsu ligíbugiñe líñun-ágei lúrodu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janúgüni Jesúsu ligíbugiñoun fádiri le íñutimaabei, ába jóúndaragun sun jábutigu fádirigu jáma arúfudajatiña lilúrudun Moisés, jáma ámu wügúriña ja weírigutiña lídan jafíñen jurú. ⁵⁴ Ábati lafálaruni Pédro Jesúsu dísegiñe chúlú túbúrürugun lúban fádiri le íñutimaabei, ába leréderun ñun jáma oúnigirutiña témpulu abácharagua larúgürügü wátu.

⁵⁵ Jáluajati jábutigu fádirigu lúma sun líñun-ágei lúrodu lidúnrun Jesúsu lun gayáraabei lan jasíadiruni lun láfarúniwa jilágubei, madáritiña lidúnrun. ⁵⁶ Sarágu jáña yebe adímurejatiña iyéeni luágu, múaradúntiña láu le jaríñagubei. ⁵⁷ Níñanu yéetiña ásaarutiña aríñaga.

⁵⁸ —Agáambatiwa laríñagun. “Nagúnrinchaguboun témpulu to, to jadúgüboun wügúriña, ábame naráramagüdün ában témpulu lídan úrüwa wéyu to máma jadúga wügúriña.”

⁵⁹ Ni ítara, múaradúntiña láu le jaríñagubei.

⁶⁰ Ábati lásaarun fádiri le íñutimaabei jádaangiñe sun jagía, ába laríñagun lun Jesúsu. —¿Moúnabuntibusan ni cáta? ¿Cáteisan le, le jaríñagubei buágu?

⁶¹ Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amúrúsan Crístubei le Liraú Búngiu, le lúnbei lasálbaruniña gürígia lídaangiñe jafígoun?

⁶² Ába laríñagun Jesúsu lun.

—Ánja, áu. Áni jugúya, jaríjubadina, áu le Wügúri Garaúwarügüti, ñun lueígiñe loúnwenren Súnti Gabáfu, aríja jumeíme niábin lídan juánriñu siéluigiñe.

⁶³ Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó? ⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súnagubei lun láfarúniwa jilágubei.

⁶⁵ Ábatí buri jagúmeserun jíbiri ásueraguei, adáuragua láu ligíbu, abúleiseirei, jaríñagati.

—¿Aríñaga beígia cátei lan áfarubalibu!

Ába buri jagáyujan súdaara luágu.

Laríñagun Pédro luágu ibídiñe lan Jesúsu lun

(Mt 26.69-75; Lc 22.56-62; Jn 18.15-18, 25-27)

⁶⁶ Níñein Pédro búrürüru, ligía tiábin ában lumúsun fádiri le íñutimaabei. ⁶⁷ Dan le taríjini abácharagua larúgürügü wátu, ába taríaguni, ába taríñagun lun.

—¿Ma gíñe buga lúmañadibu Jesúsu le Nazarétna?

⁶⁸ Ába leyéedagun Pédro, laríñaga.

—Ibídiñeti gürígia ligía nun, ibídiñegubeíti nun ca lan uágu badímureja.

Ába lígiruni fulásu le ní lubei labácharagua lun yaráfa lan lun lebéneri baríeru, ábati layúgurujan ában gáyu. ⁶⁹ Ábaya taríjini músu tugúya, ába taríñagun joun ja ñíbaña.

—Ába giñétia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jaríñagun ja ñíbaña lun Pédro.

—Inárüni, amúrü ában jádaangiñe, ladúga Galiléana amúrü, ítara líña badímurejan quei jagía.

⁷¹ Ába líñaragun Pédro lúngua ánjein máma lubeí inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

⁷² Lídán óra ligía, ába layúgurujuan gáyu libíaman weíyaasu. Ábati larítangun Pédro luágu le laríñagubei buga Jesúsu lun. “Lubáragiñe layúgurujuan gáyu bián weíyaasu, beyéedaguba náu úruwa weíyaasu.” Dánti le larítangun luágu, ába layájun.

15

Jesúsu ligíbugiñe Piláto

(Mt 27.1-2, 11-14; Lc 23.1-5; Jn 18.28-38)

¹ Larúgan bináafin, ába jóundaragun jábutigu fádirigu jáma arúfudajatiña lilúrudun Moisés, jáma ámu wügúriña ja weírigutiña lídan jafíñen juríu lúma sun líbiri líñun-ágei lúrudu, aríja cába lan jadúga lun lasíadirúniwa Jesúsu. Ába janúgüni gürágu, ába jedéregeroni lun Piláto. ² Ába lálügüdüni Piláto Jesúsu.

—¿Amúrü Jarúeitebei Juríu?

Ába loúnabun Jesúsu.

—Ánja, ítara líña quei baríñaguni.

³ Ába buríti jíchugun jábutigu fádirigu sarágu lidúnrun. ⁴ Ábayati lálügüdüni Piláto, ába laríñagun lun.

—¿Moúnabuntíbusan ni cáta? ¿Aríjabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígi Piláto láu líra.

Lasíadirúniwa Jesúsu lun ouweni

(Mt 27.15-31; Lc 23.13-25; Jn 18.38-19.16)

⁶ Jéchutiti Piláto ígiragüda ában adaürúti ságü fédu le lánina páscua, le jamúriajan gürígia jádaangiñe adaürútiña. ⁷ Níñeinti ában adaürúti gíríti Barabási úara jáma ámu ja áfarajabaña gürígia jílagubei lídan iñúraguni luágu gumádi. ⁸ Ábati jayábin gürígia, ába jaríñagun lun Piláto lun ladúgüni queíñaja ladúga. ⁹ Ába lálügüdüniña.

—¿Buséntün lun nígiragüdüni Jarúeite Juríu?

¹⁰ Laríñagubaalin Piláto líra ladúga busén lán yebe lígiragüdüni Jesúsu, subúdi lumúti luágu ladúga lan gimúgaü jedéregerei jábutigu fádirigu. ¹¹ Fúgüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu.

¹² Ábati laríñagun Piláto.

—¿Cáti jabúseerubei nadúgün láu le uágubei jaríñaga Jarúeite Juríu?

¹³ Ába jagúaragun.

—¿Dáguabeí luágu gurúwa!

¹⁴ Ába laríñagun Piláto joun.

—¿Cáti wuríbati ladúgübei?

Ábaya jagúaragun.

—¿Dáguabeí luágu gurúwa!

¹⁵ Queíti busúen lan Piláto leréderun buídu jáma gürígia, ába lígiragüdüni Barabási, laríñagun loúnajan abeíchei Jesúsu, ába ledéregeroni lun ládarawagún luágu gurúwa.

¹⁶ Ábati janúgüni súdeara lídoun tübürürü lúban urúei, ába jóundarúniwa sun súdeara.

¹⁷ Ába jadáuraguagüdüni táu ában anáanguni funátu, ába jadúgün ában rídi láuti jíyu, ába jíchuguni leréberugu. ¹⁸ Ába jagúmeseron agúaraja lun.

—¿Gabágarilá Jarúeite Juríu!

¹⁹ Ába jagáyuaajan lábulugun láu ában wéwe, ába jásuéruguni, ába jájuduragun abúsura lun. ²⁰ Lárígiñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

²¹ Ñíñein ában wügúri Cirénena, gíriti Simón, lúguchi Alejandro lúma Rúfo, liábiña áraabugiñe, dan le lásügürün ñígiñe, ába jafósuruni lun lanúgüni lugúruwan Jesúsu.

²² Ába janúgüni Jesúsu lídoun ában fulásu gíriti Gólgota, míni lan líra, Lufúlasun Lábu Ichúgü. ²³ Ába jíchugun diweín láu ában luwúyeri árani gíriti mírra tídoun lun, mátun lumútu. ²⁴ Ábati jádaraguni luágu gurúwa, ába jájurerun súaara ubúnuruni lun jaríjin cába lan jádaangiñe erédera táu lanáangun.

²⁵ Ladaúnrun néfu bináafin, ligía jádaraguni luágu gurúwa. ²⁶ Ába labúrüdúniwa lidúnrun ñi. “Jarúeite Juríu.” ²⁷ Dáguatiña gíñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaúna. ²⁸ Láu líra lagúnfulira le taríñagubei Lerérun Búngiu. “Abájüdúwati jáma wuríbatíña.”

²⁹ Dan le buríti jásügürün gürígia, ába jájinjani jachúgü láu, ába janábuni, jaríñaga.

—¡Bugúya le aríñagubei luágu fífbounme lan témpulu, ábaya lánme baráramagüdünun lídan úrüwa wéyu, ³⁰ séfuguabá búngua, raríba lueígiñe gurúwa!

³¹ Ába gíñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¡Séfuti ámu, ánjein ligía, siñáti leséfuragun lúngua! ³² ¡Raríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámuga luágu!

Ja dáwaguñubaña luágu gurúwa úara lúma, anába jamúti gíñe.

Loúnwen Jesúsu

(Mt 27.45-56; Lc 23.44-49; Jn 19.28-30)

³³ Amídirugu, ába labúrigadun sun ubou darí ladaúnrun úrüwa rábounwéyu. ³⁴ Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

³⁵ Ñíñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladúduragüdün ában mudúsi táu diweín garújütu, ába líchuguni luágu ában wéwe, ába línchuni lun Jesúsu lun lachúurunun, ába laríñagun.

—Ígira wameí guetó, waríja ánjein ñúbin Elías aráriragüdei.

³⁷ Ábati ladúgün Jesúsu ában agúaraguni jéreti, ába loúnwen. ³⁸ Ába tajeíridagun tubélun témpulu lídan bián murúsun íñugiñe lun únabun. ³⁹ Dan lagáambuni jábuti súaara Rómata le rárabei ligíbugiñe Jesúsu lagúaragun, aríjaleí ída líña lan loúnwen, ába laríñagun.

—Inárüni luágu Liraú lan Búngiu wügúri le.

⁴⁰ Ñíñanu gíñe würiña, aríagutiña dísegiñe, ñíñoun María Magdaléna, María to lúguchu Jacóbo le ñúraütimagilíbei, lúguchu gíñe José, ñíñoun gíñe Salomé. ⁴¹ Würiña ja, falá jamuti Jesúsu áni íderagua jamúti dán meja le Galiléañein lan. Ñíñanu gíñe sarágu ámu würiña ja ñúbinbaña Jerusaléoun úara lúma Jesúsu.

Lábunajóin Jesúsu

(Mt 27.57-61; Lc 23.50-56; Jn 19.38-42)

⁴²⁻⁴³ Lubáragiñe lálüdün wéyu, ába liábin José, ában wügúri inébewati jádaangiñe líñun-ágei lúrudu, le agúrabajabaalín lagúmeserun larúeijan Búngiu táu sun lanígi, lílana fulásu le gíribei Arimatéa. Queíti luwéyuri lubeí lan aráansejani, le ában wéyu lubá wéyu le eméraguagülei, ába lebéllurun le ñíjin lubeí Piláto amúriajei lúgubu Jesúsu, úouga ni murúsun anúfudei lídan. ⁴⁴ Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súaara lun lálügüdüni ánjein inárüni lubeí luágu jilá lan. ⁴⁵ Dan le laríñagunbei lun luágu inárüni lan, ába líchuguni Piláto lúgubu Jesúsu

lun José. ⁴⁶ Ábati lagáñijan José ában gamísa fínutu, ába larárigüdüni lúgubu Jesúsu lueígiñe gurúwa, ába loúburaguni táu. Ába líchuguni lídoun ában umúajaü achigíti luágu dúbü, ába ladáuruni láu ában dúbü. ⁴⁷ Ába tídin María Magdaléna túma María to lúguchu José aríjei fulásu le ñí lubei labunúa Jesúsu.

16

Lásaarun Jesúsu lídaangiñe ouweni

(Mt 28.1-10; Lc 24.1-12; Jn 20.1-10)

¹ Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé ibíñei lun jóudin ájurudei luágu lúgubu Jesúsu.

² Dimáasu, láfunaduña larúgan, ába jóudin luágu lumúaja, ³ ábati jaríñagun jámagua.

—¿Cábasan agídareí dúbü lueígiñe lubéneri umúajaü?

⁴ Dan le jaríjinbei, úaali oúnwenbun dúbü ligía lídan lilúgaarun. ⁵ Ába jebélurun lídoun umúajaü, ába jaríjin ában wügúri ñúraügili ñun ñi lueígiñe loúnwenren táu ában goónu jarútu. Ába janúfudedagun, ⁶ ába laríñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe ouweni. Aríja jumeísan fulásu le ñí lubei líchugúa. ⁷ Jeíba, jaríñagame joun láni disípulugu, lúntima Pédro, luágu níngiran lan luágu úma lun Galiléoun jubáragiñe. Jaríjibeí ñi quei laríñaguni jun.

⁸ Ába jóudin wúriña jagía anúrajeina ñígiñe ladúga lebélorun ában luweírin anúfudei joun. Maríñaguntiñati ni cáta ni ca un ladúga janúfude.

Larúfudagun Jesúsu lúngua tun María Magdaléna

(Jn 20.11-18)

⁹ Lárigiñe lásaarun Jesúsu lídaangiñe ouweni, dimáasu bináafin, ába larúfudagun lúngua furúmiñe tun María Magdaléna, to méja uefboun laságara sédü espíritugu wuríbatiña. ¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuaña ladúga lanárime íruni jádan luágu loúnwen. ¹¹ Dan le jagáambun luágu wínwanya lan, luágu aríja táani, mafíñetiña.

Larúfudagun Jesúsu lúngua joun biáma jádaangiñe disípulugu

(Lc 24.13-35)

¹² Lárigiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóudiña áraabun. Ibídiñetí yebe joun luágu Jesúsu lan. ¹³ Ába jóudin, ába jawísaruniña ja jíbiri, ni jagía, mafíñetiña.

Líchugun Jesúsu jadásin disípulugu

(Mt 28.16-20; Lc 24.36-49; Jn 20.19-23)

¹⁴ Lárigiñe, ligía larúfudagun Jesúsu lúngua joun únsu disípulugu jagía dan le ñun jamá luágu dábula, ába celadeínjan joun luágu liloúguan jafíñen lúma lidére jachúgü, ladúga mafíñen jamá joun ja aríjubalin lárigiñe lásaarun. ¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia. ¹⁶ Ja affínerutiña luágu, badísei jagíame, jasálbaruba, ja mafíñetiña, jeféridiruba lídaanme luwéyuri agúseragüdüni. ¹⁷ Niján cátei le lúnbei jarúfuduni ja affínebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatiña jaweí gürígia lídan níri, jadímurejaba ámu dimúrei lueí jerérun, ¹⁸ ánjaña árügüda jéwe jájaburugu o ánjaña lan áta cátei le gáfarajati, madúgünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélun

(Lc 24.50-53)

¹⁹ Lárígiñe ladímurejan joun, ába líñurúniwa Jesúsu siélun, ába lañúurun lueígiñe loúnwenren Búngiu. ²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni choúrügüdaleí ugánu le japúrichijabei láu miláguru lé buri jadúgübei.

UGÁNU BUÍTI LE LABÚRÜJABEI LÚCAS LUÁGU JESÚSU

Labúrüjani Lucas lé meja asúseredubei

¹ Lun Teófilo le weírigubei. Gíbeeña gürígia oúchutiña jabúrüjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabúrüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun. ³ Áu gíñe, álügüdajaadina gíñe buídu buídu libúgürü sun cátei le asúseredubei lúmagiñe lagúmeserun, áni afíñetina luágu maríban lan lun nabúrüjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagúriajóun Juan le abásteragüdjabei

⁵ Dán meja le Heródes lan urúeibeí Judéa, ñíñein meja ában fádiri lánina jafíñen jurú, gíriti Zacarías, jádaangiñeti fádirigu ja lánigu Abías. Elisabét tíribei lúmari, jádaangiñetu gíñe ladúgawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adúga jameí sun le lubeíbei darí lun siñá lan laríñawagún ni cáta wuríbatí jawágu. ⁷ Masáanigutiña ladúga siñá lan tagáragüdüni Elisabét, áni derébugugaaña gíñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburi fádirigu jurú, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába lábुरुjan luágun Zacarías. ¹⁰ Sun niján lan cupáli águdajoúa, añája gürígia boúgudi ayúmuragua lun Búngiu. ¹¹ Ábati lasáliragun ában láni Wabúreme ánjeli lun Zacarías, rára luegiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebélorun anúfudei lídoun. ¹³ Ába laríñagun ánjeli ligía lun.

—Manúfudebá, Zacarías, ladúga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba gíñe agúndaarutiña láu lagúriajóun, ¹⁵ ladúga weírigubei biraú ligíbugiñe Búngiu. Mátunbei diweín ni bínu, áni ñíbei Sífiri Sándu lúma lúmagiñe lubáragiñe lagúriajóun lun ladúndejani lídan sun cátei. ¹⁶ Ladúgüba lun jagríbudun sarágu jádaangiñe Israelítagu lun jagáambuni Jabúngiute, ¹⁷ lesériwiduba lun Búngiu láu sarágu ubáfu quei meja ladúgüni Elías. Laráansejaba lubá Jesúsu láu laráandaragüdüniña agúbürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachouruni cátei le? Áu táu sun númeri, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun. ²⁰ Guetó, quei maffínerun bubeí luágu le naríñagubei bun, berédera merérunga, siñábei badímurejan daríme lagúriajóun biraú. Lagúnfuliruba cátei le lídan lidáani.

²¹ Sun dan le, añájati buga gürígia boúgudi agúrabajei Zacarías, weírititi janígi luágu lílü témpulurugu. ²² Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárígiñe cátei le, ába tadágeinadun Elisabét, to lúmari, ába máfuridun tan

jábiñegiñe luágu seíngü játi, teréngati túnguarügü. ²⁵ “Ladúgüñein Búngiu lubuídun cátei le nun guelé lun lagídaruni nibúsigari jagíbugiñe gürígia.”

Lasúbudiragüdüni ában ánjeli luáguti lagúriajoun Jesús

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúruğu lání Galiléa, gíríti Nazarét, ²⁷ lun lídin bisídoun ában wúri irájügiru, gírítu María. Wúri tugúya, gadáraduñoun lúma ában wügúri gíríti José lun tamárieidun lúma, wügúri ligía, linébaanfán urúei Davíd. ²⁸ Ába lebélorun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun wúriña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagúriajan ában irájü, ábame bíchuguni líri Jesús. ³² Weírigubei, Liraú Búngiu le ínubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje. ³³ Lagúmadirubei linásiñun Israél lun sun dan, áni magúmuchadibei lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame louburagunibu lubáfu Búngiu. Ligía sándubei lubei irájü le lúnbei bagúriajani, Liraú Búngiu lúba lagúarún. ³⁶ Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügúri irájü, ítara líña lubeíti, tó meja uáguboun jaríñaga luágu siñá lan tagáraüdü, níjein sísi játi dageínaü tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adúgaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúruğu le labádinaguabei buri wúbü Judéa, ⁴⁰ ába tebélorun lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraú turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügü jáu sun jiñáriñu, binílaali gíñe biraú. ⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraú nurágeirugu láu ugúndani. ⁴⁵ Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rútu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasálbaragüle,

⁴⁸ lugúndun gudémejabujaali nun, nugúya le lidámun.

Lúmagiñe guelé, jaríñaguba sun gürígia luágu fuleíseiwaadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei,

adúgaali lun ni cáta jamá ja bartúguabaña jóungua.

⁵² Gidálaaña ja gabáfubaña lídaangiñe jaweírigun,

ja únabubaña, ába ladúgüniña lun weírigu jamá.

⁵³ Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

⁵⁵ queí meja lidáradun jáma binádu wagúbürigu—

Abrahám jáma ladúgawagun—lun gudémejabu lan joun lun sun dan.

⁵⁶ Ába teréderun María úrüwa játi ñi, lárigiñe, ába tagíribudun jábiñoun.

Lagúriajoun Juan le abásteragüdjabei

⁵⁷ Ába lagúnfulirun dan lun tagúriajan Elisabét, ába tagúriajan ában wügüri irájü.

⁵⁸ Dan le jagáambun tubésinanigu jáma tidújeñu luágu lubuídun cátei le ladúgübei Búngiu tun, ába jagúndaarun úara túma. ⁵⁹ Luágu liwídün wéyu, ába lerésibiruni circuncisión, le liseíni luágu lání lan Búngiu irájü ligía. Buséntiña yebéti jíchuguni líri lúguchi luágu, le Zacarías, ⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu.

⁶³ Ába lamúriajan ában murúsun fuláansu, ába labúrüdün luágun. “Juan líribei.” Ába laweíridun janígi súngebubei láu cátei le. ⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. ⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu. ⁶⁶ Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoun luágu Wabúreme le Jabúngiutebei güri-gia ja Israelítagu, ladúga ñúbinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰ Ítara líña meja laríñaguni Búngiu jádaangiñe lání profétagu ja edéregeragubaña jóungua lun, lúmagiñe meja binádu dan,

⁷¹ luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagúbürigu, arúfudaleí luágu mabúlieidagun lan lueí lidáradun le sándubei jáma.

⁷³ Niján lé meja laríñagubei lun wáguchi Abrahám.

⁷⁴ luágu leséfurubadíwa lan jaweí wáganiñu, lun gayáraabei lan wesériwidun lun manúfudeiga,

⁷⁵ láu úarani, derégeguñu wagía woúngua lun, sun dan le wabágaridubei.

⁷⁶ Áni bugúya nisáaniraü, lání Búngiu le íñubei proféta lúba bagúarúniwa, ladúga baráansejaba lubá Wabúreme,

⁷⁷ subúdi lámuga úma lánina asálbaruni joun lánigu, le áubei ferúdunawa lan jafígoun.

⁷⁸ Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

⁷⁹ lun larúgoungadágüdüni jáu ja lídaanbaña lubúriga lúma jáu ja luágubaña úma le ouwenibeí lébeja,

lúma lun ladúndejani wapásun lídoun úma le anúgübaliwa lídoun darángilaü.

⁸⁰ Aweírideina ligíati irájü ligía, afáragadagueina gíñe lídan lání espíritu. Ába laganoún lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2

Lagúriajóuniwa Jesúsu
(Mt 1.18-25)

¹ Lídoun buga dan ligía, ába laríñagun urúei Augústo lun jabájüdüün sun gürígia ja Rómabaña. ² Furúmiñe meja jadúgüni cátei le, dán meja le Cirénio lan agúmadijabei Síria. ³ Súnti gürígia mósu jóudin jageíra lun ñi lan jabájüdüüwa. ⁴ Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le gírubei Belén, le ñí lubei lagúriajóua Davíd, quei linébaanfan lubei Davíd José. ⁵ Ába lídin Belén lun labájüdüün úara túma María to gadáradunboun lúma lun jamárieidun, áni dageínañoun. ⁶ Dánti le añája lan ñi Belén, ába lachúlürün dan lun tagúriajan María. ⁷ Ába tagúriajani furúmiñeti tiraú ñi, ába toúburaguni tídan lágei, ába taróunragüdüni ñi tídan jában anímaalu ladúga úati ubáraü joun tídan jában chúlúdügütiña.

Ánjeligu jáma oúnigirutiña mudún

⁸ Lídan áraabu bougudi luei Belén, ñíñanu jóuniri mudún, bou larúgan jáu oúnigiraña jalúgüniña mudún. ⁹ Sódini, ába lasáliragun ában lání Wabúreme Búngiu ánjeli siéluigiñe joun, ába jaríjin ában oúnwenbun larúgounga le lánina Búngiu geyégua jáu, ába janúfudedagun. ¹⁰ Ába laríñagun ánjeli ligía joun.

—Manúfudeda jumá, ladúga níjein ugánu buíti nanúgün jun, lébunabei sarágu ugúndani joun sun gürígia. ¹¹ Luágu agúriajóuaali lan ában asálbaragülei jun ugúñe, lageíra Davíd, Crístu le Jabúreme. ¹² Jadárirubei irájü ligía jóuburagu tídan lágei, roun tídan jában anímaalu.

¹³ Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweírighuni lun Búngiu, jaríñaga.

¹⁴ ¡Uweírighuni lun Búngiu lídan líñutima siélu, darángilaü múarugu jádan gürígia ja ibíjubalin lufúleisein!

¹⁵ Dánti le jagíribudun ánjeligu jarigoún siélun, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóudin furésequeina, ába jadárirunun María lúma José, lúma irájü roun tídan jában anímaalu. ¹⁷ Dan le jaríjinbalin, ába jabájüdaguni le laríñagubei ánjeli joun libúgürü le. ¹⁸ Súnti ja agáambuliña, weíruti janígi láu le jaríñagubei. ¹⁹ Áni María, areídañu tíñein sun cátei le tídan tanígi, arítagua luágu. ²⁰ Ábati jagíribudun jóuniri mudún, adímurejeina weíri luágu Búngiu, luágu sun le jagáambubei lúma le jaríjibe, ladúga suséreti ítara quei laríñawagúniwa joun.

Larúfudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáni jarúmadun lagúbürigu Jesúsu según igáburi lídan lilúrudun Moisés, ába janúgüni irájü ligía ubúrugun Jerusalén lun jedégergeruni lun Búngiu. ²³ Jadúgünbalin líra ladúga laríñajare tídan lilúrudun Búngiu. “Sun furúmiñeti wügúri irájü agúriajóuti lúnbei Búngiu.” ²⁴ Ába lubeíti jóudin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñíñein meja ában wügúri Jerusalén gíruti Simeón. Wügúri ligía ában wügúri buíti, weíruti ledégergeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Níñein Sífiri Sándu lúma Simeón, ²⁶ áni arúfuda láali lun luágu moúnwenbei lan maríjingalei Crístu le lúnbei loúnajani Wabúreme Búngiu. ²⁷ Ába lídin wügúri ligía témpulurugun, ladúndejan Sífiri Sándu. Dánti le

janúgünbalin lagúbürigu Jesúsu Jesúsu témpulurugun lun jadúgüni le laríñagubei lúruđu láu, ²⁸ ába loúyuajani Simeón, ába líchugun eténgiruni lun Búngiu, aríñageina ligía.

²⁹ Nabúreme, gayáraajali bígirunina lun noúnwen láu darángilaü, nugúya le esériwidubei bun,

ladúga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le boúnajabei joun sun gürígia.

³² Ítara lúba queísi ában lámpu lun larúfuduni inárüni joun ja mámabaña jurú, ru ligíame uweíríguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le.

³⁴ Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni. ³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Níñoun gíñe ában wúri proféta, gírítu Ána, wúri tugúya liraü Fanuél, jádaangiñe ladúgawagun Áser. Weíríyaaru wúri tugúya, ñúraügiru meja tamárieidunbei, sédüñein irúmu táu lúma túmari, ába loúnwen, ³⁷ guetó, gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu áriebe wéyuagu, ayúnara lúma ayúmuragua lun Búngiu. ³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárígíñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰ Aweírídeina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

⁴¹ Ságüja irúmu jóudin lagúbürigu Jesúsu ubúrugun Jerusalén lubá fédu le páscua, ⁴² áni dan le lagúnfulirunbei Jesúsu dúusu irúmu, ába jóudin súnigubei Jerusalén quei le jagáburi lídan fédu ligía. ⁴³ Dánti le jagíribudun lárígíñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jarítagún yebe luágu níten lan jádan gürígia ja jámarigubaña luágu úma. Ítara líña jadúgün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Úrüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weírítu janígi luágu lichú láu lúma luágu buri loúnabagüle. ⁴⁸ Dan le jaríjinbalin lagúbürigu, ába laweíridun janígi, ába taríñagun lúguchu lun.

—¿Cáme badúgei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le lání Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábati buri tareíduni lúguchu sun cátei le tarítangunrugun. ⁵² Niján mémeti Jesúsu aweírídeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdajabei, lídan fulásu mageírawati
(Mt 3.1-12; Mr 1.1-8; Jn 1.19-28)

¹ Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ² Anás lúma Gáifasi, jagía fádirigu ínutimáabaña lídan jafíñen juríu. Ábati líchugun Búngiu ában ugánu lun Juan, le liraú Zacarías, lídan fulásu mageírawati, ³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame. ⁴ Suséreti cátei le ítara queí meja labúrüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumóun janígi lubá liábin Wabúreme, queísi ladárarúniwa úma surúti.

⁵ Labuínchagüdúwaba sun gudúungu,

sun wúbü, lagurúaba,

úma buri le segéti, lásururuba,

úma buri le múaragunti, lúwaradaguba.

⁶ Larijúbei sun ubou Wasálbaragüle, le louñajabei Búngiu woun.”

⁷ Núbintiña sarágu gürígia lun Juan lun labásteragüdúniña, ába laríñaga joun.

—Jarásan jéwe jugúya le! ¿Ca awísarubalün lun jeíbaagun lueí lanárime lafáyeiragüle figou le yaráfaalibeí? ⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei naríñaguni jun, gayáraati ladúgün Búngiu linébaanfaangu Abrahám lídaangiñe buri dúbü le. ⁹ Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadúgüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹² Núbintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadúgüni?

¹³ Laríñaga Juan joun.

—Magúburaja jumá lougiñe le uágubei laríñaga lúru.

¹⁴ Aríñagatiña gíñe fiú súdeara lun.

—Ángi wagía, ¿cági lúnbei wadúgüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madúgün lumúti, gufúruma jumá láu jafáyeiruaja.

¹⁵ Añájati gürígia madéraguagüdünja arítagua luágu fágua lan Juan Crístubei, ¹⁶ ába laríñagun Juan joun súngebei.

—Áu, láu dúna nabásteragüdaün, nítenebei ában le lúnbei labásteragüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagúruga ligeídin. ¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába louñdarún türígu buíti tídoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun güriǵia luágu wasálbaragüle. ¹⁹ Erérati gíñe lun gumándan Heródes luágu laganoún túma Heródias, to lúmari Felípe, le lamúlen, lúma luágu ámu buri cátei wuríbatu le ladúgübei. ²⁰ Lubáragiñe ladúgün Heródes gásu láu, adúgarügü ligía ában cátei wuríbatimaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

²¹ Lubáragiñe ladaürúniwa Juan, dan le labásteragüdüniña güriǵia, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijiniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amúrü Niraú le jínsiñebei nun, gúndaatina báu.

Linébaanfaangu Jesúsu

(Mt 1.1-17)

²³ Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraú lan José, José, liraú Elí, ²⁴ Elí, liraú Matát, Matát, liraú Leví, Leví, liraú Melquí, Melquí, liraú Jána, Jána, liraú José, ²⁵ José, liraú Matatías, Matatías, liraú Amós, Amós, liraú Nahúm, Nahúm, liraú Eslí, Eslí, liraú Nagaí, ²⁶ Nagaí, liraú Maat, Maat, liraú Matatías, Matatías, liraú Semeí, Semeí, liraú José, José, liraú Judá, ²⁷ Judá, liraú Joána, Joána, liraú Résa, Résa, liraú Zorobabél, Zorobabél, liraú Salatiél, Salatiél, liraú Néri, ²⁸ Néri, liraú Melquí, Melquí, liraú Adí, Adí, liraú Cosám, Cosám, liraú Elmodám, Elmodám, liraú Er, ²⁹ Er, liraú Josué, Josué, liraú Eliézer, Eliézer, liraú Jorím, Jorím, liraú Matát, ³⁰ Matát, liraú Leví, Leví, liraú Simeón, Simeón, liraú Judá, Judá, liraú José, José, liraú Jonán, Jonán, liraú Eliaquím, ³¹ Eliaquím, liraú Meléa, Meléa, liraú Mainán, Mainán, liraú Matáta, Matáta, liraú Natán, ³² Natán, liraú David, David, liraú Isaí, Isaí, liraú Obéd, Obéd, liraú Booz, Booz, liraú Salmón, Salmón, liraú Naasón, ³³ Naasón, liraú Aminadáb, Aminadáb, liraú Arám, Arám, liraú Esróm, Esróm, liraú Fáres, Fáres, liraú Judá, ³⁴ Judá, liraú Jacób, Jacób, liraú Isáac, Isáac, liraú Abrahám, Abrahám, liraú Taré, Taré, liraú Nacór, ³⁵ Nacór, liraú Serúg, Serúg, liraú Ragáu, Ragáu, liraú Pelég, Pelég, liraú Héber, Héber, liraú Sála, ³⁶ Sála, liraú Cainán, Cainán, liraú Arfaxád, Arfaxád, liraú Sem, Sem, liraú Noé, Noé, liraú Laméc, ³⁷ Laméc, liraú Matusalén, Matusalén, liraú Enóc, Enóc, liraú Jaréd, Jaréd, liraú Mahalaléel, Mahalaléel, liraú Cainán, ³⁸ Cainán, liraú Enós, Enós, liraú Set, Set, liraú Adán, Adán, liraú Búngiu.

4

Loucháwagúniwa Jesúsu

(Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanúgüni Sífiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia ouchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü. ³ Ábati laríñagun Máfia lun.

—Ánjein Liraú bubei Búngiu, salíguagüdabeí dúbü le feínme.

⁴ Laríñaga Jesúsu lun.

—Tariñajare Lerérun Búngiu. “Mámarügüba táu fein jabágarida güriǵia, jabágariduba gíñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanúgüni Máfia Jesúsu luágun ában wúbü íñuti, ába larúfuduni sun fulásu le ubouágubei lun lídan ában. ⁶ Ába laríñagun Máfia lun.

—Níchugubei sun ubáfu lúma sun uweíríguni le bun ⁷ ánjabu ájuduragua nun lun banúgünina quei bubúngiute, bánibei súnigubei, ladúga ibíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladúga taríñajare Lerérun Búngiu. “Judúguabá lun Búngiu le Babúreme, lúnriugúlá besériwida.”

⁹ Lárígíñe, ába lanúgüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraú bubei Búngiu, chúguabá búngua yágiñe lun únabun, ¹⁰ ladúga taríñajare Lerérun Búngiu.

Loúnajabaña Búngiu láni ánjeligu lun jóunigiruníbu,

¹¹ janúgübadibu jájaburugu lueí labúleiseirun bugúdi luágu dúbü.

¹² Ába laríñagun Jesúsu lun.

—Taríñajare gíñe Lerérun Búngiu. “Moúchaguabeí Búngiu le Babúreme.”

¹³ Dánti le madárijali Máfia cába lan luwúyeri óuchawagúni ladúga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa

(Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejoún luágu lídan sun fulásu geyégua. ¹⁵ Arúfudajatija tídan jalígilisin juríu lídan sun fulásu, buíti jadímurejan sun gürígia luágu.

Jesúsu lídan ubúrugun Nazarét

(Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñí lubei lagúriajoúa, ába lebéllurun tídoun jalígilisin juríu lídan wéyu le eméraaguagülei quei ligáburi yebu, ába laráramun lun lalíjan tídan Lerérun Búngiu. ¹⁷ Ába jíchugunun lílburun proféta Isaías lun, dan le ladárunun, ába ladáriruni le ñí lubei laríñaga ítara.

¹⁸ Níjein láni Búngiu Sífiri Sándu nuágu,

ladúga anúadaja láadina lun níchuguni ugánu buíti joun gudémetiña,

oúnaja láadina lun námaliyaniña ja nidíjeribaña tídan janígi,

lun náfuridagüdüniña adaürútiña,

lun níchugun aríjini joun maríjintiña,

lun neséfuruniña ja ouserúabaña wuríba,

¹⁹ lun nadímurejan luágu dan le fuleíseijabu lan Búngiu joun gürígia.

²⁰ Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei, ²¹ ába lagúmeserun adímureja, laríñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weírítiti janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraú José le?

²³ Ába laríñagun Jesúsu joun.

—Subúsiiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adúga báalibei Capernaúm, adúgabeí giñe ya bageíra.”

²⁴ Ába lasígirun adímureja, laríñaga.

—Nínarün jáu luágu úa lan ni ában proféta erésibirúati buídu lageíra. ²⁵ Choúru numúti luágu añajein lán meja sarágu würiña ja jiláguañábaña jámarigu jádan Israelítagu lídan meja lidáni proféta Elías, dan le májuyun lubeí júya luágu úrüwa irúmu dimí,

ába ñi lan sarágu ilámaü fulásurugu, ²⁶ áni moúnajan lumúti Búngiu Elías túmoun ni ában jádaangiñe würiña jiláguaaña jámarigu jagía ja aganoúbaña Israél, lounajei túmoun ában to aganoúboun Sarépta, yaráfa lun ubúruugu Sidón. ²⁷ Ñíñanu meja gíñe sarágu gawágutiña gumeín luágu jára ñi Israél lídan lidáani proféta Eliséo, úati ni ában jádaangiñe areídawaguagüdüti lueídügüya Naamán le Síriana.

²⁸ Dan le jagáambunbalin sun ja ñibaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janúgüni lálbulugun wúbü le gagíbuagubalin fulásu lun jájuchuruni ñígiñe. ³⁰ Ába lásügürün Jesúsu jamí-daanguágiñe jámagua, ába lídin.

Ában wügüri gawáguti espíritu wuríbati

(Mr 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun güriña ñi lídan wéyu le eméraaguagülei. ³² Weírititi janígi láu ligáburu larúfudajan, ladúga láu ubáfu ladímureja.

³³ Ñíñeinti ában wügüri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agúnrinchaguawa? Subúdi numútibu, áni subúdi numúti luágu amúrü lan Liraú Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe güriña le!

Ábati lájuchuruni espíritu wuríbati wügüri ligía múarugun jagíbugiñe súngebui, ába láfuridun lídaangiñe, mabúleiseirunga. ³⁶ Ába laweíridun janígi súngebui, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritugu wuríbatiña, ába jáfuridun!

³⁷ Adímurejóatiti buri luágu Jesúsu lídan sun fulásu geyégua.

Lareídaguagüdünnun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídaguagüdünnun. ³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídaguagüdünnun Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janúgüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. ⁴¹ Sarágu jaña gíñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amúrü le Liraúbei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladúga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúruugu lídoun ában fulásu mageírawati. Ába jáluajani güriña, ába jachúlürün le ñíjin lubeí, buséntiña yebe jeréderuni lueí lídin, ⁴³ ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladúga lun líra noúnajoúa.

⁴⁴ Ítara líña lídin apúrichijeina tídan buri jalígílisin juríu, Galiléa.

5

Esénijani le láubei miláguru

(Mt 4.18-22; Mr 1.16-20)

¹ Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladúga busén jamá jagáambuni lerérun Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábati ládinun Jesúsu tídon ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe. ⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebe, mañúguntiwa ni cáta, quei amúrü lubei aríñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábati jadúgün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügúri gafígounti nugúya.

⁹ Laríñagubaañin Simón líra ladúga laweíridun lanígi, jáu sun ja úarabaña lúma, luágu añúguni le jadúgübei. ¹⁰ Weíriti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja gürígia nun.

¹¹ Lárigiñeti jätürün, ába jígiruni sun cátei, ába jóúdin lúma Jesúsu lun láni jamá disípulugu.

Lareídaguagüdün Jesúsu ában gawáguti gumeínluágu sun lúra

(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñí lubei ában wügúri gawáguti gumeín luágu sun lúra. Dan le laríjinbalin wügúri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, áñjabu busén, gayáraati bareídaguagüdünina.

¹³ Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín lueí wügúri ligía, ¹⁴ ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñúdünrügübá, arúfudagua búngua lun fádiri, rúbeíme edéweejani le uágubei laríñaga lilúrudun Moisés luágu barúmadun, aríja jamámugei gürígia luágu areídaguadibu lan.

¹⁵ Eíbu dan, eíbu labúruchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídaguagüdünini jasándi. ¹⁶ Ábaja lídin Jesúsu le ñíjin lumúti úa jamá gürígia lun layúmuragun lun Búngiu.

Lareídaguagüdün Jesúsu ában fadáguaali

(Mt 9.1-8; Mr 2.1-12)

¹⁷ Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniniña sánditiña.

¹⁸ Ábati jayábin fiú wügúriña barúina ában wügúri fadáguaaali tídan ában ubárari, jálugati jebélaagüdüni le ñjin lubei Jesúsu lun laríjini. ¹⁹ Madáritiña jalágiñeba lan jebélura ladúga jíbe güriquia, ábati jawéinrun tábulugun múna, ába jagídarun murúsun lueígiñe loúgiñe le ñi lubei Jesúsu, ába jarárigüdüni sánditi tídan lubárari ligíbugiñoun. ²⁰ Dan le laríjinbalin Jesúsu afíñeni le jawágubei, ába laríñagun lun sánditi ligía.

—Wügúri, ferúdunawaali bifígoun.

²¹ Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisan güriquia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figoú lueídügüya Búngiu.

²² Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³ ¿Cátima méreengúnbei laríñawagun. “Ferúdunawaali bifígoun”, ódi “Sarába, beíbuga”? ²⁴ Narúfudaaliti jun luágu gayára lan ferúduna nan figoú, áu le Wügúri Garaúwarügüti.

Ábati laríñagun lun le sándibei.

—Sarába, barúboun bubárari, beíba búbiñoun.

²⁵ Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu. ²⁶ Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu

(Mt 9.9-13; Mr 2.13-17)

²⁷ Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíriti Leví, ñun líña lídan fulásu le ñi lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

²⁸ Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

²⁹ Lárigiñe, ába ladúgün Leví ában óunwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu güriquia ñun luágu dábula jáma. ³⁰ Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gaffí-gountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. ³² Máma niábiña áluaja magádietiña ligíbugiñe Búngiu, niábiña áluaja gaffí-gountiña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Mr 2.18-22)

³³ Ábati jaríñagun lun Jesúsu.

—¿Ída líñasan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóútiña, gurá jagía súnwandan?

³⁴ Ába laríñagun Jesúsu joun.

—¿Gayáraati funági jayúnaragüdüniña güriquia ja jamísurajan lídoun ában maríei sun niján lan adári jáma ñi? ³⁵ Lachúlürüba dan lun lídin adári, ligíameti jayúnarun.

³⁶ Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga ítara, lagádeiruboun to isérigiruboun, áni merédebei gíñe murúsun gamísa iséri ligía búidu tuágu anáanguni ñulújaru tugúya. ³⁷ Michugúntu

gíñe diweín iséri lídoun guéru ñulújali, ánjein adügúwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati gíñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

Jabúdajan disípulugu türígu lídan wéyu le eméraaguagülei

(Mt 12.1-8; Mr 2.23-28)

¹ Luágu ában wéyu le eméraaguagülei, eíbugeina líña Jesúsu labádinagua nádü jáma láni disípulugu, átüjeina jagíati disípulugu lin türígu, ába jéferejani láu jájabu, ába jeígini líla. ² Ábati jaríñagun jádaangiñe fariséogu joun.

—¿Cásan uágu jadúga wadágimanu le moún lumuti ladügún lídan wéyu le eméraaguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma? ⁴ Ába lebélorun tídoun lúban Búngiu, ába lanúgün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádírigu rügúñanu lán yebe lúnbaña jeígin tídaangiñe fein tugúya, según lilúrudun Moisés, áni máma figoú le ladügübei Davíd ligíbugiñe Búngiu.

⁵ Aríñagati gíñe joun.

—Gabáfutina, áu le Wügúri Garaúwarügüti, lun naríñagun cába lan gayára ladügúniwa wéyu le eméraaguagülei.

Wügúri le jiláalibei újabu

(Mt 12.9-14; Mr 3.1-6)

⁶ Lídaanya ában wéyu le eméraaguagülei, ába lebélorun Jesúsu tídoun jalígílisin juríu, ába lagúmeserun arúfudaja. Níñein ában wügúri jiláali lújabu le loúnwenren, ⁷ añájati arúfudajatiña lilúrudun Moisés jáma fariséogu aríaajei Jesúsu ánjein lagáranijaba lubeí lun lídan wéyu le eméraaguagülei, lun jadárirun lidúnrun. ⁸ Subúdi lumúti ca lan jarítagubei, ába laríñagun lun wügúri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügún lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰ Ábati laríaguniña Jesúsu sun ja geyégubaña láu, ába laríñagun lun wügúri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmochun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wúbü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴ Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraú Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu gürígia

(Mt 4.23-25)

¹⁷ Ába larárirun Jesúsu jáu lueígiñe wúbü, ába leréderagun jáu láni disípulugu lídan ában fulásu le ní lumuti sagádi wásati, níñanu gíñe sarágu gürígia ñúbintiña louúbawagugiñe Judéa, Jerusalén, lúma lárurugugiñe Tíro lúma Sidón. Sun gürígia ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wuríbatíña, areídaguatíña gíñe. ¹⁹ Álugatiña sun gürígia jagúrurun luágu Jesúsu, ladúga areídaguagüda lumútiña súngubei láu lubáfu.

Fuleíseiwatiña jáma fugiábugu
(Mt 5.1-12)

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibe, ladúga ménreengúnbei jun lun jebélurun lídoun larúeijan Búngiu.

²¹ ‘Fuleíseiwatün, jugúya le áfaagubei ilámaü guetó, ladúga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

²² ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriua, dan le janábagunün, dan le janúgüni jíri queí ni cáta, quei cátei wuríbati, nueígiñe, áu le Wügúri Garaúwarügüti. ²³ Gúnda jumá sarágu, buin jumá láu ugúndani lídan wéyu ligía, ladúga jibíjuba ában oúnwenbun afáyeirujauü siélu, ítara méme líña meja jadúga binádu jagúbürigu gürígia ja joun profétagu.

²⁴ ‘Fugiábugu jugúya, jugúya le rísibe, ladúga ibíja jumáli sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladúga jalámachuba.

‘Fugiábugu jugúya le éjerajabei guetó, ladúga jayájuajaba láu íruni.

²⁶ ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagúbürigu buíti jawágu profétagu yéetiña.

Jínsiñe jamá jáganiñu jun
(Mt 5.38-48, 7.12)

²⁷ ‘Niján nerérun jun, Jugúya le agáambubalina. Jínsiñe jamá jáganiñu jun, adúga jumá buíti joun ja iyéreejabúbaña jun, ²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjabu láfara ában gürígia luágu ában louba bigíbu, rúbei gíñe le ában louba lun, le anúgütu babíte bueí, rúboun gíñe bisímisin lun. ³⁰ Furúmieguarügü le amúriajati búma, rúba lun, le anúgüti bumégen, máluajabeí lúma. ³¹ Le cátei le babúseerubei ladügün bun, ligíalá badúga joun ámu.

³² ‘Ánjein já rügúñanu lubeí jínsiñejabúbaña jun jínsiñe jun, ¿ca buíti jadúgübei láu líra? Ásta gafígountiña, ítara líña jadúga. ³³ O ánjaün lan adúga buíti jóunrügü ja adúgübaña buíti jun, ¿ca buíti jadúgübei láu líra? Ítara líña gíñe jadúgün gafígountiña.

³⁴ Ánjaün afúredeija jóunrügü ja úmagiñebaña jarítagua jibíjin som cátei, ¿ca buíti jadúgübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiñu jun, adúga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeirujaja lúmagiñe Búngiu le ínugubei, áni lirájüñübadün gíñe le tímatimaati, ladúga ligía, fuleíseijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan júguchi Búngiu.

Madímureja jumá wuríba jawágu ámu
(Mt 7.1-5)

³⁷ ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburi. Míchiga jumá jadúnrun ámu, míchun lámuga gíñe Búngiu jidúnrun.

Ferúduna jumá, ferúduna lámugaïn gríne Búngiu. ³⁸ Rújuma joun ámu, ru lámuga gríne Búngiu jun. Líchuguba Búngiu sarágu jun, ladúgüba jun queígubeirügü jadúga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? ⁴⁰ Úati ni ában disípulu weíriguti lueí lumáesturun, íbini ánjein lagúmucha latúriajan, chülúrügübei quei lumáesturun.

⁴¹ ‘¿Ída líña gayára bubálin liraúraü ifei le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubeí baríñagun lun bíbugaña. “Sagánei liraúraü ifei le bágurugubei”, áni masándi bumúti durúsu le bágurugubei? ¿Biánguañein bigíbu! Sagábei durúsu le bágurugubei furúmiñe, gayára lámuga baríjini liraúraü ifei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ ‘Úati tídibu wéwe buíti lun wuríba lan lin, úati gríne tídibu wéwe wuríbati lun buídu lan lin. ⁴⁴ Sun tídibu wéwe subúdiwati luágu lin, mátüjoúntu ígo lueígríne jíyu, ni beíbei lueígríne guríbiyuwa. ⁴⁵ Gürígia le buídubei, cátei buíti laríñagubei ladúga cátei lan buíti tídaanbei lanígi, gürígia le wuríbati, cátei wuríbati laríñagubei ladúga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu

(Mt 7.24-27)

⁴⁶ ‘¿Ca uágu jaríñaga luágu áu lan Jabúremebei áni madúgün jumúti le nubeíbei? ⁴⁷ Naríñagaali jun ída líña lan le ñúbinbei nun áni adúgaleí le nubeíbei. ⁴⁸ Ítara líña quei ában wügúri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladúga luáguñoun lan ébuu derébuguti. ⁴⁹ Ánjeinti le agáambubalina áni madúgün lumúti le nubeíbei, ítara líña quei ában wügúri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagúnrinchagun le gumúti.

7

Lareídaguagüdüni Jesúsu lumúsun ában gumándan Rómána

(Mt 8.5-13)

¹ Dan le lásurunbei ladímurejan Jesúsu joun gürígia, ába lídin Capernaúm. ² Níñein ában gumándan Rómána ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen. ³ Dan le lagáambunbei gumándan ligía luágu Jesúsu, ába loúnajan fiú jádaangiñe wügúriña weírigutiña lídan jafíñen juríu lun jayúmuragun lun Jesúsu lun lídin areídaguagüdei lumúsun. ⁴ Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ ladúga jínsiñetiwa wagía juríu lun, ligía guánarügü ábunaguagüdübarun walígilisin.

⁶ Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manúgün ban bubéresegun ñúdün lúbiñe, luágu nege madúna lan lun bebélurun lúbiñoun, ⁷ ligía nege mídin lubeí lúngua álugabu. Rúrügübeí dimúrei, ábame lareídagun lumúsun. ⁸ Ladúga ligía nege gríne lábugiñeñein gumádi ínutimaati, áni añájein gríne súdeara lábugiñe lagúmadijan. Dan lé nege laríñagun lun ában jádaangiñe lun lídin, ñúdünti, dan le laríñagun lun le ában lun liábin,

ñúbinti, áni dan le loúnajani lumúsun adúga som cátei, adúga lumúti. Ítara lúba nege, luágu berérun mósu lídin sándi lueí lumúsun.

⁹ Dan le lagáambunbalin Jesúsu cátei le, weíríti lanígi láu wügúri ligía, ába laríjin jawágun güriá ja afálarubalin, aba laríñagun joun.

—Ninárün jáu, ni íbini jádan Israelítagu madárigidina afíñeni weíríti quei lafíñen wügúri le.

¹⁰ Dánti le jachúlürünbei wügúriña ja ñúdünbaña álugei Jesúsu járiogún lúbiñoun gumándan, areídaguwaali lumúsun.

Láguyuaguädüni Jesúsu tiraú ában jiláali túmari

¹¹ Lárigiñe cátei le, lídiña Jesúsu lídoun ában ubúru gu gíríti Naín, úareina jáña láni disípulugu lúma, jáma sarágu güriá. ¹² Dan le lachúlürünbei yaráfa lun lubéneri ubúru gu ligía, ába laríjin jóudin ábunaja ában jiláali le ligiarügüti tiraú lúguchu to jiláali túmari. Sarágu jáña lílana fulásu ñúdün ábunaja túma. ¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anúgübaña. Ába laríñagun lun jiláali.

—Írájú, ñaríñaguña bun lun básaarun!

¹⁵ Ábati lásaarun lé buga jiláalibei, ába lagúmeserun adímureja. Ába ledéregeruni Jesúsu tun lúguchu. ¹⁶ Dan le jaríjinbalin güriá cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chúlúgua ában proféta weíriguti wádoun.

Aríñagatiña gíñe.

—Ñúbinja Búngiu íderaguawa, wagía le lumútuniña.

¹⁷ Ába lagaambúniwa cátei le ladúgübei Jesúsu lídan sun Judéa lúma geyégua láu.

Loúnagülegu Juan le abásteragüdjabei

(Mt 11.2-19)

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun bíama jádaangiñe, ¹⁹ ába loúnajaniña álügüdei Wabúreme Jesúsu ánjein ligía lubeí Crístubei le lúnbei líabin, o ánjein jagúrabajaba lubeí ámu. ²⁰ Dan le jachúlürünbei le ní lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdjabei álügüdabu ánjein amúru lubeí Crístubei le lúnbei líabin, o ánjein lun lubeí wagúrabun ámu.

²¹ Lídan méme óra ligía, areídaguagüdati Jesúsu sarágu güriá lídaangiñe jasándi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdagúame lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe güriá le meféridirun lumúti lafíñen nuágu.

²⁴ Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun güriá, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali?

²⁵ Ánjein máma lubeí ítara líña, ¿cáti jídinbei aríja? ¿Ában wügúri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu. ²⁶ Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügú láu proféta. ²⁷ Juan, ligía óunagülei le uágubei taríñaga Lerérun Búngiu.

Nounajañein nouñagüle bubáragiñe
lun laráansejani úma bubá.

²⁸ Quei naríñaguni jun, jádan sun gürígia, úagili proféta weíriguti lueí Juan, áni láu sun líra, weíriguti le únabutimaabei lídan larúeijan Búngiu sügú láu le anúgarügübalin ugánu luágu arúeijani ligía.

²⁹ Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáali meja labásteragüdajan Juan, ³⁰ ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadúgüni le lubeíbei Juan, merésibirun jamúti lé yebe labúseerubei Búngiu ladúgün luágu jafúleisein. ³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja añúurubaña mágidirugu ájurera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jírti jun, mayájuntün.” ³³ Ladúga ñúbinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügúri Garaúwarügüti, jóútina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷ Níñounti ában wúri wuríbati témeri lídan ubúrugü ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadúdüragüdüni lugúdi láu táguira. Nuján ayájuaja, nuján arágajei láu tídíburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügúri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bían wügúriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun wúri tugúya, ába laríñagun lun Simón.

—¿Aríagu bíña tun wúri to? Belútina búbiñoun, míchutibu dúna nun lun nachíbuni nugúdi, ánjounti wúri to, ágawagüda tumúti nugúdi láu táguira, ába tamábeidagüdüni láu tídíburi. ⁴⁵ Machú bumútina, ánjoun tugúya, lúmagiñe nebélurun, merédegili tachújani nugúdi. ⁴⁶ Míchutibu aáli nábulugu, ánjoun tugúya, túguatu ibíñei jémeti luágu nugúdi. ⁴⁷ Ligía naríñagunbei bun luágu arúfuda láani luweírin tínsiñejabu luágu

ferúdunawa lan líbe tifígoun, ánjeinti gürígia le míbeti ferúdunawa lan, míbeti ínsiñeni larúfudun.

⁴⁸ Ábati laríñagun Jesúsu tun wúri tugúya.

—Ferúdunawaali bifígoun.

⁴⁹ Ábati jagúmeserun amísurajoútiña ja ñúnbaña lúma ñi aríñaga jámagua.

—¿Cáteisan wügúri le, ferúduna lubeí gíñe figoú?

⁵⁰ Ába laríñagun Jesúsu tun wúri tugúya.

—Sálbawádibu lídaangiñe bifígoun ladúga bafíñerun nuágu, beíba darángilañu.

8

Würíña já buri meja íderaguti Jesúsu

¹ Lárigiñe cátei le, ñúdünti Jesúsu lídoun sarágu ubúругu lúma buri lirájüñü fulásu íchigei ugánu buíti luágu larúeijan Búngiu. ² Ñúdütiña dúusu apóstolugu lúma jáma würíña ja lareídaguagüdübaña jádaangiñe espíritugu wuríbatiña lúma sándi. Ñíñoun María to gíriboun Magdaléna jádan, to ídaangiñeboun jáfurida sédü espíritugu wuríbatiña, ³ ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti

(Mt 13.1-9; Mr 4.1-9)

⁴ Sarágu jána gürígia ñúbinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun úma, ába jadúgüraguni ásügürütiña, ába jeígini dunúru. ⁶ Líbiri, ába láburujan labádinaguoún dúbü, dánti le laboúchun, ába lásaurün ladúga lumábei fulásu. ⁷ Ába láburujan líbiri labádinaguoún jíyu, ába láfaruni jíyu le ájüchübei úara lúma. ⁸ Ñíñein gíñe lídaangiñe, áburujati lídoun múa buíti, dan le laweñamudun, gin ligía, buíti lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt 13.10-17; Mr 4.10-12)

⁹ Ábati jálügüdüni láni disípulugu ca lan lílabei jémpulu le. ¹⁰ Laríñaga joun. —Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebésesenbaña láu lerérun, láu jémpulu laríñawagúa cátei luáguti larúeijan joun lun ibídiñebei lan líla cátei le jaríjibei joun, lun gíñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti

(Mt 13.18-23; Mr 4.13-20)

¹¹ Ába laríñagun Jesúsu joun.

—Niján líla jémpulu ligía. Líla nádü, ligía lerérun Búngiu, ¹² úma le ñíjin lubeí láburuja lídaangiñe líla nádü, jagía gürígia ja agáambubalin lerérun Búngiu, ába líábin Máfia, ába lagídaruni tídaangiñe janígi lun mafíñerun jamá, masálbarun jagíame. ¹³ Dúbü le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afíñetiña luágu murúsun dan, áni dan le jóuchawagún, mawándun jamúti, ába jeféridiruni jafíñen luágu Búngiu. ¹⁴ Jíyu le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irisini lúma ugúndani le lánina uboú le, úati fulásu jarítaturugun lun lerérun Búngiu, siñátiti laságarún cátei buíti jádaangiñe. ¹⁵ Ánjeinti múa buíti le ñíjin lubeí láburuja líbiri líla nádü, jagía gürígia ja

agáambubalin lerérun Búngiu táu anígi buítu, adúga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu

(Mr 4.21-25)

¹⁶ Ába laríñagun Jesúsu.

—Úati güriía ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua. ¹⁷ Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machúlürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu

(Mt 12.46-50; Mr 3.31-35)

¹⁹ Ábati tachúlürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladúga jíbe güriía. ²⁰ Ába laríñawagún lun.

—Nujántia búguchu jáma bamúlenu bougudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía núguchubaña jáma namúlenu.

Lagálumaduni Jesúsu lérouga

(Mt 8.23-27; Mr 4.35-41)

²² Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálmougadun, ába darángila lan sun cátei. ²⁵ Ábati laríñagun joun disípulugu.

—¿Ca susérebei lun jafíñen?

Ába jálügüdagun jámagua láu anúfudei lúma luweírin anígi, jaríñaga.

—¿Cátei funásan wügúri le, gumádi lubáli garábali lúma lugúdi barána áni agáamba jameí?

Wügúri Gadárana le gawágubei espíritugu wuríbatíña

(Mt 8.28-34; Mr 5.1-20)

²⁶ Ába jachúlürün loubawagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába líabin ában wügúri lílana fulásu ligía lubádun. Lújali wügúri ligía gawágu espíritugu wuríbatíña. Madáuti anáanguni, maganoún ligía tídan múna, lídan buri jabára jiláaña le achigíti luágu dúbü lagánawa. ²⁸ Dan le laríjinbalin wügúri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraú Búngiu le Íñugutimaabei? Ayúmuraguatina bun lun masúfuriragüdün bánina.

²⁹ Laríñagunbei ítara ladúga lagúmadiruñein lan Jesúsu espíritugu ligía lun láfuridun lídaangiñe. Saráguja weíyaasu lárügüdüni espíritugu wuríbati ligía, ábaja jagúraguni

gürígia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritu lídoun fulásu le mageírawati. ³⁰ Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladúga gíbeeña espíritugu wuríbatíña ja ebélu-rubaña lídoun. ³¹ Ába jamúriajan espíritugu jagía lúma Jesúsu lun moúnajan lániña máfiougatin. ³² Queíti ñíñanu jamá sarágu búuruju eíga luágu ában wúbü yaráfa, ába jayúmuragun espíritugu jagía lun lun loúnajaniña jádoun búuruju jagía, ába lánjarun Jesúsu. ³³ Ábati jáfuridun espíritugu wuríbatíña jagía lueí wügúri ligía, ába jebélurun jádoun búuruju, ábati jáguragun búuruju jagía jóungua lueígiñe ában gudúungu, ába jáburujan lídoun lagúnu, ába jañaradagun.

³⁴ Dan le jaríjinalin ja oúnigirubaliña búuruju cátei le asúseredubei, ába janúfudedagun, ába jeíbaagun abájüdaguei ubúruju lúma áraabu. ³⁵ Ábati jóúdingua gürígia aríjei cátei le asúseredubei. Dan le jachúlürünbei le ñí lubei Jesúsu, ába jadáriruni wügúri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areídaguuali, ába janúfudedagun. ³⁶ Játi buga aríjubalin, ába jabájüdaguni luáguti lareídagun wügúri lé buga gawágubei espíritugu wuríbatíña joun, ³⁷ ába jayúmuragun lílana fulásu ligía lun Jesúsu lun lídin ñígiñe, ladúga janúfude. Ábati ládinun Jesúsu tídoun ugúnein lun lídin, ³⁸ ába layúmuragun wügúri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

³⁹ —Giríubá búbiñoun, ábame babájüdaguni sun le ladúgübei Búngiu bun.

Ába lídin, ába labájüdaguni le ladúgübei Jesúsu lun lídan sun fulásu ligía.

Liraú Jáiro túma wúri to agúrurubarun lanáangun Jesúsu

(Mt 9.18-26; Mr 5.21-43)

⁴⁰ Dan le lagíríbudunbei Jesúsu loubáfurugun lagúnu, ába jerésibiruni gürígia láu ugúndani ladúga sun jagía agúrabañu jáñein. ⁴¹ Ábati liábin ában wügúri gíríti Jáiro, le ábanbei jádaangiñe tábutigu jalígílin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladúga ában rügúñoun liraú, queí buri dúusu irúmu táu, touwe. Dan le lídinbei Jesúsu, ába jafálaruni sarágu gürígia darí lun jámurudaguni.

⁴³ Níñounti ában wúri jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴ Ába tayárafadun lun Jesúsu lanáangiñe, ába tagúruruni táru lanáangun, lídan méme óra ligía ába tareídagun.

⁴⁵ Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdagidibu ca lan agúrurubei buágu?

⁴⁶ Ába laríñagun Jesúsu.

—Gurúwaali nuágu, ladúga sandí numuti luágu areídaguagüdaadina lan gürígia láu nubáfu.

⁴⁷ Dan le tasúbudiruni wúri tugúya luágu subúdiwaali lan, ába tiábin adádagareina, ába tájuduragun lubádu lugúdi Jesúsu, ába tagúfesserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía. ⁴⁸ Ábati laríñagun Jesúsu tun.

—Niraú, areídaguadibu ladúga bafíñerun nuágu. Beíba darángilañu.

⁴⁹ Nígili Jesúsu adímureja, ligía lachúlürün ában lúbiñegiñe Jáiro, ába laríñagun lun Jáiro.

—Jilá biraú, mebérésejadügüyabá lun Maésturu.

⁵⁰ Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraú.

⁵¹ Dan le lachúlürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagúbürigu irájü tugúya. ⁵² Jayájuña sun ja ñíbaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

⁵³ Ába jéjerajan láu ladúga subúdi jamáni luágu jilá tan. ⁵⁴ Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

⁵⁵ Ába táguuyugun, ába tásaarun lídan méme óra ligía, ába laríñagun Jesúsu lun jíchugun eígini tun. ⁵⁶ Weíríti janígi tagúbürigu, ába laríñagun Jesúsu joun lun mabájüdagun jamáni le asúseredubei ni ca un.

9

Loúnajaniña Jesúsu dúusu apóstolugu apúrichija

(Mt 10.5-15; Mr 6.7-13)

¹ Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídaguagüdün sánditiña.

² Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña. ³ Laríñaga joun.

—Manúga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janúgün. ⁴ Furúmieguarügü múna to ñíjin lumúti jachúlúra, reídei jumá ñi darí jídin lídaangiñe fulásu ligía. ⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun joúngua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóúdin.

Loúnwen Juan le abásteragüdejabei

(Mt 14.1-12; Mr 6.14-29)

⁷ Ába lagáambun gumádimati Heródes luágu sun cátei le ladúgübei Jesúsu, ibídiñetiti lun cába lan larítagua, ladúga ñíñanu aríñagutiña luágu saráali lan Juan lídaangiñe ouweni, ⁸ jíbiri aríñaga luágu proféta Elías lan achúlaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹ Ába laríñagun Heródes.

—Áu guánarügü oúnajabei adúrürei lichúgü Juan. ¿Cátei funáti le, le uágubei nagáamba labájüdagún sarágu cátei?

Ábati loúchun Heródes laríjini Jesúsu.

Leíqagüdün Jesúsu seíngü mílu wügúriña

(Mt 14.13-21; Mr 6.30-44; Jn 6.1-14)

¹⁰ Dan le jagíríbudun apóstolugu, ába jabájüdagun lun Jesúsu luágu sun le jadúgübei. Ábati lanúgüniña lídoun fulásu mageírawati yaráfa lun Betsáida. ¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña gürígia ja, ñúdün jamámuga áluga jabára lun jeméraagun, áluaja jagíame eígini lídan buri lirájüñü aúdü lúma lídan buri fulásu yaráfati, ladúga úati ni cáta ya.

¹³ Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjava gubeñrügü ñúdün agáñija eígini joun sun gürígia ja.

¹⁴ Yaráfañanu joun seíngü mílu wügúriña ñi, mabájüdunga wúriña jáma irájüñü. Ába laríñagun Jesúsu joun láni disípulugu.

—Ñurúgüda jumáña dimí dimí-san.

¹⁵ Ába jadúgüni ítara, ába jañúurun súngubei. ¹⁶ Ábati lanúgünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷ Joútiña súngubei quimúle, dan le jabúdajanun ígiragutu, buíngüdatiña dúusu faniñe láu.

Laríñaguni Pédro luágu Jesúsu lan Crístubei

(Mt 16.13-19; Mr 8.27-29)

¹⁸ Luágu ában wéyu dan le layúmuruña lan Jesúsu lábugua, ñíñanu láni disípulugu díseraü lueí, ába laríñagun joun.

—¿Ída liñasan jarítagun gürígia nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdejabei amúru, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amúru.

²⁰ Ábati laríñagun joun.

—Ángi jugúya, ¿cátanagi lídan jarítagun?

Laríñaga Pédro lun.

—Crístu, le loúnajabei Búngiu lun lasálbaruniña gürígia, amúru.

Ladímurejan Jesúsu luágu loúnwen

(Mt 16.20-28; Mr 8.30-9.1)

²¹ Ába laríñagun Jesúsu joun láu éregu lun maríñagun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügúri Garaúwarügüti. Janúgübadina wügúriña weírigutiña lídan jafíñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lúruwan wéyu lúnya nabágaridun.

²³ Lárigiñe, ába laríñagun joun súngubei.

—Le buséti nánigu lan, buléileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queísi lanúgüni ában wügúri lugúruwan, falálana. ²⁴ Ladúga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libjubei ibágari le magúmuchaditi siélu. ²⁵ ¿Cági ju lan lun gürígia lagáñeiruni sun le lánina ubou, leféridireime lubára siélu o lagúnrinchaguba lan lúngua? ²⁶ Le anúgüti busíganu nuágu lúma luágu nerérun, áu le Wügúri Garaúwarügüti, nibúsigaribadina gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷ Ninárün naríñaguni jun luágu añájein lan jádaangiñe ja yábaña guetó, moúnwenbaña maríjinga jameí larúeijan Búngiu.

*Lámuñedagun larijín Jesúsu**(Mt 17.1-8; Mr 9.2-8)*

²⁸ Queíburi wídü wéyu lárigiñe lariñaguni Jesúsu cátei le, ába laweínrun luágun ában wúbü ayúmuragua lun Búngiu, barú lumútiña Pédro, Jacóbo, lúma Juan lúmagua. ²⁹ Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun. ³⁰ Ábati jasáriragun Moisés lúma Elías ayánuja lúma, ³¹ geyégu líña ában larúgounga weíriri jáu, jayánujaña libúgürü ouweni le lúnbei lasúfuriruni Jesúsu, Jerusalén. ³² Láu sun luweírin lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wügúriña ja lúmabaña. ³³ Dan le adísedeiña bián wügúriña jagía lueí Jesúsu, ába lariñagun Pédro lun.

—Maésturu, ¡lídán dan awánja lan ya! Adúga wamá úrúwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan lariñagubei. ³⁴ Súnti niján lan adímureja, ába liábin ában juánriñu ouburaguaña, ába janúfudedagun ladúga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraú le jínsiñebeí nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

*Lareidaguagüdüñ Jesúsu ában irájü gawáguti espíritu wuríbatí**(Mt 17.14-21; Mr 9.14-29)*

³⁷ Larúgan, dan le jarárirunbei lueígiñe wúbü, sarágu jáña gürígia ñúdüntiña lubároun Jesúsu. ³⁸ Ábati lagúaragun ában wügúri jádaangiñe láu umálali jéreti, lariñaga.

—Maésturu, fuleíseijabubá nun, aríjabeí niraú le ligía rügúñeibeí, ³⁹ níjein ában espíritu wuríbatí luágu, dan le lárügüdüni, ába lagúaraguagüdüni, ába louwejan, ába lá-furijan jacútaü liyúmulugugiñe. Añáwurija lumúti, májati lígiruni. ⁴⁰ Ayúmuraguaadina joun báni disípulugu lun jaságaruni espíritu wuríbatí le lueí, siñá jamuti.

⁴¹ Ába louñabun Jesúsu, lariñaga.

—¡Jugúya gürígia mafíñeradiña, wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barúbei biraú ñájoun.

⁴² Dán yebe le lídin irájü ligía lun, ába lájuchuruni espíritu wuríbatí múarugún, ába louwejagüdüni, ába ladeínjan Jesúsu lun espíritu wuríbatí ligía, ába lareidaguagüdüni irájü, ába ledéregeruni lun lúguchi. ⁴³ Ába laweíridun janígi súnigubei láu luweírigun Búngiu.

*Ladímurejaanya Jesúsu luágu louñwen**(Mt 17.22-23; Mr 9.30-32)*

Sun añája lan láu luweírin janígi láu le ladúgübei Jesúsu, ába lariñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügúri Garaúwarügüti, jájaburugun náganiñu.

⁴⁵ Úati gunfaráanda jamáni disípulugu le lariñagubei, ladúga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le lariñagubei, joun.

*¿Ca weírigutimaabei?**(Mt 18.1-5; Mr 9.33-37)*

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ quei lasúbudiruni Jesúsu jasáminan, ába lanúgün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jádan, ligía weírigutimaabei.

Le mámabei wágani, wámagiñeñein

(Mr 9.38-40)

⁴⁹ Ábati laríñagun Juan lun Jesúsu.

—Maésturu, aríjatiwa ában wügúri aságajati espíritugu wuríbatiña lídan bíri, ába wewéridiruni ladúga máma lan ában wádaangiñe.

⁵⁰ Laríñaga Jesúsu lun.

—Mewéridira jumeí, ladúga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layarafadun dan lun lanügúniwa Jesúsu siélun, ába ladúgüni luweíyasun Jerusaléoun láu anígi. ⁵² Ába loúnajan loúnagülegu lubá, ába jóúdin lídoun ában liraúraü fulásu láni Samária lun jáluajan múna lubá, ⁵³ májatiña Samariána jerésibiruni ladúga jaríjin luágu leíbuga lan Jerusaléoun. ⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmunchun jáu queí meja ladúgüni proféta Elías?

⁵⁵ Ábati ladígiragun Jesúsu jawágun, ába ladeínjan joun, laríñaga.

—Ibídíñeti jun luágu wuríba lan cátei le jayúmajabei. ⁵⁶ Máma niábiña, áu le Wügúri Garaúwarügüti, agúnrinchaguei jabágari gürígia, niábiña asálbarei.

Ábati jóúdin lídoun ámu liraúraü fulásu.

Já yebe busénbaña jafálaruni Jesúsu

(Mt 8.19-22)

⁵⁷ Dan le luágu jamá úma, ába laríñagun ában wügúri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügúri Garaúwarügüti, úati ni jalába lan nabálachagüdei nichúgü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen nóguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu, ánjein bugúya, beíba apúrichije uganu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

¹ Lárigiñe cátei le, ába lanúadajan Jesúsu úruwa-wein-dísi jádaangiñe lánigu, ába loúnajaniña lubá, bián bián, lídoun sun ageíraü luma fulásu le lúnbei lídin ñi. ² Laríñaga joun.

—Inárüni, gíbetiña güriña ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubeí jamúriajan luma Búngiu lun loúnajan ñadágimeintiña jagá-naguóun. ³ Jeíba, noúnajañadün quei mudún jádoun anímaalu gáñitiña. ⁴ Manúga jumá ságü júmagua, ni seínsu, ni geídi, meréderagun jugúyame ayánuja ni ca úma luágu úma. ⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añájein lubeí güriña jínsiñejabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí güriña jínsiñejabutiña lun darángilaü tídan múna tugúya, giríbugüda jumeí abúsuruni. ⁷ Reídei jumá tídan múna tugúya to ñí lubei jerésibirúa, jou jumeíme, gurá le íchugúti jun úouga busíganu, ladúga garíchatí ñadágimeinti lun lafáyeiruaja. Masáansija jumá múna. ⁸ Dánme le jachúlürün lídoun ában ageíraü le ñí lumuti jerésibirúa, jóujumei le íchugúti jun, ⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰ Ánjaün achúlüra lídoun ában ageíraü le ñí lumuti merésibirúniwa jumá, furíjuma lídoun buri úma, jaríñagame. ¹¹ “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburí, áni subúdi jumeí luágu subúdigüdáwaali lan luáguti larúeijan Búngiu jun.” ¹² Naríñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirubadün sügü láu jabeichún lílana ubúругu le Sodóma.

Lílana ageíraü buri magáambaditiña
(Mt 11.20-24)

¹³ ¡Fugiábu jugúya lílana Corazín! ¡Fugiábu jugúya lílana Betsáida! Ladúga lun jamúga ubúругu lan Tíro o Sidón ladügúwa buri miláguru le adügúbei lídan jubúrugute, binárü jamúga lasáansiragua jagáburí lílana, ába jamúga jarúfuduni láu jadáuragun lúdu luma balígi. ¹⁴ Ánjein jugúya, lídaanme luwéyuri agúseruni, weíritimaabei jabeichúniwa sügü jáu güriña Tírona jáma Sidónna. ¹⁵ Amúrüti, ubúругu le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdúwaba bíri únabun queísi lúnabun máfiougati.

¹⁶ Ába laríñagun Jesúsu joun úruwa-wein-dísi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Núguchi le oúnajabalina.

Jagíribudun úruwa-wein-dísi disípulugu

¹⁷ Ába jagíribudun úruwa-wein-dísi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburí leíguadun Máfia siéluñe quei ában labírijanouga. ¹⁹ Rújadina ubáfu jun lun jadúgüragun jéwe jáma águru, masúfurirunga ni cáta, luma lun jére lan jubáfu lueí lubáfu Máfia. ²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürúwañu tídan lilíburun Búngiu siélu.

Lagúndaarun Jesúsu
(Mt 11.25-27, 13.16-17)

²¹ Lídán óra ligía, ába labuínchagüdüni Sífiri Sándu Jesúsu láu ugúndani, ába laríñagun. —Núguchi, le Labúremebei siélu lúma múa, iñúragüda numúti bíri, ladúga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja louguabaña ufúrendeí queísi irájüñü. Ánja, Núguchi, ladúga ítara líña babúseeruni.

²² ‘Derége láali Núguchi sun cátei nun. Úati ni ában subúdíjabuti cáтана lan lueídügüya Núguchi, úati gíñe ni ában subúdíjabuti cáteiñein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ ladúga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídán ában guríriguaü, ñíñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadúga lun gayára lan nibíjini ibágari magúmuchaditi?

²⁶ Laríñaga Jesúsu lun.

—¿Cáteigi bürúwañubei lídan lilúrudun Moisés? ¿Ída liñágia balíjan ñi?

²⁷ Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badúga ítara, bibíjubei ibágari magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰ Ábati loúnabuni Jesúsu, laríñaga lun.

—Ñíñein ában wügúri arágachuti Jerusaléngiñe lun ubúrugun Jericó, luágu luweíyasun ába jarügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jilá mémeeli. ³¹ Ába lásügürün ában jafádirin juríu lídaangiñe méme úma ligía, dan le laríjinbalin wügúri ligía, mebéresenti láu, ába lasígiruni leíbugun loubáfurugugiñe úma. ³² Sügú ligía ában jádaangiñe ladúgawagun Leví ñígiñe, dan gíñe le laríjini wügúri buleíseiwaali ligía, ába gíñe lasígiruni leíbugun loubáfurugugiñe úma, mebéresenga gíñe láu. ³³ Ábati lásügürün ában wügúri Samariána aweíyasujati lídaangiñe úma ligía, dan le laríjinbalin, ába lagúdemedagun lun. ³⁴ Ába liábin, ába lagáranijan lun bíti buri le luágubei láu aáli túma diweín, ába lagúraguni. Ába laweínragüdüni luágu lilügün burígü, ába lanügüni tídown jában chülúdügütiña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügúri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe úruwa wügúriña ja líbiribeí le ueíbei líwerujoúa, lídan barítangun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badúga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachúlürün lídoun ában liraúraü fulásu le ñí lubei terésibirei ában wúri gíritu Márta, túbiñe. ³⁹ Ñíñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le lariñagubei, ⁴⁰ ánjounti Márta, weíriti teténirun lun tubéresegun. Ába tariñagun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nábugua? Aríñagabá tun lun tíderagunina.

⁴¹ Ába loúnabunun Jesúsu, lariñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügúniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába lariñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Lariñaga Jesúsu lun.

—Dánme le jayúmuragun lun Búngiu, jariñagame ítara.

Wáguchi Búngiu le siélubei, inébewalá bíri.

Ñúbinlá bidáani lun barúeijan ya ubouágu, adügúwalá bugúndan ubouágu quei ladügún bugúndan siélu.

³ Rúboun fein buídurügüti woun lun wéyu le ugúñebei.

⁴ Ferúdunabeí wuríbatí le adúga wamáalibeí quei ferúduna wamániña ja adügübaña wuríbatí woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati gíñe Jesúsu joun.

—Niján ában jémpulu jun. Lídin jamúga ában jídaangiñe lúbiñe ában lumáda amídi áriebe, ába lariñagun lun. “Numáda, furédeibá úrüwa fein nun, ⁶ ladúga sun líña lachúlürün ában numáda núbiñoun áni úati ni cáta núma lun níchugun lun.” ⁷ Ába jamúgati loúnabun le ában múnadagiñe, lariñaga jamúga. “Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.”

⁸ Nariñaguña jun luágu íbini lan jamúga másaarun lan íchigoun lun ladúga lumáda lan, lásaaruña jamúga íchigoun lun lueí lasígirun ebéreseja lun. ⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰ Ladúga sun le amúriajati, ibíjati, le áluajati, daríti, le adaúnjati luágu béna, junrénwati lun.

¹¹ ‘¿Gayáraabei funági líchugun ában úguchili jídaangiñe dúbü lun liraú dan le lamúriajan fein lúma? ¿o líchugun lan ában jéwe lun dan le lamúriajan úduraü? ¹² ¿o líchugun lan ában águru lun dan le lamúriajan gañeín? ¹³ Gíchigadijadün ligá cátei buíti joun jirájüñü láu sun juríban, ¿gúbumeti líchigei Júguchi Búngiu le siélubei Sífiri Sándu joun ja amúriajati!

Lariñawagún luágu níjein lan lubáfu Máfia lúma Jesúsu
(Mt 12.22-30; Mr 3.19-27)

¹⁴ Níñein Jesúsu aságara ában espíritu wuríbati lueí ában wügúri le madímuregüdün láalibe yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵ Níñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügúri le espíritugu wuríbatiña.

¹⁶ Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu. ¹⁷ Queíti subúdi láani le jarítagebei, ába laríñagun joun.

—Furúmieguarügü arúejani le afánreinraguti lun jageíndagun jámagua, lagúnrinchaguba, ában gíñe familia fánreinguatiña ladúga wuríbu, jagúnrinchaguba gíñe. ¹⁸ Ánjein gíñe níjein lubeí fánreinguau jádan Máfia jáma lánigu, ¿ída lubági ladúrarun lubáfu? Naríñagunbalin le, ladúga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia, ¹⁹ áni ánjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagía guánarügü arúfuda jamúti luágu bulíeigua jumá. ²⁰ Le inárünibeí, láu lubáfu Búngiu naságaja espíritugu wuríbatiña, áni arúfuda lumúti líra luágu chülújali lan larúejan Búngiu lídoun fulásu le.

²¹ ‘Ába wügúri jéreti, dan le aráanseñu lan, toúnigi lúban buídu, sun le lúbiñebei chóuruti. ²² Ánjein nñúbin ában jéretimaati lueí ába lásiiraguni, lagídaruboun sun lárúmate to uáguboun leménigida lueí, ábame lanúgüni le labúseerun, ába lafánreinraguni jáma lumádagu.

²³ ‘Le mámabei númagiñe, náganiñein, le míderagun lumútina, güríngua lumúti le nadúgübei.

Espíritu wuríbati le agíribudúbei

(Mt 12.43-45)

²⁴ Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to nñigiñe lubeí náfurida.” ²⁵ Dánti le lagíribudun, ába ladáriruni gürígia buga ligía quei ában múna to buídawaru, aráanserúa. ²⁶ Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügúri ligía lueí buga furúmiñe.

Ugúndani le tímatimaati

²⁷ Dan le niján lubeí Jesúsu aríñagei cátei le, ába tagúaragun ában wúri jádaangiñe gürígia, taríñaga.

—¡Fuleíseiwatu jiñáru to agúriajabalibu, fuleíseiwatu to átagüdübalibu!

²⁸ Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

Amúriajatiña gürígia wuríbatiña miláguru lúma Jesúsu

(Mt 12.38-42; Mr 8.12)

²⁹ Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatiña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás. ³⁰ Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügúri Garaúwarügüti, ligíaba ában seíni joun gürígia ja lánina dan le luágu Búngiu lan oúnajabalina. ³¹ Dánme le lidáani agúseruni, dánme le lagúseragüdüniña Búngiu gürígia

ja lánina dan le, ábame tásaarun lurúeite Súru lun tasíadiruniña, ladúga tugúya, ñúbintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügú láu Salomón áni májatün jagáambunina. ³² Lídan mémeme agúseruni ligía, ábame gíñe jásaarun já meja aganoúbaña ubúruugu Nínive, ábame jasíadiruniña ja lánina dan le, ladúga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weíriguti sügú láu Jonás, áni májatün lun jagáambunina.

Lilámpun úgubu

(Mt 5.15, 6.22-23)

Ába lasígirun Jesúsu aríñaga.

³³ —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundun joun ja ebélurutiña. ³⁴ Ítara líña águu quei ában lámpu lun úgubu, ánjein buídu lubei bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubei bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi. ³⁵ Touñigibá lun mabúrigadun lan bilámpun. ³⁶ Ánjein jarúgounga lubei láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

³⁷ Dan le lagúmunchunbei ladímurejan Jesúsu, ába lamísurajani ában fariséo eíga lúbiñe. Ába lebélorun Jesúsu, ába lañúurun luágu dábula. ³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini. ³⁹ Ába laríñagun Wabúreme Jesúsu lun.

—Jugúya fariséogu ragá jumuti wéru lúma asíedu boúgudigiñe libíti, múnadagiñe jibíti, wiyetün, buin jíña láu luweínamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿Ibídíñeti jun luágu le lan adúgübalin le boúgudigiñebei, ligía lan gíñe adúgübalin le múnadagiñebei? ⁴¹ Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe boúgudigiñe jibíti.

⁴² ¡Fugiábugu jugúya fariséogu! Adúgatün díisi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madúgüntün gásu láu ísuruni lúma línsiñejabu Búngiu. Ligía lúnbei jadúgüni, mígirunga jumeíme jadúgüni le ában.

⁴³ ¡Fugiábugu jugúya fariséogu! Buséntün járügüdüni ubáraü le jabára ja weíriguti-maabaña tídan jilígilisin, busén jugúya lun labúsurún jun láu sarágu inébesei úmada.

⁴⁴ ¡Fugiábugu jugúya fariséogu, biángua tigíbul, ladúga ítara jíña quei umúajaü le marijinti, sügú jagía gürígia ligíbuagugiñe ibídíñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

⁴⁶ Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anúgüni júrüti joun ámu, áni jugúya, májatün janúgün ni murúsun lídaangiñe.

⁴⁷ ¡Fugiábugu jugúya!, ladúga rújumuti dúbü arítaguagüleme luágu jamúaja profétagu já meja jáfaragubaña binádu jagúbürigu. ⁴⁸ Láu líra, arúfuda jumúti luágu gúnda jumá láu le jadúgübei binádu jagúbürigu, jagía áfaragubaliña, jugúya wéndegüda jumúti jamúaja.

⁴⁹ ‘Ligía laríñagunbei meja Búngiu láu lichú láu. “Noúnajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰ Ligía

lagúseragüdübaña lubeí Búngiu gürígia ja lánina dan le luágu játa profétagu ja áfarawagübaña lúmagiñe ladügún ubou, ⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jóúwegun profétagu.

⁵² ‘¡Fugiábugu jugúya arúfudajatiña lilúrudun Moisés!, ladúga ragú jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

⁵³ Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴ lun jaríjin ánjaña adárira lidúnrun.

12

Larúfudajan Jesúsu luágu mabuídun lan biángua lan igíbu

¹ Ába jóúndaragun sarágu mílu gürígia, gíbetiña darí lun jachúinragun jóúngua. Ába lagúmeserun Jesúsu aríñaga jóúntima láni disípulugu.

—Toúnigi jumátia jawéi fariséogu, ítara líña jagáburi quei ísi—biánguañein jagíbu.

² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Naríñajare jun, numádagu, moún lumuti janúfudedun jawéi gürígia ja gabáfubaña lun jáfarunün jilágubei, lárigiñe líra siñá jadúgün ámu cátei jun. ⁵ Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibeí lun loúnajanun juwáni máfiougatin lárigiñe lagídaruni jibágari. Lueílá janúfueda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷ Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügú jáu sarágu dunúru ligíbugiñe Búngiu, áni loúnigiruñádün.

Ja meyédagunbaña luágu Jesúsu jagíbugiñe gürígia

(Mt 10.32-33, 12.32, 10.19-20)

⁸ ‘Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba gíñe luágu nánigu jamá jagíbugiñe láni Búngiu ánjeligu. ⁹ Ánjaña ja aríñagubaña jagíbugiñe gürígia luágu máma jamá nánigu, naríñaguba gíñe jagíbugiñe láni Búngiu ánjeligu luágu máma jamá nánigu.

¹⁰ ‘Furúmieguarügü le aríñaguti cátei wuríbati nuágu, áu le Wügúri Garaúwarügüti, gayáraati ferúdnawa lan, ánjein le anábaguti Sífiri Sándu, siñáti ferúdnawa lan.

¹¹ ‘Dánme le janügún ligíbugiñoun lúrudu lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan jóúnaba o cába lan jaríñaga, ¹² dánme le lachúlürün óra lun jadímurejan, larúfudubei Sífiri Sándu le lúnbei jaríñaguni jun.

Ewerídjani lueí leténirún sarágu lun irisini

¹³ Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Laríñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵ Aríñagati gíñe ítara.

—Toúnigigua jumá júngua lueí luweínamu águu, ladúga máma lueígiñe líbe lúmati gürígia labágarida sarágu dan.

¹⁶ Ábati líchuguni jémpulu le joun, laríñaga.

—Ñíñein méja ában wügúri rísiti, ába líchugun lichári alúbajouni buíti. ¹⁷ Ábati laríñagun rísiti le lúnguarügü. “¿Cábasán funa nadúga? Ibídiñeti nun jalába lan nareídei sun le nalúbajabei.” ¹⁸ Ába lasáminarun, ába laríñagun. “Subúdi náali cába lan nadúga, nagúnrinchaguaru sun náni lágei líla nádü, ábame nadúgün ámu weínamutimaatu, ábame nareíduni nalúbajan lúma sun le nómabei tídan. ¹⁹ Ábame naríñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóuba, gurába, gúndaabá.” ²⁰ Laríñaga Búngiu lun. “Wügúri deré tagáambun, bouwe áriebe le, sun le búmabei areídañu, ¿cábasan un lerédera?” ²¹ Ítara líña lasúseredun lun gürígia le adámuridaguagüdüti irisini lánina ubou le lúngua, ába leréderun gudemeñu lídan cátei le luáguti Búngiu, líña Jesúsu.

Touñigi lumútiña Búngiu lirájüñü

(Mt 6.25-34)

²² Ába laríñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun. ²³ Gebégitimaati ibágari sügú láu eígini, gebégi úgubu sügú táu anáanguni. ²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, jóugüda lumútiña Búngiu. ¿Gebégitimaatün sügú jáu dunúru! ²⁵ Úati ni ában jídaangiñe gayáraati líchugun lánwoun libágari láu sun luweírín lidíjeri luágu. ²⁶ Ánjein lubeíti siñá lubei jadúgüni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan labouchun buri fulúri. mawádigimariti, májüchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubei ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, lougua tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladúga lirájüñü ubou le, lárígiñanu buri cátei le, ánjein jugúya, níjein ában Júguchi le subúdíjabúbei lun sun jemegeirun. ³¹ Áluaja jumá lun jesériwidun lun furúmiñe, ábame líchuguni sun le jemegeirubei jun.

Irisini siélu

(Mt 6.19-21)

³² ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan. ³³ Alúgura jumeí le júmati, jíchigeime lebégi joun gudemetiña, láu líra, jadúgüñoun lágei seínsu to maweyadaditu, irisini siélu le magúmuchaditi, le ñí lubei siñá lan jebélurun jíwerutiña anúgei jirisin, úa jagía jamútiri ñi lun jeígini. ³⁴ Naríñagubalin le jun ladúga le ñí lumuti jirisin, ñíñoun gíñe janígi.

Aráanseñu jumá, agúrabaja

³⁵ ‘Aráanseñu jumá lubá nagíribudun siéluñe, durúngu jilámpun. ³⁶ Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. ³⁷ Buídubei dan joun músu ja ladárirubaña jayúbudiri agágudúañu dan le lachúlürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun. ³⁸ Íbini amídi áriebe lan lachúlúra o lubá lan larúgan, ánjaña ladárra agágudúañu, buídubei dan joun músu jagía. ³⁹ Subúdi jumeí luágu lun lan jamúga subúdi láni tabúreme múna cába lan óra lachúlúra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegún. ⁴⁰ Jugúya, aráanseñu jumá gíñe, ladúga lídaanme magáradajan jumá ligíame nagíribudun, áu le Wügúri Garaúwarügüti, ubouágun.

Músu le úarabei, lúma le múaraanbei

(Mt 24.45-51)

⁴¹ Ábati lálügüdüni Pédro Jesúsu, laríñaga lun.

—Nabúreme, ¿wounrügü bíchigei jémpulu le ódi joun súngubei?

⁴² Laríñaga Wabúreme Jesúsu lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leígagüdüniña lídan dan. ⁴³ Buídubei dan lun músu le ladárirubei liyúbudiri agúnfulira láu luwádigimari dan le lachúlürün. ⁴⁴ Ninárün jáu, luágu líchugubei lan liyúbudiri lun ligía lan aríja láu sun le libíjubei. ⁴⁵ Ánjein arítagua músu ligía luágu lúgili lan liábin liyúbudiri, ábame lagúmeserun ouseraña jíbiri músu ja lábugiñebaña laríajaan wuríba, leréderame eíga, áta, abácharuada, ⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírín-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷ ‘Músu le subúdijabúbei lun ca lan labúseerubei liyúbudiri áni maráanserunti, mabájüdünléi, labeichúba sarágu. ⁴⁸ Ánjeinti músu le ibídiñeti lun, ába ladúgün cátei lé buri lúnti labeichún lueígiñe, maweírubei labeichún. Le únti líchugúa gíbeti, gíbebei amúriajóuti lúmagiñe, le gíbeti ígirúti lábugiñe laríajaan, gíbetimaabei amúriajóuti lúmagiñe.

Jesúsu lébunabei fánreinguaü

(Mt 10.34-36)

⁴⁹ ‘Láu niábin uboúagun, ñíbei fánreinguaü uboúagu queísi wátu geméti. ¡Busénjadina jamúga durúnguaali lan wátu ligía! ⁵⁰ Lúnti nasúfurirun le gumúti, ¡meménija nanígi lagúmuchun! ⁵¹ ¿Jarítaguatúnsan luágu barú nán meja darángilaü númagua dan le niábinbei uboúagun? Manúgütina darángilaü, fánreinguaü nanúgübei. Jafánreinraguba ja mafíñebaña nuágu jáma ja afíñebaña nuágu, ⁵² lúmagiñe guetó, seíngügua tídan ában múna, jafánreinraguba úrüwa jaweí biáma, biáma jaweí úrüwa, nueígiñe. ⁵³ Lagáraguba úguchili luágun liraú, isáani luágun úguchili, úguchuru tuágun tiraú, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

⁵⁴ Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. ⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

Jóucha jumá lun lídan jumá dan jáma jáganiñu

(Mt 5.25-26)

⁵⁷ ‘¿Ca uágu siñá lubei jasúbudiruni cátei le úaraguabei júngua? ⁵⁸ Ánjein agúaragüda ában gürígia buágu, ába bídin lúma ligíbugiñe lúruðu, jóuchabá baráanseragun búngua lúma luágu úma lubáragiñe jachúlürün, manúgün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furísunrugun. ⁵⁹ Naríñajare bun luágu máfuridunbadibu lan nígiñe darí bafáyeiruni lagúmujoún bigáwanün.

13

Ca lan uágu lúnti lubei lasáansirún igáburi

¹ Lídoun méja dan ligía, ába jayábin gürígia abájüdagua lun Jesúsu jawágu wügúriña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu. ² Ába laríñagun Jesúsu joun.

—¿Jarítaguatúnsan luágu ladúga lan luweírín jafígoun Galiléana jagía sügú jáu ja jíbiri lílana jageíra lasúseredunbei le joun? ³ Mára lueígiñe líra, láu sun líra, naríñajare jun luágu ánjein lan masáansirun jumá jigáburi, jóúweguba gíñe sun jugúya. ⁴ Ángi díisi-wídü jagúra ja ouwegubaña dan le láburuanbei wáyelesi le Siloébei jawágun — ¿jarítaguatún luágu weírítima lan jadúnrun sügú jáu ja jíbiri ja aganoúbaña Jerusalén? ⁵ Mára líña gíñe, láu sun líra, naríñajare jun luágu ánjein lan masáansirun jumá jigáburi, jóúweguba gíñe sun jugúya.

Jémpulu tuáguti tídibu ígo to múnboun

⁶ Ábati labájüdaguni Jesúsu jémpulu le joun, laríñaga.

—Ñíñein ában wügúri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati laríñagun lun le oúnigirubalin ichári. “Aríjabásan, úrüwaali irúmu gabúgürügua niábin áluaja ígo tuágu ídibu to, madáritina. Chaúnboun, ¿cába uágu terédera ñi luágu ni cáta?” ⁸ Ába loúnabuni le oúnigirubalin ichári, ába laríñagun. “Niyúbudiri, ígirayaboún irúmu le, nañúludagüdali múa táu, awoúja áume táu. ⁹ Fágua tagíindun ítara, ánjour magíindun, ábame tánychugún.”

Lareídaguagüdünnun Jesúsu ában wúri sebúti tanágan lídan wéyu le eméraaguagülei

¹⁰ Luágu ában wéyu le eméraaguagülei, ñíñein Jesúsu arúfudaja tídan jalígílisin juríu, ¹¹ ñíñounti ában wúri, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun. ¹² Dan le laríjinbarun Jesúsu, ába lagúarun tun, ába laríñaga tun.

—Wúri, areídaguaadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴ Ábati lagáñidun tábuti ligílisi ladúga lareídaguagüdünnun Jesúsu lídan wéyu le eméraaguagülei, ába laríñagun joun gürígia ja ñíbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraaguagülei.

¹⁵ Ába laríñagun Wabúreme Jesúsu lun.

—¿Biángua tigíbu jugúya le!, ¿ma farára jumúti sun jugúya jilúgün bágasu o jilúgün lan burígü lun janúgün áta dúna lídan wéyu le eméraaguagülei? ¹⁶ Wúri to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdünnun lídan wéyu le eméraaguagülei?

¹⁷ Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürígia, gúndaatiña láu cátei lé buri weíríguti le ladúgübei Jesúsu.

Jémpulu luáguti tíla mostása

(Mt 13.31-32; Mr 4.30-32)

¹⁸ Ábati laríñagun Jesúsu.

—¿Ída líña ligáburi larúeijan Búngiu? ¿ca cátei úmounbei gayára lan níchuguni? ¹⁹ Ítara líña quei ában liraúraü tíla mostása le lábunubei ában wügúri lichárirugu, ába labóuchun, ába laweíridun darí lun liábin lun ábanme lan tídibu wéwe weírítí, darí lun jadúgün dunúru jádibu luágu tuburébu.

Jémpulu luáguti ísi

(Mt 13.33)

²⁰ Ábaya laríñagun Jesúsu.

—¿Ca cátei úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában wúri tídoun úrüwa líburu fulúaarú, ába terésirun súnigubei.

Béna le búrüraübei

(Mt 7.13-14, 21-23)

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aúdü lúma lirájüñü fulásu le ídaangiñebei lásügüra. ²³ Ába laríñagun ában wügüri lun Jesúsu. —Nabúreme, míbetiñásan ja lúnbaña jasálbarun?

Ába loúnabun Jesúsu, ába laríñagun.

²⁴ —Bürúraüti lubéneri siélu, jóucha jumá lun gayáraabei lan jebélurun lídaangiñe, ladúga quei naríñaguni jun, sarágujaba busúentiña jebélurun, siñábei. ²⁵ Lárigiñe ladáuruni tabúreme múna lubéneri, jugúya le boúgudibei jadaúnjaba luágu béna, jaríñagame. “Wabúreme, darába béna wabá.” Ábame loúnabunün, laríñagame jun. “Ibídiñetün nun, ibídiñe gíñe nun jalána jumá.” ²⁶ Ábame jagúmeserun aríñaga. “Jóujadiwa, gurá wagía búma, arúfudaja amúrú woun úmadarugu.” ²⁷ Ábame loúnabunün, laríñagame. “Aríñaga náali jun luágu ibídiñe jumá nun, ibídiñe nun jalána jumá. Díse jumá nueí, sun jugúya le adúgübei wuríbani.” ²⁸ Ligíaba jayájuaajan, acúnrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa boúgudín. ²⁹ Jayábiba gürígia lueígiñe oúbaü le ñígiñe lubeí láfuara wéyu lúma lueígiñe le ñígiñe lubeí lálüda, lueígiñe núru lúma lueígiñe suédi lun jañúurun eíga lídan larúeijan Búngiu. ³⁰ Ñíbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

*Layájun Jesúsu jawágu lílana Jerusalén
(Mt 23.37-39)*

³¹ Lídan méme wéyu ligía, ába jayábin fariséogu, ába jaríñagun lun Jesúsu.

—Beíba yágiñe, ladúga buséti Heródes láfarunibu jilágubei.

³² Ába laríñagun joun.

—Jeíba, jaríñagame lun wügüri bíbuti ligía. “Ugúñe lúma jarúga naságajan espíritugu wuríbatíña jádaangiñe gürígia, areídaguagüda áu sánditiña, lárigiñe jarúga, lásurun nuwádigimari. ³³ Lúnti nasígiruni nuweíyasun ugúñe, jarúga, lúma lárigiñe jarúga, ladúga máma lúnti lafarúniwa ában proféta jilágubei boúgudi lueí Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chúgua jugúya dúbü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁵ Ígira láadün Búngiu, áni naríñajare jun luágu maríjindügüya jumáadina lan daríme lachúlürün dan lun jaríñagun. “Biníwati le ñúbinbei lídan líri Wabúreme.”

14

Lareídaguagüdüñ Jesúsu ában wügüri lújali larúna lúma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jaríaguñein Jesúsu. ² Ñíñein gíñe ában wügüri láu sándi le ílu, ³ ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídawaguagüdüñ ában wügüri lídan wéyu le eméraaguagülei ódi siñáti?

⁴ Ába jeréderun maníñu. Ábati lanúgüni Jesúsu sánditi ligía, ába lareídaguagüdüni, ába laríñagun lun lun lídin. ⁵ Ába laríñagun joun fariséogu.

—Furúmieguarügü jídaangiñe, ánjein eíguada lilúgün bágasu o lilúgün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoubaña lídoun maríei

⁷ Dan le laríjini Jesúsu janúadajani amísurajouítiña ubáraü buri le joúnbei ja weírigubaña, ába laríñagun joun.

⁸ —Dánme le bamísurajoún lídoun ában fédu lánina marfei, máluajabeí lubuídun-ágei ubáraü, ñúbin liñeín ábanya amísurajoúti weírigutimáati bueí, ⁹ ábame liábin le amísurajabalün, laríñagame bun. “Rúbei bubára lun wügúri le.” Ábame ti bídin láu busíganu añúura lídan lúnabun-ágei ubáraü. ¹⁰ Dánme le bamísurajoún lídoun ában fédu, ñurúba lídan lúnabun-ágei ubáraü, lun dánme lan le liábin le amísurajabalibu, laríñagame bun. “Numáda, sügúba lídoun ában ubáraü weírigutimaati.” Ítara lúba berésibirun inébesi jagíbugiñe sun ja ñúnbaña luágu dábula. ¹¹ Le anáanguti lúngua weíri, lúnabudúba, le únabuti lanáangun lúngua, weíribei lanügün.

¹² Aríñagati gíne lun wügúri le amísurajabalín.

—Dánme le bíchugun ában adíneruni o fédu, mamísuraja báña bumádagu, ni bamúleni, ni bíbugañanu, ni jíbiri bidújeñu, ni bubésinanigu ja rísitiña, ladúga jamísurajabadibu gíne, bibíjubati bafáyeiruaja. ¹³ Dánme le badúgün fédu, amísuraja báña gudémetiña, siñáguatiña úngua, danímaatiña, maríjintiña. ¹⁴ Ábame gúnda ban, ladúga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe óuweni.

Jémpulu luáguti óunwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügúri, íchuguti ában óunwenbun adíneruni, ába loúnajan amísuraja sarágu gürígia. ¹⁷ Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.” ¹⁸ Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹ Laríñaga ában. “Agáñijaadina seíngü féru bágasu lánina wadágimanu, neíbuga óuchaña, adúgabá fuleísei nun, ferúduna bána, siñáti nídin.” ²⁰ Laríñagaya ában. “Sun líña namárieidun, ligía siñá lubei nídin.” ²¹ Dan le lagíribudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.” ²² Lárigiñe ladúgüni, ába laríñagun músu lun liyúbudiri. “Nabúreme, adúga náali le bubeíbei nun, níjein mémegua ubáraü.” ²³ Ábati laríñagun iyúbudiri lun músu ligía. “Beíba lídan sun úma boúgudin lueí ubúrugü, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban. ²⁴ Ladúga naríñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibeí lan Crístu

²⁵ Sarágu jáña gürígia afálaruti Jesúsu, ába lagáragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúleni, o lítunu, o libágari guánarügü, sügü náu. ²⁷ Le gíne májabei lasúfurirun nueígiñe queísigubeirügü jamúga ában wügúri le anúgüti lugúruwan, siñáti náni lan disípulu. ²⁸ Ánjein arítagua ában jádaangiñe ladúgün ában wáyelesi, ¿ma funági lañúuruba furúmiñe asáminara átiribeí lan lagástarun lun laríjini ánjein gabáfu lubeí lun lagúmuchuni? ²⁹ Ladúga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu, ³⁰ jaríñagame. “Guméseti wügúri le ában wadágimanu, siñá lumuti agúmucha.” ³¹ Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súdaara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan

jamá, lun jebélurun lídoun idíli. ³³ Ítara líña lubeíti, furúmieguaugü jídaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt 5.13; Mr 9.50)

³⁴ ‘Buíti sálu, ánjein leféridira lubásuan, ¿cábagi un ju lan? ³⁵ Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun

(Mt 18.10-14)

¹ Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni. ² Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügúri le, resíbi lumútiña gafígountiña, jou ligía jáma.

³ Ábati líchuguni Jesúsu jémpulu le joun, laríñaga.

⁴ —¿Ca jídaangiñe, lun jamúga galúgüniña lan san mudún, leféridira ában jádaangiñe, mígirun lubáña gádürü-wein-díisi-néfu ñi, lubárua, lun lídin áluajoun mudún to eféridiruboun? ⁵ Dan le ladárirunun, ába lanúgünun légewagu láu ugúndani. ⁶ Dan le lachúlürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladúga darína nilúgün mudún tó yebe eféridiruboun nueí.” ⁷ Naríñajare jun luágu ítara méme líña weíritima lan ugúndani siélu luágu ában gafígounti le asáansiruti luríban ligáburi lun lafálaruni Búngiu, sügú láu jawágu gádürü-wein-díisi-néfu gürígia richágutiña ligíbugiñe Búngiu ja memégeirunbaña jasáansiruni jagáburi.

Jémpulu luáguti seínsu le eféridirubei

⁸ ¿Ca wúri to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni? ⁹ Dan le tadáriruni, ába toúndaruniña tumádagu jáma tubésinanigu, taríñaga joun. “Gúnda jumá núma, ladúga darína seínsu lé yebe neféridirubei.” ¹⁰ Naríñajare jun luágu ítara líña lan gíñe ugúndani jádan lání Búngiu ánjeligu luágu ában gafígounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹ Rulumuti gíñe Jesúsu jémpulu le joun, laríñaga.

—Ñíñein méja ában wügúri jáu bián lirájüñü. ¹² Ába laríñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³ Málüti lueígiñe, ába loúndaruni amúleñein sun lumégegun, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴ Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei. ¹⁵ Ábati lídin áluaja wadágimanu lúma ában lílana fulásu ligía, ába loúnajani wügúri ligía oúnigiraña lilúgüniña büíruju. ¹⁶ Weíriti liláma darí lun lawámadun lun lun leígini jeígin büíruju, míchugúnwati lun. ¹⁷ Ábati lasáminarun, laríñaga lúnguarügü. “¡Sarágu ñadágimeintiña lúbiñe núguchi ígiraguati eígini joun, áu ya, ouwe niláma! ¹⁸ Nagíribuda le ñíjin lubeí núguchi, naríñagame lun. Núguchi, afígounjaadina ligíbugiñe Búngiu lúma bigíbugiñe. ¹⁹ Madúnaali lun nanáangun núngua quei biraú, barúbana quei ában jádaangiñe ñadágimeintiña búma.” ²⁰ Ába lárügüdün úma lun lagíribudun lúbiñoun lúguchi.

‘Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruni. ²¹ Ábati laríñagun isáani lun. “Núguchi, afígounjaadina ligíbugiñe Búngiu luma bigíbugiñe, madúnaali lun nanáangun núngua quei biraú.” ²² Ába laríñagun úguchili joun lumúsuniña. “Sagájumoun tubuídun-ágei anáanguni furése, daúguagüda jumeí. Daújuma giñe ában bágü luágu lújabu túma geídi luágu lugúdi. ²³ Áfara jumeí liraúraü bágasu le dibúnetimaabei. ¡Weíga, eféduja wagíame!, ²⁴ ladúga niraú le, rúnaali yebe quei jiláali áni chülúguaya, féridijalí yebe áni daríwama.” Ába jagúmeserun eféduja.

²⁵ ‘Súnti buga dan le, níjeinti buga íbugañaü áraabu. Dánti le lagíribudun, dan le lachúlürün tubádun múna, ába lagáambuni áfaruni luma abínajani. ²⁶ Ábati lagúarun lun ában jádaangiñe músu, ába lálügüduni ca lan susébebe. ²⁷ Ába laríñagun lun. “Chülújali bamúlen, áfaragüdalá bóguchi liraúraü bágasu le dibúnetimaabei, ladúga lachúlürün láu magádiei.” ²⁸ Ába lagáñidun íbugañaü, májaali lebéllurun. Ába láfuridun lúguchi, ába layúmragun lun lun lebéllurun. ²⁹ Ába laríñagun lun lúguchi. “Subúdi bumúti luágu seríwíjadina lan bun sarágu dan, madúraagunganeí le bubeíbei ni ában weíyaasu, míchugidibu ni ában liraúraü gábara nun lun nefédujan jáma numádagu. ³⁰ Guetóti, láu líabin biraú le, le achágarubalin biseínsun jáma würíña wuríbatíña, jáfaragüdába bágasu le dibúnetimaabei!” ³¹ Ábati laríñagun úguchili lun. “Niraú, amúrü númañadibu súnwandan, sun le náni, báni. ³² Ánjein guetó, lúnti wadúgün fédu luma lun wagúndaarun ladúga bamúlen lé yebe rúwamaalíbei quei jiláali, chülúguaya, féridijalí yebe, áni daríwama.”

16

Jémpulu luáguti óunigiruti le múaraanbei

¹ Aríñagati giñe Jesúsu joun láni disípulugu.

—Ñíñein méja ában iyúbudiri rísiti, ñíñein giñe ában loúniri lumégegungun, ába jayábin aríñaga lun luágu lachágaruñein lan óunigiruti ligía lirísini. ² Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladúga masígijadibu óunigirei nílugu.” ³ Ábati leréderun óunigiruti ligía asáminara, laríñaga lúnguarügü. “¿Cábatí nadúga guetó lárigiñe gidála lan niyúbudiri wadágimanu nueí? Méretina lun nadúgün wadágimanu júrüti, áni nibúsigaritina lun namúriajan. ⁴ Subúdi náali cába lan nadúga lun ní jama erésibirutina jábiñe dánme mawádigimarijadina.” ⁵ Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?” ⁶ Ába laríñagun lun. “Dúwei numúti san barín agúlei.” Ábati laríñagun óunigiruti ligía lun. “Nuján bigáradan, ñurúba furése, badúgame ában luágurügü dimí-san.” ⁷ Lárigiñe, ábaya lálügüdün ában, laríñaga lun. “Ángi amúrü, ¿átiri badúweijan?” Laríñaga lun. “San ságü túrigu.” Laríñagati lun. “Nuján bigáradan, adúgabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu óunigiruti ligía lídan ligáburi ladúgüni cátei.

Ligía laríñagun Jesúsu.

—Gürígia wuríbatíña ja lánina uboú le, chúti jáu lídan jáni jáma ámu sügú jáu ja lánina larúgounga, ja lirájüñü Búngiu. ⁹ Siñáti leménigidún luágu irisini lánina uboú le, aríñagatina lubeíti jun lun jayúsuruni jirísini lun jadúgün buíti, lun dánme lan le lagúmochun jibágari, jerésibirúba tídan múna to magúmochaditu, yágüta siélu.

¹⁰ ‘Le adúgüti buíti láu le murúsunrügüti, ladúgüba giñe buíti láu le gíbeti, le madúgünti buíti láu le murúsunrügüti, madúgünbei giñe buíti láu le gíbeti. ¹¹ Ánjaün

lubeíti madúgün buíti láu buri irísini le láni uboú le, le uágubei siñá lan leménigidún, ¿cábagi afíñera juágu lun ledéregerun irísini ináruniti lábugiñe jaríajaan? ¹² Ánjaüinti madúgün buíti láu jemégen ámu, ¿cábagi íchigei le jáni guánarügü jun?

¹³ ‘Siñáti lesériwidun ában gürígia joun bián iyúbudirigu, ladúga liyéreeguduba ában lun, línsiñedame le ában lun, o úarabei lan lun ában, lanúgeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjerajan láu Jesúsu, ladúga jínsiñe lan seínsu joun. ¹⁵ Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janúgübei gürígia quei weíriti cátei, iyéreeguti lun Búngiu.

Lúrudu lúma larúeijan Búngiu

¹⁶ ‘Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóuchatiña lun jebélurun lídoun.

¹⁷ ‘Méreenguntimaati lun lagúmuchagun siélu lúma uboú, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸ ‘Ánjoun lígira ában wügúri lúmari, lagámarida ámu, ladúgüñein figoú le gíríbei adultériu, le gíñe agámariduti ában wúri to ígiraguaaru, ladúgüña gíñe adultériu.

Wügúri le rísíbei, lúma Lázaro

¹⁹ Aríñagati gíñe Jesúsu.

—Níñein méja ában wügúri rísiti, anáanguni fínutu to wéndegutu ladáüraguboun, ságüja wéyu ladáagun fédu láu sarágu wéndegu. ²⁰ Níñein gíñe ában gudémeti gírítí Lázaro, sun lúra láu gumeín, ²¹ lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weíriti lasúfurirun darí lun lawánduni jayábin oúnli éjelujei lugúmein. ²² Luágu ában wéyu, ába loúnwen fugiábu ligía, ába janúgüni ánjeligu lúmoun Abrahám, le ñíjin jabeí jiláaña buítiña, ába gíñe loúnwen rísiti, ába lábunajoún. ²³ Dan le lasúfuriruña lan rísiti ligía lídan fulásu le ñíjin jabeí jiláaña wuríbatíña, ába liñúruni laríjin, ában laríjini Abrahám dísegiñe, láu Lázaro lúma. ²⁴ Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladúduragüdüni ligíbu lújabu láu dúna, ñúbin lámuga éderei tuágu niñéñe, ladúga nasúfuriruña sarágu lídan wátu geméti le.” ²⁵ Ába laríñagun Abrahám lun. “Niráú, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira. ²⁶ Boúgudigiñe lueí sun le, níjein ában baráangu afánreinraguáwa júma, ja jamúga buséntiña jóúdin yágiñe lun ñíjin, siñáti, ni ja ñíbaña, siñáti jayábin ñájoun.” ²⁷ Ábati laríñagun rísiti. “Amúriajatina búma, Núguchi Abrahám, lun boúnajani Lázaro lúbiñe núguchi, ²⁸ añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.” ²⁹ Ába laríñagun Abrahám lun. “Níjein le labúrújabei Moisés jáma profétagu jáma ñi, ¿adúga jamá gásu láu!” ³⁰ Ába loúnabun rísiti, ába laríñagun. “Binárün, núguchi Abrahám, láu sun líra, ánjein ñúdün ában jádaangiñe jiláaña adímureja joun, lasáansiraguba jagáburi.” ³¹ Laríñaga Abrahám lun. “Ánjein mája jabeí jadúgün gásu láu le laríñagubei Moisés jáma profétagu, mafíñebañá gíñe láu sun lásaarun ában jádaangiñe jiláaña lun lídin adímureja joun.”

17

*Luríban lafigoungüdüniwa ában gürgia**(Mt 18.6-7, 21-22; Mr 9.42)*

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afígoungüdüti gürgia, jáni fugiábu gürgia le afígoungüdüti ámu! ² Buítimaati jamúga lun lun lagurún baránajoun láu ában dúbü le lamúlíja awási güaráñu luágu ligíina sügú láu lafigoungüdüni ában jádaangiñe ja ñúbüriñibaña lídan jafíñen nuágu. ³ Ítara líña lubeíti toúnigi jumá.

‘Ánjein adúga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí, ⁴ ánjein adúga wuríbani bun sédü weíyaasu lídan ában wéyu, sédü weíyaasu líabin aríñaga bun luágu madúgüdüngüya láali lan, lúnti ferúduna báni.

Lubáfu afíñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü afíñeni jídan—gayáraati jamúga ñúraüraü lan queísi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruniwa luágu

⁷ ‘Ánjein níjein lubeí lumúsun ában jádaangiñe, dan le lagíribudun áraabugiñe lárigiñe lawoújan o loúnigirun lan anímaalú, ¿laríñaguba funági lun músu ligía. “Belúba, ñurúba eíga”? ⁸ Uá, aríñagarügübei lun. “Aráansebei neígin, aráanseñu amúrúme lun beténirun nun sun anája lan eíga luma áta, lárigiñeme, gayáraajalíme beígin luma bátun.” ⁹ ¿Teínqui lumúti funági iyúbudiri músu luágu ladúgüni le lubeíbei lun? Uá. ¹⁰ Jugúya giñéti, dánme lásurun jadúgüni le uágubei laríñaga Búngiu jun lun jadúgüni, lúnti jaríñagun. “Músu moúntiña wagía, ladúga lé rügüñein lúnbei wadúgüni wadúga.”

Lareídagugüdüni Jesúsu díisi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária luma Galiléa. ¹² Dan le lachúlürünbei lídan ában liraúraü fulásu, ába jayábin díisi wügüríña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—¿Jesúsu, Maésturu, gudéme wamá bun!

¹⁴ Dan le laríjinbaliña Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun. ¹⁵ Níñeinti ában jádaangiñe, dan le laríjinbei luágu areídaguaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wügürí ligía. ¹⁷ Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu? ¹⁸ ¿Niján gubeírügü teréncha le agíribuda eteíngirei Búngiu?

¹⁹ Ábati laríñagun lun wügürí ligía.

—Sarába, beíba, areídaguaadibu ladúga baffíñen.

*Ída lúba lan ligáburi líabin larúeijan Búngiu**(Mt 24.23-28, 36-41)*

²⁰ Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, marijínbei, ²¹ maríñawagúnbei. “Niján”, o “Níngitan”, ladúga lídan linárün cátei, níjeinjali larúeijan Búngiu jagánagua.

²² Ábati laríñagun joun láni disípulugu.

—Lachúlürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía. ²³ Laríñawagúba jun. “Niján Cristu ya”, o “Níngitan yágüta.” Iyéenibei, mídin jumá járigi, mafálarun jumáñame. ²⁴ Ladúga ítara quei larijín ában labírjaníga lueígiñe ában loúba siélu lun luágun le ában, ítara lúba dánme le nagíribudun ubouágun, áu le Wügúri Garaúwarügüti. ²⁵ Lúnti nasúfurirun sarágu furúmiñe, mebéresen jagíame gürígia ja lánina dan le náu. ²⁶ Queí meja lasúseredun lídan lidáani Noé, ítara lúba gíñe lasúseredun lídan búrime wéyu le niábingüle, áu le Wügúri Garaúwarügüti. ²⁷ Dán meja ligía, jerédera meja gürígia eíga, áta, agámarida, íchaajaña jarájüñü lun jamárieidun darí wéyu le lebélurun Noé tídon ugúnein to árcá. Ába liábin gúnran, ába jañáradagun súngebü. ²⁸ Ítara lúba gíñe quei lasúseredun lídan lidáani Lot. jerédera gürígia eíga, áta, agáñija, alúguraja, ábunagua, adáagua múna. ²⁹ Dan le láfuridunbei Lot ubúrugugiñe Sodóma, ába lábúrujan wátu geméti lúma sífuru siélugiñe, ába láfaraguniña súngebü. ³⁰ Ítara lúba dánme le niábin, áu le Wügúri Garaúwarügüti.

³¹ ‘Lídaanme wéyu ligía, le gürígia le bougudibei tueí lúban, ánjein níjein lubeí lumégegún múnada, mebéluralá aságarei. Le gürígia le áraabubei lídan óra ligía, magíribudalá lúbiñoun. ³² Jarítagua jumá luágu le asúseredubei tun lúmari Lot. ³³ Le áluguti leséfuruni libágari ya ubouágu, lefériDIRUBEI íbágari magúmuchaditi, le ánjabei lefériDIRUNI libágari ya ubouágu, nueígiñe, libíjuba íbágari magúmuchaditi.

³⁴ ‘Naríñajare jun luágu áriebu lánme ligía, ñíbaña bíama gürígia arúmuga tídan ában meme gabána, lanügúba ában jádaangiñe, ígirúame le ában según jafíñen nuágu.

³⁵ Ñíbaña bíama würiña amúlija lídan ában, tanügúba ában jádaangiñe, ígirúame to ában.

³⁶ Ñíbaña bíama wügúriña áraabu, lanügúba ában jádaangiñe, ígirúame le ában.

³⁷ Dan le jagáambunbalin cátei le, ába jálügüdüni, jaríñaga lun.

—¿Jalíabasan lasúsereda buri cátei le, Wabúreme?

Laríñaga joun.

—Le ní lumuti lúgubu jiláali, ñíba jóúndaragua wadúbi.

18

Jémpulu tuáguti würi to jiláali túmari, lúma agúseragüdüti

¹ Ába labájüdagun Jesúsú ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu. ² Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia. ³ Ñíñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵ quei nuján méme lan würi to ásüdagüda nichúgü, neséfuraaru, jebé lámuga tiábin, gumú líñein nugúraasun.”

⁶ Ába laríñagun Jesúsú.

—Niján laríñagubei agúseragüdüti le wuríbabei, ⁷ gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lúbei lubá líderaguniña? ⁸ Uá, madárasanbei. Láu sun le, dánme le nagíribudun, áu le Wügúri Garaúwarügüti, ubouágun, ¿nadáriruba funásan afíñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu güriña quei ni cáta. Laríñaga.

¹⁰—Ñúditiña bián wügúriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri güriña—jíwerutiña, wuríbatíña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnumuti gíñe dísi gáwanün lídaangiñe ságü fiádürü le ebélurubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun liñúrui laríjin siélun, le luweírui lúnabun lanáangun lúngua. Aboújarügüleí laníguagu láu igárigu, laríñaga. “¡Búngiu, gudémená bun, nugúya le gafígounti!” ¹⁴ Nariñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladúga le anáanguti lúngua weírui, ñúraübei lanügün, ánjein le ñúraübei lanáangun lúngua, weírubei lanügün.

Labíniruniña Jesúsu irájüñü

(Mt 19.13-15; Mr 10.13-16)

¹⁵ Anaajouátiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan joun ja anáajabaliña irájüñü. ¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladúga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu afíñeni jarúmati líbe jafíñen irájüñü, mebélubei lídoun.

Layánujan ában wügúri rísiti lúma Jesúsu

(Mt 19.16-30; Mr 10.17-31)

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadúgüni lun gayára lan nibíjini ibágari le magúmucha-diti?

¹⁹ Laríñaga Jesúsu lun.

—¿Ca uágu baríñaga nun “buíti”? Ában rügúñein buíti, Búngiu. ²⁰ Subúdi bumúti gumádi. Maganoúabá túma wúri gámaritu, máfarajabá, míwerujabá, mayéejabá luágu ni ában, inébe jamá bagúbürigu bun.

²¹ Laríñaga wügúri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badúgüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarun-ina.

²³ Dan le lagáambunbalin wügúri ligía cátei le, ába lírudagun, ladúga rísiti buídu.

²⁴ Dan le laríjini Jesúsu lírudagun, ába laríñagun.

—Jénreenguti lun jebélurun rísitiña lídoun larúeijan Búngiu! ²⁵ Méreenguntimaati lun lásügürün ában caméyu lídaangiñe lujúyun ában agúsa sügú láu lebélorun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei güriña adúga, gayára lumúti Búngiu, ladúga úati ni cáta siñáti lun Búngiu.

²⁸ Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Ninárün jáu luágu furúmieguarügü lan le ígiruti lúban, o lagúbürigu, o líbugañanu, o lamúleno, o lúmari, o lirájüñü luágu larúeijan Búngiu, ³⁰ libíjubatíma sarágu weíyaasu loúgiñe lídan uboú le, ibíjaleíme ibágari magúmuchaditi yágüta siélu.

Ladímurejaanya Jesúsu luágu loúnwen

(Mt 20.17-19; Mr 10.32-34)

³¹ Ába lagúarun Jesúsu joun láni dúusu apóstolugu jábugua, ába laríñagun joun.

—Weíbuga Jerusalén guetó, le ñíba lubeí lagúnfulira sun le jabúrújabei profétagu nuágu, áu le Wügúri Garaúwarügüti. ³² Jedéregerubadina joun ja mámabaña juríu, jéjer-ajaba náu, anába jamáname, suégu. ³³ Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lúruwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

Lareídaguagüdün Jesúsu ában Jericóna maríjinti

(Mt 20.29-34; Mr 10.46-52)

³⁵ Dan le achúlüreinaali Jesúsu ubúrugun Jericó, ñíñein ában maríjinti ñun láru úma amúriaja. ³⁶ Dan le lagáambunbei maríjinti ligía jásuüjan sarágu gürígia, ába lálügüdajan ca lan susébebei. ³⁷ Ába jaríñagun lun luágu niján lan Jesúsu Nazarétna ásügüra ñígiñe.

³⁸ Ábati lagúaragun, laríñaga.

—¡Jesúsu, le ladúgawagun Davíd, gudémená bun!

³⁹ Ja lubá lubáabaña, ába jadeínjan lun lun lámanichun, ligíatima lagúaragun.

—¡Ladúgawagun Davíd, gudémená bun!

⁴⁰ Ábati laráramagun Jesúsu, ába loúnajan anúgei. Dan le yaráfaali lun, ába laríñagun lun.

⁴¹ —¿Ca babúseerubei nadúgün bun?

Ába laríñagun lun.

—Nabúreme, buséntina naríjin.

⁴² Laríñaga Jesúsu lun.

—¡Ibíjabei baríjin! Areídaguadibu ladúga baffñen.

⁴³ Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

¹ Ábati lebélorun Jesúsu fulásurugun Jericó, ába lásügürün ubúrugugiñe. ² Ñíñein ában wügúri rísiti, gíríti Zaquéo, jábuti agúburajatiña liseínsuna gumádi. ³ Buséntiti Zaquéo laríjini Jesúsu lun lasúbudiruni, siñáti laríjini ladúga ñúraüraüti lúgubu, áni gíbetiña gürígia. ⁴ Lúnti gayára lan laríjini, ába leíbaagun ubáraü, ába laweínrun tuágun ában tídiibu wéwe sicómoro yaráfa lun le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladúga lúnti neréderun búbiñe ugúñe.

⁶ Ábati larárirun Zaquéo furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában gürígia láu eyéeraguni, náguyugüdüba gádürü weíyaasu sügú láu lun.

⁹ Laríñaga Jesúsu lun.

—Sálbañu jáña tìlana múna to ugúñe, ladúgawagun gíñe Abrahám amúrú. ¹⁰ Ligía niábinbei uboúagu, áu le Wügúri Garaúwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹ Dan le añája lubei gürígia agáambajei laríñaguni buri Jesúsu cátei le, ába labájüda-gun ában jémpulu joun, ladúga ayarafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹² Ábati laríñagun joun.

—Ñíñein ában wügúri íñugutiña lidújeñu, leíbugati wügúri ligía lídoun ámu fulásu díseti lun líchugúniwa lurúeiteme lageíra, ábayame lagíribudun. ¹³ Lubáragiñe láfuri-dun, ába loúnajan jawágu díisi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumei seínsu le darí nagíribudun.” ¹⁴ Queíti liyéreegunbei wügúri ligía joun lílana fulásu, ába jóúnajan larígi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageíroun. Dan le lachúlürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubei lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe laríñagun lun. “Bagúmadija lídan seíngü fulásu.” ²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladúga nanúfude buei, ²¹ ladúga ában ban wügúri derégüdati, reídeitibu láu cátei le mawádigimaritibu luágu, alúbaja amúrú le ní lumuti mábunagun ban.” ²² Ábati laríñagun urúei lun. “Músu wuríbatu, luágu guánarügü berérun nagúseragüdábu. Quei subúdi bubálin luágu ában nan wügúri derégüdati, luágu reídei nan láu cátei le mawádigimaritina luágu, alúbaja áu le ní lumuti mábunagun nan, ²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴ Ába laríñagun joun ja ñíbaña. “Gidájumei seínsu luei, rújumei lun le díisibei lúma.” ²⁵ Ába jaríñagun lun. “Wabúreme, níjeinga díisi seínsu lúma.” ²⁶ Ába laríñagun urúei. “Naríñajare jun luágu sun lan le adúgati buíti láu le lúmabei, libíjuba lánwoun, ánjein le madúgünti ni cáta buíti láu murúsun le lúmabei, lagídarúaba murúsun ligía luei. ²⁷ Játi náganiñu, já yebe mabúseerúnbaña lun urúei nan, baríjumaña ñájoun, áfaragua jumáña jilágubei nigíbugiñe.”

Lebélorun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárígiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá. ²⁹ Dan le chúlú mémeeli lídoun buri fulásu le Betfajé lúma Betánia, yaráfa lun wúbü le gíribei Olívos, ³⁰ ába laríñagun joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, dánme le jachúlürün ñi, jadáriruba ában burígü güráñu le maweinrúngili. Jafáragadeíme, ábame janúgüni ñájoun. ³¹ Ánjaün álügüdúwa ca lan uágu jafáragadei, jaríñagame luágu busén láani Jabúreme.

³² Ába jóúdin, ába jadáriruni ítara quei laríñaguni Jesúsu joun. ³³ Dánti le añája lubei afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴ Ába jóúnabuniña.

—Ladúga busén láani Wabúreme.

³⁵ Ábati janúgüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun. ³⁶ Quei awáansereina lan Jesúsu, átulejeina jamóun

janáangun luágu úma lubá. ³⁷ Dan le jayárafadun lun larárirún wúbü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibe. ³⁸ Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

³⁹ Ábati jaríñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰ Laríñaga Jesúsu joun.

—Nínárün jáu luágu ánjaña lan ámanichaja ja, lagúarajaba lán buri dúbü nuágu.

⁴¹ Dan le layárafadun lun Jerusalén, dan le laríjini ubúrugú ligía, ába layájuañan jawágu lílana fulásu ligía, laríñaga.

⁴² —¡Lun jamúga gunfaráanda jumáni ugúñe luágu áu lan úmabei lun ñurúguaü jun, buíti jamúga! Májatün. ⁴³ Ligía lachúlürüba lubei wéyu buri wuríbati jun, jadúgame jáganiñu ában baríeru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü. ⁴⁴ Jagúnrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladúga mebéresen jumá láu óra le líabinbei Búngiu asálbaraün.

Larúmadagüdünnun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi. ⁴⁶ Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájati jábutigu jáfádirigun juríu jáma arúfudajatiña lilúrudun Moisés, jáma gíñe lábutigu fulásu áluaja ída lúba lan jáfaruni jilágubei, ⁴⁸ madáritiña ída lúba lan jadúgüni ladúga weíri lan jórabajoúniwa sun gürígia lun jagáambuni lerérun.

20

Lirícha Jesúsu témpulurugu

(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun gürígia, apúrichijeí ugánu luáguti asálbaruni, ligía jayábin jábutigu jáfádirigun juríu, jáma arúfudajatiña lilúrudun Moisés, jáma wügúriña weírigutiña lídan jafíñen juríu, ² ába jaríñagun lun.

—Aríñagabeí woun ca lan biríchabei lun badúgüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdáadün gíñe ában cátei, oúnaba jumána. ⁴ ¿Ca oúnajabalin Juan abásteragü-daja? ¿Loúnajan Búngiu ódi jóúnajan wügúriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu maffínerun wabeí lun. ⁶ Ánjawa aríñaga luágu jóúnajan lan wügúriña, jachámuraguba gürígia dúbü wawágun, ladúga choúru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnajabalin Juan abásteragü-daja.

⁸ Ábati laríñagun Jesúsu joun.

—Maríñagun nubeí gíñe jun ca lan áu ubáfu nadúgei buri cátei le.

Jémpulu jawáguti ñadágimeintiña wuríbatíña
(Mt 21.33-44; Mr 12.1-11)

⁹ Ába lagúmeserun Jesúsu adímureja joun gürígia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügúri ábunaguti bełbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰ Dan le lachúlürün lidáani alúbajani, ába loúnajan ában lumúsun anúgei lufánran, ába jabúleiseiruni ñadágimeintiña músu ligía, ába joúnajani lárigoún, míchugunga ni cáta lun. ¹¹ Ábayati loúnajan ábanya músu, ába gíñe janábuni, buleisei jameí, oúnaja jameí, míchugunga ni cáta lun. ¹² Ábaya loúnajan ábanya, ábaya gíñe jabúleiseiruni, ába jabúguni ñígíñe.

¹³ ‘Ába laríñagun labúreme ichári lúnguarügü. “¿Cábasán funa nadúga? Noúnajaali niraú le jínsiñebei nun, dánme le jaríjini, fágua inébebei joun.” Ába loúnajani. ¹⁴ Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladúga labúreme ichári? ¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷ Ába laríñaguniña Jesúsu, ába laríñagun joun.

—¿Cáti lílabei le bürúñubei tídan Lerérun Búngiu le ní lubei laríñaga.

Lé meja dúbü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dúbü ligía lagúnrinchaguba, léti uágunti láburuja, labúrechagubei. Áu dúbü ligía.

Luáguti liseínsuna gumádi
(Mt 21.45-46, 22.15-22; Mr 12.12-17)

¹⁹ Lídan meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járgüdüni Jesúsu, ladúga jasúbudiruni luágu jawáguti lan jémpulu le laríñagubei, madúgün jamúti ladúga janúfude jaweí gürígia. Ábati jagúrabajan ámu dan. ²⁰ Ábati joúnajan gürígia ja ásügürütiña joúngua camá jamuga jarúmatiña lun jaríajani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati. ²¹ Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladúga ni cáta lan luweírigun gürígia bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijoún seínsu lun warúeite César ódi mabuídunti?

²³ Ába lasúbudiruni Jesúsu luríban jarítangun, ába laríñagun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le bürúñubei luágu?

Jaríñaga lun.

—Láni César.

²⁵ Ábati laríñagun joun.

—Le lani César rújumei lun César, le lani Búngiu rújumei lun Búngiu.

²⁶ Siñá jamútiti áburugüda tídoun jasádarán láu lé buri laríñagubei jagíbugiñe gürígia, weírügüti janígi láu loúnabagüle joun. Ába jámanichun.

Álügüdajani lübügürü ásaaruni lídaangiñe ouweni
(Mt 22.23-33; Mr 12.18-27)

²⁷ Lárigiñe, ába jóúdin saduséogu aríjei Jesúsu. Jaríñajare saduséogu luágu másaarun-baña lan jiláaña lídaangiñe ouweni lúnya jabágaridun. Ábati jaríñagun lun Jesúsu.

²⁸ —Maésturu, laríñajare Moisés woun tídan lilíburun, luágu ánjein lan ouwe ában wügúri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadúgawagun lámuga líbugaña le ouwebei. ²⁹ Wel, ñíñanu mejáti sédü wügúriña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabáman túma buga lúmari íbugañaü, ába gíñe loúnwen marájüñüga. ³¹ Ábati lamárieidun le júriwan túma, chülú lúmoun le jasédün, jilágua meme jagía, marájüñüga táu. ³² Ába gíñe toúnwen wúri tugúya. ³³ Aríñagabá ában cátei woun. dánmeti le jásaarun lídaangiñe ouweni lúnya jabágaridun, ¿cábati úmari wúri to jádaangiñe, quei maríei tubeí jáma sédügubei?

³⁴ Ába laríñagun Jesúsu joun.

—Lídan ubou le, maríetiña wügúriña jáma wúriña, ³⁵ ánjein lídaanme dan le lúnbei líabin, úabei agámariduni siélu jádan ja garíchabaña lun ásaaruni lídaangiñe ouweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ ladúga moúnwendügüyaaña gürígia siélu, ítaraañame quei ánjeligu, lirájüñü jañáme Búngiu ja saráaña lídaangiñe ouweni. ³⁷ Moisés guánarügü arúfuda lumúti luágu níjein lan ásaaruni lídaangiñe ouweni lídan le labúriñanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanúgüniña Búngiu sun gürígia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáli lan.

¿Ladúgawagunsan David Crístu?
(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñasan jaríñagunbei luágu ladúgawagun lan David Crístu? ⁴² Laríñajare David guánarügü tídan líburu to gíriboun Sálmos.

Aríñagati Búngiu lun Nabúreme. “Ñurúba lueígiñe noúnwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladúgawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés
(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu gürígia agáambajei Jesúsu, ába jagáambun laríñagun joun láni disípulugu.

⁴⁶ —Toúnigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesi úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eíginí. ⁴⁷ Gidá jamutu gíñe jában wúriña ja jiláaña úmari jaweí, lúnti jadáuragun láu, ába jadúgün furíeigi migínaguti. Weíribei jasúfurirun luágu sun le jadúgübei.

21

*Seínsu le tíchugubei ában fugiábu wúri témpulurugu**(Mr 12.41-44)*

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíñe tíchugun ában wúri jiláali túmari, gudémetu, bián gáwanün tídoun gáfu. ³ Ába laríñagun Jesúsu.

—Nínarün jáu luágu gíbetima lan tíchugun fugiábu wúri to sügú jáu súngebei, ladúga sun jagía, lídaangiñe le ígiragubei jáma jíchiga, ⁴ ánjon tugúya, láu tugúdemegun tíchigei sun le túmabei lún yebe tawínwandun.

*Laríñagun Jesúsu luágu tagúnrinchawagúba lan témpulu**(Mt 24.1-2; Mr 13.1-2)*

⁵ Jadímurejaña fiú gürígia tuágu témpulu, luágu tubuídunmeraü láu lubuídun buri tidúbüri lúma buri cátei le jíchugubei gürígia lun tawéndedun. Ábati laríñagun Jesúsu.

⁶—Lachúlürüba wéyu lun lagúnrinchawagún sun le jaríagubei tuágu témpulu to guetó, merédebei ni ában dúbü ligíbuagu dúbü.

*Seíni buri lubá lagúmuchun ubou**(Mt 24.3-28; Mr 13.3-23)*

⁷ Ábati jálügüdüni, jaríñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafíñera jumá joun, mafálara jumáña. ⁹ Dánme le jagáambun ladímurejoun luágu awúribujani lúma jawágu gürígia agáragua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubou líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu.

¹¹ Níbei óunwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma óunwenbun buri seíni.

¹² ‘Lubáragiñe lasúseredun sun le, jaríjoubá, eíbaajouá jugúyame. Janügüba agúsera tídan jalígilisin juríu, jádarawagúba furísunrugun, barúwa jugúyame jagíbugiñoún urúeigu jáma gumádimatiña, nueígiñe, lun jagúseragüdünün, ¹³ ligíame jidáani lun jadímurejan luágu nufúleisein. ¹⁴ Aráanse jumeí jarítagun lun madíjeri jumá cába lan jaríñaga jueígiñegua, ¹⁵ níchuguba dimúrei lúma lichú áu jun le lásíñerun ni ában jádaangiñe jáganiñu asígenera ni óunaba. ¹⁶ Jalúgurubadün jagúbürigu guánarügü, jíbugañanu, jamúlenü, jidújeñu, jumádagu. Jáfarúba jídaangiñe, ¹⁷ jiyéereeguduba joun sun gürígia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meme derégüdagua lídan jafíñen nuágu, jibíjibeí ibágari magúmuchaditi.

²⁰ ‘Dánme jaríjin geyégua jamá lan súaara ubúrugü Jerusalén, subúdi jumeí luágu yaráfaali lan lagúnrinchagun ubúrugü ligía. ²¹ Jámeti gürígia ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun nígiñe, ja áraabubaña, magíribuda jamá ubúrugun. ²² Luwéyuri buríbei jafáyeirun gürígia luágu wuríbati le jadúgübei, dánme le lagúnfulirún sun le bürúwañubei tídan Lerérün Búngiu. ²³ ¿Fugiábugume wúriña ja dageínatiña lídan dan ligía, o ja lan garájüñütiña ja gurágiña! Ladúga níbei sarágu igárigu ubouágu, larúfudubei Búngiu luweírin ligáni luágu jafígoun gürígia ja juríu. ²⁴ Níbaña óúwegutiña wuríburugu, jíbiri janáawaguba adáürawagua lídoun ámu ageíraü, ábame jagúnrinchaguni ja mámbabaña juríu ubúrugü Jerusalén daríme lagúmuchun dan le íchugübei joun lun jadúgüni.

*Ligáburu ída lúba lan liábin Crístu**(Mt 24.29-35, 42-44; Mr 13.24-37)*

²⁵ ‘Lasálriragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu ubouágu, ábame janúfudedagun luágu lanárime lajúujan lúma labouñjan lugúdi barána. ²⁶ Ladágaruba falálaü jawágu güriáia láu anúfudei, láu jasáminarun luágu cátei le lúnbei lasúseredun, ladúga járügüdüba lan warúguma ámu úma. ²⁷ Ábameti larijín niábin, áu le Wügúri Garaúwarügüti, lídan juánriñu láu sun nubáfu lúma oúnwenbun nuweírigun. ²⁸ Dánme le lagúmeserún buri cátei le asúsereda, ragújuma dügüdaguai, iñúra jumeíme jichügü, ladúga madíseelime jasálbarun.

²⁹ Rulumuti gíñe jémpulu le joun.

—Aríja jumouñ tídibu ígo, o furúmieguarügü tídibu wéwe. ³⁰ Dan le jaríjin labouñchun tubána, subúdi jumúti luágu yaráfaali lan lidáani lubáchouga. ³¹ Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Ninárün jáu luágu lagúnrinchawagúba lan sun ubúrugun le Jerusalén lubáragiñe jouwegun güriáia ja lánina dan le. ³³ Lagúmuchaguba siélu lúma ubou, ánjein nerérun, ladúraruba lun sun dan.

³⁴ ‘Toúnigi jumá, mígira jumá lun tabuñchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina ibágaru le, márügüdün lámugaün wéyu nagíribudagüle ubouágun lídan magáradajan jumá, ³⁵ quei ában sádara to adárurutu. Ladúga ítara lúba liábin wéyu ligía jawágun sun ja aganoúbaña lídan sun fulásu ya ubouágu. ³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun gíñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, áriebe, ábaja lídin erédera luágu wúbü le Olívos. ³⁸ Ábaja chülúgiñe jamá güriáia témpulurugun ságü bináafin lun jagáambuni.

22

*Jelédegun áganiñu lubá Jesúsu**(Mt 26.1-5, 14-16; Mr 14.1-2, 10-11; Jn 11.45-53)*

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfara-gun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñounga joun güriáia, ladúga janúfude jaweí.

³ Ábati lagáñeiruni Máfia larítangun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adúga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jaríñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriáia.

*Lagúmujoún leígin Jesúsu jáma lánigu**(Mt 26.17-29; Mr 14.12-25; Jn 13.21-30, 1 Co 11.23-26)*

⁷ Ába lachúlürün fédu le ídaanbei teigúa fein magánatu ísi, ní lubei gíñe ladágarawagüdúwa mudún le lánina fédu. ⁸ Ába laríñagun Jesúsu lun Pédro lúma Juan.

—Jeíba aráanserei eíginu le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Laríñaga joun.

—Dánme le jebélurun ubúrugun, jadúnraguba lúma ában wügúri táu ában dináa láu dúna, jafálareime chülú tídoun múna to níjin lumúti lebéllura. ¹¹ Jaríñagame lun

tabúreme múna. “Laríñajare Maésturu. ¿Jigóun rúmu to ñí lubei gayára lan neígini eígini le lánina fédu jáu náni disípulugu?” ¹² Ábame larúfudun ában rúmu weírítu jun tougiñegua múna, aráanseñu tíña, jaráansereime eígini ñi.

¹³ Ába jóúdin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

¹⁴ Dan le lachúlürünbei óra, ába lañúurun Jesúsu jáu láni disípulugu luágu dábula, ¹⁵ ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe noúnwen!

¹⁶ Ladúga naríñajare jun luágu meígindügüya náali lan eígini lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanúgün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumeí jídaangua, ¹⁸ naríñajare jun luágu mátundügüyaadina lan diweín daríme liábin larúeijan Búngiu.

¹⁹ Lárigiñe, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumeí le, jarítaguáüleme nuágu.

²⁰ Ítara meme gíñe, lárigiñe jeígin, ába lanúgüni wéru táu diweín, ába laríñagun.

—Niján níta le lúnbei láwiurun lídaangiñe núgubu juágu, lun lañúurun iséri darádu.

²¹ ‘Niján wügúri le lúnbei ledéregerunina wáma ya luágu dábula, ²² luáguñadina úma le lúnbei nanúgüni, áu le Wügúri Garaúwarügüti, áni ¡fugíábutia wügúri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejóun luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá. ²⁵ Ába laríñagun Jesúsu joun.

—Lídan arúeijani lánina uboú le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügúriña jamá ja gadúgatiña fuleísei joun gürígia. ²⁶ Ánjein lídan narúeijan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei. ²⁷ ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ ‘Jugúya úarabañaja núma lídan nouchwagun, ²⁹ ligía níchugunbadün lun jarúeijan quei líchugunina Núguchi lun narúeijan. ³⁰ Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadúgawagun dúusu lirájüñü Israél.

Laríñaguni Jesúsu luágu leyéedaguba lan Pédro láu

(Mt 26.31-35; Mr 14.27-31; Jn 13.36-38)

³¹ Aríñagati gíñe Wabúreme Jesúsu.

—Simón, Simón, amúriajaali Máfia úma lúma Búngiu lun gayáraabei lan loúchagunün quei lawánijóun türígu, ³² ibíja lumúti, áni ayúmuraguaadina buágu lun Búngiu lun meferidirun báani baffínen nuágu lídaanme óra ligía. Áni dánme le bagíríbudun nun, rúba dúgüdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu úrüwa weíyaasu lubáragiñe layúgurujan gáyu, baríñaguba luágu ibídiñe nan bun.

Layárafadun lórate oúchawaguni

³⁵ Ábati laríñagun Jesúsu joun.

—Dan le noúnajanbalün maságüteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barúloun, barú ligíame lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le. ³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le bürúwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní

(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wúbü le Olívos quei ligáburiñaja, ába jóúdin láni disípulugu lúma. ⁴⁰ Dan le jachúlürün lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹ Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴² laríñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügúwalá le nabúseerubei, le la babúseerubei adügúwa.

⁴³ Ábati líábin ában ánjeli siélugiñe lun líchugun érei lun. ⁴⁴ Dan létima laweíridun ligárigu, ligátima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni. ⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janügüni Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Ába layárafadun lun Jesúsu lun lachúuruni. ⁴⁸ Ábati laríñagun Jesúsu lun.

—Júdas, ¿láu ában chúuti balúgurana, áu le Wügúri Garaúwarügüti?

⁴⁹ Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. ⁵² Ába laríñagun joun jábutigu fádirigu, joun wügúriña weírigutiña lídan jafíñen jurú, lúma joun jábutigu tisúdaarana témpulu, ja nñúbinbaña anúgei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadúgüni jugúndan náu, óraali lun lagúmadijan le labúremebei lubúriga.

Laríñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járügüdüni Jesúsu, ába janúgüni lúbiñoun fádiri le íñutimaabei, ábati lafálaruni Pédro dísegiñe. ⁵⁵ Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan. ⁵⁶ Queíti taríjini ában músu ñun larúgürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

⁵⁷ Ába leyéedagun Pédro, laríñaga.

—Ibídiñeti wügúri ligía nun.

⁵⁸ Murúsun lueígiñe, ábaya laríjini ában, ába laríñagun.

—Jánigu gíñe amúrü.

Ába laríñagun Pédro.

—Máma jánigu áu.

⁵⁹ Queí buri ában óra lárigiñe, ábaya laríñagun ában.

—Inárüni luágu lúmañajañein lan wügúri le ladúga Galiléana gíñe.

⁶⁰ Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu.

⁶¹ Ába ladígiragun Wabúreme Jesúsu aríja luágun Pédro, ába larítágun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu úrüwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügúriña ja oúnigirubalin Jesúsu, ába jéjerajan láu, bei jameí. ⁶⁴ Ába jagúraguni lágu, ába jagáyuajan ligíbuagun, aríñageina jagía.

—¿Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóúndaragun wügúriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janúgüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amúrúsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, maffíñebadün nun, ⁶⁸ ánjaün nálügüdagua, móunabun jubádina, mígiragüdün jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügúri Garaúwarügüti, lueígiñe loúnwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amúrü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

*Jesúsu ligíbugiñe Piláto**(Mt 27.1-2, 11-14; Mr 15.1-5; Jn 18.28-38)*

¹ Ábati jásaarun sun líñun-ágei lúrudu, ába janúgüni Jesúsu ligíbugiñoun Piláto, ² ába jagúmeserun íchiga lidúnrun, jaríñaga.

—Darí wamaali wügúri le achágaraguágüdaña güriquia, laríñajare luágu moun lan lun wafáyeijan seínsu lun urúei Rómana, aríñagati gíñe luágu ligía lan Crístubei le lanúadirubei Búngiu lun lasálbaruniña güriquia, aríñaga ligía luágu urúei lan ligía.

³ Ábati laríñagun Piláto lun.

—¿Amúrüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri güriquia.

—Madáritina dúru luágu wügúri le.

⁵ Ábatima jaríñagun jére.

—Lachágaraguágüdüñanu sun güriquia Judéana láu ligáburi larúfudajan, lagúmesera Galiléagiñe, niján mémegua adúgei chülú ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubeí wügúri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladúga ññein Heródes Jerusalén lídan dan ligía. ⁸ Ába lagúndaaragun Heródes dan le laríjini Jesúsu, ladúga agáambañajaali lan luágu áni lúja labúseerun laríjini, agúrabatiti laríjin ladúgün ában miláguru. ⁹ Ába lálügüdaguni luágu sarágu cátei, moúnabunti Jesúsu ni cáta. ¹⁰ Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wédegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

*Lasíadirúniwa Jesúsu lun loúnwen**(Mt 27.15-26; Mr 15.6-15; Jn 18.39-19.16)*

¹³ Ábati loúndaruniña Piláto jábutigu fádirigu jáma lúrudugu, jáma buri ámu güriquia, ¹⁴ ába laríñagun joun.

—Jugúya anúgübalin wügúri le nun, jaríñaga luágu chagáguagüda lániña güriquia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu. ¹⁵ Madáriti gíñe Heródes lidúnrun, giríbugüdalá woun. Aríja jumáali luágu madúgün lan ni cáta le lúnti lafarún jilágubei lueígiñe, ¹⁶ nabeíchagüdalí lubeíti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdüni ában adaürúti fédurugu, ¹⁸ ába jagúarajan súnigubei lídan ában.

—¿Áfarabeí le! ¿Ígiragüdabeí Barabási!

¹⁹ Barabási ligía, ladaürúña lueígiñe ligía lan ában jádaangiñe ja iñúragubaña jóungua luágu gumádi, lúma lueígiñe láfarajan. ²⁰ Busénti yebe Piláto lígiragüdüni Jesúsu, ábaya ladímurejan joun, ²¹ ligíatima jagúaragun.

—¿Dáguabeí luágu gurúwa! ¿Dáguabeí luágu gurúwa!

²² Ába laríñagun Piláto joun luágu lúruwan weíyaasu.

—¿Cáti wuríbatí ladúgübei? Madáritina ni cáta le lúnti lafarún jilágubei lueígiñe. Nabeíchagüdalí, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubeíti ladúgüni Piláto le jabúseerubei, ²⁵ ábati lígiragüdüni wügüri le jabúseerubei, le adaürúbei lueígiñe iñúrangun lúma áfarajani, ábati ledéregeruni Jesúsu joun lun jadúgüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóüdiña lan láu Jesúsu lun ládarawagún luágu gurúwa, ába járügüdün ában wügüri Cirénena gíriti Simón, liábiña áraabugiñe, ába janúgagüdüni gurúwa lun, ába lídin láu lárigi lárigi Jesúsu.

²⁷ Sarágu jáña gürígia afálaruti jáma sarágu würiña jádan ayájuajeina, agúarajeina láu íruni luágu. ²⁸ Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladúga liábinba buri wéyu dánme le laríñawagún. “Fuleíseiwatiña ja siñábei jagáraüdun jáma gíñe ja marájüñüjañábaña, jáma ja mátagüdanbaña.” ³⁰ Ábameti jaríñagun gürígia lun wúbü ínuti. “Áburujabá wawágun”, aríñaga jagíame lun wúbü únabuti. “Darúguabá wáu.” ³¹ Ladúga ánjein adúgajabalin sun le láu tídibu wéwe le dúdügili, ¿cábagi madúgün jamá láu le mábeijali? (ítara líña ladímurejan luóúgua, le madúnrunbei, lúma jawágu ja gadúnrunbaña.)

³² Barútiña gíñe biáma gadúnruntiña lun jafarún úara lúma Jesúsu. ³³ Dan le jachúlürünbei lídoun fulásu le gíribei Lufúlasun Lábu Ichúgü, ába jádaragun Jesúsu luágu gurúwa jáma gíñe biáma wuríbatíña jagía, ában lueígiñe loúnwenren, ában lueígiñe lubáüna. ³⁴ Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladúga ibídiñeti joun ca lan jadúgübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu. ³⁵ Níñanu gürígia aríagua, níñanu gíñe lúrudugu jéjerajaña láu, jaríñaga.

—Sálbati ámu, sálbagonalá gíñeti lúngua, ánjein inárüni lubeí luágu ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña gíñe súdeara láu, láu jayárafadun íchiga tagúbüri diweín lun lun látunun, ³⁷ jaríñaga buri lun.

—Ánjein Jarúeite bubeí juríu, sálbaguabá búngua.

³⁸ Níñeinti ában abúrújoüni louígiñe lichúgü, laríñajare ñi. “Niján Jarúeite Juríu.”

³⁹ Ába lanábuni ában jádaangiñe wuríbatíña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubei, sálbaguabá búngua, sálba bawame.

⁴⁰ Ába ladeínjan le ában lun louba, laríñaga lun.

—¿Manúfudetibusan lueí Búngiu, bugúya le lábugiñebei ában meme sáfuri lúma? ⁴¹ Wagía, garíchatywa lun wasúfurirun ladúga wafáyeijaña luágu wadúga, ánjeinti wügüri le, madúgünti ni cáta wuríbatí.

⁴² Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³ Laríñaga Jesúsu lun.

—Nínárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaúnrün úrüwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le laríjnbalin jábuti súdaara Rómána le asúseredubei, ába ladímurejan weírigu luágu Búngiu, laríñaga.

—Inárüni, madúnrunti buga wügúri le.

⁴⁸ Sun gürígia ja ñíbaña, ja aríjubalin le asúseredubei, ába jóudin ñígiñe, áfarajeina jameí janíguagu, le jagárigu. ⁴⁹ Ánjaña sun lumádagu Jesúsu jáma giñe würíña ja ñúbinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Ñíñein ában wügúri gíriti José, lídaangiñeti fulásu le gíribei Arimatéa, le jafúlasun juríu. Buíti ligáburu wügúri ligía, richáguati ligíbugiñe Búngiu, lídaañein líñun-ágei lúrudu le jáni juríu. ⁵¹ Agúrabañu líñein larúeijan Búngiu, magúndaanti lubeíti láu cátei le ladúgübei líñun-ágei lúrudu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma. ⁵³ Lárigiñe laráriragüdüni luegiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dúbü le ñí lubei úagili lan ni ában abunúti. ⁵⁴ Wándaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵ Ába jafálaruni würíña já meja ñúbinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü. ⁵⁶ Dan le jagíribudunbei jábiñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraaguagülei quei laríñaguni lílúrudun Moisés.

24

Lásaarun Jesúsu lídaangiñe oúweni

(Mt 28.1-10; Mr 16.1-8; Jn 20.1-10)

¹ Wéyu dimáasu, ába jagíribudun würíña luágun umúajaü, bináafingua, barúina jameí ibíñei le jaráanserubei jámagua. ² Dan le jachúlürünbei, mámaali lídan lubára dúbü le lidaú umúajaü. ³ Ába jebélurun lídoun umúajaü ligía, madári jamúti lúgubu Wabúreme Jesúsu ñi. ⁴ Súnti añája lan ñi arítagua jageí lánfuna, ligía jaríjin bián wügúriña rára jarúgabu táu anáanguni mirítu. ⁵ Queíti jélemuchun láu jagíbu únabun, buin láu anúfudei, ába jaríñagun wügúriña jagía joun.

—¿Ca uágu jáluajei le wíwanbei jádan jiláaña? ⁶ Úati ya, saráli lídaangiñe oúweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügúri Garaúwarügüti, ⁷ luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe oúweni luágu lírúwan wéyu.

⁸ Ábati jarítangun luágu dimúrei le laríñagubei Jesúsu. ⁹ Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anúgübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würíña. ¹¹ Dan le jaríñagunbalin buri cátei le joun apóstolugu, ába janúgüni quei lílülün áu, maffñetiña joun.

¹² Ába láfuridun Pédro, ába lídin ebaagueina luágun umúajaü, dan le laríjnbali lurágeirugun, gamísa rügüñoun ñi, úaali úgubu. Ába lídin lúbiñoun láu luweírín anígi láu cátei le laríjubei.

Luágu úma lun Emaúsun

(Mr 16.12-13)

¹³ Luágu méme wéyu ligía, jóudiña biáma jádaangiñe lánigu Jesúsu lídoun ában liraúraü fulásu gíriti Emaús, úrüwa óra eíbuguni Jerusaléngiñe, ¹⁴ adímurejeina jáña

luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíríti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amúrü rügúñein jádaangiñe ja ñíbaña ibídiñejabu lun?

¹⁹ Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladúgübei lúma luágu lerérun ligíbugiñe Búngiu lúma jagíbugiñe sun gürígia. ²⁰ Ábati jedéregeruni jábutigu wafádiriñegu jáma walúrudungu lun siádiwa lan lun oúweni lúma lun ládarawagún luágu gurúwa. ²¹ Rúwamutí yebe wafíñen luágu ligíaba lan eséfurei linásiñun Israel. Úrüwa wéyu guetó luegiñe lasúseredun cátei le. ²² Láu sun líra, weírigüda jamáli jádaangiñe würiña ja wámabaña wanígi láu jóudin luágun umúajaü lubá buga larúgan, ²³ queítí madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu. ²⁴ Ába jóudin jádaangiñe wíbirigu aríjei umúajaü, ába jadáriruni ítara quei jaríñaguni würiña jagía, maríjin jamúti Jesúsu.

²⁵ Ábati laríñagun Jesúsu joun.

—¿Loúguati gíñe gunfaráanda jumá, lúti gíñe lubá jafíñerun luágu lé meja jaríñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmágiñe buri lilíburun Moisés túmoun sun jalíburun profétagu.

²⁸ Dan le jachúlürün lídoun fulásu le ñíjinbaña lubeí, ába ladúgün Jesúsu camá jamuga lasígiraali leíbugun. ²⁹ Ába jéredun luágu lun leréderun jáma, jaríñaga lun.

—Reídeibá wáma, ladúga ladáruduña áni gúñemémeeli.

Ábati lebélorun Jesúsu lun leréderun jáma. ³⁰ Dánti le ñurújali jáma luágu dábula, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubeí woun luágu úma, aríñagaleí tíla Lerérun Búngiu woun?

³³ Ábati magúrabajaanjaña lan, ába járügüdün úma lun jagíribudun ubúrugun Jerusalén le ñí lubei jadáriraña únsu apóstolugu oúndaragu jáma gíñe jíbiri lánigu. ³⁴ Ába jaríñagun ja oúndaraguñubaña ñi joun.

—Inárüni luágu saráli lan Wabúreme Jesúsu lídaangiñe oúweni lúnya labágaridun, aríja láali Simón.

³⁵ Ábati jabájüdaguni bián wügúriña jagía le asúseredubei joun luágu úma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt 28.16-20; Mr 16.14-18; Jn 20.19-23)

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítangun luágu pántu lan jaríjubei.

³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan affíneni le tídan janígi?

³⁹ Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun. ⁴¹ Queíti mafíñen mémegiña lan ladúga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eíginí júma ya?

⁴² Ába jíchugun murúsun úduraü súti lun lúma síruudu, ⁴³ ába lanúgüni, ába leígini jagíbugiñe sun jagía. ⁴⁴ Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürúwañubei nuágu tídan lílburun Moisés, tídan jalíburun profétagu, lúma tídan líburu to gíríoun Sálmos.

⁴⁵ Ábati gunfaráandagüda lánun Lerérun Búngiu joun, ⁴⁶ ába laríñagun joun.

—Bürúwañu líña luágu lúnti lan loúnwen Crístu, ába lánme lásaarun lídaangiñe ouweni lúnya labágaridun luágu lúruwan wéyu, ⁴⁷ lúnti lan gíñe lapúrichijoún lídan líri joun sun gürígia uboúagu lun jasáansiruni jóuserun lun ferúdnawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Noúnajabei Sífiri Sándu, le uágubei laríñaga Nóguchi Búngiu jun, ítara líña lubeíti, reídei jumá ya ubúругu Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun

(Mr 16.19-20)

⁵⁰ Ábati lanúgüniña Jesúsu boúgudín lueí ubúругu chülú Betánia, ába liñúruni lújabu, ába ln ferúdnawa laabíniruniña. ⁵¹ Dánti labíniruniña, ába lamúdeirun jaweí, ába lanügúniwa siélun. ⁵² Lárigiñe jájuduragun lun, ába jagíribudun járigoún ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíriguni lun Búngiu.

UGÁNU BUÍTI LE LABÚRÜJABEI JUAN LUÁGU JESÚSU

Liábigüle Búngiu Irájü ubouágun queísi Wügüri Garaúwarügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía. ² Lídan lubeíti lagúmeserunbei sun cátei, lúmañein Búngiu Úguchili Búngiu Irájü. ³ Lídaangiñe ladúgei Búngiu sun cátei, úati ni cáta adügúti le máma ladúga. ⁴ Ligía íchugubei ibágari lun sun cátei, áni ligía arúgoungadagüdübei jáu güriía. ⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügüri loúnajan Búngiu, gíriti Juan, le ñúbinbei lun líchugun fe luágu Búngiu Irájü le lúnbei liábin ubouágun lun larúgoungadágüdün jáu güriía. ⁷ Juan, lúnti líchugun fe luágu, lun gayáraabei lan jafíñerun sun güriía luágu cátei le lúnbei laríñaguni dánme le liábin. ⁸ Máma Juan le lúnbei larúgoungadágüdün jáu güriía, ában wügüri ligía le óunajoubei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímatimaati lun larúgoungadágüdün jáu sun güriía, lachúlürüña meja ubouágun lídan dan ligía.

¹⁰ Núbinti ubouágun, áni láu sun lídaangiñe lan ladúgei Búngiu ubou, manúgün jamúti lirájüñü ubou quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafíñerun luágu, ába líchugun ubáfu joun lun lirájüñübaña lan Búngiu. ¹³ Mítaraantiñatia quei jasáanigu agúbürigu ja güriíabaña, ja agúriajouñtiña quei furúmierügü güriía o láu lan lugúndan ában wügüri, lirájüñü Búngiu jagía.

¹⁴ Ligíratí meja le Dimúreibe, le méme Búngiu Irájübei, ñúbinti lun ítara lúba lan quei furúmierügü güriía, ába laganoúniwa wádan. Aríja wamúti luweírigun, uweíriguni le ladúnabei Liraú Búngiu le ábanrügüti, le buínbei láu areíni lúma inárüni. ¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja úma, weírigutima lan sügú náu, ladúga níjeinjali lán meja lubáragiñebei nagúriajouñ.

¹⁶ Sun wagía íbijaadiwa sarágu abíniruni lídaangiñe luweírin lirísín. ¹⁷ Lúmagiñe Moisés lerésibirúa lilúrudun Búngiu, ánjeinti ínsiñeni lúma inárüni, lídaangiñe Jesucrístu liábin. ¹⁸ Úagili ni ában aríjiti Búngiu, Liraú le ábanrügübei le yaráfabei tun lanígi, ligía arúfudubalin woun ída líña lan Búngiu.

Ladímurejan Juan le abásteragüdjabei luágu lufúleisein Jesucrístu
(Mt 3.11-12; Mr 1.7-8; Lc 3.15-17)

¹⁹ Ába jounajan juríu ja Jerusalénna fádirigu jáma wügüriña jádaangiñe ladúgawagun Leví álügüdei Juan cáteinein lan. ²⁰ Ába laríñagun joun furáangu.

—Máma áu Crístu.

²¹ Ábayati jálügüdüni.

—¿Cátabuti? ¿Proféta Elías amúrü?

Laríñaga joun.

—Uá, máma áu.

Ábaya jaríñagun lun.

—¿Amúrü proféta ligíra le lúnbei liábin?

Ába laríñagun joun.

—Máma gíñe áu.

²² Ábati jaríñagun lun.

—¿Cátabuti? Mósutia wanúgüni boúnabagüle joun ja oúnajabaliwa. ¿Cági gayáraabei baríñagun woun buoúgua?

²³ Ába loúnabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumoun janígi lubá liábin Wabúreme queísi ladárarúniwa úma surúti.”

²⁴ Ja ñúdümbaña adímureja lúma Juan, lánigu jadámurin fariséogu, ²⁵ ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

²⁶ Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua, ²⁷ liábinba nárigiñe, wügúri ligía, madúnatina ni lun jamúga nafáragaduni tagúruga ligeídin.

²⁸ Sun cátei le, lídan fulásu le gírubei Betábara lasúsereda, luágu oúbaü le ñígiñe lubei láfuara wéyu libíti dúna Jordán, le ñí lubei labásteragüdaja Juan.

Wügúri le loúnajabei Búngiu lun loúnwen luágu jafígoun gürígia

²⁹ Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Niján le loúnajabei Búngiu lun loúnwen luágu jafígoun gürígia queísi meja lafarúniwa mudún lídan dan ligíra luágu jafígoun gürígia. ³⁰ Luáguñaja nadímureja dan le naríñagunbei. “Liábinba ában wügúri nárigiñe le weíriguti sügú náu, ladúga níjeinjali lán meja lubáragiñe nagúriajoun.” ³¹ Ni áu, ibídiñeti meja wügúri ligía nun, abásteragüdajádina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lábulugu. ³³ Ibídiñeti yebe nun cátei lan wügúri ligía, aríñagarügaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu itaga wügúri, ligía wügúri ligía le abásteragüdajabei láu Sífiri Sándu.” ³⁴ Aríja náaliti, geféen áu luágu ligía lan Liraúbei Búngiu.

Furúmiñetiña láni Jesúsu disípulugu

³⁵ Larúgan, ñíñeinya Juan jáma biáma jádaangiñe lánigu. ³⁶ Dan le laríjinbei Juan lásügürün Jesúsu, ába laríñagun.

—Niján wügúri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu. ³⁸ Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigoúgu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladúga queíburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu. ⁴¹ Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanúgüni Andrés Simón le ñíjin lubeí Jesúsu, ába laríaguni Jesúsu Simón ligíbuagun, ába laríñagun lun.

—Simón, amúrrü le liraú Jonás, guetó Céfasha bíri, míni lan íri le. Pédro, o dúbü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítangun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴ Felípe ligía, Betsáidana le ñí lubei gíñe lagánawa Andrés láu sun Pédro. ⁴⁵ Ábati lídin Felípe áluajei Natanaél, ába laríñagun lun.

—Aríja wamáali wügúri le uágubei labúrüja Moisés tídan líburu to lánina lilúrudun Búngiu, le gíñe uágubei jabúrüja profétagu—Jesúsu le liraú José le Nazarétna.

⁴⁶ Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷ Dan le laríjin Jesúsu layárafadun Natanaél, ába laríñagun.

—Nitén ában ladúgawagun Israél le tímatimaati, úati yéguau lídan.

⁴⁸ Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati laríñagun Natanaél lun.

—Maésturu, amúru Liraúbei Búngiu, amúru jarúeitebei Israelítagu.

⁵⁰ Ába laríñagun Jesúsu lun.

—¿Bafíñerunbei nun ladúgarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹ Aríñagati gíñe Jesúsu.

—Nínárün jáu, luágu jaríjubei lan siélu junréñu, añájame láni Búngiu ánjeligu aweíña lúma arárija nougiñe, áu le Wügúri Garaúwarügüti.

2

Ában maríei lídan fulásu le gíribei Caná, le lídaanbei Galiléa

¹ Úrüwa wéyu lárigiñe, níñein ában maríei lídan ában fulásu gíriti Caná, le lídaanbei Galiléa. Níñounti lúguchu Jesúsu, ² amísurajouáti gíñeti Jesúsu jáu sun láni disípulugu lídoun maríei ligía. ³ Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu baríñagei le nun, núguchu? Machúlügili dan lun nídejan lídan cátei le.

⁵ Ába taríñagun joun ja éjeeragubaña.

—Adúga jumeí sun le laríñagunbei jun.

⁶ Níñoun sísi dináa láutu dúbü tíbe to jayúsuruboun juríu lun jachíbagun jóungua según jagáburi. Ságü ában dináa tugúya, barútu wein o darándi gálun dúna. ⁷ Ába laríñagun Jesúsu joun éjeeragutiña.

—Buíngüda jumoún sun dináa to láu dúna.

Ába jabuínchagüdünun buídu buídu. ⁸ Ábati laríñagun Jesúsu joun.

—Dabú jumati murúsun tídaangiñe, ábame janúgüni lun le aríjubei láu fédu.

Ába jadúgüni ítara. ⁹ Ábati louchuni le aríjubei láu fédu dúna ligía salígua lun diweínme, ibídiñoun lun jalágiñeti lan, ja rügúñanu éjeeragubaña asúbudirei, ladúga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ ába laríñagun lun.

—Sun gürígia seríwi jamútu tubuídun-ágei diweín furúmiñe, dánti le guráaña amí-surajóutiña gíbe, ligía jéjeeragun diweín to furúmiegurügü, ánjeinti amúrü, ába bareídunun tubuídun-ágei diweín darí guetó baságaroun.

¹¹ Cátei le, le ladúgübei Jesúsu lídan fulásu le gíríbei Caná le lídaanbei Galiléa, ligía furúmiñetíbei miláguru le áubei larúfudei luweírigin, ába jafíñerun láni disípulugu luágu.

¹² Lárígiñe cátei le, ába lídin lídoun fulásu le gíríbei Capernaúm, úara túma lúguchu, lamúleno, jáma láni disípulugu, ába jeréderun átiri wéyu ñi.

Labúgaguniña Jesúsu alúgurajatiña témpulurugugiñe

(Mt 21.12-13; Mr 11.15-18; Lc 19.45-46)

¹³ Ábati lídin Jesúsu ubúru Jerusalén ladúga yaráfaali lan jafédun juríu le lánina páscua. ¹⁴ Ñi ladárraña ja alúgurajabaña bágasu, mudún, únjun, jáma buri ja ñúnbaña lídan jabára le ñí lubei jasáansija seínsu joun gürígia. Lídan tübürürü témpulu ladárraña sun gürígia ja. ¹⁵ Dan le laríjinbalin Jesúsu cátei le, ába ladúgün ában labejagüle láu gúrudu, ába labúgaguniña sun jagía lídaangiñe tübürürü témpulu jáu sun jalúgüniña mudún jáma bágasu. Chagálei jaseínsun ja asáansijabaña seínsu, garábagualeí jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manúga jumóun lúban Núguchi lun jalúgu-raagüleme!

¹⁷ Ábati jarítangun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jaríñagun juríu lun.

—¿Ca miláguru barúfudubei woun lun wasúbudiruni ánjein garícha bubeí lun badúgüni cátei le?

¹⁹ Ába laríñagun Jesúsu joun.

—Güríngua jumóun témpulu to, naráramagüdayaboun lídan úrüwa wéyu.

²⁰ Ába jaríñagun juríu lun.

—Bián-wein-sísi irúmu janúgün adúgoun témpulu to, ¿lun biyáraaboun lan aráram-agüda lídan úrüwa wéyu?

²¹ Lúgubu guánarü Jesúsu témpulu to uáguboun ladímureja joun. ²² Ligía dan lubeí le lásaarun lídaangiñe oúweni, ába jarítangun luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsi le tídaanbei janígi gürígia lun Jesúsu

²³ Dan le Jerusalén lubeí Jesúsu lídan fédu le lánina páscua, sarágu jáña afíñerutiña luágu dan jaríjinbaalin miláguru buri le ladáagubei lun larúfuduni luágu ligía lan Crístubei. ²⁴ Ánjeinti Jesúsu, míchaagunti lúngua jájaburugun ladúga subúdi láníña cátañañanu lan. ²⁵ Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Ñíñein ában wügúri lánina jadámurin fariséogu, ába jádaangiñe jábutigu juríu, gírítí Nicodémo. ² Ába lídin Nicodémo ayánuja lúma Jesúsu gúñoun, ába laríñagun lun.

—Maésturu, subúdi wamúti luágu Búngiu lan oúnajabalibu arúfudaja woun, ladúga úati ni ában lun gayára lan larúfuduni lubáfu láu miláguru quei badúgüni ánjein úa lubeí Búngiu lúma.

³ Ába laríñagun Jesúsu lun.

—Ninárün báu luágu le lan magúriajouúnwayati, siñáti lebéllurun lídoun larúeijan Búngiu.

⁴ Ába laríñagun Nicodémo lun.

—¿Ída lubági lagúriajouúnwaya ában wügúri weíriyaali? ¿Gayáraati funági lebéllurunya turágeirugun lúguchu lúnya tagúriajani?

⁵ Ába laríñagun Jesúsu lun.

—Ninárün báu luágu le lan magúriajouúnti lídaangiñe dúna lánina abásteruni, lúma lídaangiñe Sífiri Sándu, siñáti lebéllurun lídoun larúeijan Búngiu. ⁶ Le agúriajouúbei jádaangiñe agúbürigu ja gürígiabaña, ítara líña ligáburi queísi jagáburi gürígia, le agúriajouúbei lídaangiñe Sífiri Sándu, ítara líña ligáburi queísi ligáburi Sífiri Sándu. ⁷ Maweíridalá banígi luágu naríñagun bun luágu lúnti lánya jagúriajouúniwa sun gürígia. ⁸ Ítara quei láfurun garábali le nígiñe lumúti labúseera, agáambabei lamúri, ibídiñeti bun jalágiñe lan liábin ni jalíñoun lan lídin, ítara jáña gíñe sun ja agúriajouúbaña lídaangiñe Sífiri Sándu.

⁹ Ábayati laríñagun Nicodémo lun.

—¿Ída lubásan cátei le?

¹⁰ Ába laríñagun Jesúsu lun.

—Ába oúnwenbun maésturu Israélna amúrü, ¿ibídiñeti cátei le bun? ¹¹ Ninárün báu luágu le lan wasúbudirubei, ligía lan wadímurejabei, geféen wagía luágu le aríja wamáalíbei, jugúya fariséogu, maffíñetün luágu le waríñagubei jun. ¹² Ánjein maffíñen jubei nun dan le nadímurejan jun luágu buri cátei le lánina ubouú, ¿ída lubági jaffíñera luágu le lánina siélu?

¹³ ‘Úagili ni ában amúdeiruti siélun, lárigiñe ába larárirun nígiñe lun gayára lan geféen lan luágu nueídügüya, áu le Wügúri Garaúwarügüti, le gábanbei siélu. ¹⁴ Ítara queí meja liñúrúnun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá gíñe niñurúaba lan luágu gurúwa ¹⁵ lun sun lan le affíñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun gürígia

¹⁶ ‘Weíruti jínsiñe gürígia ja ubouúagubaña lun Búngiu darí lun loúnajanina, áu le Liraú le ábanrügüti, lun noúnwen luágu jafígoun, lun sun lan ja affíñerutiña nuágu, mídin jamámuga máfiougati, siélun lámuga jóúdin, abágarida ában ibágari le magúmuchaditi.

¹⁷ Moúnajan lumútina Búngiu áu le Liraú ubouúagun lun níchugun jadúnrun gürígia, loúnajanina lun jasálbarun ja ubouúagubaña nuágu.

¹⁸ ‘Le affíñeti nuágu, áu le Liraú Búngiu, barú lumuti Búngiu queísi madúnrunuti, ánjein le maffíñeti, gadúnrunjali ligíbugiñe Búngiu ladúga maffíñen lan nuágu, áu le Liraú Búngiu le ábanrügüti. ¹⁹ Ja maffíñebaña, gadúnrunjaña ligíbugiñe Búngiu ladúga dán buga le niábinbei ubouúagun lun narúgoungagüdün láu, gúndaatimaatiña lílana ubouú láu lubúriga sügú láu larúgounga, ladúga cátei lan wuríbati jadáagubei. ²⁰ Sun ja adúgübaña cátei wuríbati, iyéreeguti larúgounga joun, ába jadísedun lueí larúgounga ligía, lueí lasúbudirúniwa cátei wuríbati le jadúgübei. ²¹ Ja adúgübalin lugúndan Búngiu, jínsiñeti joun lun lídan jamá larúgounga lun larijiniwa luágu jarúma lan le jadúgübei, láu lubáfu Búngiu.

Ladímurejaanya Juan luágu Jesúsu

²² Lárigiñe sun cátei le, ába lídin Jesúsu jáu láni disípulugu Judéoun, ába leréderun átiri dan ñi, abásteragüdaja. ²³ Níñein gíñe Juan abásteragüdaja lídan fulásu le gíríbei Enón, yaráfa lun Sálím, ladúga níñein lan sarágu dúna, ába buríti jayábingua gürígia, ába jabásterun. ²⁴ Lubáragiñe ladaürún Juan lasúsereda sun cátei le.

²⁵ Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶ Ábati jóúdin aríñaga lun Juan.

—Aríjabásan maésturu, wügúri lé buga búmabei luágu óubaü le ñígiñe lubeí láfurida wéyu libíti dúna Jordán, le ligíra lé meja uágubei badímureja woun, guetó labásteragü-dajaña güriñe áni jafálaruñeíti sun güriñe.

²⁷ Ába laríñagun Juan joun.

—Siñáti njein lan ni cáta lúma ni ában güriñe ánjein máma lubeí líchugun Búngiu lun. ²⁸ Agáamba jumúti lubeíña naríñagun jun furáangu luágu máma lan áu Crístubei, luágu áu lan ában le óunajóubei lubá. ²⁹ Lídán ában maríei, adári ligía táubei ladári. Léti lumáda adári, le ñíbei agáambe, óunwenbun lugúndan láu lagáambuni ladímurejan. Ítara níña gíñeti, óunwenbun nugúndan luágu Jesúsu, ³⁰ ligía lúnti laweírigudúntima, áu lun núñabuduntima.

Le ñúbinbei siéluñe

³¹ ‘Jesúsu, le ñúbinbei siéluñe, jóúgiñeñein sun güriñe. Áu, múaruguna áu, áni lérügüñein lánina uboú gunfaráanda nan. Ánjein le ñúbinbei siéluñe, jóúgiñeñein sun güriñe, ³² luágu gíñe le aríja lálabei lúma le agáamba lálabei ladímureja, míbetiña afíñerutiña luágu le laríñagubei. ³³ Ánjeinti le afíñeruti, lachoúrurubei luágu inárüni lan le laríñagubei Búngiu, láu lafíñerun. ³⁴ Le loúnajabei Búngiu, lerérun Búngiu ladímurejabei, ladúga mébejati líchuguni Búngiu láni Espíritu lun. ³⁵ Jínsiñeti Liraú Búngiu lun, rúlaali gíñe sun cátei lújaburugun. ³⁶ Le afíñebei luágu Liraú Búngiu, gabágariti le magúmuchaditi, ánjeinti le májabei lafíñerun luágu Liraú Búngiu, mabágaribei líbe ibágari ligía áni mebélurunbei siélun, láburujarügüba ligáñi Búngiu luágu.

4

Jesúsu túma wúri to Samariána

¹ Aba jagáambun fariséogu luágu gíbetima jamá lánigu Jesúsu sügú jáu lánigu Juan, áni gíbetima güriñe ñúbintiña lun, lun jabásterun, ² láu sun máma lan Jesúsu abásteragüdjabaliña, lánigu abásteragüdjabaña. ³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lídán weíyaasu ligía lásügürübatí loúbawagugiñe Samária. ⁵ Ítara liñáti lachúlürün lídoun ában fulásu lídan Samária gíriti Sícar, yaráfa lun múa lé meja lígirubei Jacób lun José le liraú, le ában jádaangiñe binádu wagúbürigu. ⁶ Ñíñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía. ⁷ Tiábijati ában wúri Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸ Añángüratí buga láni disípulugu agáñija eíginí ubúru. ⁹ Ábati taríñagun wúri Samariána to lun Jesúsu.

—¿Ída liñáti bamúriajanbei dúna núma, lárigiñe juríu ban, nugúya Samariána?

(Mínsiñeguatiñati juríu jóungua jáma Samariána.) ¹⁰ Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágari bun, bun.

¹¹ Ába taríñagun lun.

—Úagubeíti cába lan áu badábura dúna áni julíiti wélu le, ¿ída lubáti bíchuguni luwúyeri dúna ligía nun? ¹² Jacób, lé meja binádu wadúgawagun, ígirubalin wélu le woun, guráti meja dúna lídaangiñe jáu sun lirájüñü jáma lilúgüniña. ¿Weírigutibu funági sügú láu Jacób?

¹³ Ába laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ ánjein le átuti lídaangiñe dúna le níchugubei, mamágürabudundügüyaali, ladúga dúna le lúnbei níchuguni lun, géseséenbei lídan lun líchugun ibágari magúmuchaditi lun.

¹⁵ Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶ Ába laríñagun Jesúsu tun.

—Beíba ougei búmari le úmabei bamárieida, ábame biábin.

¹⁷ Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu baríñagun luágu mámari ban le maríeiti búma, ¹⁸ ladúga seíngüjáña wügúriña úmatiña bagánawa, áni mamárieiduntibu lúma wügúri le úmabei bagánawa guetó. Aríñagaadibu inárüni.

¹⁹ Dan tagáambubalin wúri to cátei le, ába taríñagun lun.

—Afíñetina luágu proféta ban. ²⁰ Binádu wagúbürigu ja Samariána, judúguatiña meja lun Búngiu ya luágu wúbü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába laríñagun Jesúsu tun.

—Afíñebá nun luágu nítebei lan dan lun jájuduragun lun Búngiu mídinga jugúya luágun wúbü lígita, ni jídin Jerusalén. ²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladúga lídaangiñe warásan wagía juríu liábin asálbaruni. ²³ Lachúlürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadúgüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le lálujabei Búngiu jámagiñe gürígia. ²⁴ Espíritu Búngiu, ja ájuduragubaña lun, lúnti jadúgüni láu sun janárün, mebéresenga láu cátei le arijúati.

²⁵ Ába taríñagun lun.

—Subúditi nun luágu liábinba lan Mesías le gírubei Crístu, dánmeti liábin, lafúnraan-guagüdübei sun cátei woun.

²⁶ Ába laríñagun Jesúsu tun.

—Áu Mesías ligía.

²⁷ Ligíati jachúlürün láni disípulugu, ába laweíridun janígi láu jadáriruni Jesúsu adímureja túma ában wúri, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸ Ábati tígirunun wúri tugúya tidína, ába tídin ubúruugu ougaña gürígia, ába taríñagun joun.

²⁹ —Jigoúgu jaríja ában eyéri aríñaguti sun cátei le adúga náalibei nun. ¿Mámadügü funásan ligía Crístubei?

³⁰ Ábati jódingua ubúrugugiñe lun le ñíjin lubeí Jesúsu. ³¹ Añájati buga disípulugu ayúmuragua lun Jesúsu lun leígin. ³² Laríñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴ Ába laríñagun Jesúsu joun.

—Nadúgüni lugúndan le óunajabalina, agúmuचेi luwádigimari, ligía neíginbei.

³⁵ Jugúya aríñagatün. “Níjeingua gádürü játi lubá alúbajani.” Ánjein áu, naríñajare jun. Aríja jumeí nádü, dánjali lun lalúbajoún. ³⁶ Le ñadágimeinbei alúbaja, ibíja lumúti lafáyeiruaaja, áni cáteiti le lalúbajabei, gürígia, lun jabíjini ibágari le magúmuchaditi siélu,

lun lagúndaarun le ábunagubei úara lúma le alúbajabei. ³⁷ Quei le lubeíbei laríñawagún. “Ámu le ábunagubei, ámu le alúbajabei.” ³⁸ Oúnaja náadün alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le lání Samária afíñerutiña luágu Jesúsu láu taríñagun wúri tugúya joun luágu aríñaga lání sun le adúga táalibei tun. ⁴⁰ Dánti le jachúlürünbei Samariána le ñí lubei Jesúsu, ába jayúmragun lun lun leréderun jáma. Ába leréderun bián wéyu ñi, ⁴¹ ábaya jaffínerun sarágu gürígia dan le jagáambunbalin le laríñagubei. ⁴² Ábati jaríñagun tun wúri tugúya.

—Mámarügaali luágu le baríñagubei woun waffínera, ladúga agáamba wamáali gíñe lúmagíñe, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraú ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweíya-sun loúbawagun Galiléa, ⁴⁴ mídinti lageíra quei laríñaguni Jesúsu guánarü luágu madügúniwa lan gásu láu ában proféta lídan guánarü lageíra. ⁴⁵ Dan lachúlürünbei Galiléa, resíbi jamúti lílana fulásu buídu, ladúga ñúdün jamá gíñe lídan fédu le lánina páscua Jerusalén áni aríja jamúti sun le ladúgübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasáliraguagüda dúna lun diweínme. Ñíñeinti ában wügúri weíriguti, ñadágimeinti lúma urúei, níjein ában liraú sánditi lídan fulásu le gíribei Capernaúm. ⁴⁷ Dan lagáambunbei wügúri ligía luágu ñúbinjali lan Jesúsu Judéagiñe lun Galiléoun, ába lídin aríjei, ába layúmragun lun lun lídin lúbiñe lun lareídaguagüdüni liraú, ladúga madíseeli lan lun loúnwen. ⁴⁸ Ába laríñagun Jesúsu lun.

—Jugúya, ánjaün maríjin miláguru, maffíñetün.

⁴⁹ Laríñaga wügúri ligía lun.

—Queímoun furése lubáragiñe loúnwen niraú.

⁵⁰ Ábati laríñagun Jesúsu lun.

—Giríbubá búbiñoun, areídagua biraú.

Ába lafíñerun wügúri ligía luágu le laríñagubei Jesúsu lun, ába lídin. ⁵¹ Dan layarafadun tun lúban, ába jayábin lumúsuniña lubároun, ába jaríñagun lun.

—Magádieeli biraú.

⁵² Ába lálügüdüniña ca lan óra lagúmesera liraú areídagua, ába jaríñagun lun.

—Gúñaarü ladaúnrun ában rábounwéyu lagídara abíruaü lueí.

⁵³ Ába larítagni luágu ligía lan óra laríñagun Jesúsu lun luágu areídaguaali lan liraú, ába lafíñerun luágu Jesúsu jáu sun lufámilian.

⁵⁴ Ligía libíaman miláguru le ladúgübei Jesúsu dan le lagíribudunbei Judéagiñe lun Galiléoun.

5

Lareídaguagüdüni Jesúsu wügúri adádagaraali le Betésdana

¹ Lárigiñe cátei le, jadúgüña juríu ában fédu, ába lagíribudun Jesúsu Jerusaléoun luágu fédu ligía. ² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna. ⁴ Ladúga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareídagun furúmieguarügü sándi le luágubei. ⁵ Ñíñeinti ában wügúri, darándi-wídu irúmu láu láu sándi, ⁶ dan laríjinbalin Jesúsu wügúri ligía roun, subúdileí átiri lan dan láu ítara, ába laríñagun lun.

—¿Buséntibu bareídagun?

⁷ Ába loúnabun le sándibei.

—Úati cába lan anúgana lídoun dúna dan le lánjingichagun. Ságü nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beíba.

⁹ Lídan óra ligía, ába lareídagun, ába labúdunun lubárari, ába lagúmeserun eíbuga. Queíti lidáni lubeí eméraaguni wéyu ligía, ¹⁰ ába jaríñagun juríu lun le areídagubei.

—Wéyu le eméraaguagülei ugúñe, moún lumuti banúgünun bubárari buoúgua.

¹¹ Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídaguagüdübalin, ladúga gíbetiña gürígia ñi áni ñúdünja bugáti Jesúsu. ¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguaadibu lubeí, mafígounjadügüyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin. ¹⁶ Ligía lébubei jeíbaajani juríu Jesúsu lun jáfaruni jilágubei ladúga buri ladáaguni cátei líbe le lídan wéyu le eméraaguagülei. ¹⁷ Ába laríñagun Jesúsu joun.

—Ñadágimeinti Núguchi chülú lúmoun dan le, áu ñadágimeintina gíñe.

¹⁸ Ligíatimaati jabúseerunbei juríu jáfaruni jilágubei, mámarügü ladúga lálalachaguni lúru du le lánina wéyu le eméraaguagülei, ladúga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraú Búngiu

¹⁹ Ábati laríñagun Jesúsu joun.

—Nínárün jáu, luágu siñá lan nadúgün, áu le Liraú Búngiu, ni cáta láu náni nungua, le rügúñein naríjubei ladúgün Núguchi, nadúga. Sun le ladúgübei Búngiu Úguchili, adúga numúti gíñe, áu le Búngiu Irájü, ²⁰ ladúga jínsiñetina lun Búngiu, arúfuda lumúti sun le ladúgübei nun, áni larúfuduba cátei weínamutimaati nun, le lúnti laweíridun janígi láu.

²¹ Ítara quei lásaaragüdüniña Búngiu Úguchili jiláaña lídaangiñe ouweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun.

²² Magúseragüdünti Búngiu ni ában, rúrügü lumúti sun ubáfu nun, áu le Liraú, lun nadúgüni, ²³ lun sun lan gürígia íchigei ában méme inébesi le jíchugubei lun Búngiu Úguchili nun. Le míchuti inébesi nun, áu le Búngiu Irájü, míchuti gíñe inébesi lun Búngiu Úguchili le oúnajabalina.

²⁴ ‘Nínárün jáu, luágu le lan eténiruti lun le naríñagubei lun, affíñe ligía luágu le oúnajabalina, gabágariti le magúmuchaditi, masíadirúnwabei gíñe, sügújali lídaangiñe féridi lídoun ibágari le magúmuchaditi. ²⁵ Nínárün jáu luágu nítebei lan dan, áni niján dan ligía, dánme le jagáambuni jiláaña numálali, ja ñúdünbaña láu le nubeíbei, gabágaribaña. ²⁶ Ladúga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷ rújali gíñe ubáfu nun lun nagúseragüdüniña gürígia ladúga Wügüri Garaúwarügüti áu. ²⁸ Maweíridalá janígi luágu le, ladúga lachúlürüba dan lun jagáambuni sun jiláguaaña numálali, ²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadúgüni buíti uboúagu, jásaaruba lun jaganoún lúma Búngiu lun sun dan, ánjañati ja arúfudubalin luágu lánigu jamá Máfia láu jadúgüni wuríbani, jásaaruba lun jasíadirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadúgün ni cáta láu náni núngua. Quei laríñawagúniwa nun, ítara líña nagúseragüdün, áni buíti ligáburi nagúseragüdün ladúga mouchun nan lun nadúgüni le nabúseerubei, lueídügüya le labúseerubei Nóguchi le oúnajabalina. ³¹ Ánjein áuba lubeí geféen nuóguá, mounti le naríñagubei. ³² Níjein ámu le geféenbei luágu náni fuleísei, áni subúdi ni nun luágu le lan laríñagubei nuágu, gebégiti. ³³ Jugúya oúnajatün álügüdei Juan nuágu, áni le loúnabagülebei jun, inárüni. ³⁴ Áu magúrabuntina ladímurejan ni ában wügúri luágu nufúleisein, narítaguagüda rügúñaadün luágu le laríñagubei Juan nuágu lun gayáraabei lan jafíñerun nuágu lun jasálbaruba lan. ³⁵ Ítara líña meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶ Níjein ában cátei luágu nufúleisein buítimaati sügú láu le laríñagubei Juan. Lé buri cátei le nadúgübei, le méme buri uágubei laríñaga Nóguchi nun lun nadúgüni, arúfuda lumúti luágu Nóguchi lan oúnajabalina le tímatimaati. ³⁷ Nóguchi le oúnajabalina, arúfuda láali luágu áu lan Liraú le oúnajoubei lun nasálbaruniña gürígia ubouágu, láu sun magáambun jumágili lan lumálali Búngiu, maríjin jumeí. ³⁸ Mebélugili lerérun jídoun, ladúga mafíñetün nuágu, áu le loúnajabei. ³⁹ Atúriaja jumútu Lerérun Búngiu láu sarágu goúnigi, ladúga agúraba jumá jadáriruni ibágari le magúmuchaditi tídan, láu sun líra, líburu tugúya adímurejaboun nuágu, ⁴⁰ áni májatün jiábin númoun lun jibíjini ibágari ligía.

⁴¹ ‘Máluajantina lun janúgünina gürígia weírigu. ⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueígiñe loubadina Nóguchi niábin, áni jugúya, merésibirun jumútina, ánjein ñúbin ámu láu láni lúngua, ligíaba jerésibira. ⁴⁴ ¿Ída lubásan jafíñerun nuágu, resbítinga uweíriguni júmagiñegua, máluajan jumúti uweíriguni le lúmagiñeti Búngiu le ábanrügüti? ⁴⁵ Marítagua jumátia luágu níchuguba lan jidúnrun ligíbugiñe Nóguchi, Moisés guánarügüba íchiga jidúnrun, le guánarügü uágubei jíchigei jeménigin. ⁴⁶ Ladúga, lun jamúga afíñe jumá luágu le laríñagubei Moisés, jafíñeruña jamúga gíñe nun, ladúga abúrújati Moisés nibúgürü. ⁴⁷ Ánjein mafíñen jubeí luágu le labúrújabei, ¿ída lubáti jafíñerun luágu le naríñagubei jun?

6

Leígaqüdün Jesúsu seíngü mílu wügúriña

(Mt 14.13-21; Mr 6.30-44; Lc 9.10-17)

¹ Lárigiñe, ába lídin Jesúsu loubáfurugun dúna le Galiléa, le méme gíñe dúna le gírubei Tibérias. ² Sarágu jáña gürígia afálarei ladúga jaríjini buri miláguru le ladáagubei, láu lareídaguagüdüniña sánditiña. ³ Ábati laweíñrun Jesúsu luágun ában wúbü, ába lañúurun ñi jáma láni disípulugu. ⁴ Yaráfaaliti páscua, le jafédun jurú. ⁵ Dan laríjinbei Jesúsu luágu sarágu jáña lan gürígia afálaruti, ába laríñagun lun Felípe.

—¿Jalíabasan wagáñija eígini joun sun gürígia ja?

⁶ Laríñagunbalin líra lúnrügü lagáambun cába lan laríñaga Felípe, Jesúsu, subúdi láali cába lan ladúga. ⁷ Ábati laríñagun Felípe lun.

—Ni bián-san fiádürü fein louguaboun lun tafánreinjoúniwa murúsun murúsun jádan sun gürígia ja.

⁸ Ábati laríñagun Andrés, ában gíñe jádaangiñe disípulugu, le lamúlen Simón Pédro, lun.

⁹ —Niján ában irájü ya, nújein seíngü fein lúma, jáma bián úduraü, louguabei líra joun sarágu gürígia.

¹⁰ Ábati laríñagun Jesúsu.

—Aríñaga jumá joun súnigubei lun jañúurun.

Ñíñanuti jawára seíngü mílu wügúriña bougudin jaweí wúríña jáma irájüñü. Queíti ñíñein lan sarágu sagádi lídan fulásu ligía, ába jañúurun. ¹¹ Ábati lanúgünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñúnbaña. Ligía méme ladúga jáu úduraü, ruínaleí sun le jabúseerubei joun. ¹² Dan le quimúleña, ába laríñagun Jesúsu joun láni disípulugu.

—Abúdaja jumeí sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein. ¹⁴ Dánti le jaríjinbalin gürígia miláguru le, le ladúgübei Jesúsu, ába jaríñagun.

—Inárüni luágu niján lan proféta lé meja lúnbei liábin ubouágun.

¹⁵ Queíti lasúbudiruni Jesúsu luágu busén jamá janúgüni láu érei lun jadúgüni urúeime, ába lídin lábugua luágun wúbü.

Leíbugun Jesúsu ligíbuagu dúna

(Mt 14.22-27; Mr 6.45-52)

¹⁶ Dan le lagúñedunbei, ába jarágachun láni Jesúsu disípulugu lárün dúna, ¹⁷ ába jádinagun tídoun ában ugúnein, ába jagúmeserun ánjiñuragua lun jachúlürün Capernaúm. Búrigaaliti, machúlüti Jesúsu jámoun. ¹⁸ Ába lagúmeserun garábali áfuragua jére, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eíbugeina ligíbuagu dúna, ába janúfudedagun. ²⁰ Ába laríñagun joun.

—Manúfudeda jumá, áu le.

²¹ Ábati jerésibiruni láu ugúndani tídan ugúnein, ába jachúlürün lídoun fulásu le ñíjin lubei jóúdin lídan murúsun óra.

Jáluajani gürígia Jesúsu

²² Larúgan, ába jaríjin gürígia ja eréderubaña loubáfurugu luágu ñúdünja jamá buga disípulugu tídan ugúnein to ñíboun áni tugúya rügúñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñi lubei jeígoun fein lárigi leteíngirun Jesúsu tuágu. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóúdin Capernaúm áluajei.

Jesúsu, fein to lánina ibágari

²⁵ Dan le jachúlürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

²⁶ Ába laríñagun Jesúsu joun.

—Nínárün jáu luágu ladúga lan jeígin darí lun jaquímuledun jáluajana, máma ladúga gunfaráanda jumáni laníchigu buri miláguru. ²⁷ Madíjerida jumá luágu eígini le gagúmuchaditi le lúntibei júgubu, áluaja jumeí eígini tun juwáni, le íchugubei ibágari magúmuchaditi. Ligía eígini le lúnbei níchuguni jun, áu Wügúri Garaúwarügüti, ladúga rúlaali Búngiu Úguchili ubáfu nun lun níchuguni ibágari ligía.

²⁸ Ábati jaríñagun lun.

—¿Ída lubásan wadúga lun woúdin láu le lubeíbei Búngiu?

²⁹ Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

³⁰ Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badúgübei?

³¹ Binádu wagúbürigu jóútiña meja fein to gíríboun maná lídan fulásu mageírawati, quei taríñaguni Lerérun Búngiu. “Jóúgüda lumútiña Búngiu fein to siélugiñetu.”

³² Ába laríñagun Jesúsu joun.

—Ninárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía gíñe íchugubarun fein siélugiñetu jun to tímatimaatu. ³³ Ladúga fein to líchuguboun Búngiu, tugúya to aráriruboun siélugiñe áni rúti gíñe ibágari joun lílana uboú.

³⁴ Ábati jaríñagun lun.

—Rúboun fein tugúya woun súnwandan.

³⁵ Ába laríñagun Jesúsu joun.

—Áu fein to íchuguboun ibágari. Le ñúbinti nómoun, malámadügüyaarume luwáni, le affíñeruti nuágu, mamágürabudügüyaaru giñe luwáni. ³⁶ Quei le nubeíbei jun, jugúya maffíñetün láu sun aríja jumáadina lan. ³⁷ Sun gürígia ja líchugubaña Núguchi nun, ñúbintiña nun, játi ñúbintiña nómoun mabúgun nubáña. ³⁸ Máma niábiña siélugiñe lun nadúgüni nugúndan, le náni nungua, niábiña lun nadúgüni lugúndan le oúnajabalina. ³⁹ Léti labúseerubei Núguchi le oúnajabalina, lun meféridirun nan ni ában jádaangiñe ja líchugubaña nun, lun sarágüdarügü naniña lídaangiñe oúweni lídaanme lagúmujoún wéyu. ⁴⁰ Le labúseerubei le oúnajabalina, lun sun lan ja anúgütina quéisi Liraú Búngiu, afíñe jagía nuágu, lun gabágari jamá le magúmuchaditi, áni násaaragüdübaña lídaangiñe oúweni lídan lagúmujoún wéyu.

⁴¹ Ába jagúmeserun juríu adímureja wuríba luágu Jesúsu ladúga laríñagun luágu ligía lan fein to aráriruboun siélugiñe. ⁴² Ába jaríñagun.

—¿Ma funági Jesúsu le liraú José le? Subúdi wamúti lúguchi túma lúguchu. ¿Ída liñáti laríñagunbei luágu siélugiñe lan larárrira?

⁴³ Ábati laríñagun Jesúsu joun.

—Madímureja jumá nuágu. ⁴⁴ Siñáti liábin ni ában nómoun ánjein máma lubeí lanúgün Búngiu Úguchili le oúnajabalina, áni násaaragüdübei lídaangiñe oúweni lídan lagúmujoún wéyu. ⁴⁵ Laríñajare tídan líburu to jerérun profétagu. “Larúfudajaba Búngiu joun súngebui.” Sun lubeíti ja agáambubalin Búngiu Úguchili, furéndeí jagía lúmagiñe, ñúbintiña nómoun.

⁴⁶ ‘Máma jamúgatia luágu níjein lan aríjiti Búngiu Úguchili. Áu le ñúbinbei lúmagiñe Búngiu, áu rügúñein aríjei. ⁴⁷ Ninárün jáu luágu le lan affíñeti nuágu, gabágariti le magúmuchaditi. ⁴⁸ Áu fein to íchuguboun ibágari. ⁴⁹ Joútiña binádu jagúbürigu fein to maná lídan fulásu mageírawati áni láu sun luwúyeri jiláguatiña. ⁵⁰ Áu, tuágu fein to aráriruboun siélugiñe nadímureja, lun ja lan eígitu, lúmounbaña Búngiu. ⁵¹ Áu méme fein wínwantu tugúya to aráriruboun siélugiñe, le eígitu tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, núgubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábati jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Ninárün jáu luágu ánjaün lan meígin lídaangiñe núgubu, áu Wügúri Garaúwarügüti, mátun jumeíme níta, mabágaribadün. ⁵⁴ Le eígitu núgubu, gurálei níta, gabágariti tímatimaati le magúmuchaditi, áni násaaragüdübei lídaangiñe oúweni lídan lagúmujoún wéyu. ⁵⁵ Ladúga eígini le tímatimaati núgubu, uníñein le tímatimaati níta. ⁵⁶ Le eígitu núgubu, gurálei níta, lídaañein ában núma, áu lúma. ⁵⁷ Úguchili le oúnajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribei nídaangiñe. ⁵⁸ Tuágu fein to aráriruboun siélugiñe nadímureja. Mítaraantu fein to quei maná le jeígubei binádu jagúbürigu, láu lan sun luwúyeri jiláguatiña, le eígitu tídaangiñe fein to, labágariduba tímatimaati lun sun dan lúma Búngiu.

⁵⁹ Lídán adámuridaguni tídan jalígílisin juríu to Capernaúmboun, ñi larífudajei Jesúsu cátei le.

Dimúrei lánina ibágari magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arífudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adúga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbatí lábुरुjan líra jun? ⁶² ¿Cába jamúga funáti asúsereda ánjana jamúga jaríja, áu Wügúri Garaúwarügüti, awárira nárigoún siélun lé meja ñí nubei furúmiñe?

⁶³ Náni Espírítu, ligía íchugubei ibágari tímatimaati, núguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágari magúmuchaditi. ⁶⁴ Áni añájeingua jídaangiñe, mafíñetiña.

Ladúga lúmagiñe furúmiñeti dan, subúdi láña Jesúsu cátaña lan mafíñebaña, lúma cátei lan le lúnbei lalúguruni. ⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubeí Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün gíñe jídin nueí?

⁶⁸ Ába loúnabun Simón.

—¿Cábagi úmoun woúdin? Dimúrei buri le baríñagubei, lánina ibágari tímatimaati le magúmuchaditi. ⁶⁹ Wagía afíñeediwa, áni subúdi wamúti luágu amúrü lan Crístubei le Liraú Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraú Simón Iscarióte, ladúga ligíaba lan alúgurei, láu sun ában lan jádaangiñe dúusu disípulugu ligía.

7

Mafíñeruntiña lamúlenu Jesúsu luágu

¹ Lárigiñe sun cátei le, ába eíbugañaja lan Jesúsu loúbawagu Galiléa, mabúseerunti leréderun Judéa ladúga ñi buséntiña juríu jáfaruni jilágubei. ² Queíti yaráfaali lan ában lídaangiñe jafédun juríu le gíribei tufédun dibásein, ³ ába jaríñagun lamúlenu lun.

—Meréderabá ya, beíba Judéoun aríja jamámugei gíñe bánigu ja ñíbaña cátei lé buri badúgübei. ⁴ Dan le busén lan ában gürígia lasúbudirúniwa, madúgün lumúti buri cátei arámudaguarügü. Queíti adúga ban cátei líbeina le, adúgabeí ligíbugiñe sun uboú.

⁵ Ni íbini lamúlenu mafíñetiña luágu. ⁶ Ábati laríñagun Jesúsu joun.

—Machúlügili dan lun nídin Jerusalén luágu fédu ligía, ánjein jun, buíti furúmierügü óra. ⁷ Siñáti jiyéereegudún joun ja lánina uboú le, anáti áu, iyéereegutina joun, ladúga geféentina luágu wuríba lán buri cátei le jadúgübei. ⁸ Jeíba lídan fédu, áu mídinbadina guetó, machúlügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jóudin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa. ¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wügúri le?

¹² Sarágu jañáti adímurejatiña luágu jádan güri-gia. Níñanu aríñagutiña luágu ában lan wügúri buíti ligía, jíbiri aríñaga. “Mabuídunti, yéegua lumútiña güri-gia.”

¹³ Úati ni ában adímurejati furáangu luágu, ladúga janúfude jaweí juríu.

¹⁴ Lamídounjali fédu lúmagua, ligía lebelurun Jesúsu témpulurugun, ába lagúmeserun arúfudaja. ¹⁵ Ába laweíridun janígi juríu, ába jaríñagun.

—¿Ída liñásan lasúbudirunbei le sarágu cátei, matúria-jaanga ligía?

¹⁶ Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷ Ánjein níjein lubeí ában le aráanseti lun ladúgüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja.

¹⁸ Le adímurejabei luágu láni lúngua, ladúgüni lun janúgüni güri-gia weíri, le ouchubei lun lanügúniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ¿Ma inárüni luágu rúlaani Moisés lúrudu jun? Láu sun líra, úati ni ában jídaangiñe úaraduti lúma lúrudu ligía. ¿Ca uágu jabúseera jáfarunina jilágubei?

²⁰ Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába laríñagun Jesúsu joun.

—Luágurügü ában cátei le nadúgübei lídan wéyu le eméraaguagülei laweírda janígi sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagúbürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraaguagülei. ²³ Ánjein adúga jubálin líra íbini lídan lan wéyu le eméraaguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügúri dayárugubei lídan wéyu le eméraaguagülei? ²⁴ Masáminara jumá luágu cátei queísi larijiniwa, samína jumá luágu queísi lubeí.

Ladímurejan Jesúsu luágu ladúgawagún

²⁵ Ábati jagúmeserun jádaangiñe ja aganoúbaña Jerusalén álügüdaja.

—¿Másan niján le jáluajabei lun jáfaruni jilágubei? ²⁶ Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan affíne jamá gumádimateiña luágu wügúri lan le Crístubei? ²⁷ Subúditi woun jalágiñe lan liábin le, ánjeinti dánme le liábin Crístu, ibídiñebei ni ca un jalágiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába laríñagun rein.

—¿Subúdi jumútina lubeíti, subúdi jumeí jalágiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun. ²⁹ Áu, subúdi numúti ladúga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladúga machúlügili lan dan lun loúnwen. ³¹ Sarágu jáña affínerutiña luágu, ába jaríñagun.

—Dánme le liábin Crístu, ¿ladúgüba funági ámu miláguru sügú láu wügúri le?

Jóunajan fariséogu polisía adáürei Jesúsu

³² Ába jagáambuni fariséogu le jaríñagubei güri-gia luágu Jesúsu, jagía jáma jábutigu fádirigu, ába jóunajan polisía témpulurugugiñe lun jadáürüni. ³³ Ábati laríñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴ Jáluajabadina, madári jubáquina, ladúga siñábei lan jídin le ñíjinbadina lubeí.

³⁵ Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña güriégia ja güriégu, lun larúfudajan joun güriégu? ³⁶ ¿Ca míni lan láu laríñagun woun. “Jáluajabadina, madári jubádina ladúga siñábei lan jídin le ñíbadina lubeí”?

Líseesen dúna wínwanti

³⁷ Le lagúmujoún wéyu lídan fédu ligía, ligíatima weírigubei. Lídaanti wéyu ligía, ába laráramun Jesúsu, ába laríñagun láu umálali reínti.

—Le mágürabutu luwáni, ñúbinlá númoun, gurála. ³⁸ Le afíñeti nuágu, láwiyujaba dúna wínwanti tídaangiñe lanígi, quei taríñaguni Lerérun Búngiu.

³⁹ Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábingili Sífiri Sándu ladúga magíribudungili lan Jesúsu larigoún siélun lídoun luweírigun.

Fánreinguaiú jádan güriégia

⁴⁰ Ñíñanu jádaangiñe güriégia, dan le jagáambunbalin cátei le, ába jaríñagun.

—Inárüni luágu niján lan proféta lé meja lúnbei liábin.

⁴¹ Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴² Taríñajare Lerérun Búngiu luágu ladúgawagunbei lan urúei Davíd Crístu, áni Beléngiñetibei lan, fulásu meme le ñígiñeti lubeí Davíd.

⁴³ Ába lubeíti jafánreinragun güriégia lueígiñe Jesúsu. ⁴⁴ Ñíñanu yebe abúseerutiña jadáürüni, úati ni ában adúgüti.

Mafíñetiña gumádimatiña luágu Jesúsu

⁴⁵ Ába jagíribudun polisía ja tánina témpulu jarigoún jámoun fariséogu jáma jábutigu fádirigu. Ába jaríñagun joun polisía.

—¿Ca uágu manúgün jubálin?

⁴⁶ Ába jaríñagun polisía.

—¿Úagili ni ában adímurejati quei ladímurejan wügúri le!

⁴⁷ Ábati jaríñagun fariséogu joun.

—¿Ígiraguagüdaadün gíñe júngua lun leyéedunün? ⁴⁸ ¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹ Ánjaña güriégia ja, ja afálarubalin wügúri ligía, ja ibídiñejabubaña lun lúrudu, íñarawagúaaña.

⁵⁰ Nicodémo, le ñúdünbei adímureja lúma Jesúsu gúnoun, ligía ában jádaangiñe fariséogu, ába laríñagun joun.

⁵¹ —Según walúrudun, siñáti wasíadiruni ában wügúri magáambunga wameí furúmiñe lun wasúbudiruni ca lan lidúnrunbei.

⁵² Ábati jaríñagun lun.

—¿Galiléana gíñe amúrü, badímurejaanbei luágu lufúleisein? Atúriajaboún Lerérun Búngiu, basúbudirubei luágu úagili lan ni ában proféta Galiléana.

⁵³ Ába jóudin cáda ában jábiñoun.

8

Wúri maríeitu to aganoúboun luma ámu wügúri

¹ Ánjeinti Jesúsu, ába lídin luágun wúbü le gíribei Olívos. ² Larúgan bináafin, ába lagíribudun témpulurugun, ába jayábin sun güriégia lubádun, ába lañúurun, ába lagúmeserun arúfudaja joun. ³ Ábati janúgün arúfudajatiña lilúrudun Moisés jáma fariséogu ában wúri jadáriragun lúma ámu wügúri lueí túmari. Ába jíchugunun jamídaangua ja ñíbaña jámagua, ⁴ ába jaríñagun lun Jesúsu.

—Maésturu, nuján wúri to, wadáriragun lúma ámu wügúri lueí túmari. ⁵ Laríñajare lilúrudun Moisés jawágu jíbe wúríña ja, lun jáfarawagún jilágubei láu dúbü. ¿Cági baríñagubei?

⁶ Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labúrújan múarugu láu lújabu. ⁷ Queíti jasígirun álügüdaguei, ába laráramun, ába laríñagun joun.

—Furúmiñegarügü jídaangiñe le mafígounti, chúleí furúmiñeti dúbü tuágu.

⁸ Ábaya lélemuchun, ába lasígirun abúrúja múarugu. ⁹ Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámangiñe ja weínamutumáajañaña. Dánti le furíjaña súnigubei, ába ladáriragun Jesúsu lúngua lábúgua túma wúri tugúya quei teréderunbei ñi. ¹⁰ Ábati liñúraguni Jesúsu lichúgü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun boúnwen?

¹¹ Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madúgadügüyabá figoú.

Jesúsu lilámpun uboú

¹² Ábaya ladímurejan Jesúsu joun güriquia, ába laríñagun.

—Áu lilámpunbei uboú, le afálarutina, libíjubei larúgounga le anúgübei güriquia lídoun ibágari magúmuchaditi, áni meíbugunbei lídan lubúriga.

¹³ Ábati jaríñagun fariséogu lun.

—Amúrü, badímurejaña buíti buoúgua, mebégiti líra.

¹⁴ Ába laríñagun Jesúsu joun.

—Le naríñagubei gebégiti, láu sun áu lan adímurejabei buíti nuoúgua. Áu, subúdi numúti jalágiñe lan niábin lúma jalíñounba lan nídin, ánjein jugúya, ibídiñeti jun jalágiñe lan niábin ni jalíñounbadina lan. ¹⁵ Jugúya, jasáminarun nuágu queísi luwúyeri lasáminarun uboú, áu, magúseragüdúntina ni ában. ¹⁶ Ánjana jamúga agúseragüda, nadúgüñein jamúga láu úarani, ladúga mámarügüba áu agúseragüda, Núguchi le oúnajabalina lagúseragüdüba gíñe núma. ¹⁷ Bürúwati lídan jilúrudun luágu dan lan geféen jamá bián güriquia luágu ában méme cátei, lúnti lan lafíñerún joun. ¹⁸ Ítara liñáti áu ában le geféenbei luágu náni fuleísei, Núguchi le oúnajabalina, ligía gíñe ában le geféenbei nuágu.

¹⁹ Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti gíñe jun, lun jamúga subúdi jumánina, subúditi jamúga gíñe Núguchi jun.

²⁰ Lídan laríñagubalin Jesúsu cátei le, larúfudajaña témpulurugu lídan fulásu le ní tubeí buri gáfu to lágei seínsu. Madáürün lumúti ni ában ladúga machúlügili lan lidáni lun loúnwen.

Laríñajare Jesúsu joun luágu siñá lan jeídin ñíjinba lubeí lídin

²¹ Ábaya laríñagun Jesúsu joun.

—Áu, neíbuga, jugúya jáluajabadina, jóüweguba gafígounga, siñáti jídin le ñíjinba lubeí nídin.

²² Ábati jaríñagun juríu.

—¿Láfaragua funa lúngua, laríñagunbei luágu siñá lan woúdin le ñíjinba lubeí lídin?

²³ Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni uboú le jugúya, ánjein áu, máma láni uboú le áu. ²⁴ Ligía naríñagunbei jun luágu jóúweguba lan gafígounga, ladúga ánjein mafíñen jubéi luágu áu lan áu, jóúweguba ítara.

²⁵ Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü. ²⁶ Gayáraati jamúga naríñagun gíbeti jun luágu luríban jigáburi lun nadeñjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana uboú.

²⁷ Ánjein jagía, úati gunfaráanda jamáni láu luágu lan Búngiu ladímureja Jesúsu joun. ²⁸ Ligía laríñagunbei joun.

—Dánme le jiñúrunina, áu Wügúri Garaúwarügüti, ligíame jasúbudiruni luágu áu lan le uágubei naríñaga luágu áu lan, áni madúgün nan ni cáta luágu náni núngua, lueídügüya le larúfudajabei Nóguchi nun. ²⁹ Ladúga númañein le oúnajabalina, mígirun lágidina Nóguchi nábugua, ladúga adúga náni le áubei lagúndaara súnwandan.

³⁰ Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figóu

³¹ Ába laríñagun Jesúsu joun juríu ja ánjarubaña lun lerérun.

—Ánjaün asígira lun jídin surúñu láu le nubeíbei jun, jiábinba lun náni jumá disípulugu le tímatimaati. ³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Ninárün jáu, luágu sun lan ja adágubaña figóu, lidámun figóu jagía. ³⁵ Ában idámuni, máma jádaangiñeti família, ánjeinti ában isáani, jádaangiñeti família súnwandan. ³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figóu, furáangubadün le tímatimaati. ³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladúga mája jumá lun le nubeíbei jun. ³⁸ Áu nadímurejan luágu le larúfudubei Nóguchi nun, jugúya jadúgüni le jafúnrendeirubei lúmagiñe júguchi, le Máfia.

³⁹ Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadúgüñein jamúga le ladúgübei. ⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madúgünti meja Abrahám ni cáta líbe líra! ⁴¹ Le méme ladúgübei júguchi, ligía jadúgübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí júguchibeí, jínsiñetina jamúga jun ladúga lúmagiñe Búngiu niábin, áni anája ya. Máma láu náni núngua niábin, Búngiu oúnajabalina. ⁴³ ¿Ca uágu lásiñerunbei gunfaráanda jumáni le naríñagubei? Ladúga mabúseerun jumá jagáambuni náni ugánu. ⁴⁴ Máfia júguchibeí, lánigu jugúya, áni buséntün jadúgüni lugúndan. Gáfarajadigubeiñein Máfia lúmagiñe furúmiñeti dan. Márügüdünti lueígiñe inárüni, maríñagunti gíñe inárüni. Lídan le laríñagun iyéeni, ladímurejaña quei ligáburi, ladúga yéeti áni ligía lúguchibeí iyéeni. ⁴⁵ Ánjeinti áu, quei inárüni lubeí naríñagubei,

maffñetün nun. ⁴⁶ ¿Ca jídaangiñe gayáraabei larúfuduni luágu gafígoun nan? Ánjeinti inárüni lubeí naríñagubei, ¿cáti uágu maffñen jubeí nun? ⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸ Ábati jaríñagun juríu lun.

—Wanárun láu waríñagun luágu máma ban ámu jaweí jagúbüri Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadúgübei, níchuguña inébesei lun Núguchi, jugúya, íchiga minébeni nun. ⁵⁰ Máluajaantina inébesei núngua, láu sun níjein lan ában áluga lumúti ninébesi, áni ligía le agúseragüdübei. ⁵¹ Ninárün jáu luágu le lan adúgüti gásu láu le nubeíbei, moúnwenbei lan.

⁵² Ábati jaríñagun juríu lun.

—Anáti guetó, choúru wamáali luágu níjein lan espíritu wuríbati bídan. Jiláti Abrahám, jilágua profétagu, áni aríñagagibu luágu le lan adúgüti gásu láu le bubeíbei, moúnwenbei lan. ⁵³ ¿Cátabuñadíbugi lúmoun wáguchi Abrahám? Jiláti Abrahám, jilágua profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíriguni nuoúgua, málabei, ánjeinti Núguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu. ⁵⁵ Jugúya, ibídiñeti Búngiu jun, anáti áu, subúditi nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúditi Búngiu nun le tímatimaati, áni adúga numúti le lubeíbei. ⁵⁶ Abrahám lé meja binádu júguchi, gúndaati meja láu lasúbudiruni luágu lachúlürüba lan nuwéyuri lun niábin uboúagun queísi asálbaragülei, buin líña láu ugúndani dan laríjini wéyu ligía.

⁵⁷ Ábati jaríñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dúbü lun jachúraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareídagugüdüün Jesúsu ában wügüri maríjinti

¹ Lídan le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagúriajoun. ² Ába jaríñagun láni disípulugu lun.

—Maésturu, ¿cásan uágu lagúriajounbei wügüri le maríjinga? ¿Ladúgasan jafígoun lagúbürigu, o ladúga lifígoun guánarü?

³ Ába laríñagun Jesúsu joun.

—Máma ladúga lifígoun, máma gíñe ladúga jafígoun lagúbürigu, lasúseredunbei ítara lun larijouniwa le luáraabei Búngiu adúga láu lareídagun wügüri ligía. ⁴ Lúnti nadúgüni luwádigimari Búngiu le oúnajabalina sun wínwangidina lan, jiláadina ligíame, siñáme nadúgüni. ⁵ Sun dan anája lan ligíbuagu ubou le, áu lilámpunbei ubou.

⁶ Lárigiñe laríñaguni Jesúsu cátei le, ába lásuerun múarugun, ába ladúgün murúsun gubégubeti láu larúre, ába lájuruduni luágu lágu le maríjinbei. ⁷ Ába laríñagun lun.

—Beíba achíbei bigíbu lídan dúna le gíríbei Siloé —míni lan líra, Oúnajóuti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali. ⁸ Játi lubésinanigu jáma gürígia já meja aríjubalin amúriaaja, ába jaríñagun.

—¿Másan nijáñaja le añúurubei amúriaaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügúri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügúri le gíribei Jesúsu, ligía adúgübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügúri ligía?

Laríñaga joun.

—Ibídiñeti nun jageí lan.

Jálügüdaguni fariséogu maríjinti le areídaguagüdüwalibei

¹³ Ábati janúgüni wügúri lé meja maríjinbei jagíbugiñoún fariséogu. ¹⁴ Queíti lídan lan wéyu le eméraaguagülei ladúgei Jesúsu gubégubeti le áubei lareídaguagüdei maríjinti ligía, ¹⁵ ába gíñe jálügüdüni fariséogu wügúri ligía ída líña lan gayáraajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügúri le adúgübalin cátei le, siñáti loúnagüle lan Búngiu ladúga minébenti wéyu le eméraaguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gafígoun lubeí?

Ába lubeíti ñi lan fánreinguaü jádan. ¹⁷ Ábaya jálügüdüni lé meja maríjinbei.

—Ángi bugúya, ¿cági baríñagubei luágu wügúri le, queísi bugúya lubeí le larí-jagüdübei?

Ába laríñagun.

—Nugúya, naríñagun luágu ában lan proféta.

¹⁸ Májatiña yebe fariséogu jafíñerun luágu maríjin lán meja wügúri ligía áni aríjaali lan guetó, darí lun jagúarun joun lagúbürigu, ¹⁹ ába jaríñagun joun.

—¿Nijánsan jiraú le uágubei jaríñaga luágu maríjin gubeíñein lan lúmangiñe lagúria-joun? ¿Ída liñáti aríjaali lubeí guetó?

²⁰ Ába jaríñagun lagúbürigu.

—Subúdi wamúti luágu waraú lan le, áni maríjin lan dan le lagúriajoúnbei, ²¹ ibídiñeti woun ída líña lan aríjaali lubeí, ni ca lan areídaguagüdübalin lágu. Álügüda jumeí, weíriyaali, gayáraati loúnabun lueígiñegua.

²² Anúfudeiti aríñagagüdübalin líra joun lagúbürigu wügúri ligía, ladúga aríñagaña lan fariséogu luágu sun lan ja affínerutiña luágu Jesúsu lan Crístubei, jabugúba lan tídaangiñe jalígílisin juríu. ²³ Ligía jaríñagunbei lagúbürigu. “Álügüda jumeí, weíriyaali.”

²⁴ Ábayati jagúarun juríu lun wügúri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúditi woun luágu gafígoun lan wügúri líra.

²⁵ Ábati laríñagun joun.

—Ibídiñeti nun ánjein gafígoun lubeí lúmoun mafígoun lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladúgübei báu? ¿Ída liñásan ladúga lun laríjagüdünibu?

²⁷ Ába laríñagun joun.

—Aríñaga náali jun, mebéreseguntün náu, ¿cáti uágu jabúseera naríñaguniya jun? ¿Ódi buséntün gíñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügúri ligía, ánjein wagía, larúfudajan Moisés wafálarubei. ²⁹ Subúditi woun luágu adímureja lán meja Búngiu lun Moisés, ánjein le, ibídiñegubeíti woun jaláagiñeti lan.

³⁰ Ábati laríñagun wügúri ligía joun.

—¡Ámuti gíñe cátei le! ¡Ibídiñeti jun jaláagiñeti lan, áni aríjagüda lána! ³¹ Subúditi woun luágu magáambun láníña Búngiu gafígountiña, ja rügúñanu ájuduragubaña lun jáma ja adúgübalin lugúndan, lagáamba. ³² Magáambuñajagili luágu ni ában aríjagüdúti ában gürígia le agúriajóuti maríjina. ³³ Lun jamúga máma lan lúmagiñe Búngiu liábin wügúri le, siñáti jamúga ladúgün ni cáta.

³⁴ Ábati jaríñagun lun.

—¿Bugúyasan le agúriajóubei buin láu figoú, buséntibu barúfudajan woun?

Ába jabúguni tídaangiñe jalígilisin.

Ja maríjinbaña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Afíñetibu luágu Liraú Búngiu?

³⁶ Ába laríñagun wügúri ligía lun.

—Aríñagabeí nun cátei lan, afíñe námuga luágu.

³⁷ Ába laríñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

—Afíñetina, Nabúreme.

³⁹ Ába laríñagun Jesúsu.

—Niábinbei ñájoun uboúagun lun néfegechagüdüni jágu ja ibídiñejabubaña lun cátei lánina Búngiu, lun gíñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan gíñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga ibídiñe lan cátei lánina Búngiu jun, madúnrunntün jamúga luágu jifígoun, quei jaríñagun luágu subúdi jumáni, gadúnrunntün.

10

Jémpulu luáguti louñigiruniña Jesúsu lánigu queísi ában oúnigiruti mudún

¹ ‘Nínárün jáu luágu le lan mebéluti lídaangiñe lubéneri jabárierun mudún, lun lebélorun lídaangiñe ámu oúbaü, jíweruti. ² Ánjeinti le ebélorubei lídaangiñe béna, ligía le oúnigirubaliña mudún. ³ Ába lánjunrenchuni le oúnigirubalin béna béna

lun, lun lebéllurun, subúdi jamúti gíñe mudún lumálali. Ába lagúajan joun láu jíri, ába laságaraguniña baríerurugugiñe. ⁴ Lárigiñe laságaraguniña súngebey, ába lídin eíbugeina jabá jabá, ába jafálaruni ladúga subúdi jamáni lumálali. ⁵ Mídintiña lárigi ában le ibídiñeti joun, anúrararügütiña lueí ladúga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jouniri mudún buíti

⁷ Ábayati laríñagun Jesúsu joun.

—Nínárün jáu, áu béna le ñígiñe lubeí gayára lan jayábin güriquia lun lánigu jamá Búngiu. ⁸ Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madúgütiña lánigu Búngiu gásu jáu. ⁹ Áu bénabei, le ebélluruti nueígiñe, lasálbarúaba. Ítara lúba quei ában mudún le ebélluruti furí ligía baríerurugugiñe, darí ligía sagádi lun leígin.

¹⁰ ‘Jíweruti, liábin rügüña lun líwerujan, lun láfarajan lúma lun lagúnrinchagun, ánjein áu, niábiña lun jibíjin ibágari, áni lun jibíjini gíbe. ¹¹ Áu, ítara níña queísi ában jouniri mudún le buíti, le gayáraati líchuguni libágari jawágu lilúgüniña mudún. ¹² Ánjein le ñadágimeinrügüti luágu fáyeiti, dan le laríjin liábin anímaalu le jabísa mudún, ába lígiruniña mudún, ába leíbaagun, ladúga máma lan óunigiruti buíti ligía, máma gíñe lilúgüniña mudún. Ábati liábin jabísa mudún, ába lawáraüdagugüdüniña. ¹³ Wügüri ligía eíbaaguati ladúga luwádigimariña lan luágurügü fáyeiti, mebésesegüti jáu mudún.

¹⁴⁻¹⁵ ‘Áu óunigirutibei buíti. Ítara quei nisúbudin lun Nóguchi áni subúdi Nóguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún jouniri. Rúnnumuti nibágari jawágu queísi líchuguni óunigiruti mudún libágari jawágu lilúgüniña mudún. ¹⁶ Añájein gíñe ámu güriquia ja lúnbaña nánigu jamá ja mámabaña juríu, lúnti gíñe nanúgüniña lun nánigu jamá. Jagáambubadina, ábame jeréderun súngebey lídan ában lúma ában óunigiruti.

¹⁷ ‘Jínsiñetina lun Nóguchi, ladúga níchugubei nibágari luágu uboú, ligía ábayame nibíjini. ¹⁸ Magída lubeí ni ában güriquia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Nóguchi nun.

¹⁹ Dan le jagáambubalin juríu dimúrei buri le, ábaya jafánreinragun. ²⁰ Sarágu jáña jádaangiñe aríñagutiña.

—¿Cásan uágu jadúga gásu láu, njeingusan espíritu wuríbati lídan áni lúlüjali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdüñ espíritu wuríbati maríjintiña?

Merésibirun jamáni juríu Jesúsu

²² Dan ligía lidáani luríbouga, ladügüñati fédu le lánina tedéreggerún témpulu Jerusalén lun Búngiu. ²³ Ñíñeinti Jesúsu eíbugañaja témpulurugu luágu corredór le gírubei Láni Salomón corredór. ²⁴ Ába jagúriridagun juríu láu, ába jaríñagun lun.

—¿Darísan ídaba bígirawa láu machoúruni? Ánjein amúrü lubeí Crístubei, aríñagabei furáangu.

²⁵ Ába laríñagun Jesúsu joun.

—Aríñaga náali, maffíñetün nun. Sún buri cátei le nadáagubei láu lugúmadin Nóguchi, arúfuda lumúti furáangu. ²⁶ Jugúya, maffíñetün ladúga máma jumá jádaangiñe nilúgüniña mudún quei bugája naríñaguni jun. ²⁷ Subúdi jamúti nilúgüniña mudún numálali, subúdi numútiña gíñe, áni falá jamutina. ²⁸ Rútina ibágari magúmuchaditi joun áni meféridirubaña, úabei gíñe agídarutiña nújaburugugiñe. ²⁹ Nóguchi le weírubei

jaweí súnqubei, ligía íchugubaliña nun, áni úati ni ában lun lagídaruniña lújaburugugiñe.
³⁰ Áu lúma Búngiu Úguchili ában méme wagía.

³¹ Ábayati jabúdajan juríu dúbü lun jachúráguni luágun. ³² Ába laríñagun Jesúsu joun.
 —Gíbeeli cátei buíti nadúga jigíbugiñe láu lubáfu Búngiu, ¿cábagi lídaangiñe uágu jíchaagua dúbü nuágu?

³³ Ába jaríñagun juríu lun.

—Míchaagunbadiwa dúbü buágu luágu ni cáta buíti badúga, ladúga anába báali lan Búngiu láu berérun. Wügúri rügúñadibu, áni bíchaaguña búngua quei Búngiu.

³⁴ Ábati laríñagun Jesúsu joun.

—Bürúwati lídan jilúrudun luágu aríñaga lan Búngiu. “búngiu buri jugúya”.
³⁵ Subúditi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa láníña Búngiu gürígia ja erésibirubalin lerérun lun jíchuguni joun gürígia, quei búngiugu. ³⁶ Ánjeinti anúadaja lubáalina Búngiu, ába louñajanina ubouágun, ¿ída liñáti jaríñagunbei luágu anába náni láu naríñagun luágu Liraú nan Búngiu? ³⁷ Ánjein madúgün nan cátei lé buri ladúgübei Núguchi, mafiñera jumá nun, ³⁸ ánjein nadúga, íbini mafiñerun jumá nun, afíne jumá luágu buri cátei le nadúgübei, subúdi jumámugei luágu níjein lan Núguchi nídan, áni anájein lan gíñe lídan Núguchi.

³⁹ Ábaya jálugun jadáürüni, ába leséfurun jaweí.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñí lubeí meja labásteragúdaja Juan. ⁴¹ Sarágu jáña gürígia ñúdüntiña aríjei, ába buri jaríñagun.

—Láu sun madúgün lan Juan ni ában miláguru, inárüni sun le laríñagubei luágu wügúri le.

⁴² Ába jafíñerun sarágu gürígia luágu Jesúsu lídan fulásu ligía.

11

Loúnwen Lázaro

¹ Ñíñein ában wügúri sánditi, gíríti Lázaro, lílana fulásu le gíríbei Betánia, le tageíra María túma Márta to tíbugaña. ² María tugúya, to lítu Lázaro le sándíbei, tugúya to éseruboun ibíñei luágun lugúdi Jesúsu, ába tarágajani láu tídíburi. ³ Ábati jóúnajan bián ítunu ja, aríñaga lun Jesúsu.

—Jesúsu, sándíñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntíbei larijiniwa luweírigun Búngiu, lúma gíñe lun larijiniwa luweírigun Liraú Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu, ⁶ dan le jaríñawagúnbei lun luágu sándíñein lan Lázaro, reídeigili bián wéyu lídan fulásu le ñí lubei. ⁷ Lárigiñe, ába laríñagun joun lání disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dúbü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladúga larijubei lan larúgounga le yábei ubouágu, ¹⁰ ánjein eíbuga áriebe, lachúgeraguba ladúga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguaarügü arúmuguni ladímureja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladúga buítimaati ítara jun, affíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamámuga úara lúma.

Jesúsu ásaaragüdübei lídaangiñe ouweni, ligía íchiga ibágari

¹⁷ Dan le lachúlürünbei Jesúsu, gádürüjali wéyu lueígiñe labunún Lázaro. ¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñúdüntiña Jerusaléngiñe bisídoun Márta túma María lun jíchugun ñurúguau joun luágu loúnwen jamúlen. ²⁰ Dan tagáambunbei Márta luágu níteeli lan Jesúsu achúlüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²² áni subúditi nun luágu líchugubei lan Búngiu sun le bamúriaian lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaragüdübaña jiláaña, rúneí jabágari joun lárigoún. Le affíñeti nuágu, gayáraati loúnwen, labágaridayaba, ²⁶ áni sun le wíngangilibei áni affíñeti nuágu, labágariduba gíñe lúma Búngiu súnwandan. ¿Affíñetibu?

²⁷ Taríñaga lun.

—Ánja, Nabúreme, affíñetiña luágu bugúya lan Crístubei le Liraú Búngiu, lé meja lúnbei líabin ubouágun.

Layájun Jesúsu lubádu lumúaja Lázaro

²⁸ Lárigiñe taríñaguni Márta le, ába tídin ougoun María, ába taríñagun tun joún-guarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrugin, lídaañein fulásu le ñí lubei tadárireí Márta. ³¹ Dan le jaríjinbei juríu ja ñíbaña múnada túma María amalijoun tásaarun ába táfuridun furéseguina, ába jóúdin tárigi, jarítagun luágu teíbuga lán yebe luágu umúajaü ayájua.

³² Dánti le tachúlürünbei María le ñíjin lubeí Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, moúnwenti jamúga namúlen.

³³ Dan le laríjin Jesúsu tayájun María jáma juríu ja ñúbinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábati jaríñagun juríu.

—¡Aríja jumá luweírín meja línsiñe lun!

³⁷ Níñanu jádaangiñe aríñagutiña.

—Niján le aríjagüdöbalin wügüri le maríjinbei, ¿siñáti jamúga funásan ladúgün lun moúnwen lan Lázaro?

Lásaarun Lázaro lídaangiñe óuweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dúbü, ñíñein ában dúbü lidaúme. ³⁹ Ába laríñagun Jesúsu.

—Gidájumei dúbü.

Ába taríñagun Márta lun.

—Mósutia jíngiaali lan ladúga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan affíne nuágu, baríjubei lan luweírigun Búngiu?

⁴¹ Ábati jagídaruni dúbü, ába laríjin Jesúsu siéllun, ába laríñagun.

—Núguchi, teínqui numútibu luágu bagáambunina. ⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafíñerun luágu amürü lan oúnajabalina.

⁴³ Lárigiñe laríñaguni cátei le, ába lagúaragun.

—¿Lázaro, furíba ñígiñe!

⁴⁴ Ába láfuridun jiláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun lárügüdúniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñúdünbaña túma María, aríja jameí le ladúgübei Jesúsu, ába jafíñerun luágu. ⁴⁶ Ñíñanu jádaangiñe, ába jóudin jámoun fariséogu, ába jabájüdaguni le ladúgübei Jesúsu joun. ⁴⁷ Ábati jayábin fariséogu jáma jábutigu fádirigu, ába jóúndaragun jáma jíñun-ágei agúmadijatiña, ába jaríñagun.

—¿Cábasan wadúga? Ladáaguñatia wügüri le sarágu miláguru. ⁴⁸ Ánjeinti wígira ítara, jafíñeruba sun gürígia luágu, ábamei jayábin gumádimatiña Rómata, ábame jagúmochaguagüdünun walígilisin láu sun warásan.

⁴⁹ Ñíñein ában jádaangiñe, gíríti Gáifasi, ligía jábutibeí fádirigu lídan irúmu ligía, ába laríñagun joun.

—Íbidiñeti ni cáta jun, ⁵⁰ maríjin jumeí luágu buítima lan woun lun loúnwen ábanrügü wügüri jawágu jíbiri, máma lun lagúnrinchawagún sun warásan.

⁵¹ Máma láu lání Gáifasi lúngua laríñagei líra, ladúga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu loúweba lan Jesúsu jawágu juríu, ⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubeí meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíríti Efraín, yaráfa lun fulásu mageírawati. Ába leréderun ñi jáma lání disípulugu.

⁵⁵ Yaráfaaliti jafédun juríu le gíríbei páscua, sarágu jáña gürígia ñúdün Jerusalén lun jadúgüni igáburi le lánina jarúmadun lubáragiñe fédu ligía. ⁵⁶ Jáluajañeinti Jesúsu, dánti le témpulurugüñanu lan, ába jalügüdjagan jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jaláñeini lan Jesúsu, lun lan laríñaguni, barú jamámugei adáüra.

12

*Tájurudaguni ában wúri lugúdi Jesúsú**(Mt 26.6-13; Mr 14.3-9)*

¹ Sísi wéyu lubáragiñe páscua, ába lídin Jesúsú Betánia, le ñí lubei lagánawa Lázaro le lásaaragüdübei jádaangiñe jiláaña lúnya labágaridun. ² Ába jadúgün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja ñúnbaña luágu dábula lúma Jesúsú. ³ Ábati tanúgün María ában paénti ibíñei le séruti, ába tájurudaguni lugúdi Jesúsú láu, ába tarágajani láu tídiburi, ába lejémougadun ibíñei ligía sun ñi múnada. ⁴ Ába laríñagun Júdas Iscarióte, le liraú Simón, ában jádaangiñe láni Jesúsú disípulugu, le méme lúnbei lalúguruni.

⁵ —¿Ánsan malúgurún lubei ibíñei le luágu úrüwa-san fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladúga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugúbei tídoun. ⁷ Ábati laríñagun Jesúsú lun.

—Ígiraboun, taráanseruñadina lubá lachúlürün luwéyuri nábunúniwa. ⁸ Súnwandan ñíbaña lan gudémetiña jídan, ánjeinti áu, mámaba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsú Betánia, ába jóudin ñi, mámarügü lun jaríjini, lun giñe jaríjini Lázaro le lásaaragüdübei Jesúsú jádaangiñe jiláaña. ¹⁰ Ába giñeti juáradun jábutigu fádirigu lídan ában lun giñe jáfaruni Lázaro, ¹¹ ladúga sarágu jáña lan juríu adíseduntiña jaweí lun jaffíñerun luágu Jesúsú, lídaangiñeti Lázaro.

*Lebélorun Jesúsú ubúrugun Jerusalén**(Mt 21.1-11; Mr 11.1-11; Lc 19.28-40)*

¹² Sarágu jáña güriquia ñúdüntiña Jerusalén lubá fédu le páscua, larúgan, ába jasúbudiruni luágu lachúlürüba lan Jesúsú ñíjin ubúrugun. ¹³ Ábati játüjan tubána fáluma, ába jáfuridun lubároun Jesúsú agúarajeina.

—¡Uweíriguni lun Búngiu! ¡Biníwati le ñúbinbei lídan líri Wabúreme! ¡Biníwati lurúeite Israél!

¹⁴ Ába ladárirun Jesúsú ában burígü, ába laweínruni quei laríñagun tídan Lerérun Búngiu.

¹⁵ Manúfudebá, ubúругu le Sión, níten burúeite waríñu luágu ában burígü.

¹⁶ Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsú lídoun luweírigun yágüta siélu, ába jarítangun luágu bürúwa lan sun cátei le luágu, áni ítara líña lan lasúseredun lun.

¹⁷ Ja güriquia ja ñíbaña dan le lagúarun Jesúsú lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei. ¹⁸ Ligía lébubei jáfuridun güriquia erésibirei Jesúsú, ladúga jagáambun luágu miláguru le ladúgübei.

¹⁹ Ábati jaríñagun fariséogu jámagua.

—Aríja jumáli luágu, siñá lan ladügúniwa ni cáta, sun güriquia añágüran lúma.

Jáluajani güriégu Jesúsú

²⁰ Ñíñanu güriégu jádan güriquia ja ñúdünbaña Jerusalén lun jájuduragun lun Búngiu, ²¹ ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Busétiwa waríjini Jesúsú.

²² Ába lídin Felípe, ába laríñaguni lun Andrés, ába jóudin biángubei jagía abájüdaguei lun Jesúsú. ²³ Ábati laríñagun Jesúsú joun.

—Chülúja óra lun líchugúniwa uweírighuni nun, áu le Wügúri Garaúwarügüti.
²⁴ Ninárün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein oúwe, lalúbajouba sarágu lídaangiñe. ²⁵ Le jínsiñejabuti lun libágari, leféridirubei, ánjein le mebéresenti láu libágari lídan ubou le, lareídubei lubá ibágari le magúmuchaditi, siélu. ²⁶ Le busénti lesériwidunina, lúnti lafálarunina, áni le ní numuti, níbei gíñe le esériwidubalina. Le esériwidutina, líchuguba Núguchi uweírighuni lun.

Ladímurejan Jesúsu luágu loúnwen

²⁷ ‘Níjein ában oúnwenbun líbe samínaü nuágu guetó. ¿Cábasan naríñaga? ¿Naríñaga funa. “Núguchi, sálba bána lídaangiñe le lúnbei lasúseredun nun guetó”? Uá, lun líra niábin. ²⁸ Núguchi, iñurúalá bíri nídaangiñe.

Ábati lagaambúniwa ában umálali siéluñe le aríñagubei.

—Iñúra náali níri bídaangiñe, áni niñúruyabei.

²⁹ Ábati jaríñagun gürígia ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein. ³¹ Niján dan ligía lun lagúserawagüdún ubou, áni guetóba leféridirei Máfia, le agúmadijabei lídan ubou le, lubáfu. ³² Dánmeti le niñurúniwa múarugugíñe, nanúgübaña súnigubei númoun.

³³ Láu líra laríñaguñein luágu louweba lan luágu ában gurúwa. ³⁴ Ába jaríñagun gürígia lun.

—Agáambaadiwa laliijoun tídan walíburun to lánina lilúrudun Moisés luágu labágariduba lan Crístu lun sun dan. ¿Ída liñáti baríñagunbei luágu liñurúaba lan Wügúri Garaúwarügüti? ¿Cáteigi Wügúri Garaúwarügüti ligía?

³⁵ Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáraabei lan jachúlürün le ñíjin lubeí jabúseera jachúlürün, márügüdün lámugaün lubúriga, ladúga le eíbuguti lídan lubúriga, ibídiñeti lun jalíñouñein lan. ³⁶ Afíñe jumá lubeíti nuágu sun anájagua lan júma lun lirájüñü jumá larúgounga.

Lárigíñe laríñaguni Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

³⁷ Láu sun adúga lan Jesúsu sarágu miláguru jagíbugiñe, mafíñetiña luágu. ³⁸ Láu líra jagúnfulirei le laríñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

³⁹ Quei mafíñerun jabeí, ába lasúseredun le ámu dimúrei le laríñagubei Isaías tídan labúrújan, joun.

⁴⁰ Darú lumuti Búngiu jaríjin, derégüda loun janígi,

lun maríjin jamá láu jágu,

úame gunfaráanda jamá,

mayábin jagíame nun lun nareídaguagüdüniña.

⁴¹ Laríñagunbalin Isaías le luágu Jesúsu ladúga aríja láali lan luweírighun.

⁴² Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalgílisin. ⁴³ Ladúga gúndaatimaatiña láu inébesi le jíchugubei gürígia sügú láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

⁴⁴ Ába laríñagun Jesúsu láu umálali jéreti.

—Le affñeti nuágu, máma rügüñein nuágu laffñera, affñeti gíñe luágu Nóguchi le oúnajabalina. ⁴⁵ Le gíñe aríjítina, laríjinein gíñe le oúnajabalina. ⁴⁶ Áu lámpubei, niábinbei uboúagun lun sun lan ja affñetiña nuágu, merédera jamámuga lídan lubúriga. ⁴⁷ Ánjein le agáambuti nerérun áni madúgünti gásu láu, máma áu asiádirubalin, ladúga máma niábiña lun nasiádiruniña gürígia uboúagu, niábiña asálbaraña. ⁴⁸ Le mebéresenti náu, madúgün ligía gásu láu nerérun, níjein lúnti lasíadiruni. dimúrei buri le aríñaga náalibei, ligíaba asiádirei lídaanme lagúmujoún wéyu. ⁴⁹ Ladúga madímurejaantina luágu nání nungua, Nóguchi le oúnajabalina, ligía aríñagubalin le lúnbei naríñaguni nun lúma le lúnbei narúfudajani. ⁵⁰ Áni subúdi numúti luágu barú lan lugúmadin Nóguchi ibágari magúmuchaditi joun ja adúgübalin le lubeíbei. Le lubeíti naríñagubei, naríñaguni quei laríñaguni Nóguchi nun.

13

Lachíbuni Jesúsu jagúdi láni disípulugu

¹ Ábanrúgaali wéyu lubá fédu le páscua. Subúdi láali Jesúsu luágu chülúja lan óra lun lígiruni uboú le lun lídin lúmoun Lóguchi. Súnwandan meja jínsiñe jamá lánigu ja uboúagubaña lun, guetó larúfuduñeinti línsiñejabu lídan luweírín-ágei.

²⁻⁴ Dálaalíti Máfia larítangun tídoun lanígi Júdas Iscarióte lun ledégereruni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan gíñe Búngiu lagíribuda, luágu gíñe rúlaali lan Úguchili sun cátei lújaburugun, ába larúfuduni luweírín-ágei únabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragun, ába lagúrün ában tuáya liránaagua. ⁵ Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába laríñagun lun.

—Nabúreme, ¿bachíbaalisan nugúdi?

⁷ Ába laríñagun Jesúsu lun.

—Guetó, úati gunfaráanda báni le nadúgübei, gunfaráanda bubeí lárigiñe.

⁸ Ába laríñagun Pédro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pédro lun.

—Mámarügülá nugúdi bachíba, chibábei gíñe nújabu lúma nigíbu.

¹⁰ Laríñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladúga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le laríñagunbei luágu máma lan sun jagía jarúmatiña, ladúga subúdi láni cába lan edégererei.

¹² Lásun lachíbuni Jesúsu jagúdi, ábaya ladáürunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútisan le nadúgübei jun? ¹³ Jugúya agúajatün nun Maésturu, lúma Nabúreme, áni richátün ladúga áu ligía, ¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti gíñe jachíbuni jugúdi júmagua. ¹⁵ Rújadina ában jémpulu jun lun jadúgüni líbe méme le nadúgübei. ¹⁶ Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin. ¹⁷ Ánjein gunfaráanda jumá buri cátei le áni adúga jumeíme, gúndaabadün.

¹⁸ ‘Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúnfulirún le tídaanbei

Le rerun Búngiu. “Garábagua le eígubei núma, nuágun.”¹⁹ Naríñaguñein le jun lubáragiñe lasúseredun, lun dánme lan le lasúseredun, afíñe jumámuga luágu áu lan Crístubei.²⁰ Ninárün jáu luágu le lan erésibiruti le noúnajan, resíbi lumútina gíñe, áni le erésibirutina, resíbi lumúti gíñe le oúnajabalina.

Ladímurejani Jesúsu luágu ledéregerubei lan Júdas

(Mt 26.20-25; Mr 14.17-21; Lc 22.21-23)

²¹ Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregerubadina lan ában jádaangiñe.

²² Ábati jagúmeserun disípulugu aríagua jawoúguoún, ibídiñounga joun ca lan jádaangiñe uágubei ladímureja Jesúsu.²³ Áu Juan, le abúrújabarun gárada to, ában jádaangiñe disípulugu, le weírubei ínsiñe lun Jesúsu, loúbagiñeñádina lídan adíneruni,²⁴ ába ladúgün Simón Pédro seíni nun lun nálügüdüni Jesúsu ca lan jádaangiñe uágubei ladímureja.²⁵ Ábati nayárafaduntima lun Jesúsu, ába naríñagun lun.

—Nabúreme, ¿cáteisán lúnbei ledéregerunibu?

²⁶ Ába laríñagun Jesúsu nun.

—Nadúdüragüda murúsun fein, le únti níchigoun, ligíaba edéregerana.

Ábati ladúdüragüdün murúsun fein, ába líchugunun lun Júdas Iscarióte, le liraú Simón.²⁷ Quei lárügüdünun Júdas fein tugúya, ítara lebélorun Máfia tídoun lanígi. Ábati laríñagun Jesúsu lun.

—Le lúnbei badúgüni, adúgabeí furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun.²⁹ Quei Júdas lubeí táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña.³⁰ Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába laríñagun Jesúsu.

—Larijúa nuweírigun, áu le Wügúri Garaúwarügüti, guetó, arijúame luweírigun Úguchili nuágu.³² Ánjeinti arúfuda nubálin luweírigun Búngiu, larúfudubei gíñe Búngiu nuweírigun, áni ladúgübei madíse.³³ Nirájüñü, úaadináme júma sarágu dan. Jáluajabadina, le méme naríñagubei joun juríu naríñagayaali jun guetó. Siñábei jídin le ñjinba lubeí nídin.³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti gíñe jínsiñegua jumá júngua.³⁵ Ánjaün jínsiñegua júngua, jasúbudirubei sun güriquia luágu náni jumá disípulugu.

Ladímurejani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñjinbadina lubeí guetó, lachúlürüba wéyu lun bafálarubadina lan.

³⁷ Laríñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu úrüwa weíyaasu lubáragiñe layúgurujan gáyu.

14

Jesúsu, ligía úmabei lun lúmoun Úguchili

¹ ‘Merédera jumá láu líbe samínaü, affíne méme jumá luágu Búngiu, affíne méme jugúyame nuágu. ² Níjein sarágu ubáraü tídan lúban Nóguchi lun jaganoún güri-gia ñi, lun jamúga máma lan ítara líña, aríñaga náali jamúga jun. Neíbuga lubeíti aráanseja ában ubáraü jubá. ³ Lárigiñeme nídin, aráanse neíme ubáraü ligía, ábame nagíribudunya lun nanúgünün númagua, lun ñi jumá le méme ñi numuti. ⁴ Subúdi jumúti jalíñounbadina lan, subúdi jumúti gíñe úma.

⁵ Laríñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni úma?

⁶ Laríñaga Jesúsu lun.

—Lun lachúlürúniwa lúmoun Búngiu, áu úmabei, áu inárüni, áu ibágari. Nueígiñe rügúñein gayára lan lachúlürúniwa lúmoun Búngiu Úguchili. ⁷ Lun jamúga subúdi nan jun buídu, subúdi jumúti jamúga gíñe Nóguchi, subúdi jumáaliti lúmagiñe guetó, ladúga aríjañaja jumáali láu jaríjinina.

⁸ Laríñagati Felípe lun.

—Arúfudabeí Úguchili woun, buídurügaalime woun.

⁹ Laríñaga Jesúsu lun.

—Felípe, lújadina júma, ¿ibídiñegidina bun? Le aríjitina, laríjiñein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun? ¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoúbei nídan, ligía adúgübalin luwádigimari guánarü. ¹¹ Affíne jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadúgübei, affíne jumá nun. ¹² Ninárün jáu, luágu le lan affíneti nuágu, ladúgübei lan cátei lé buri nadúgübei, ladúgüba buri cátei weínamutimaati, ladúga áu, neíbuga le ñíjin lubeí Nóguchi. ¹³ Sun le jamúriajan lídan níri, nadúgübei, arúfuda námugei luweírigun Nóguchi. ¹⁴ Nadúgübei furúmieguarügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ ‘Ánjein jínsiñe nubeí jun, gúnfuli jumá láu le nubeíbei, ¹⁶ ábame nayúmuragun lun Nóguchi lun loúnajan ámu jun newéñegua lun líderagunün, lun gíñe líchugun gurásu jun. Ligíaba Sífiri Sándu le subúdi-jabúbei lun sun inárüni, júmabei súnwandan. ¹⁷ Ja lánigu ubou le, siñáti jerésibiruni Sífiri Sándu ligía, ladúga siñá lan jaríjini ni jasúbudiruni, ánjein jugúya, subúdi jumáali, ladúga níjein júma áni leréderuba jídan. ¹⁸ Mígirun nubádün jábugua, nagíribudayaba lun júma nan. ¹⁹ Málüjadina ánjana maríjin jamá güri-gia, ánjein jugúya, jaríjubadina, áni gabágaribadün ladúga wínwañu níña lan. ²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nóguchi, jugúya nídan, áu gíñe jídan. ²¹ Le subúdi-jabuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Nóguchi lun le jínsiñejabuti nun, jínsiñebei gíñe nun, arúfudagua áume núngua lun.

²² Ába laríñagun Júdas (mámatia le Isarióte).

—¿Cásan uágu barúfudaguba lubeí búngua woun, máma joun güri-gia ja lánigu ubou le?

²³ Laríñaga Jesúsu lun.

—Le jínsiñejabuti nun, adúgati gásu láu le nubeíbei, áni línsiñeduba lun Nóguchi, ábame wayábin, áu lúma Nóguchi, agánawa lúma. ²⁴ Le mínsiñejabuti nun, madúgüinti gásu láu le nubeíbei. Dimúrei le naríñagubei, máma náni, láni Nóguchi le oúnajabalina.

²⁵ ‘Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Nóguchi lídan níri lun líderagunün, larúfudajaba jun, larítaguagüdubadün gíñe luágu sun le aríñaga náalibeí jun.

²⁷ ‘Neíbuga júmagiñe, nígiraali ñurúguaü júma—ában luwúyeri ñurúguaü le áurügübei gayára lan níchiguni. Mítaraanti queísi ñurúguaü le líchugubei uboú. Magíbedalá jisáminan, manúfude jugúyame. ²⁸ Agáamba jumáali naríñagun luágu neíbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Nóguchi, ladúga ligía íñugutimaati nueí. ²⁹ Ligía aríñaga gíñe nubálin le jun, lun dánme lan lasúseredun, afíñe jumámuga.

³⁰ ‘Madímurejaanjadina sarágu júma, ladúga níteeli le agúmadijabei lídan uboú le. Láu sun mabáfu lan nuágu, ³¹ lúnti ítara lúba lan lun lasúbudiruni uboú luágu jínsiñe lan Nóguchi nun, áni adúga náni le lubeíbei nun. Sarájuma, queímoun yágiñe.

15

Tídibu beíbei lúma tilímun

¹ Laríñaga Jesús.

—Ítara níña quei ában tídibu beíbei le tímatimaati, Nóguchi, ítara líña quei le oúnigirubarun nádü. ² Chaún lumuti furúmieguarügü lídaangiñe nilímun le míinti, atírímujá lumúti le gínbei, jarúmagüdaleí lúntima lagíndun. ³ Jugúya, jarúmaadün lárígi narúfudajan jun. ⁴ Lídan méme jumá ában núma quei lídaañadina lan ában júma. Ában límu siñáti lagíndun ánjein mámañein lubeí luágu ídibu, ítara jíña gíñe, siñáti jagíndun ánjein máma lubeí badúleñu jíña nuágu.

⁵ ‘Áu ídibubei, jugúya límu. Le badúleñuti nuágu, badúleñu áu luágu, lagínduba gíbe, siñáti jadúgün ni cáta úouga áu. ⁶ Le merédeti badúleñu nuágu, lágurúba boúgudin, ábame lamábeidun queí buri límu le abúdajoubei lun lagudúniwa.

⁷ ‘Ánjaün asígira badúleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jibíjubei. ⁸ Ibíjati Nóguchi inébesei dan le gíbe lan jagíndun, áni arúfuda jumúti luágu náni jumá disípulugu ja tímatimaatiña láu líra. ⁹ Jínsiñetün nun ítara quei nínsiñe lun Nóguchi, ítara méme jumá lubeíti lídan ínsiñeni le nánibeí jun. ¹⁰ Ánjaün ñúdün láu le nubeíbei, lídan mémebadün ínsiñeni le nánibeí jun, ítara quei nídin láu le lubeíbei Nóguchi, áni lídan mémeñadina ínsiñeni le lánibeí nun.

¹¹ ‘Nadímurejánbei jun ítara lun gayára lan jasúbudiruni úgundani le níchugubei, le gumúti. ¹² Niján nugúmadinbei. lun jínsiñegua jumá júngua quei jínsiñe nun. ¹³ Luweírín-ágei ínsiñeni le gayáraabei gáni láni gürígia, lun líchuguni libágarí jawágu lumádagu. ¹⁴ Numádagu jugúya, ánjein jadúga le nubeíbei. ¹⁵ Manúgün náadün quei músu, ladúga íbídiñeti le ladúgübei liyúbudiri músu lun, nanúgünün quei numádagu ladúga subúdigüda náali sun le laríñagubei Nóguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagíndun gíbe, lun gíñe ladúrarun jin. Ítara lúba líchuguni Nóguchi sun le jamúriajan lúma lídan níri jun. ¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsú jáu sun lánigu lun uboú

¹⁸ ‘Ánjaün iyéreeguda lun uboú, subúdi jumeí luágu áu lan iyéreegudubei lun furúmiñe. ¹⁹ Lun jamúga lánigu jumá uboú, jínsiñetün jamúga joun gürígia ja lánigu uboú quei jínsiñe jánigu joun. Anúadaja numútün jádaangiñe ja lánigu uboú, ligía jiyéreegunbei lun uboú ladúga mámaadün lan lánigu uboú. ²⁰ Jarítagua jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí,

jeibaajabadün gíñe, ánjein giñéti madúgün jabeí gásu láu narúfudajan, madúgünbaña gíñe gásu jáu. ²¹ Jadúgübei sun le jun, nueígiñe, ladúga ibídiñe lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figoú ligía.

²³ Ja iyéreejabúbaña nun, iyéreeguti gíñe Núguchi joun. ²⁴ Madúnruntiña jamúga lun jamúga madúgün nan ni cáta le úagili adúgüti jagánagua, guetó aríja jamáali buri cátei ligía áni láu sun líra iyéreegugidina joun, iyéreegu gíñe Núguchi joun. ²⁵ Wel, lasúseredunbei le ladúga lúnti lan lagúnfulirun dimúrei le bürúwañubei lídan jalúrudun. “Ába niyéreegudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loubadina Núguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladúga númañadün lan lúmagiñe furúmiñeti dan.

16

¹ ‘Naríñaguñein buri cátei le jun lun moúnwen lan jafíñen nuágu. ² Jabúgagubadün tídaangiñe jalgílisin, wuríbabei dan jun daríme lun ánjaün lan láfaragua furúmierügü gürígia jilágubei, larítaguba luágu lesériwiduñein lan Búngiu láu líra. ³ Jadúgübei líra ladúga masúbudirun jamágili lan Núguchi, masúbudirun jamána. ⁴ Naríñaguñein le jun, lun dánme lan le lachúlürün dan ligía, lun jarítagun luágu aríñaga náali lán meja jun.

Le ladúgübei Sífiri Sándu

‘Maríñagun numúti meja le jun lúmagiñe binárü ladúga meja júmañadina lan, ⁵ ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan, ⁶ jírurügütün luágu naríñaguni cátei lé buri jun. ⁷ Inárüni naríñagubei jun. buítimaati jun lun nídin, ladúga ánjana mídin, miábinbei Sífiri Sándu júmoun lun líderagunün, áni ánjana ñúdün, noúnajabei. ⁸ Dánme liábin, ladáraguagüdübaña gürígia ja uboúagubaña jóungua luágu gafígoun jamá, luágu gíñe níjein lan ában úma le lánina úarani, luágu gíñe lagúseragüdübaña lan Búngiu. ⁹ Larúfudubei joun luágu gafígoun jamá láu maffíñen jamá nuágu, ¹⁰ lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubeí Núguchi dánme le nígirunün. ¹¹ Líchuguba fe joun luágu lagúseragüdün Búngiu, ladúga agúseragüda láali Máfia, le agúmadijabei lídan uboú le.

¹² ‘Gíbegili lúnti naríñaguni jun, jásiñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabei sun inárüni jun, ladúga madímurejanbei luágu láni lúngua, le lagáambubei, ligíaba laríñaga. Lasúbudiragüdübei cátei lé buri lúnbei lasúseredun jun. ¹⁴ Líchuguba inébesei nun, ladúga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Núguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ ‘Málüjadina, ánjana maríjin jumá, múrusunmeya dan lárigiñe, ábayame jaríjinina, ladúga neíbuga le ñíjin lubeí Núguchi.

¹⁷ Ábati jálügüdagun jádaangiñe láni disípulugu jámagua, ába jaríñagun.

—¿Cásan míni lan le? Laríñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladúga leíbuga lan le ñíjin lubeí Lúguchi. ¹⁸ ¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálügüdaguni, ába laríñagun joun.

—Aríñagatina jun luágu málüjadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügüdagua jámagua? ²⁰ Ninárün jáu luágu jayájuba lan, jírugua jugúyame, ánjañati gürígia ja láni uboú le, jagúndaaruba.

Láu sun líra, íbini jíru jumá, lasáansiraguba jírun lun ugúndanime. ²¹ Dan le tagúriajan lan ában wúri, súfuritu ladúga chülúja lan lórate igári, lásun agúriajouaali lan irájü, marítangunjaru luágu igári, ladúga ugúndani le tasánderubei luágu agúriajaaru lan ában irájü ubouágu. ²² Ítara líña gíñe, jugúya jírutün guetó, naríjayabadün, ábame ti tabuínchun janígi láu ugúndani, ában ugúndani le úati gayáraati lagídaruni jueí.

²³ Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nóguchi sun le jamúriajabei lídan níri lúma, jun. ²⁴ Chülú lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin ubou

²⁵ Aríñaga náali buri cátei le jun láu jémpulu, inítebei dan lun madímurejaanjadina lanme jun láu jémpulu, ábame nadímurejan furáangu jun luágu Búngiu Úguchili. ²⁶ Lídaanme wéyu ligía, jamúriajaba lúma lídan níri, maríñaguntina luágu nayúmuraguba lan lun Nóguchi juágu, ²⁷ ladúga ligía guánarü jínsiñetün lun. Jínsiñetün lun ladúga jínsiñe nan jun, affíneedün gíñe luágu lúmagiñe lan Búngiu niábin. ²⁸ Lúmagiñe Búngiu Úguchili náfurida, ába niábin lídoun ubou le, guetó nígiraali ubou le, neíbugaya lúmoun Nóguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰ Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladúga subúdi báni jarítangun gürígia. Luágu líra wafíñera luágu lúmagiñe lan Búngiu biábin.

³¹ Ába laríñagun Jesúsu joun.

—¿Affíneedüti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladúga níjein Nóguchi núma. ³³ Naríñagunbalin sun le jun, lun jadárirun ñurúguau lídan jaffíñerun nuágu. Jasúfuriruba ubouágu, ganígi jumá, ¡sirígua náali ubou!

17

Layúmuragun Jesúsu jawágu láni disípulugu

¹ Lárígiñe laríñaguni Jesúsu sun cátei le, ába laríjin siélun, ába laríñagun.

—Nóguchi, chülúja nidáani, rúba inébesi luágu Biraú, ru lámuga gíñe Biraú inébesi bun. ² Rújadibu ubáfu lun Biraú jawágu sun gürígia lun líchugun ibágari magúmuchaditi joun ja bíchugubaña lun. ³ Niján lébunabei ibágari le magúmuchaditi, lun jasúbudirunibu gürígia amúrü le Búngiu ábanrügüti, le inárüti, lúma lun jasúbudirunina, áu Jesucrístu le bouñajabei.

⁴ Rújadina uweíriguni bun ya ubouágu, gumú nan gíñe le uágubei bouñajana. ⁵ Guetóti Nóguchi, rúbei uweíriguni le méme méja nánibei nun biñúwarü lubáragiñe meja ñi lan ubou.

⁶ ‘Subúdigüda náali joun ja baságarubaña lídaangiñe ubou lun bíchuguniña nun, cátabu lan. Bánigu meja, ába bíchuguniña nun, ñúdüntiña láu le bubeíbei. ⁷ Guetó, subúdi jamáali luágu sun lan le bíchugubei nun búmagiñe lan liábin, ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, affíñeeña gíñe luágu amúrü lan ouñajabalina.

⁹ ‘Ayúmuraguatina bun jawágu, mayúmuraguntina jawágu lánigu ubou, nayúmuragun jawágu ja bíchugubaña nun, ladúga báni jamá. ¹⁰ Sun le náni, báni, le báni, náni, arijúati nuweírigun jawágu.

¹¹ ‘Áu, merédedina ubouágu, ánjein jagía, jeréderuba. Áu, neíbuga búmoun. Nóguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma. ¹² Dán meja le jáma nan ubouágu, toúnigi numútiña meja

ja bíchugubaña nun láu bubáfu, meféridiruntina ni ában jádaangiñe lueídügü Júdas, lun lagúnfulirun le bürúwañubei tídan Berérun.

¹³ ‘Guetó, neßbuga le ñíjin bubei, luágu anájagua lan ubouágu aríñaga numúti buri cátei le lun jabuínchun láu ugúndani méme le nuágubei. ¹⁴ Rúnaali berérun joun, ába jeyéreegudún lun ubouú, ladúga máma jamá lánigu ubouú ítara queísi máma lan lánigu ubouú áu. ¹⁵ Mamúriaaantina búma lun baságaruniña ubouágugiñe, namúriaan búma lun batoúnigiruniña lueí Máfia. ¹⁶ Ítara quei máma lan láni ubouú áu, máma gíñe láni ubouú jagía. ¹⁷ Derégeguagüda báña joúngua bun, láu lubáfu berérun le inárütibe. ¹⁸ Quei boúnajanina jádoun lánigu ubouú láu ugánu lánina asálbaruni, ítara gíñe noúnajaniña jádoun lánigu ubouú láu ugánu ligía. ¹⁹ Ani derégeguatina núngua bun jawágu, lun gíñe jedéregeragun joúngua bun le tímatimaati.

²⁰ ‘Máma rügúñein jawágu namúriaa búma, amúriaajatina gíñe jawágu ja lúnbaña jafñerun nuágu dánme le jagáambuni ugánu lánina asálbaruni jámagiñe. ²¹ Amúriaajatina búma lun lídan jamá ában sun jagía, lun ában méme jamá cátei wáma quei áu búma, amúrü núma, lun lídan jamá ában buídu buídu, lun lafñerun ubouú luágu boúnajan nan. ²² Rúnaali uweíriguni le méme bíchugubei nun joun, lun ában méme jamá cátei quei ában méme wamá cátei áu búma, ²³ áu jádan, amúrü nídan, lun jayábin lun ában mémebaña lan buídu buídu, subúdi lámugei ubouú luágu boúnajan lan áu, áni jínsiñe jamá bun sarágu quei nísíñe bun.

²⁴ ‘Núguchi, amúrü íchugubaliña nun, buséntina lun númabaña lan le ñí numuti, lun jaríjini uweíriguni le bíchugubei nun, ladúga jínsiñegubeiñadina bun lubáragiñe ladügúniwa ubouú. ²⁵ Núguchi richáguati, ibídiñetibu lun ubouú, subúditibu nun, subúdi jamáali gíñe wügúriña ja luágu boúnajan lan áu. ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

18

Janúgüni Jesúsu adáüra

(Mt 26.47-56; Mr 14.43-50; Lc 22.47-53)

¹ Lárigiñe laríñaguni Jesúsu cátei le, ába láfuridun jáu láni disípulugu lun joúdin loubáfurugun dúna le cedrón. Ñíñein ában fulásu lé buri ñí lumuti tídibu olívos, ñíjin lubei lebelúra Jesúsu jáu láni disípulugu. ² Subúdi lumúti gíñe Júdas le alúgurubalin Jesúsu, fulásu ligía, ladúga oúndaraguañajaali Jesúsu ñi jáma láni disípulugu. ³ Ába lubeiti lachúlürün Júdas ñíjin jáu sarágu súdaara jáma polisía ja tánina témpulu, joúnajan jábutigu fádirigu jáma fariséogu. Gárumatetiña, barútiña gíñe lámpu lúma tóchi. ⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edéregerubalin jáma. ⁶ Dan laríñagunbei Jesúsu joun luágu ligía lan le jáluajabei, ába jeíguadunga múarugún janagóun. ⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágu áu lan. Ánjein áu lubei jáluajabei, ígira jumáña ja lun joúdin.

⁹ Lasúseredunbei líra lun lagúnfulirun le laríñagubei Jesúsu guánarügü. “Meféridirúnti ni ában jádaangiñe ja líchugubaña Núguchi nun.” ¹⁰ Ábati laságarunun Simón Pédro lefeínte, ába líbuguni larígei ában lumúsun fádiri le íñutimaabei gíríti Málco. ¹¹ Ába laríñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni óuchawagúni le líchugubei Núguchi lun nasúfuriruni?

Jesúsu ligíbugiñe fádiri le íñutimaabei

(Mt 26.57-58; Mr 14.53-54; Lc 22.54)

¹² Ábati janúgüni súdeara, lúma gumándan, jáma japolisían juríu, Jesúsu adáúra, ába jagúrraguni. ¹³ Lárigiñe, ába janúgüni lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía. ¹⁴ Gáifasi ligía, le méme meja aríñagubei joun juríu luágu buítima lan joun lun loúnwen ában wügüri jawágu sun mútu.

Leyéedagun Pédro luágu subúdi láni Jesúsu

(Mt 26.69-70; Mr 14.66-68; Lc 22.55-57)

¹⁵ Ába woúdin, áu Juan lúma Simón Pédro, lárigi lárigi Jesúsu. Áu, subúditina lun fádiri le íñutimaabei, ábati nebélurun lúma Jesúsu lídoun tübürürü lúban fádiri, ¹⁶ ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to ónigirubalin béna, ába nebélaagüdüni Pédro. ¹⁷ Ábati tálgüdüni ónigirutu béna Pédro.

—¿Ma bugúya ában jádaangiñe láni gürígia le disípulugu?

Laríñaga Pédro.

—Uá, máma áu.

¹⁸ Queítí dilíga lubeí, fúguatiñati músu jáma polisía wátu, rára jañáti ñi abácharagua. Ñíñein gíñe Pédro jáma, abácharagua larúgürügü wátu.

Lálügüdaguni fádiri le íñutimaabei Jesúsu

(Mt 26.59-66; Mr 14.55-64; Lc 22.66-71)

¹⁹ Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan gíñe larúfudajabei. ²⁰ Laríñaga Jesúsu lun.

—Bougudi nadímureja ligíbugiñe sun uboú, súnwandan narúfudajan tídan ligílisi lúma témpulurugu le ñí lubei jóundaragua sun juríu, madúgüngidina lubeíti ni cáta arámudaguati. ²¹ ¿Ca uágu bálügüdana? Álügüda báña ja agáambubalina, jagalá aríñagei le uágubei nadímureja joun. Subúdi jamúti le naríñagubei joun.

²² Dan laríñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagan, ába laríñagun lun.

—¿Ítara lúba bouñabuni fádiri le íñutimaabei?

²³ Laríñaga Jesúsu lun.

—Ánjein aríñaga nubeí wuríbati, aríñagabeí jalíañein lan luríban, ánjeinti buídu lubeí le naríñagubei, ¿ca uágu bagáyuaja nuágu?

²⁴ Ábati loúnajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu

(Mt 26.71-75; Mr 14.69-72; Lc 22.58-62)

²⁵ Sun dan le, nijágua Pédro abácharagua larúgürügü wátu, ába jaríñagun lun.

—¿Másan amúrü ában jádaangiñe láni gürígia le disípulugu?

Ába leyéedagun Pédro, ába laríñagun.

—Uá, máma áu.

²⁶ Ábati lálügüdüni ában jádaangiñe lumúsuníña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñí lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

*Jesúsu ligíbugiñe Piláto**(Mt 27.1-2, 11-14; Mr 15.1-5; Lc 23.1-5)*

²⁸ Ábati janúgüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebélutiñati juríu palásiurugún lueí marúma jamá, siñáme gádan láníña adíneruni le lánina páscua. ²⁹ Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madúgün lan wuríhani, medéregerun wamúti jamúga bun.

³¹ Ábati laríñagun Piláto joun.

—Barújumei, agúseragüda jumeí quei laríñaguni jilúrudun guánarü.

Jaríñaga juríu lun.

—Wagía juríu, maríchatiwa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburi ída lúba lan loúnwen.

³³ Ábaya lebéllurun Piláto palásiurugun, ába lagúarun lun Jesúsu, ába laríñagun lun.

—¿Amúrü Jarúeitebei Juríu?

³⁴ Ába laríñagun Jesúsu lun.

—¿Luágu báni búngua bálügüdaja luágu líra, ódi ladúga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina uboú le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubeíti amúrü?

Laríñaga Jesúsu lun.

—Urúei áu quei baríñaguni. Agúriajouatina, ñúbin áu lídoun uboú le lun naríñaguni le inárünibeí. Sun ja gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibeí?

*Lasíadirúniwa Jesúsu lun ouweni**(Mt 27.15-31; Mr 15.6-20; Lc 23.13-25)*

Lárigiñe ladúgüni Piláto álügüdajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügúri le. ³⁹ Quei jéchu jumá lun nígiragüdün ában adaürúti jun lídan fédu le lání páscua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábati lanúgüni Piláto Jesúsu, ába loúnajan abeíchagüdei, ² ába jíchugun ában súdeara ába rídi láuti jíyu leréberugu Jesúsu, ába jadáuraguagüdüni táu ában anánguni colóru gúchu. ³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyujajan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati laríñagun Piláto joun.

—¡Niján wügúri ligía!

⁶ Dan jaríjinbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barújumeiti, dágua jumeí luágu gurúwa, ladúga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni según walúrudun, lúnti loúnwen ladúga laríñagun luógu luágu Liraú lan Búngiu.

⁸ Dan lagáambunbalin Piláto le, ábatima lanúfudedun. ⁹ Ábaya lebélorun palásiurugun, ába laríñagun lun Jesúsu.

—¿Jalíanasan amúrü?

Móunabunti Jesúsu ni cáta.

¹⁰ Ábati laríñagun Piláto lun.

—¿Móunabun bumútina? ¿Ibídiñetísan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubeí lidúnrun le edéregerubalina bun sügú báu.

¹² Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.

—¡Anjein bígiragüda, máma amúrü lumáda urúei Rómana! ¡Furúmieguarügü le aríñaguti luógu luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaú le agúseragülei, ubáraü le únbei jaríñaga Dúbü, Gabáta lídan jerérun juríu. ¹⁴ Queí buri amídirugujaali, le ában wéyu lubá páscua. Ábati laríñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, aba ledéregeruni Piláto joun lun ládarawagún luágu gurúwa, ába janúgüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barúinaleí lugúruwan lun lídin lídoun fulásu le únbei jaríñaga Lufúlasun Lábu Ichúgü, Gólgota lídan jerérun juríu. ¹⁸ Ñi jádaraguei luágu gurúwa, dágua jagía bián wügúriña úara lúma, ában lueígiñe cáda loúba. ¹⁹ Ába loúnajan Piláto íchigagüda ában abúrújóuni luágu gurúwa, laríñaga ñi. “Jesúsu Nazarétna, Jarúeite Juríu”. ²⁰ Sarágu jáña jádaangiñe juríu alíijati abúrújóuni ligía ladúga fulásu le ñí lubei jádaraguei Jesúsu luágu gurúwa, madíseti ubúrugugiñe, áni abúrújóuati abúrújóuni ligía lídan buri dimúrei hebréo, güriégu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabúrüdabá ñi “Jarúeite Juríu”, bürúba “Le aríñagubei luágu Jarúeite lan Juríu.”

²² Ába laríñagun Piláto joun.

—Le bürúnaalíbei bürúnaalíbei, ítara lúba.

²³ Lárigiñe jádaraguni súdeara Jesúsu luágu gurúwa, ába janúgünun lanáangun, ába jadúgün gádürü fánreinti táu, ába fánreinti lun cáda súdeara. Ába gíñe janúgünun lisímisin, quei májüchawagún tubeí, ában rügüñoun fiésu íñugiñe lun únabun, ²⁴ ába jaríñagun súdeara jámagua.

—Majeíridagua wamoún, ájurera wamá tuágu, aríja wamámuga cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurera jagía tuágu nisímisin cába lan agáñiroun.” Ítara líña lubeíti jadúgüni súdearagu.

²⁵ Níñoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraú.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladúgüni luágu wasálbarun, ába laríñagun, lun lagúnfulirún le taríñagubei Lerérun Búngiu.

—Mágürabujadina.

²⁹ Níñein ában fúdu táu diweín garújütu, ába jadúdüragüdün ában mudúsi tídan diweín tugúya, ába jíchuguni luágu ában wéwe, ába jiñúrui luágun liyúma. ³⁰ Ába látunun Jesúsu diweín garújütu tugúya, ába laríñagun.

—Gúnfulija sun cátei.

Ába larábachun ligíina, ába loúnwen.

Límiruni ában súdeara loúba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu gürígia luágu gurúwa lídan wéyu le eméraaguagülei, ladúga weíriti wéyu ligía. Ligía jamúriaajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíñe lagídarún jágubu ñígiñe. ³² Ábati jóudin súdeara, ába jájalachuni lúruna furúmiñeti, jalá jamei lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubei lúruna.

³⁴ Ába liábin ában súdeara, ába límiruni Jesúsu loúbawagun táu ában efeín, ába láfuridun jítaü lúma dúna ñígiñe. ³⁵ Áu Juan, le abúrújabalin le, ában le aríjubalin, áni aríñaga numúti inárüni, subúdi numúti luágu aríñaga náni inárüni lun gíñe jafíñerun jugúya. ³⁶ Ladúga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.” ³⁷ Aríñagati gíñe tídan Lerérun Búngiu. “Jaríjubei le jímiragubei.”

Lábunajóun Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, níñein ában wügúri Arimatéana, gíriti José, falá lumuti meja wügúri ligía Jesúsu, láu sun arámudaguarügü lan ladúga lanúfude jaweí juríu, ába lamúriaajani lúgubu Jesúsu lúma Piláto. Ába líchuguni lun, ába lanúgüni José lúgubu Jesúsu. ³⁹ Ába gíñe liábin Nicodémo, lé meja ñúdünbei ayánuja lúma Jesúsu gúñoun, ába liábin láu sarágu ibíñei. ⁴⁰ Ábati janúgüni José lúma Nicodémo lúgubu Jesúsu, ába

joúburaguni táu gamísa to túaguatu láu ibíñei ligía según jagáburi juríu lubá jábunajan. ⁴¹ Ñíñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñíñein ában umúajaü iséri le mayúsurungili. ⁴² Ñíjin jíchigei lúgubu Jesúsu, ladúga yaráfa lan umúajaü ligía, ladúga gíñe agúñeeli lan, gumése wéyu le eméraaguagülei.

20

*Lásaarun Jesúsu lídaangiñe ouweni**(Mt 28.1-10; Mr 16.1-8; Lc 24.1-12)*

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachúlürünbei ñi, úaali dúbü le lidaú umúajaü ñi. ² Ába tídin eíbaagueina le ñíjin wabeí áu lúma Simón Pédro, ába taríñagun woun.

—Barújama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába wouúdin luágun umúajaü. ⁴ Úara wouúdin biángubei wagía eíbaagueina, furésetina lueí Pédro, ába nachúlürün furúmiñe luágu umúajaü. ⁵ Ába nélemuchun aríja ñíjin, gamísa rügúñoun naríja ñi, mebélutina. ⁶ Lárigiñe, ába lachúlürün Simón Pédro, ába lebélorun lídoun umúajaü. Gamísa to aúboun lagúrawagua Jesúsu, tugúya rügúñoun gíñe laríja ñi. ⁷ Gamísati to aúboun loubarawagua lichúgü Jesúsu, máma lídaañoun ában túma tó buri aúboun lagúrawagua, joúburagu tíña, tábugua. ⁸ Ába giñéti nebélorun, ába naríjini le asúseredubei, ába naffíñerun luágu saráli lan Jesúsu lídaangiñe ouweni. ⁹ Ligíaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe ouweni. ¹⁰ Ábati wagíribudun wabiñoun.

*Larúfudagun Jesúsu lúngua tun María Magdaléna**(Mr 16.9-11)*

¹¹ Ánjounti María, ába teréderun boúgudi ayájuaja lubádu umúajaü. Sun nuján lan ayájua, ába télemuchun aríja lídoun umúajaü, ¹² ába taríjin bián ánjeligu, jarútu jadáuragun, ñun le ñí lubeí buga lúgubu Jesúsu, ában lichúgügiñe, ában lugúdigíñe.

¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barújama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banúgün lubeí, aríñagabeí nun jalía lan bíchigei, barú námugei.

¹⁶ Ábati laríñagun Jesúsu tun.

—¡María!

Ába tagáragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdadá nuágu, ladúga maweínrungidina le ñíjin lubeí Núguchi. Beíba, baríñagame joun náni disípulugu luágu neíbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñaguni joun.

*Larúfudagun Jesúsu lúngua joun disípulugu**(Mt 28.16-20; Mr 16.14-18; Lc 24.36-49)*

¹⁹ Wéyu méme ligía guñoun, oúndaragu jáña disípulugu, darúgu béna jáu ladúga janúfude jawei juríu. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñaguni líra, ába larúfuduni lújabu lúma louba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilaü jídan. Ítara quei loúnajanina Núguchi, ítara líña gíñe noúnajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu. ²³ Ánjein ferúduna jumá jafígoun ámu, ferúdonawaali, ánjein úa ferúduna jumáni, reideijali, úouga ferúdonawa lan.

Laríjini Tomás Jesúsu lárigiñe lásaarun lídaangiñe ouweni

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le liábinbei Jesúsu. ²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun louba, siñábei nafñerun.

²⁶ Wídü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun nouba. Masígirabá láu liloúguan affñeni, affñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, affñeedibu guetó, ladúga aríja báadina lan, gúndaatiña ja affñerubaña, maríjinga jamána.

Ca lan lébubei tabürüjoun líburu to

³⁰ Adúgayati Jesúsu ámu sarágu miláguru jagíbugiñe láni disípulugu, le úabei bürüñu tídan líburu to. ³¹ Labürüdúnbei buri le lun jafñerun luágu Jesúsu lan Crístubei, le Liraü Búngiu, lun gíñe láu lan jafñerun, gabágari jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíríbei Tibérias. Niján ligáburi ladúgüni. ² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóudin, mañúguntiña ni cáta áriebeu ligía. ⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan. ⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma lueígiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan.

⁷ Ábati naríñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun. ⁸ Ja jíbiri disípulugu, ába jóudin lárún béya táu ugúnein, adúrujeina jamóun séni buin jáu úduraü, quei ában rügúñein lan san bádun jadíse lueí béya. ⁹ Dan le jarárirun múarugun, ába jadárirun wátu geméti láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹ Ába ládinun Simón Pédro tídoun ugúnein, ába ladúrujanun séni lárún béya buin jáu úduraü weínamutiña, san dimí-san úrüwañanu, láu sun jíbe, majeíridaguntu séni.

¹² Ábati laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álügüdüti cátei lan, ladúga subúdi jamáni luágu Jesúsu lan. ¹³ Ába liábin, ába lanúgünun fein lújaburugu, ába líchugunun joun, ligía méme ladúga láu úduraü.

¹⁴ Ligía lúrüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraú Jonás, ¿jínsiñetinasan bun sügú jáu ja?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti.

¹⁶ Ábaya lálügüdüni luágu libíaman weíyaasu.

—Simón, liraú Jonás, ¿jínsiñetinasan bun le tímatimaati?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Laríñaga lun.

—Toúnigi báñati nánigu.

¹⁷ Ábaya lálügüdüni luágu lúrüwan weíyaasu.

—Simón, liraú Jonás, ¿jínsiñetinasan bun?

Ába lírudagun Pédro ladúga lálügüdüni Jesúsu luágu lúrüwan weíyaasu ánjein jínsiñe lubeí lun, ába laríñagun lun.

—Nabúreme, subúsi bun cátei bun. Subúsi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti. ¹⁸ Ninárün báu, luágu dan lán meja ñúraütimagidibu, ábaja badáüragun, ába bídin le ñíjin lumúti babúseera, dánme le weíyaadibu, inúrarügübalime barúna, ábame ladáüraguagüdüniibu ámu, ábame lanúgüniibu le ñíjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburi loúnwen Pédro, lun líchugun uweíriguni lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loúbagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei. ²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amúrü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, maríñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abúrüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladúga Jesúsu, ánjein jamúga abúrüjoúa ában ában, afíñetina luágu mábara tan jamúga buri líburu to abúrüjoútu láu lídan sun uboú.

CÁTEI LÉ BURI MEJA JADÚGÜBEI APÓSTOLUGU

Loúnajani Búngiu Sífiri Sándu

¹ Lun teófilo.

Abúrújatina bun tídan furúmiñetu nigáradan luágu sun le ladúgübei Jesúsu, lúma le larúfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadúgüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúругu Jerusalén, laríñaga joun.

—Agúraba jumá lagúnfulirun dimúrei le líchugubei Núguchi jun, le uágubei naríñaga jun. ⁵ Subúdi jumúti luágu badíseigüda lan Juan láu dúna, nasúbudiragüdúñein jun luágu málüjadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oúndaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladúgei Núguchi cátei le buri, ligía rügúñein gayára laríñagun ídame lan ladúgei. ⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loubawagu Judéa, Samária, chülú lúmoun lidíse-ágei fulásu ubouágu.

⁹ Lárigiñe laríñagun Jesúsu cátei le, sun añája lan aríaguei, ába liñurúniwa lun lanügúniwa siélun, ába liábin ában juánriñu, ába ladáuragun láu, ába maríjin jamáli lan.

¹⁰ Níñanu aríagua siélun sun amúdeireina lan Jesúsu, ligía jasáliragun bián wügúriña, jarútu jadáuragun jarúgabú, ¹¹ ába jaríñagun joun.

—Wügúriña Galiléana, ¿ca uágu jerédera aríagua siélun? Jesúsu méme le, le amúdeirubei siélun jumagiñe, liábiyaba ítara quei jaríjin lídin.

Lanúadirún Matías lewéñeguame Júdas

¹² Ábati jagíribudun disípulugu lueígiñe wúbü le gíribei Olívos lun ubúrugun Jerusalén, lidíse ában kilómetro. ¹³ Dan le jachúlürünbei ubúrugun, ába jamúdeirun tídoun rúmu to ñí lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraú Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo. ¹⁴ Oúndaraguatiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würiña.

¹⁵ Luágu ában wéyu lídan dan ligía, ába laráramun Pédro jagíbugiñe sun afíñetiña ja ñíbaña—jawára san-wein gürígia—ába laríñagun joun.

¹⁶ —Nidújeñu, lúnti buga lagúnfulirun le laríñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anúgübalin Jesúsu adáüra. ¹⁷ Ában meja jádaangiñe wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeyirúbei lun luágu wuríbani le ladúgübei. Ába láburujan láu lábulugu únabun, ába lafáünchün, ába láfuridun sun litíripan. ¹⁹ Dan le jagáambunbalin gürígia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

²⁰ Ába lasígirun Pédro aríñaga.

—Bürúwañu líña dimúrei buri le luágu Júdas tídan líburu to gíriboun Sálmos. Laríñajare ñi.

Reídeitá lúban málouga,
úa jamá aganoútiña tídan.

Aríñagati gíñe ñi.

Rúalá lubára lun ámu.

²¹ Ítara líña lubeíti, lúnti wanúadajan ában wügúri wádaangiñe lé meja wámati sun dan le wáma lubeí Jesúsu, ²² lúmagiñe dan le labásterágüdünbalin Juan Jesúsu darí lúmoun dan le lamúdeirúnbei siélun, lun lewéñegua lan Júdas. Wügúri ligía, líchuguba fe úara wáma luágu lásaarun Jesúsu lídaangiñe ouweni lúnya labágaridun.

²³ Ábati jíridun bián jádaangiñe. José, le méme gíribei Barsabási, le méme gíñe gíribei Jústu, lúma Matías. ²⁴ Ába jayúmuragun lun Búngiu ítara.

—Wabúreme, amúrú le subúdijabúbei tun janígi sun gürígia, arúfudabei woun ca lan jádaangiñe bián wügúriña ja anúadira báalíbei ²⁵ lun lesériwidunibu queísi apóstolu lewéñegua Júdas. Ladúga féridi láali Júdas lubára ladúga lafígounjan, áni ñúdünja lídoun fulásu le ladúnabei.

²⁶ Ábati jíchaajan ubúnuruni, ába láburujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹ Dan lachúlürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñúbinti siéluigiñe quei dan le láfurun ában garábali jéreti, ába lagaambún tídan sun múna to ñí jabei. ³ Ábati lasálrágún buri cátei joun camá ligémeri wátu, afánreinjouañu lun ñi lan ában murúsun lougiñe lúblugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérun quei ladímuregüdüníña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñúbintiña lídaangiñe sun fulásu ubouágu. ⁶ Dan le jagáambunbalin ireíni ligía, ába jóundaragunga gürígia, ibídiñeja joun cába lan jasáminara ladúga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe? ⁹ Añájein gürígia Pártiana ya, Médiana, Elámna, Mesopotámiana, Judéana, Capadócia, Póntona jáma Ásiana, ¹⁰ Fríjiana, Panfíliana, Ejíptona lúma lídaangiñe buri fulásu África le yagúroun mémebei lueí Ciréne. Añájein giñe Rómata aganoútiña ya, añájein jádaangiñe, juríu ladúga juríu jamá jagúbürigu, jíbiri, barú jamaali ligáburi jafíñen juríu. ¹¹ Añájein gíñe gürígia Crétana jáma Arábiana, sun wagía agáamba wamútiña adímureja luágu luweírigun Búngiu lídan werérun guánarü.

¹² Weíruti janígi súnigubei, ibídiñeja joun cába lan jasáminara, ába buri jálügüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun gürígia ja ñíbaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügúriña Judéana jáma sun ja aganoubaña Jerusalén, agáamba jumeí le lúnbei naríñaguni jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügúriña ja quei jarítangun, néfugubeigili bináafin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagunbei.

¹⁷ Lídoun buríme lagúmujoun wéyu, líña laríñagun Búngiu, noúnajabei náni Espíritu jádoun sun gürígia, nadímurejaba jayúmulugugiñe jisáanigu.

Nayáwadaguba joun irájüñü, lúma joun weíyaaña mútu.

¹⁸ Noúnajabei gíñe náni Espíritu jádoun ja esériwidubaña nun lídoun buri wéyu ligía, wügúriña jáma würíña, ábame nadímurejan jayúmulugugiñe.

¹⁹ Narúfuduba buri cátei garíyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuaramé játi funáti quei jítaü,

lubáragiñe lachúlürün luwéyuri Wabúreme,

le lúnbei ában lan wéyu weíríti, le marijíngilíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² ‘Agáamba jumeí lubeíti le lúnbei naríñaguni, jugúya wügúriña Israelítagu. Jesúsu le Nazarétna, ában meja wügúri le larúfudubei Búngiu jigíbugiñe quei wügúri úraguati láu buri cátei weínamuti, miláguru, lúma buri seíni le ladúgübei Búngiu jagánagua lídaangiñe, quei le jisúbudin. ²³ Láu sun líra, dan le ledéregerúnbei jun, quei ligáburi aráansejani le larítagebei Búngiu lúmagiñe furúmiñeti dan, ába jáfaruni jilágubei láu jedéregeruni joun wügúriña wuríbatíña lun jádaraguni luágu gurúwa. ²⁴ Ába leséfuruni Búngiu lídaangiñe lubáfu ouweni, sarágüda lumúti lúnya labágaridun, ladúga siñá lan gabáfu lan ouweni luágu. ²⁵ Laríñajare urúei Davíd, dan le ladímurejan luágu Jesúsu. Subúdi numúti luágu númabei lan Nabúreme Búngiu súnwandan, noúbagiñeñein lun úa lan ni cáta lun lebélaagüdün anúfudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wügúri nan garaúwarügüti,

jemenigitina buágu luágu nabágaridayaba lan,

²⁷ ladúga mígirun bubóun nuwáni lídan jabára jiláaña,

mígirun amúrúme lun lañáladun núgubu, áu le bánígu le jínsiñebei bun.

²⁸ Arúfuda bumúti úma le anúgübei gürígia lídoun ibágari magúmuchaditi nun,

áni babuínchagüdúbadina láu ugúndani láu abúnja lan nubádu.

²⁹ ‘Nidújeñu, cátei furánguti le, luágu jilá lan meja wadúje Davíd, bunáwa ligía, gayáraagili waríjini lumúaja chülú lúmoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfán liábin Crístu, le lúnbei lañúurun luágu lála. ³¹ Adímurejati lubeíti Davíd luágu lásaarun Crístu lídaangiñe ouweni, luágu gíñe merédeboun lan luwáni lídan jabára jiláaña, mañáladun ligíame lúgubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun. ³² Sarágüda lumúti Búngiu Jesúsu méme le lídaangiñe ouweni, sun wagía geféentiwa luágu líra. ³³ Nurúgüda lumúti Búngiu lueígiñe loúnwenren láu sarágu uweíríguni, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan loúnajani méme Sífiri Sándu ligía joun sun lánigu ubouágu. Ligía cátei le aríja jumáalíbei lúma le agáamba jumáalíbei guetó. ³⁴ Mára Davíd amúdeirubei siélun, aríñagati Davíd guánarügü.

Laríñajare Búngiu lun Nabúreme.

“Ñürúba lueígiñe nouñwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adúga láali lan Búngiu lun ligíaba lan Wasálbaragüle, ligíame gíñe Wabúreme.

³⁷ Dan jagáambunbalin cátei le, ába lebélorun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadúga?

³⁸ Ába laríñagun Pédro joun.

—Sáansi jumeí jigáburí ligíbugiñe Búngiu, badísei jugúyame cáda ában lídan líri Jesucrístu, ferúdunawa lámuga jifígoun, ru lámugei Búngiu Sífiri Sándu jun. ³⁹ Ladúga aríñagaali Búngiu luágu líchugubei lan giñe Sífiri Sándu jun, lúma joun jadúgawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara liñáti ába jabásterun, ja adúgübaña gásu láu lerérun, ába jayábin queí buri úrúwa mílu gürígia lun jafíñerun luágu Jesucrístu wéyu ligía. ⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesúsu, queísi meja laríñaguni joun apóstolugu lun jadúgüni.

Jabágarí furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri miláguru le ladúgübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajeí buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu jóúndaragun témpulurugu lun jájuduragun lun Búngiu. Lárígiñe, ába jóúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírígu luágu Búngiu, ábati jínsiñe jamá joun gürígia, ábatija anáajeina láníña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaúnrún úrúwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügúri meíbugunti lúmagiñe lagúriajoún, barúwarügütíja añúura lubádu tubéneri témpulu le gíríbei “Béna Buídumeraüti” lun lamúriajan seínsu jáma ebélorutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriajan seínsu jáma. ⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. Lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírígun Búngiu. ⁹ Ába jaríjini sun gürígia eíbuga lúma adímureja luágu luweírígun Búngiu. ¹⁰ Weírítiti janígi luágu le asúseredubei lun, queí subúdi jabálin

wügúri ligía, subúdi jameí luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro luma Juan, súnti gürígia, ába jeíbaagun láu luweírin janígi luágun tubárandá témpulu le gíribei Salomón, le ní jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdúbalin wügúri le, eíbugagüdei láu wabáfu o láu lan wagúnfulin luma Búngiu? ¹³ Mára líña, Búngiu, le Jabúngiute binádu wagúbürigu Abrahám, Isáac luma Jacób, ligía areídaguagüdúbalin wügúri le lun líchuguni líñun-ágei uweíríguni lun Jesucrístu le Liraú, ligíra lé meja jedéregerubei joun lúrudugu, áni dan lálugan Piláto lígiragüdüni, májatün. ¹⁴ Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati. ¹⁵ Ítara líña jáfaruni le íchugubalin ibágarí tímatimaati. Ába lásaaragüdüni Búngiu lídaangiñe ouweni, áni geféentiwa luágu líra. ¹⁶ Niján wügúri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areídaguagüdúbalin buídu buídu quei jaríjini.

¹⁷ ‘Subúdi náali, nidújeñu, luágu ibídiñe lán meja jun ca lan jadúgübei dan le jáfarunbálin Jesúsu, jugúya jáma jábutinu. ¹⁸ Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu. ¹⁹ Ligía lubeíti, ígira jumeí binádu jigáburí, giríbu jumá lun Búngiu, chibáwa lámuga jifígoun. ²⁰ Ábamei gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. ²¹ Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeíti aríñagati meja Moisés joun binádu wagúbürigu. “Loúnajaba Wabúreme Búngiu ában proféta jádaangiñe guánarügü quei loúnajanina. Ánja jumá lun sun le lúnbei laríñaguni jun, ²³ ladúga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ ‘Ítara líña lubeíti, sun profétagu lúmagiñe Samuél darí lárigiñe, adímurejatiña libúgürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladúgübei Búngiu jáma binádu wagúbürigu dan le laríñagunbei lun Abrahám. “Nabínirubaña sun gürígia ja ubouágubaña láu ában jádaangiñe binébaanfaangu.” ²⁶ Ába lanúadajani Búngiu Liraú lun loúnajani jun furúmiñe, jugúya juríu, lun labínirunün cáda ában jádaangiñe, láu laságarunün lídaangiñe luríban jigáburí.

4

Pédro luma Juan jagíbugiñe gumádimatiña

¹ Nígiña Pedro luma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu. ² Gáñitiña ladúga jarúfudajan Pédro luma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladúga sará lan Jesúsu. ³ Ábati janúgüniña adáúra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügúriña, queí buri seíngü mílu.

⁵ Larúgan, ába jóundaragun jábutigu juríu, wügúriña weírígutiña lídan jafíñen, jáma arúfudajatiña lilúrudun Moisés, Jerusalén. ⁶ Níñein gíñe Anás le fádíri le íñutimaabei,

Gáifasi, Juan, Alejandro jáma sun ja jádaangiñebaña lufámilian Anás. ⁷ Ábati jóunajan anúgei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügúri le?

⁸ Buin líña Pédro láu Sífiri Sándu, ába laríñagun joun.

—Jábutigu juríu jáma wügúriña weírigutiña lídan wafíñen. ⁹ quei jálügüdüníwa luágu buíti le adügúbei lun ában wügúri sánditi, ída líña lan lareídawaguágüdün, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubei wügúri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe ouweni, lareídagua. ¹¹ Jesúsu le, ligía queisi dúbü le áubei jíchiga mebéreseni, jugúya le queíbaña ábunagutiña múna, áni núbinjali Jesúsu lun ligíaba lan quei dúbü le mégeiwatimaabei lídan bunáguai. ¹² Úati ámu lun lasálbaruníwa lueídügüya Jesucrístu, ladúga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jamei luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan jámeja eíbugubaña lúma Jesúsu. ¹⁴ Queíti níñein lubei wügúri le areídawaguágüdübei jáma, rára ligía, siñáti jaríñagun lúrudugu ni cáta. ¹⁵ Ábati jóunajaniña lúrudugu Pédro lúma Juan lúma wügúri le areídaguaalibei bougudin luei jadámurin lun gayáraabei lan jayánujan jámagua. ¹⁶ Jaríñagati.

—¿Cábasan wadúga jáu wügúriña ja? Sun ja aganoúbaña Jerusalén subúdi jamúti luágu adúga jamáli lan miláguru le, áni siñáti wayeedagun láu. ¹⁷ Lun mabúruchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugúñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubei ligíbugiñe Búngiu lun ladügün le jubeíbei, ígira le lubeíbei Búngiu. ²⁰ Wagía, siñáti wámanichun láu cátei le aríja wamáalibei lúma le agáamba wamáalibei.

²¹ Ábayati jewéridiruniña gumádimatiña, ába jígiragüdüniña. Madáritiña ída lúba lan jadügün ni cáta jáu ladúga adímurejatiña buri gürígia buíti luágu Búngiu luágu cátei le asúseredubei. ²² Wügúri le areídagubei láu miláguru ligía, sügú láu bián-wein irúmu láu.

Jamúriajan afíñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóudin le ní jabei jíbirigu, ába jabájüdaguni sun le jaríñagubei jábutigu fádirigu jáma wügúriña weírigutiña joun.

²⁴ Dan jagáambubalin, ába jayúmuragun sun jagía lun Búngiu, ába jaríñagun.

—Wabúreme, amúrü Búngiubei le adügübalin siélu, ubou, barána lúma sun cátei. ²⁵ Amúrü, aríñagatibu láu lubáfu Sífiri Sándu liyúmulugugiñe Davíd lé meja esériwidubei bun.

¿Ca uágu jagáñida ja mámabaña juríu,
samína jagía lun jadügüni cátei le siñábei jadügüni?

²⁶ Inúraguatiña lurúeitegu ubou jóungua,
óundaraguatiña lábutigu fulásu

lun jadügün wuríbani lun Wabúreme Búngiu lúma lun Crístu le lanúadajabei.

²⁷ ‘Áni suséreti itara, óundaraguatiña Heródes luma Póncio Piláto lídan ubúru le, jáma ja mámabaña juríu, lúma jáma Israelítagu lun jadügün wuríbani lun Biraú Jesúsu le sándubei, le banúadajabei. ²⁸ Láu líra, adúga jamúti sun le baráansejabei

lun lasúsereduba lan. ²⁹ Guetóti, Wabúreme, aríjabeí jasíadiruníwa, rúba anígi woun, wagía le esériwidubalibu, lun wadímurejan buágu manúfudeiga, ³⁰ gayára lámuga gíñe wareídaguágüdün sánditiña, adúga wagíame miláguru lídan líri Biraú Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei jóúndaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afíñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súngua luágu. ³³ Ába jasígirun apóstolugu adímureja luágu lásaarun Wabúreme Jesúsu lídaangiñe ouweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeirutu ni cáta ladúga sun ja gafúlasunbaña o gában, ába buri jalúgurunun, ába janúgüni tebégi, ³⁵ ába jadéregeruni joun apóstolugu lun lafánreinjoún jádan ja emégeirutitiña. ³⁶ Quefburi, ñíñein ában jádaangiñe ladúgawagun Leví jádan, gíríti José, agúriajóuti luágu uboúju le gíríbei Chíppe, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügúri ligía, ába lalúguruni lufúlasun, ába lanúgüni seínsu edéregera joun apóstolugu.

5

Jafígoun Ananías túma Safíra

¹ Ñíñein gíñe ában wügúri gíríti Ananías, túma Safíra, to lúmari, ába gíñe jalúgurun ában fulásu. ² Wügúri le, ába lanúgün lídaangiñe seínsu, ába lídin láu líbiri joun apóstolugu, lafámura camá jamuga ligía rügúñein libíjin luágu fulásu. Áni subúsititi sun cátei tun lúmari. ³ Ábati laríñagun Pédro lun.

—Ananías, ¿ca uágu bígira lun lagáñiruni Máfia barítangun lun layéejagüdüñibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badúgüni le babúseerunbei láu? ¿Ca uágu basáminara badúgüni cátei le? Búngiu bálugubei bayéedagun, máma wügúriña.

⁵ Dan lagáambuni Ananías cátei le, ába lábुरुjan ouwe. Súnti ja asúbudirubalin cátei le, ába janúfudedagun. ⁶ Ábati jayábin wügúriña, ába jóúburaguni Ananías, ába janúgüni ábuna.

⁷ Quefburi úruwa óra lárigiñe, ába tebélurun lúmari Ananías, ibídiñoun ni cáta tun luágu le asúseredubei. ⁸ Ába laríñagun Pédro tun.

—Aríñagabeí nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábati laríñagun Pédro.

—¿Ca san uágu jebélura lídoun úaraduni lun jóúchaguni láni Búngiu Espíritu ítara? Añatén ja anúgübalin búmari ábuna, janúgadibu gíñe.

¹⁰ Lídan méme óra ligía, ába táburujan ouwe lubádu lugúdi Pédro. Dan jebélurun wügúriña, jadáriroun jiláaru, ába jaságarunun, ába jábununun loúbagiñe túmari. ¹¹ Súnti gürígia ja afíñebaña luágu Cristu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri jóúndaragun sun afíñetiña lídan fulásu témpulurugu le gíríbei “Barandá Salomón”.

¹³ Úati meja ni ában jádaangiñe ja mámabaña affñetiña lun jóundaragun jáma affñetiña ladúga janúfude, láu sun jínsiñe jamá sun affñetiña joun gürígia, sarágu. ¹⁴ Eibu wéyu, eibu jayábin gürígia lun jafiñerun luágu Jesucrístu, dándu wügúriña queisi würiña. ¹⁵ Quei jadúgüña lan apóstolugu sarágu miláguru, ába jaságaraguniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Nñíbintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatíña, sun jagía areídaguátiña.

Jeíbaajóun Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janúgüniña apóstolugu, ába jadáürüniña. ¹⁹ Ába ladáraruni ában lání Wabúreme Búngiu ánjeli tubéneri furísun áriebu ligía, ába láfuridagüdúniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja ñíbaña luágu iséri ibágari le líchugubei Jesucrístu joun gürígia.

²¹ Dan jagáambuni cátei le, ába jóudin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóundaruniña líñun-ágei lúrudu, ja súnbaña Israelítagu weírigutiña, ába jóunajan anúgaña apóstolugu furísunrugugiñe. ²² Dan jachúlürünbei polisía furísunrugu, madári jamútiña ñi. Ába jagíribudun, ²³ ába jaríñagun.

—Darúñu líña wadárirunun furísun, ñíñanu súdaara bénabu óunigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádirigu lúma jábuti súdaara ja óunigirubarun témpulu cátei le, ába jálügüdagun jóungua cába lánfuna ídan lébeda cátei le. ²⁵ Lídan óra ligía, ligía liábin ában wügúri, ába laríñagun joun.

—Ja wügúriña ja jádarubaña furísunrugun, añájein témpulurugu arúfudaja joun gürígia.

²⁶ Ábati lídin jábuti óunigirutiña jáu súdaara, ába janúgüniña láu buídu, ladúga janúfude lueí jachámuragun gürígia dúbü jawágun. ²⁷ Dan jachúlürün jáu, ába jíchuguniña ligíbugiñe líñun-ágei lúrudu, ába laríñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesúsu, áni ¿ca jadúga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügúri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadúgüni le lubeíbei lubáragiñe le jabeíbei wügúriña.

³⁰ Le Jabúngiute binádu wagúbürigu, ligía ásaaragüdúbalin Jesúsu, le méme jáfarubei láu jádaraguni luágu ában gurúwa. ³¹ Rúlaali Búngiu uweíriguni lun, ñurúgüdaleí lueígiñe loúnwenren, adúga láali Ábutime lúma Asálbaragülei, gayára lámuga jígiruni Israelítagu binádu jagáburi, lun gíñe ferúdunawa lan jafígoun. ³² Geféentiwa luágu líra, geféenti gíñe Sífiri Sándu le líchugubei Búngiu joun ja ñúdünbaña láu le lubeíbei.

³³ Dan jagáambunbalin líñun-ágei lúrudu cátei le, ába jagáñidun, ába yebe jabúseerun jáfaraguniña jilágubei. ³⁴ Nñíñein ában fariséo jádan lúrudugu, gíríti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janúgüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúrudu. ³⁵ Ába laríñagun joun gumádimatiña.

—Wügúriña Israélña, toúnigi jumátia láu le lúnbei jadúgüni jáu wügúriña ja.

³⁶ Jarítagua jumátia luágu iñúragua lán meja Teudás lúngua aríñaga luágu ában lan

wügúri weíriguti ligía, ába jafálaruni gádürü-san wügúriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lidáani jabájüdüniwa güriña, ligía liñúragun Júdas le Galiléana lúngua, sarágu jáña afarúati lídan labúseerun yebe lagáragabagun luágun gumádi. Áfarúati giñe, ába giñe jawáragadagun sun ja afálarubalin. ³⁸ Ígira jumáña lubeíti wügúriña ja, memétera jumá jámoun. Ladúga ánjein jáni lubeí wügúriña cátei le jarúfudajabei lúma le jadúgübei, lagúmuchaguba, ³⁹ ánjein láni lubeí Búngiu, siñá jubei agúnrinchagua. Toúnigi jumá, mageíndagua jumá lúma Búngiu.

⁴⁰ Ába jánjanrun súnigubei láu le laríñagubei. Ábati jebélaagüdüniña apóstolugu, ába jabeichuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámagiñe lúrudugu, gúndaañu láu laríñiña Búngiu queísi güriña gadúnamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tídan buri múna ságü wéyu, aríñaga jagía luágu Jesúsu lan Crístubei le agúrabajóubei.

6

Jáluajóuniwa sédü idejatiña

¹ Lídan dan ligía, quei agíbedeina jamátima afíñetiña luágu Jesucrístu, ába jagúmeserun ja adímurejabaña güriégu adárra jadúnrun ja adímurejabalin jerérun juríu, ába jaríñagun luágu mibíjin jamá würiña güriégu ja jiláañabaña úmari eíginí dan le lafánreinjóuniwa, ságü wéyu. ² Ábati jóundaruniña dúusu apóstolugu afíñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eíginí. ³ Ligía lubeíti nidújeñu, áluga jumá sédü wügúriña jídaangiñe ja gaffíñerúati jawágu, ja chúbaña áu, ja derégeguatiña jóungua lun Sífiri Sándu le gumúti, lun jadúgüni wadágimanu le. ⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súnigubei lídan cátei le, ába janúadiruní Estéban, le ában wügúri buín líña láu afíñeni luágu Jesucrístu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquíana, lé meja afálarubalin ligáburi jafíñen juríu. ⁶ Ába janúgüniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afíñetiña Jerusalén furése, ába giñe jafíñerun sarágu fádirigu juríu luágu Jesucrístu.

Ladáürün Estéban

⁸ Adáaguatíja Estéban, le ábanbei wügúri le buínbei láu ubáfu lúma abíniruni lúmagiñeti Búngiu, miláguru lúma seíni jádan güriña. ⁹ Ábati jagúmeserun güriña asígeneja luágu, güriña jagía, tídaangiñetiña jalígilisin juríu to gíriboun “Idámunigu Jóunguaaña”, jáma Cirénena, Alejandríana, Cilíciana jáma Ásiana. ¹⁰ Siñáti joun lúma Estéban, ladúga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügúriña lun jaríñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdüniña güriña, jáma arúfudajatiña lilúrudun Moisés, jáma wügúriña weírigutiña lídan jafíñen juríu, ába jarúgüdüni Estéban, ába janúgüni ligíbugiñoun líñun-ágei lúrudu. ¹³ Ába giñe jálugun yéetiña lun jaríñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jaríñaga.

—Agáamba wamúti laríñagun luágu lagúnrinchaguboun lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati laríñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagúbürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanúgüni Búngiu Abrahám lídoun fulásu le ñí lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachúlürüba lan dan lun lánibei lan ageíraü le jáu sun ladúgüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganoúba lan ladúgawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati giñe Búngiu lun. “Nagúseragüdübaña lílana fulásu le anúgübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.” ⁸ Adúgati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagúriajounbei liraú Abrahám le Isáac, ába lerésibiruni circuncisión luágu wídü wéyu láu, ítara giñe ladúga Isáac lun Jacób le liraú, adúgaleí Jacób, le méme gíribei Israél, joun dúusu lirájüñü, ja jagúbürigubaña dúusu türüba ja gíribaña Israelítagu guetó.

⁹ ‘Lirájüñü Jacób ja, ja binádubaña wagúbürigu, ába jagímugajan lun José le jamúlen, ába jalúguruni lun lanügún Ejiptoun quei idámuni. Ñíñein Búngiu lúma José, ¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragüdüni lufúleisein Faraón, le lurúeite Ejipto lun, ába líchuguni José ábutime ñi Ejipto lúma tídan lúban Faraón.

¹¹ ‘Ábati ladágarun ában ilámaü lídan fulásu le Ejipto lúma Canaán, deréti meja dan ligía, madáritiñati binádu wagúbürigu cába lan jeíga. ¹² Ába lagáambun Jacób luágu níjein lan eígin Ejipto, ába loúnajaniña lirájüñü, ja binádu wagúbürigu, ñi. Ligía furúmiñetibei jaweíyasun. ¹³ Le libíaman jóúdin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati loúnajan José anúgei Jacób le lúguchi jáu sun lufámilian, Ejiptoun, úrüwañanu-weinqueínsi gürígia jagía. ¹⁵ Ítara líña lídinbei Jacób agánawa Ejipto, le ñí lubei louwe, ñí lubei giñe jóúwegua binádu wagúbürigu. ¹⁶ Átiri irúmu lárigiñe, ába lanügüniwa jábu ñígiñe lídoun fulásu le gírabei Síquem, ába jabunún lídan umúajaü lé meja lagáñijabei Abrahám jámagiñe lirájüñü Hamor ñi Síquem.

¹⁷ ‘Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladúgawagun Israél Ejipto. ¹⁸ Ábati lagúmeserun ában urúei agúmadija Ejipto le ibídiñejabubei lun José. ¹⁹ Ába layéeraguniña urúei ligía warásan juríu, amúdiragua láña binádu wagúbürigu, águragüdáña jasáanigu ja figígiña joun lun jóúwegun, gumúgua lámuga warásan. ²⁰ Lídan dan ligía, ligía lagúriajoun Moisés, ában irájü buídumeraüti, ába jagúriajani lagúbürigu jábiñe luágu úrüwa játi. ²¹ Dan lachúlürünbei dan lun jáguruni, ába jáguruni, ába tabúduni liraú urúei Ejiptona, ába tagúriajani quei tiraú. ²² Ligía lafúnrendeirubalin Moisés lichú jáu Ejiptona, áni gabáfutiti lídan le laríñagubei lúma le ladúgübei.

²³ ‘Dan le bián-weínjali irúmu láu Moisés, ába lálugun lídin aríjaña lirásan ja ladúgawagun Israél, ja ñíbaña Ejipto. ²⁴ Ába laríjin ában Ejiptona amúdiragua ában jádaangiñe, ába lídin Moisés íderagüei lidúje, ába leséfuruni láu láfaruni Ejiptona ligía

jilágubei. ²⁵ Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémetia mútu jugúya, ¿ca uágu jageíndagua jámagua?” ²⁷ Ábati ládaruni wügúri le áluajabei wuríbu lúma le ában, ába laríñagun lun. “¿Ca íchubalibu ábutime lúma agúseragüdütime wádan? ²⁸ ¿Buséntibu gíñe báfarunina quei báfaruni Ejíptoná ligíra gúñaarü?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

³⁰ ‘Bián-wein irúmu lárigiñe, ába lasálriragun ában ánjeli lun lídan fulásu mageírawati, yaráfa lun wúbü le gíribei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagúbürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin lueígiñe bugúdi, ladúga fulásu le ñí bubei rára, fulásu sánduti. ³⁴ Aríja náali jasúfurirun numútuniña Ejípto, agáamba náali jagúajan láu igárigu, neséfuraaña lubeíti. Jigábu lubeíti, nouñajadibu Ejípto.”

³⁵ ‘Láu sun mebéresen jamá láu Moisés, álügüda jameí ca lan íchubalin ábutime lúma agúseragüdütime, ouñaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asálriragubei lun lídan búbugati. ³⁶ Moisés aságarubaliña binádu wagúbürigu Ejíptogiñe, adúga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adúga jumá gásu láu.” ³⁸ Lídan le añája lubeí Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wúbü le Sinaí, ába lásügüragüdüni lerérun ánjeli ligía joun binádu wagúbürigu. Ligía le erésibirubalin ugánu le adúrurubei lun sun dan lúmagiñe Búngiu lun lásügüragüdüni woun.

³⁹ ‘Májatiña meja binádu wagúbürigu jagáambuni Moisés, mebéreseruntiña láu, busénrügü jagía jagíribudun Ejíptoun. ⁴⁰ Ábati jaríñagun lun Aarón. “Buséntiwa lun badúgün búngiugu woun lun jóudin wabá wabá, ladúga ibídiñeti woun ca lan susérebei lun Moisés, le aságarubaliwa Ejíptogiñe.” ⁴¹ Ábati jadúgün ában tiyáwa bágasu lun jasándunme, ába jáfarun anímaalugu lun jadágaragüdüni tun jasándun, ába jadúgün fédu lun jagúndaarun láu cátei le jadúgübei láu jájabu. ⁴² Ábati ladíreirun Búngiu jaweí, ába lígiruniña lun jájuduragun joun warúguma ja siélubaña. Ítara líña labúrüdün tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdüni nun lídan bián-wein irúmu le jáubei lídan fulásu mageírawati?

⁴³ Madúgün jumúti líra, lubáragiñe lira, barú jumuti jisándun Molóc tídan lágei to jadúgüboun lun,

túma tiyáwa warúguma to gíriboun Renfán, to gíñe janúgüboun quei jisándun, iyáwaü buri ja jadáagun guánarügü lun jájuduragun joun.

Ligía naságarubadün lubeí jageíragiñe, nouñajaünme yagúroun méme lueí Babilónia.

⁴⁴ ‘Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagúbürigu, ñí lubei lerédera Búngiu jáma. Adúga lumútu Moisés lúban Búngiu tugúya queísi larúfuduni Búngiu lun lun ladúgünun. ⁴⁵ Nújeingua méja múna tugúya jáma jadúgawagun binádu wagúbürigu, ába janúgünun jámawagua lídoun fulásu le

ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lídan fulásu le darí lidáani Davíd. ⁴⁶ Daríti urúei Davíd fuleísei ligíbugiñe Búngiu, ába labúseerún yebe ladúgün ában témpulu lun laganóun Lubúngiute Jacób ñi, ⁴⁷ Salomón adúgübarun témpulu tugúya, ⁴⁸ láu sun, maganoún lan Búngiu le weírigutimaabei tídan buri ligílisi to jadúga güriña, queí meja laríñaguni proféta.

⁴⁹ Siélu nálabei le ñí lubei nañúura lun narúeijan, uboú, le ñí lubei neméraaguagüdei nugúdi.

¿Cába tuwúyeri múna jadúga nun? líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadúga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagúbürigu. ⁵² ¿Ca jádaangiñe profétagu mouserun jabáña binádu jagúbürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacúnrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélu, ába laríjini luweírigun Búngiu, lúma Jesúsu rára lueígiñe loúnwenren Búngiu.

⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesúsu le Wügúri Garaúwarügüti, lueígiñe loúnwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáangun lábugiñe laríaajan ában wügúri gíriri Sáulo, ába jachámuragun dúbü luágun Estéban. ⁵⁹ Súnti añája lan achámuragua dúbü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figoú le.

Lárigiñe laríñaguni le, ába loúnwen.

8

Leíbaajaniña Sáulo ja afíñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajoúni jawágun ja afíñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña güriña ñi, apóstolugu rügüñanu manúrajan. ² Ába jayábin wügúriña ja derégeguatiña jóungua lun Búngiu, ába jábununi Estéban láu sarágu íruni luágu loúnwen. ³ Ábati lasígirun Sáulo eíbaajaña afíñetiña, ábaja lebélorun tídoun sun múna lun laságaruniña wügúriña jáma würiña adúruujeina, ába loúnajaniña furísunrugun.

Lapúrichijóun ugánu buíti luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülú lan Jesucrístu lun lasálbaruniña sun güriña, sun le ñí lumuti jóudin. ⁵ Ába lídin ában jádaangiñe, gíriri Felípe, lídoun ában ubúругu Samária, ába lagúmeserun adímureja

joun ja ñíbaña luágu Crístu. ⁶ Ábaja jóundaragun güriña, ru jagía jarígei lun le ladímurejabei Felípe, aríja jameí buri gíñe miláguru le ladáagubei. ⁷ Ladúga sarágu buri güriña ja gawágutiña espíritugu wuríbatíña, areídaguátíña, ába buri jáfuridun espíritugu wuríbatíña jagía agúarajeina jádaangiñe, areídagua jagía sarágu derégüdaaña jamá, mešbuguntiña. ⁸ Súnti güriña lídan fulásu ligía, gúndaatiña luágu cátei le.

⁹ Ñíñein ában wügúri lídan fulásu ligía, gírítí Simón, gabíñarajati meja, lúñajaali ayéejaña güriña Samariána láu laríñagun joun luágu máma lan furúmiegurügü güriña ligía. ¹⁰ Agáambaja jamútítíja sun güriña buídu, jámagiñe ja gudémegutiña dagá jámoun ja weírígutiña, ába jaríñagun.

—Íbíja lumúti güriña le oúnwenbun lubáfu Búngiu.

¹¹ Adúgatiñatíja gásu láu, ladúga lúñajaali ayéejaña láu labíñarajan. ¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucrístu, dándu wügúriña quei würiña, ába jabásterún. ¹³ Simón meme ligía ába gíñe lafíñerun, ába gíñe labásterún, ába lagúmeserun afálarei Felípe, le luweírín lanígi láu buri oúnwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérun Búngiu, ába jóunajani Pédro lúma Juan ñi. ¹⁵ Dan le jachúlürünbei, ába jayúmuragun jawágu afíñetiña ja Samariána lun liábiba Sífiri Sándu jádoun, ¹⁶ ladúga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñúbin lan Sífiri Sándu jádoun güriña dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. ¹⁹ Ába laríñagun joun.

—Rújumei gíñe ubáfu le nun, lun dánme lan níchuguni nújabu luágu furúmiegurügü, lun gíñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiougatin láu sun biseínsun, ladúga jarítaguatibu luágu gayára lan lagáñi-jóun cátei le ledéweejan Búngiu. ²¹ Maríchatibu, mafánran bugúya lídan wesériwidun lun Búngiu, ladúga múaraantu banígi ligíbugiñe Búngiu. ²² Ígirabeí buríban le, ayúmuraguabá lun Búngiu, lun ferúduna lánibu luágu luríban barítangun. ²³ Ladúga aríja numúti luágu buin tíña lan banígi láu wuríbani, áni ragúñu liñálíbu Máfia.

²⁴ Ábati laríñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárígiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu güriña lídaangiñe jafígoun lídan sarágu lirájüñü fulásu Samária, luágu jaweíyasun járigoún Jerusaléoun.

Felípe lúma wügúri le Etiopíana

²⁶ Lárígiñe cátei le, ába laríñagun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe úma le arárirubei Jerusaléngiñe lun ubúrun Gun Gáza.

Ligía úma le ásügürübei lídaangiñe fulásu mageírawati. ²⁷ Ába laráanserun Felípe, ába lídin. Luágu lešbuguniwágu, ába ladárirun ában wügúri Etiopíana lubá lubá. Wügúri ligía siñátí garaú lan, ában wügúri weíríguti, ligía gíñe gamánijaríbei láu sun tiseínsun Candáce to lurúeite Etiopía. Liábiñati wügúri ligía Jerusaléngiñe lárígi lídin ájuduragua lun Búngiu. ²⁸ Lagíribuduñátí lageíroun, ñun tídan ában cárü, alíijeinaloún lilíburun proféta Isaías. ²⁹ Ábati laríñagun Sífiri Sándu lun Felípe.

—Yaráfabá tuágun cárü túra.

³⁰ Ába leíbaagun tuágun cárü, ába lagáambuni lalíjaña lan tídan lilíburun Isaías, ába laríñagun lun.

—¿Gunfaráanda bumútisan le balíjabei?

³¹ Ába laríñagun wügúri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába laríñagun lun Felípe lun ládinun lúmoun lun lañúurun loúbagiñe.

³² Niján buri dimúrei le lalíjabei.

Quei mudún, lanügúwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña gíñe maríñagun lan ni cáta.

³³ Únabuti lanügún, áni michugúnwati lirícha lun,

siñábei ladímurejóun jawágu ladúgawagun,

ladúga gumúja lan labágaridun ubouágu.

³⁴ Ába laríñagun wügúri ligía lun Felípe.

—Adúgabei fuleísei nun, aríñagabei nun, ¿cáteisán le uágubei laríñagei wügúri le abúrújabei dimúrei le, luouágu, ódi luágu ámu?

³⁵ Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubeí lagúmesera alíja, ába líchuguni ugánu luáguti Jesúsu lun. ³⁶ Dánti le jásügürünbei lídaangiñe ában fulásu le ñí lubei dúna, ába laríñagun wügúri ligía.

—Nijántia dúna, ¿siñátisan nabásterun?

³⁷ Laríñaga Felípe lun.

—Ánjein afíñe bubeí luágu Jesucrístu táu sun banígi, gayáraati babásterun.

Laríñaga wügúri ligía lun.

—Afíñetina luágu Jesucrístu lan Liraúbei Búngiu.

³⁸ Ábati laráramagüdúnun cárü, ába jarárirun biángubei jagía dúnarugún, ába labásterágüdüni Felípe. ³⁹ Dan jamúdeirun dúnarugugíñe, ába lanúgüni láni Búngiu Espíritu Felípe ñígiñe, ába maríjin láali lan wügúri ligía. Ába lasígiruni leíbugun, gúndaañu. ⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinaleí ugánu luáguti Crístu darí lachúlürün Cesaréa.

9

Lerésibiruni Sáulo Crístu queísi lasálbaragüle

¹ Sun dan ligía, merédeti lasíadiruniña Sáulo afíñetiña luágu Jesucrístu. ² Ligía lídinbei lúmoun fádiri íñutimaati lídan jafíñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanúgüniña adáüragua Jerusalén, dándu wügúriña quei würiña. ³ Luágu leíbuguniwágu, dan yaráfaali lun Damáscu, sódini ába ladúnraagun ában larúgounga siélugiñe, geyégua láu. ⁴ Ábati láburujan Sáulo múarugún, ába lagáambun laríñagun ában umálali lun.

—Sáulo, Sáulo, ¿ca uágu beíbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beíbaajabei. ⁶ Sarába, belúba ubúrugun, laríñawagúba bun ñi cába lan badúga.

⁷ Wügúriña ja úarabaña lúma Sáulo lídan luweíyasun, ába jaráramun láu luweírin janígi ladúga agáamba jamúti umálali, áni maríjin jamúti le adímurejabei. ⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati járügüdüni lújabu,

ába janúgüni ubúrugun Damásco. ⁹ Ába leréderun úruwa wéyu ñi marjinga, meígin líña, mátun ni cáta.

¹⁰ Ñíñein ában affñeti luágu Jesucristu ñi Damásco gíriti Ananías, le únbei layáwadagua Wabúreme Jesúsu, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágu úma le gíribei Surúti, danme le bachúlürün lúbiñe Júdas, bálügüdajame luágu ában wügúri Társona gíriti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügúri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágu wügúri ligía lúma luágu sun wuríbani le ladáagubei joun ja affñebaña buágu, Jerusalén. ¹⁴ Guetó, liábiña ñájoun láu ubáfu jámagiñe jábutigu fádorigu lun ladáüraguniña sun ja bánigubaña.

¹⁵ Ába laríñagun Jesúsu lun.

—Beíba, ladúga anúadira náali wügúri ligía lun ladímurejan nuágu joun güriquia ja mámabaña juríu lúma joun jarúeitegu, lúma gíñe joun Israelítagu. ¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñí lubei Sáulo. Ába lebélorun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu úma le ñígiñe lubei biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leígin, ábaya lejéredun, ába leréderun átiri wéyu jáma affñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraúbei Búngiu. ²¹ Súnti ja agáambubalín, ába laweíridun janígi, jaríñagati.

—¿Másan niján wügúri léñaja eíbaajabáliña ja afálarubalin Jesúsu Jerusalén? ¿Ma ligía méme le ñúbinbei ya lun lanáanguniña adáüra, lun ledéregeruniña joun jábutigu fádorigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña güriquia lídaangiñe jaffgoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jaweí juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdün le jabúseerubei jadúgün lun Sáulo. Wéyuagu, áriebe, jagúrabanja juríu luágu béna le áfuridagülei le lání ubúругu Damásco lun jáfaruni jilágubei. ²⁵ Ába jíchuguni affñetiña lídoun ában faníñe weíriti, ába jarárigüdúni áriebe lueígiñe baríeru le geyégubei láu ubúругu, ába leséfurun.

Sáulo ubúругu Jerusalén

²⁶ Dan le lachúlürünbei Sáulo Jerusalén, ába yebe lálugun ládaragun lúngua jádoun affñetiña, sun jagía, janúfudetiña lueí, ladúga maffñetiñá yebe luágu affñejali lan luágu Jesucristu. ²⁷ Ába lanúgüni Bernabé jagbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun,

lúma luágu lapúrichijan Sáulo furáangu luágu Jesúsu ubúrugú Damásco. ²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma jurú ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirúnbalin afíñetiña cátei le, ába janúgüni Sáulo ubúrugun Cesaréa, ñígiñe ába jóunajani Társoun.

³¹ Lídoun buri dan ligía, buíti jóuserúniwa afíñetiña luágu Jesucristu ja aganoúbaña Judéa, Galiléa, lúma Samária. Ába jedérebugudún lídan jafíñen luágu Jesucristu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebélujaña lubeí Pédro lídan buri fulásu lun líderaguniña ja afíñeñaabaña luágu Jesucristu, ába gíñe lídin aríjaña lánigu Búngiu ja ubúrugubaña Lída. ³³ Ñi ladárira ában wügúri gíríti Enéas, wídü irúmu láu gabánarugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucristu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafíñen, ába jafíñerun luágu Jesúsu.

Táguyugun Dórcas

³⁶ Lídan meja dan ligía, ñíñoun meja ában afíñetu aganoútu Jópe, gírítu Tabíta, lídan jerérun güriégu, gírítu Dórcas. Wúri tugúya, súnwandan táu adúga buíti, íderagua tugúya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jágawagüdünun, ába jariwachaguagüdünun. ³⁸ Yaráfati Jópe lun Lída le ñi lubei Pédro, queíti jagáambuni afíñetiña luágu níjein lan ñi, ába jóunajan bián wügúriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachúlürünbei, ába janúgüni tídoun rúmu to ñi tubei jiláaru, ába jagúriridágun sun würiña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájüchagubóun Dórcas dán meja moúnwengiru, lun. ⁴⁰ Ába láfuridagüdúniña Pédro sun ja ñibaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñúragun túngua. ⁴¹ Ába lárügüdüní tújabu, ába lásaaragüdünun. Lárigiñe, ába lagúarun joun würiña jagía jáma jíbiri afíñetiña ja ñibaña, ába larúfudunun joun, wínwañu. ⁴² Ába lagaambún cátei le lídan sun ubúrugú Jópe, ába sarágu jamá afíñerutiña luágu Jesucristu. ⁴³ Ába leréderun Pédro sarágu dan lídan ubúrugú ligía, lúbiñe Simón le aráansejabei úraü.

10

Loúnajan Cornélio oúgei Pédro

¹ Ñíñein ában wügúri ubúrugú Cesaréa gíríti Cornélio, gumándan joun súdaara ja Italiána. ² Wügúri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá jurú. Rúti buri gíñe sarágu seínsu lun jíderawagún jurú, áni súnwandan layúmuragun lun Búngiu. ³ Luágu ában wéyu, queí buri ladaúnrün úrüwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjaleí buri cátei le badúgübei lun bídera-guniña gudémetiña. ⁵ Oúnajabá lubeíti wügúriña ubúruгу Jópe lun jóuguni Simón, le gíñe gíríbei Pédro, lun liábin bun. ⁶ Lúbiñe Simón le aráansejabei úraü, le gábanbei láru barána.

⁷ Dan le ñúdünjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügúri derégeguati lúngua lun Búngiu, leménigira Cornélio. ⁸ Ába labájüdaguni sun cátei joun, ába loúnajaniña ubúruгу Jópe.

⁹ Larúgan amídirugu, sun ayárafadeina jamá wügúriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu. ¹⁰ Weírjaliti liláma óra ligía, busénjali leígin. Dan le añája lan aráanserei leígin, ába lasálriragun ában cátei lun ítara. ¹¹ aríja lumúti lánjunrenchun siélu, ába tiábin ában cáton camá jamuga gamísa weírítu gürágu lueígiñe gádürü tarígei, tiábin arárireina múarugun. ¹² Tídan gamísa tugúya, ñíñanu sun jawúyeri anímaalú, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalú ja lun beígin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanúgübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Úrüwañein weíyaasu lasúseredun cátei le, lárigiñe, ábaya tamúdeirun gamísa tugúya siélu. ¹⁷ Súnti niján lan Pédro láu luweírín aríttaguni luágu, asáminara ca lan laníchigubei cátei le laríjubei, ligía jachúlürün luwügüriñan Cornélio, álügüdajeína tuágu lúban Simón. ¹⁸ Dan jachúlürün tubéneri múna, ába jálügüdajan rein ánjein ñí lubei lagánawa ában gírítu Simón le gíñe únbei jaríñaga Pédro. ¹⁹ Queíti buga nijágu lan Pédro asáminara luágu cátei le asálriragubei lun, ába laríñagun Sífiri Sándu lun.

—Añája úrüwa wügúriña álugabu, ²⁰ raríba, oúfudabá, beíba jáma láu afíñeni ladúga áu lan oúnajabalíña.

²¹ Ábati larárirun Pédro le ñíjin jabei wügúriña ja loúnajabaña Cornélio, ába laríñagun joun.

—Áu le jáluajabei. ¿Ca gabúgürübalün?

²² Ába jaríñagun.

—Loúnajan gumándan le gíríbei Cornélio wagía, ában wügúri surúti, derégeguati lúngua lun Búngiu, jínsiñeti joun sun juríu. Núbinti ában ánjeli aríñaga lun lun loúnajan oúgabú lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi áriebu ligía. Larúgan, ába lídin Pédro jáma, ñúdüntiña gíñe jádaangiñe afíñetiña ja aganoúbaña Jópe jáma.

²⁴ Larúgan, ligía jachúlürün Cesaréa, le ñí lubei Cornélio agúrabajaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachúlürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügúri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan wafíñen wagía juríu lun jóúndaragun juríu jáma ja mámabaña juríu quei jugúya, ni lun webélurun tídoun jában lueí wasálrirun mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun noúseruniña ja mámabaña juríu queísi gürígia mabuíduntiña. ²⁹ Ligía nánjanrunbei niábin dan le boúnajanbei nuágu. Buséntina jamúgati nasúbudiruni ca lan lébubei jóúnajan nuágu.

³⁰ Ábati loúnabun Cornélio.

—Úrüwa wéyu guetó, queíburí óra le, ñañadina núbiñe ayúmuraagua lun Búngiu ladaúrün úrüwa rábounwéyu, queísi wéchun, ligía lasáliragun ában wügúri nun táu ában dáüguaü mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badúgübei lun bíderaguniña gudémetiña. ³² Oúnajabá lubeíti wügúriña ubúruugu Jópe ougei Simón le gíñe gíribei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti nouñajan ougabufurése, áni buítiti badúga biábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanúgüniña Búngiu sun gürígia. ³⁵ Resbírigü lumútiña sun ja inébejabúbaña lun áni adúga jameí le buídubei, dándu juríu quei ja mámabaña juríu. ³⁶ Adímurejati Búngiu joun ladúgawagun Israel, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsu Nazarétna, luágu meja gíñe ladaágun buíti, luma lareídaguagüdüniña ja asúfurirubaña lábugiñe lubáfu Máfia. Ladúgünbalin buri meja cátei le, ladúga ñíñein lan Búngiu luma. ³⁹ Wagía geféentiwa luágu sun cátei le ladúgübei Jesúsu Jerusalén luma lídan sun líbiri jageíra juríu. Lárigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe ouweni luágu lúruwan wéyu, ába larúfudaguagüdüni lúngua wíwnaño woun. ⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe ouweni. Jouítiwa luma, gurá wagía luma lárigiñe lásaarun lídaangiñe ouweni lúnya labágaridun. ⁴² Ába loúnajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja wínwangiñabaña jáma ja jiláguaañabaña dánme le lagíribudun ubouágun. ⁴³ Adímurejaaña meja gíñe sun profétagu luágu Jesúsu lúmagiñe binárü, luágu sun lan ja afíñebaña luágu, resíbi jamáni ferúdu luágu jafígoun.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afíñetiña luágu Jesucrístu ja ñúbinbaña úara luma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majouábei funági lun jabásterún gürígia ja, quei resíbi jamáali lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmura-gun lun Pédro lun leréderun átiri wéyu jáma.

11

Labájüdagun Pédro joun títana liglisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afíñetiña ja Judéabaña luágu ánjaaña lan gíñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja afíñetiña, ³ jaríñaga.

—¿Cámesan bídin aríjaña ja mámabaña juríu, áni jou amúrü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúruguañadina Jópe, ayúmuragua lun Búngiu, ligía naríjin ában cátei lasáliragun nun camá jamuga ában gamísa weírítu tarárirun siélugiñe, gürágu lueígiñe gádürü tarígei, tiábin chülú le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.” ⁸ Ába naríñagun. “Uá, Nabúreme, ladúga meígiñajágidina ni cáta le wanúgübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdü Búngiu, maríñagabá luágu luágu mabuídun lan.” ¹⁰ Úrüwañein weíyaasu lasúseredun cátei le, lárigiñe, ábaya tamúdeirun siélun. ¹¹ Lídan óra ligía, ligía jachúlürün úrüwa wügúriña tídoun múna to ñí nubei, óunajóutiña Cesaréagiñe álugana. ¹² Ába laríñagun Sífiri Sándu nun lun nídin jáma láu afíñeni. Ñúdüntiñá giñe sísi afíñetiña ja núma. Dan wachúlürün Cesaréa, ába webélurun sun wagía lúbiñoun ában wügúri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Óunajabá wügúriña lun jóudin ubúrugua Jópe ougei Simón le giñe giríbei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati naríttagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Ánjeinti ru lubálin Búngiu líbe le líchubei woun, wagía le afíñeelibe luágu Jesucrístu, joun, ¿cátanañadináti lun neréderubei lan le labúseerubei Búngiu ladúga?

¹⁸ Dánti le jagáambuni afíñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubeí giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin ibágari magúmuchaditi!

Ligílisi to Antioquána

¹⁹ Dan le láfarúnbei Estéban, ába giñe jagúmeserun eíbaajaña ja jíbiri afíñetiña, ába janúrajan jíbiri chülú Fenícia, Chípree, luma Antioquía. Ñi jíhigei ugánu luáguti lasálbaruniña Jesucrístu gürígia lídaangiñe jafígoun jóunrügü juríu, máma joun ámu gürígia. ²⁰ Ánjeinti afíñetiña ja Chípree jáma Ciréneña, ába jachúlürün Antioquía, ába giñe jadímurejan joun ja mámabaña juríu, ába jíhuguni ugánu luáguti Wabúreme Jesucrístu joun lun jasálbarun. ²¹ Níñein lubáfu Búngiu jáma afíñetiña jagía, sarágu ja mámabaña juríu, ába jígiruni binádu jafíñen, ába jafíñerun luágu Jesucrístu.

²² Dan lachúlürünbei ugánu le lábun jagáambun afíñetiña ja Jerusalénbaña, ába jóunajani Bernabé Antioquíoun. ²³ Dan lachúlürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña sùngubei lun jafálaruni Wabúreme Búngiu táu sun janígi. ²⁴ Bernabé, ában meja wügúri buíti, derégeguati lúngua lun Sífiri Sándu le gumúti, buin líña giñe láu afíñeni luágu Jesucrístu, ítara líña lagáñeirun sarágu gürígia lun Jesucrístu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanúgüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ní Antioquía lagúarúa joun afíñetiña “Cristiánugu” furúmiñe.

²⁷ Lídan dan ligía, ába jóudingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan afíñetiña, ába laríñagun láu le lasúbudirágüdübei Sífiri Sándu lun luágu liábiba lan ában óunwenbun ilámaü lídan sun ubóu, áni suséreti lídan lidáani larúeijan Cláudio. ²⁹ Ábati jóundaragun afíñetiña ja

Antioquíana lun jounajan seínsu joun affñetiña ja Judéabaña según le jayáraati íchiga. ³⁰ Ítara líña jadúgüni, ába jounajani seínsu ligía luma Sáulo joun tábutigu jalígilisin affñetiña Judéana.

12

Loúnwen Jacóbo luma ladaürün Pédro

¹ Lídan dan ligía, ába lagúmeserun urúei Heródes eíbaajaña jádaangiñe affñetiña. ² Ába láfaragüdúni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába giñe lanúgüni Pédro adaúra. Lídan buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe lanúgüni Heródes Pédro adaúra, ába ládaruni furísunrugun jáu díisi-sísi súdaaragu oúnigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun. ⁵ Níñein lubeíti Pédro furísunrugu toúnigiwañu buídu, merédeti jayúmurangun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Árieibu le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. ⁷ Sódini, ligía lasálirangun ában lání Wabúreme ánjeli, ába larúgoungadún furísunrugu. Ába lagúuruni ánjeli ligía loubawagu, ába lagáguduni, ába laríñangun lun.

—Sarába furése.

Ábati láburujan güríngüri lueígiñe lújabu Pédro, ⁸ ába laríñangun ánjeli ligía lun.

—Murúbei bubélitin, daúbounme bigeídin.

Lárigiñe ladúgüni Pédro sun líra, ába laríñangun ánjeli ligía lun.

—Daúboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubeí lúmoun máma lan inárüni cátei le ladúgübei ánjeli ligía. Genégetimáati lun camá gewenediñein.

¹⁰ Ába já sügürün jáu furúmiñetiña oúnigirutiña, sügú jamaña jabíaman, dánti le jachúlürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragún ában úma, ába lígiruni ánjeli ligía Pédro lábugua.

¹¹ Ligíaali lárügüdagun Pédro lúngua, ába laríñangun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes luma lueí sun lé yebe jabúseerubei juríu jadúgün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márcos, le ní jabei sarágu gürígia adamuriñu ayúmuragua lun Búngiu luágu. ¹³ Dan lacaújan luágu lubéneri bürürü, ába táfuridun ában irájü músu, gíritu Róde, aríja ca lan agúajabei. ¹⁴ Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírín tugúndan, ábarüga teíbaagun múnadoun awísaja luágu niján lan Pédro bénabu. ¹⁵ Ábati jaríñangun tun.

—¡Lúlüjaali báu!

Ába taríñangun joun luágu choúru tan luágu ligía lan. Ába jaríñangun.

—Máma ligía, fágua láfurugu.

¹⁶ Niján mémeti Pédro acaúnja luágu béna. Dan jánjunrenchuni, ába laweíridun janígi dan le jaríjini. ¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo luma joun jíbiri affñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladúga ibídiñeti joun ca lan susérebei lun Pédro. ¹⁹ Ába loúnajan Heródes áluajei, quei madári jamáni,

ába lálügüdaguniña súdaara já buga ónigirubalin, lárigiñe, ába láfaraguágüdüniña jilágubei. Lárigiñe, aba láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíriti ligáñi Heródes jáma güriña ja aganoúbaña Tíro lúma Sidón, ánjein jagía, ába jebélurun lídoun ában aríttaguni lun jóunajan wügüriña lun jadímurejan lúma luágu jafúleisein. Dan le jachúlürün, ába jagáñeiruni Blásto, ában wügüri íñuguti láni Heródes, lun líderaguniña adíljei sun cátei, ladúga lageíragiñe Heródes jabíja eíginí. ²¹ Ába lagúaragüdüñ Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubei lagúmadija, ába ladímurejan joun. ²² Ábati jagúmeserun güriña agúaraja.

—¡Máma wügüri adímurejabei, búngiu adímurejabei!

²³ Lídan óra ligía, ába lasándiragüdüñi láni Búngiu ánjei Heródes, ladúga lanáangun lúngua luágu jerérun güriña, míchu lumúti linébase Búngiu lun, ába jeígini jéweraü, ába loúnwen.

²⁴ Abúruchagueínatimá ligíati ugánu le láni Búngiu, apúrichijóuati lídan sun fulásu.

²⁵ Dan jagúmuchi Bernabé lúma Sáulo jawádigimari, ába jagíribudun Jerusaléngiñe barüina jamei Juan Márcos jámagua.

13

Jagúmeseruni Bernabé lúma Sáulo jawádigimari apúrichijei Lerérun Búngiu

¹ Tídan ligílisi to Antioquíaboun, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumei Bernabé lúma Sáulo nun lun wadágimanu le únbei nanúadiraña.

³ Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóudin Seléucia, ñígiñe, jádina lun jóudin luágun ubóju le Chípre. ⁵ Dan jachúlürün lídan ubúru le gíribei Salamína, líbiri méme Chípre, ába jagúmeserun apúrichijei lerérun Búngiu tídan jalígilisin juríu. Nídünti gíñe Juan Márcos jáma, íderaguaaña. ⁶ Eíbuga jamúti sun ubóju ligía chúlú lúmoun fulásu le gíribei Páfos. Ñi jadárira ában juríu gíriti Barjesús, garíyajati wügüri ligía, ye ligía, laríñaga luágu proféta lan. ⁷ Garíyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladúga busén lan lagáambuni lerérun Búngiu. ⁸ Ánjein garíyajati ligía, le méme gíribei Elímas, sigéne lumútiña luei yebe lafíñerun gumádimati luágu le jaríñagubei lun luágu Jesucrístu. ⁹ Sáloti, le méme gíribei Páblo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraú Máfia amúru, lágani sun le buídubei! ¿Ca uágu meréde lubei beyéejan luágu lémeri Búngiu le surúbei? ¹¹ Guetó láburuja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába láluajan cába lan árüjei lújabu, ladúga maríjinjali lan. ¹² Dan laríjini gumádimati cátei le, ába lafíñerun luágu Jesucrístu, weíriti lanígi láu le jarífudajabei luágu Wabúreme Jesucrístu.

Páblo lúma Bernabé ubúru Antioquia

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíriti Panfília. Ánjein Juan Márcos, ába lígiruniña, ába lagíribudun Jerusaléoun.

¹⁴ Lárigiñe, ába jásügürün Pérgegiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun jalígilisin juríu, ába jañúurun ñi. ¹⁵ Lárigiñeti talijóuniwa líburu to lánina lilúrudun Moisés túma buri líburu to jabúrújaboun profétagu, ába jóunajan ábutigu aríñaga joun.

—Wadújeñu, ánjein níjein lubeí dimúrei lun jaríñaguni joun güriña ja, aríñaga jumeí guetó.

¹⁶ Ábati lásaarun Páblo, ába ladúgün seíni joun láu lújabu lun jámanichun, ába laríñagun.

—Agáamba jumá, wügüríña Israelítagu júma jugúya le ájuduragubei lun Wabúngiute.

¹⁷ Búngiu le Jabúngiute Israelítagu, anúadaja lumútiña meja binádu wagúbürigu lun lánigubaña lan, ába ladúgüniña ábanme oúnwenbun násiñun dán meja le añájagua lan agánawa quei teréncha Ejípto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu. ¹⁹ Lárigiñe, ába lagúmochaguagüdüni sédü násiñun ja aganoútiña Canaán lun líchuguni jafúlasun joun binádu wagúbürigu luára gádürü-san-dimí irúmu. ²⁰ Lárigiñe, ába líchugun güriña lun jagúseragüdüniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraú Cis, ladúgawagun Benjamín. ²² Lárigiñe, ába lagídaruni Búngiu arúejani lueí Saúl, ába líchuguni lun David, le uágubei laríñaga. “Darína David, liraú Isaí, ában wügürí le áubei nagúndaara, áni ladúgübei sun le nabúseerubei.” ²³ Jádaangiñe ladúgawagun David ligía liábin Jesúsu le loúnajabei Búngiu lun jasálbarun Israelítagu, quei meja laríñaguni. ²⁴ Lubáragiñebei liábin Jesúsu ubouágun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeídin.”

²⁶ ‘Nidújeñu, jugúya le jarájüñübei ladúgawagun Abrahám, júma jugúya le mámabei ladúgawagun Abrahám, inébejabutün lun Búngiu. wagía güriña ja únbaña loúnajoúa ugánu le luáguti Wasálbaragüle. ²⁷ Já meja güriña ja aganoúbaña Jerusalén jáu sun jábutigu, ibídiñetí yébe joun ca lan Jesúsubei, úa ligía gunfaráanda jamáni jerérun profétagu, láu sun alijóúa lan jerérun tídan jalígilisin ságü luwéyuri eméraaguni, jagía guánarügüti gúnfuli jamúti le bürúwañubei láu jasádiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña luma Piláto lun láfaragüdüni jilágubei. ²⁹ Dánti le adúga jamáali sun le taríñagubei Lerérun Búngiu luágu, ába jarárigüdüni lueígiñe gurúwa, ába jíchuguni lídoun lumúaja. ³⁰ Ába lásaaragüdüni Búngiu lídaangiñe oúweni lúnya labágaridun. ³¹ Arúfudaguati Jesúsu lúngua wínwañu luágu sarágu weíyaasu joun ja ñúbinbaña luma luágu luweíyasun Galiléagiñe lun Jerusaléoun, jagíati geféenbaña luágu joun güriña guetó.

³² ‘Wíchiguñein lubeíti ugánu le jun, luágu darádu lé meja ladúgübei Búngiu jáma binádu wagúbürigu ³³ gúnfuli láali woun, wagía le jadúgawagun, láu lásaaragüdüni Jesúsu, quei laríñaguni tídan lílburun, lídan libíaman Sálmo. “Niraú amúrü, rúnaali ubáraü le bun ugúñe.” ³⁴ Aríñaga láali meja Búngiu luágu lásaaragüdüni Jesúsu lídaangiñe oúweni lun mañáladun lan lúgubu, dan laríñagun tídan líburu to Lerérun. “Níchugubei abíniruni le uágubei naríñaga lun David bun, gayáraati beménigidun luágu.” ³⁵ Laríñaga gíñe David lídan ábanya Sálmo. “Mígirunbadibu lun lañáladun lúgubu Biraú le jínsiñebei bun.” ³⁶ David, seríwiti méja joun ja lánina lidáani quei laríñaguni Búngiu lun, lárigiñe, ába loúnwen, ába labunún le ñí lubei jabunúa lagúbürigu, ába lañáladun lúgubu. ³⁷ Ánjeinti Jesúsu, sarágüda lumúti Búngiu lídaangiñe oúweni, mañáladun lúgubu. ³⁸ Nidújeñu, lúnti lubeíti jasúbudiruni luágu lídaangiñe lan Jesúsu

ferúdunawa lan wafígoun. Ligía ugánu wanúgübei jun. ³⁹ Lídaangiñeti gíñe, chibáwaali lubeí sun wafígoun, sun wagía le affñebei luágu, gidáwa ligía wadúnrun ligíbugiñe Búngiu, cátei lé meja siñá lubei lilúrudun Moisés adúga. ⁴⁰ Toúnigi jumá lubeí lueí láburujan ligáñi Búngiu juágun queísi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá,

ladúga áu le Búngiubei, nadúgüba cátei weínamuburiti, daríme lun mafíñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu. ⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafíñen lun jafálaruni jafíñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jaríñagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraaguni, ába jóundaragun jibe-ágei lílana fulásu lun jagáambuni lerérun Búngiu. ⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába jameí líri Jesúsu. ⁴⁶ Ábati jadímurejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madúna jumáni ibágari le magúmuchaditi, ítara líña weíbugagubeíti apúrichija joun ja mámabaña juríu. ⁴⁷ Ladúga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu, lun gayáraabei lan jasálbarun ja aganoúbaña lídan lagúmujoún fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucrístu, ja lúntiñabaña ibágari le magúmuchaditi. ⁴⁹ Ítara líña lapúrichijoún lerérun Búngiu lídan sun fulásu ligía. ⁵⁰ Ába jadímurejan juríu jáma würiña gúnfulitiña, inébeba jagía, lúma jáma wügúriña weírigutiña ñi ubúruyu, ába jínchajaniña lun jeíbaajaniña Páblo lúma Bernabé darí lun jabúguniña lídaangiñe fulásu ligía. ⁵¹ Ábati jáfuruduní calíqui lueígiñe jagúdi, arúfudei luágu mabuídun lan jóuserun lílana fulásu ligía, ába jóúdin ubúrugun Icónio. ⁵² Gúndaañu jáña affñetiña Antioquía luágu jabágari lúma Crístu, weíríti jedéregeragun jóungua lun Sífiri Sándu.

14

Páblo lúma Bernabé ubúruyu Icónio

¹ Ába jebélurun Páblo lúma Bernabé tídoun jalígilisin juríu ubúruyu Icónio, ába japúrichijan, buíti jadímurejan darí lun jafíñerun sarágu, dándu juríu quei máma juríu, luágu Jesucrístu. ² Juríu ja mafíñebaña luágu Jesucrístu, ába jínchajaniña ja mámabaña juríu, amísiñedagúdaña affñetiña joun. ³ Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. ⁴ Fánreinguañu jáña lílana ubúruyu ligía, jíbiri jámagiñeñanu juríu, jíbiri jámagiñe apóstolugu. ⁵ Játi juríu jáma ja mámabaña juríu, ába jebélurun lídoun ában aríttaguni jáma gumádimatiña lun jeíbaajaniña apóstolugu lúma lun jachámuragun dúbü jawágun. ⁶ Ánjein Páblo lúma Bernabé, ába jasándiruni, ába jóúdin lídoun buri fulásu le gíribei Lístra lúma Dérbe, biáma fulásu le láni méme fulásu le Licaónia, lúma geyégua láu, ⁷ apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dúbü luágu Páblo lídan fulásu le Lístra

⁸ Níñein ában wügúri meíbugunti, Lístra, ñun líña ladúga ítaragubeíñein lan lúmagiñe lagúriajoún, meíbugungubeíti. ⁹ Lagáambajañein wügúri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügúri ligía luágu gayára lan lareídagun. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügúri ligía arárama, ába lagúmeserun eíbuga. ¹¹ Dan jaríjini güriña cátei le ladúgubei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügúriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladúga ligía lan adímurejabei. Nújein lúban jabúngiute Júpiter bougudiñoun lueí ubúru, ¹³ ába liábin lufádirin Júpiter ñígiñe barúina wügúriña bágasu lúma buri fulúri luágun lubéneri ubúru, buséti yebéti ligía jáma buri güriña lun jáfaruniña bágasu jagía lun jadágaragúdún joun Páblo lúma Bernabé. ¹⁴ Dan jasúbudiruni Páblo lúma Bernabé cátei lan jabúseerunbei güriña ja jadúgün, ába jajeíridagunun janáangun le luweírin lubéresen cátei le joun, ába jádaragun jóungua jádoun güriña agúarajeina.

¹⁵ —¡Wügúriña! ¿cámesan jabúseera jadúgüni cátei le? Wügúriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wíwanbei, le adúgübalin siélu lúma uboú, barána lúma sun cátei le lídaanbei.

¹⁶ Lídan meja dan le sügújalibei, ígira lumútiña meja Búngiu güriña lun jadúgüni le jabúseerubei, ¹⁷ láu sun, arúfuda láani joun güriña cáteiñein lan láuja buídu le ladúgubei joun. Rúti júya woun lúma alúbajani buíti, ru ligía eígini buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña güriña lueí jáfaruniña bágasu jagía lun jadágaragúdún joun.

¹⁹ Ábati jachúlürün juríu Antioquíagiñe lúma Icóniogiñe, ába jagáñeiruni jarítangun güriña lun jachámuragun dúbü luágun Páblo. Lárigiñe, ába jadúruguduní bougudín lueí fulásu, sun jaríñagun luágu jiláali lan. ²⁰ Dan le jagúriridágun afíñetiña láu Páblo, ába lásaarun, ábaya lebélorun fulásurugún. Larúgan, ligía lídin lúma Bernabé ubúrugun Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñí jabei sarágu güriña afíñerutiña luágu Jesucrístu, ába jagíribudun, ába jóúdin Lístra, Icónio lúma Antioquíu. ²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélorun lídoun larúeijan Búngiu. ²³ Rútiña gíñe ábutigu lídan cáda jadámurin afíñetiña. Lásunti jayúmuragun lúma jayúnarun, ába jedéregeruniña lábun laríaajan Búngiu le uágubei jafíñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachúlürün Panflia. ²⁵ Ába japúrichijaní ugánu luáguti Jesucrístu ubúruge Péрге, líbiri méme Panflia, ábati jóúdin Atálioun. ²⁶ Nígiñe jádina, ában jóúdin Antioquíoun, le fulásu le ñíjin lubeí jóúnajoúa lábugiñe laríaajan Búngiu adúgei wadágimanu le jagúmuchubei guetó. ²⁷ Dan jachúlürün Antioquíu, ába jóúdaraguniña tánigu jalígilisin afíñetiña, ába jabájüdaguní sun cátei le ladúgubei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afíñetiña ñi.

¹ Ligía jayábin wügúriña Judéagiñe lun Antioquíoun, ába jagúmeserun arúfudaja joun affíñetiña luágu lun lan jasálbarún, mósu lan jerésibiruni wügúriña circuncisión, quei laríñaguni lilúrudun Moisés. ² Barúti Páblo lúma Bernabé ában sigénei weíriti jáma luágu cátei ligía, lagúmujoún óra, ába loúnajoún Páblo, Bernabé, jámaya ámu wügúriña Jerusaléoun lun jóúdin aráanserei cátei le jáma apóstolugu jáma tábutigu ligílisi to ñífboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jaffíñen lun jafálaruni Crístu. Ába jagúndaaragun sun affíñetiña láu ugánu le.

⁴ Dan jachúlürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adúga láalibei Búngiu jádaangiñe. ⁵ Ñíñanu jádaangiñe jadámurin fariséogu ja affíñetiña luágu Crístu, ába jaráramun, ába jaríñagun.

—Lúnti jerésibiruni wügúriña affíñetiña ja mámabaña juríu circuncisión, lúnti gíñe jagúnfulirun lúma lilúrudun Moisés.

⁶ Ábati jóúndaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába lásaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jaffíñerun luágu Jesucrístu. ⁸ Búngiuti, le subúdijabúbei tun anígi, arúfuda lumúti luágu resíbi láníña ja mámabaña juríu láu líchuguni Sífiri Sándu joun quei líchuguni woun. ⁹ Manúgün lumútiwa Búngiu ámu jaweí, jarúmagüda lumútu gíñe janígi láu jaffíñen luágu Jesucrístu. ¹⁰ ¿Cáti uágu laloúguada jaffíñen guetó luágu le adúga láalibei Búngiu, ru jugúya ában ijúrúgu jawágun affíñetiña ja, le wásiñerubei wagía guánarügü anúga—ni wagía ni binádu wagúbürigu? ¹¹ Affíñetiwa luágu sálbaadiwa lan láurügü waffíñerun luágu Jesucrístu, madúgünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña gíñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguru le ladúgübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána. ¹⁴ Abájüdaguaali Simón Pédro woun ída líña lan fuleísei láníña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabúrüjabei profétagu tídan Lerérun Búngiu.

¹⁶ Gumúguaali jarúeijan ladúgawagun Davíd, queísigubeirügü tagúmuchagun ában múna eíguadutu.

Lachúlürüba wéyu nun, áu le Búngiu, lúnýame naríjin jawágun ladúgawagun Davíd, ábame níchuguni ubáfu lun ában jádaangiñe lun larúeijan jádan.

¹⁷ Nadúgübei líra lun gayáraabei lan jayábin sun jíbiri gürígia lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ Ligía naríñagunbei luágu moun lání wíchugun sarágu lúru luágu jawágun ja mámabaña juríu, ja ígirubalín binádu jaffíñen lun jafálaruni Búngiu, ²⁰ buídurügüti láu labúrújoún joun lun jebé lan jeígin eígin le adágarawagüdúti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu.

²¹ Buíti lun jagúnfulirun lúma buri cátei le lun jíchugun inébesei joun juríu, ladúga

lúmagiñe bugája binádu dan, añájein güriña apúrichijati lilúrudun Moisés lídan ságü fulásu, alijjóati lúrudu luágu tídan buri jalígilisin jurú ságü luwéyuri eméraguni.

²² Ábati jarítangun apóstolugu jáma tábutigu liglisi jáma sun títana liglisi janúadajan wügúriña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le gíribei Barsabási, lúma Sílas, bián wügúriña weírigutiña jádan afíñetiña. ²³ Ába jóunajan ában gárada jáma, láriñajare tídan gárada tugúya.

“Wagía le apóstolugu, tábutigu liglisi, jáma sun jíbiri afíñetiña, mábuga wáña joun wadújeñu lueígiñe Jesucristu ja mámabaña jurú ja aganoúbaña Antioquía, Síria, lúma Cilícia. ²⁴ Agáambaadiwa luágu añájein lan güriña ñúdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jaríñangun jun luágu mósu lan jerésibiruni wügúriña circuncisión, queísi laríñangun lilúrudun Moisés. ²⁵ Ligía wúwaradúnbei lídan warítangun lun wanúadajan güriña wadaangiñe lun jóudin aríjaün úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucristu. ²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to woúnajaboun jun, jun. ²⁸ Maríbaanti laríjín lun Sífiri Sándu lúma woun, míchugúniwa lan ámu ijúrúgu jun lueídügüya murúsun cátei le, le lunbei jadúgüni. ²⁹ lun meígin jumá úwi le jáni anímaalu ja adágarawagüdütiña joun sándu, meígin jugúyame jítaü, ni úwi le jáni anímaalu ja tigíwarügütiña, madáangun jugúyame cátei buri jama güriña ja mamárieidúntiña júma. Ánjaün areídagua júngua lueí buri cátei le, buídubei jadúga. Buídu lámuga lídin jun.”

³⁰ Lárigiñeti jóunajóun luágu jawéiyasun, ába jóudin Antioquía. Dan le jachúlürünbei ñi, ába jóundaraguniña afíñetiña, ába jíchugunun gárada joun. ³¹ Dánti le jalíjanbarun afíñetiña, ába jagúndaarun sarágu luágu gurásu le tíchugubei joun. ³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afíñetiña láu jadímurejan joun, ru jagía idérebugu lun jafíñen. ³³ Lárigiñe jásügürün átiri dan ñi, ába jayoúragun afíñetiña joun lubá jagríbudun jámoun já meja óunajabaliña Jerusalén. ³⁴ Ánjeinti Sílas, ába leréderun. ³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijeí ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñangun Páblo lun Bernabé.

—Queímounya aríjaña afíñetiña lídan sun ubúrugü buri le ñi lubei apúrichija wamáali lan ugánu luágu Crístu, aríja wamáuga ída jáña lan.

³⁷ Busénti yebe Bernabé janúgüni Juan Márcos jámagua, ³⁸ májati Páblo janúgüni ladúga meja ígira láaña lan Panfília, masígiti jáma lídan wadágimanu. ³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanúgüni Bernabé Márcos, ába jóudin Chípree, ⁴⁰ ába lanúgüni Páblo Sílas. Lárigiñe jedégereruni afíñetiña Páblo lúma Sílas lújaburugun Búngiu, ába jóudin, ⁴¹ ába jásügürün Síriagiñe lúma Cilíciagiñe, íchaajeina gurásu joun afíñetiña liglisirugu.

16

Lídin Timoteo úara jáma Páblo lúma Sílas

¹ Ába jachúlürün Páblo lúma Sílas lídoun buri fulásu le Dérbe lúma Lístra, le ñi lubei jadárira ában afíñeti gíríti Timotéo, tiraü ában wúri jurú afíñetu luágu Jesucristu, güriégu lúguchi. ² Afíñetiña ja aganoúbaña Lístra lúma Icónio, buíti jadímurejan luágu. ³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun jurú ja aganoúbaña lídan buri fulásu ligía, quei subúdi jamáni luágu merésibirun láani circuncisión ladúga güriégu lan

lúguchi. ⁴ Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun affíñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdún tílana ligílisi lídan jafíñen, ába jagánwoundun affíñetiña ságü wéyu.

Lasálriragun ában wügúri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachúlürün luágu fadáguau le Mísia. Ñígiñe yebe jaritagua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadúgüni. ⁸ Ábati jóúdin surúru Mísioun, ába jarárirun Tróas. ⁹ Ñi lasálriragua ában wügúri Macedóniana lun Páblo, áriebu, rára ayúmuragua lun, laríñaga lun. “Queímoun Macedónia íderagua bámugawa.” ¹⁰ Lárigiñe lasálriragun wügúri ligía lun Páblo, ába waráansejan lun woúdin Macedónia láu wafíñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúru Filípos

¹¹ Ábati wáfayarun Tróasgiñe, ába woúdin sügúlügü luágun ubóju le Samotrácia, larúgan, ligía wachúlürün Neápolis. ¹² Ñígiñe ába woúdin Filípos, Filípos lábugiñeñein lagúmadijan Róma, ligía giñe ubúru le weírigutimáabei luágu loúba Macedónia. Reídeitiwa átiri wéyu ñi. ¹³ Luágu ában wéyu le luwéyuri eméraaguni, ába wáfuridun bougudin lueí ubúru, lárun dúna, lídan ában fulásu le ñi lubeíja layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun wúriña ja óundaragubáña ñi. ¹⁴ Ñíñoun ában jádaangiñe, gírítu Lídia, ubúruguna Tiatíra, tifísiute alúguraja gamísa fínutu to gúchu tágu. Judúguatu wúri tugúya lun Búngiu, tagáamba-jañadiwa, ába lánjunrenchunun Búngiu tanígi lun tadúgün gásu láu le laríñagubei Páblo. ¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein affíne jubeí luágu affíne nan le tímátimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le woúdiña lan lídoun fulásu le ñi lubeíñaja layúmurawagúa lun Búngiu, ába wadúnragun túma ában irájü gawágu ában espíritu wuríbati le íchugubei ubáfu tun lun tasábiujan. Ában idámuni irájü tugúya, ibíjatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu úma lánina asálbaruni lídaangiñe figou jun.

¹⁸ Gíbeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáli lan jagáñeirun seínsu tueígiñe, ába jarügüdüni Páblo lúma Sílas, ába janúgüniña jagíbugiñoún ábutigu lamídaangua ubúru. ²⁰ Ába jarúfuduniña jagíbugiñe gumádimatiña, ába jaríñagun.

—Wügúriña jurú ja, jachágaraguñein wabúrugute, ²¹ jarúfudajaña igáburi le wásiñerubei erésibira ni adúga ladúga Rómana wagía.

²² Ábati jiñúragun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe. ²³ Lárigiñe sarágu abeichúni, ába jádaruniña furísunrugún, ába jaríñagun lun ónigiruti adaürútiña lun goúnigi lánina buídu. ²⁴ Dan libíjini ónigiruti lúru le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi áriebu, ñíñanu Páblo lúma Sílas ayúmuragua lúma erémuja urému lun Búngiu, ja jíbiri, agáambaja. ²⁶ Sódini, ába liábin ában oúnwenbun járabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güríngüri le jawágubei adaürútiña. ²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágu ñúdüngua jamá adaürútiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagúdi Páblo lúma Sílas. ³⁰ Ába laságaruniña furísunrugugiñe, ába laríñagun joun.

—Wügúriña, ¿ca cátei lúnbei nadúgüni lun nasálbarun?

³¹ Ába jaríñagun lun.

—Afiñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña. ³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. ³⁴ Lárigiñe, ába lanúgüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

³⁵ Larúgan bináafin, ába jóunajan gumádimatiña polisía aríñaga lun oúnigiruti lun lígiragüdúniña Páblo lúma Sílas. ³⁶ Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünün, gayárajali lubeíti jídin darángilañu.

³⁷ Ába laríñagun Páblo joun polisía.

—Láu sun Rómana wamá, beíjamutiwa jagíbugiñe gürígia, míchigunga dan woun lun wadímurejan waweígíñegua, dágua jamáwa furísunrugun, ¿guetó buséntiña jígiragüdúniwa arámudaguárügü? ¡Máfuridunbadiwa! Núbin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómana jamá Páblo lúma Sílas. ³⁹ Ábati jóudin amúriaja ferúdu jama, ába jaságaruniña, ába jayúmuragun joun lun jáfuridun nígiñe ubúrugugiñe. ⁴⁰ Dan le jáfuridunbei furísunrugugiñe, ába jóudin túbiñe Lídia, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

17

Chagáguai ubúru Tsalónica

¹ Lídan jaweíyasun Páblo lúma Sílas, sügútiña Anfípolisgiñe lúma Apolóniagiñe, nígiñe, ába jachúlürün ubúrugun Tsalónica le ní tubei ában jalígilisin juríu. ² Quei léchun Páblo, ñúdünti tídan ligílisi tugúya, adímurejati jáma úrüwa dimáasu, ságü luwéyuri eméraguni. ³ Arúfudajati joun quei taríñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, ába lánme lásaarun lídaangiñe ouweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña gürígia.

⁴ Ábati jafíñerun jádaangiñe juríu, ába júaradun lúma Páblo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würiña weírigutiña. ⁵ Juríu ja mafiñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügúriña wuríbatiña ja eíbugañajádügübaña úmada, ába jachágaraguágüdúniña gürígia ñi ubúru. Ába jaságarajanun lúban Jasón, áluajaña Páblo lúma Sílas lun jaságaruniña lun jedégeruniña jájaburugún gürígia. ⁶ Queíti madári jamániña ñi, ába janúgüni Jasón jáma átiri jádaangiñe afíñetiña jagíbugiñoún gumádimatiña lídan ubúru ligía, ába jagúaragun aríñaga.

—Wügúriña ja, ja ebéresejabaña lídan sun fulásu, chülújaña gíñe ñájoun, ⁷ resíbi láaña Jáson lúbiñe. Sun jagía dūrúgua jamúti lilúrudun Urúei César, ladúga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri gürígia cátei le, ába jachágaragun. ⁹ Jáson jáma ja jíbiri, ába jafáyeijan, ába jígirawagüdúniwa.

Páblo lúma Sílas ubúru gu Beréa

¹⁰ Furése furése, dan le labúrigadun, ába jóunajaniña afíñetiña Páblo lúma Sílas ubúrugun Beréa. Quei jachúlürün ñi, ába jóudin tídoun jalígílisin jurú. ¹¹ Jurú ja ñibaña, buítimaati jagáburi jaweí ja Tesalónicabaña, resíbi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubeí le aríñawagúbei joun. ¹² Sarágu jáña lubeíti afíñerutiña jádaangiñe, afíñe jagía gíñe sarágu ja mámabaña jurú, dándu würiña weírígutiña quei wügúriña. ¹³ Dan le jasúbudirunbalin jurú ja Tesalónicabaña luágu lapúrichijañein lan gíñe Páblo Lerérun Búngiu Beréa, ába joudin achágaraguágüdaña gürígia ñi. ¹⁴ Ába jóunajani afíñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñúdünbaña láu Páblo, ába jáfayajan lúma chülú ubúru gu Aténas. Lárigiñe, ába jagíríbudun barüina jagía dimúrei lun Sílas lúma Timotéo lun jóudin lárigi Páblo lídan lufúresen.

Páblo ubúru gu Aténas

¹⁶ Sun niján lan Páblo Aténas agúrabajei Sílas lúma Timotéo, medéraguágüdúnti larítagun láu laríjini ubúru gu ligía buin jáu bürúbün sándu. ¹⁷ Ligíaja ladímurejaanbei tídan jalígílisin jurú lúma jáma ja mámabaña jurú ja ájuduragubaña lun Búngiu, adímureja ligía buri ságü wéyu jáma gürígia ja úmadarugubaña, ní lubei jadámuridagua. ¹⁸ Níñanu jádaangiñe wügúriña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan laríñagubei wügúri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiu gu.

Jaríñagunbeiti ítara ladúga lapúrichijan Páblo joun luágu Jesúsu lúma luágu ásaaruni lídaangiñe ouweni. ¹⁹ Ábati janúgüni lídoun ában fulásu gíriti Areópago, le ñi lubeíja jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoubaña ñi, marítaguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügúriña Aténasna, aríja numúti luágu afíñe jumá jawágu jisándun, ²³ ladúga dan le aríaajeina nubálin fulásu buri le ní lubei jájuduragua joun jisándun, darítina ában latárü le ní lubei bürúwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ ‘Ligía Búngiu le adúgübalin ubou lúma sun cátei le ubouágubei, ligía labúremebei siélu luma ubou. Maganounti tídan ligílisi to jadúga gürígia, ²⁵ memégeirun lumúti gíñe le gayáraabei jadúgüni gürígia luágu lufúleisein, ligía guánarügü íchugubei ibágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügúri ladúgaña sun néchaanigu lun jaganoún lídan sun fulásu, aráanseleí dan le lúnbei jabágariduni lúma fulásu le lúnbei ñiba lan jagánawa.

²⁷ Adúga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe. ²⁸ Ladúga lídaangiñeti Búngiu awánjein lubeí, gabágari wagía, eíbuga

wagía ligíbuagu uboú le, quei jaríñaguni poétagu jídaangiñe. “Lirájüñü Búngiu wagía.”

²⁹ Queíti lirájüñü wabeí Búngiu, moún lumuti wanúgüni Búngiu quei ában sándu le gólu, o pláta o dúbü le jadúga wügúriña quei jarítangun luágu ítara líña lan Búngiu.

³⁰ Mebéresegúnti méja Búngiu láu cátei le jadúgübei gürígia lábugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jóuserun.

³¹ Ladúga anúadajaali Búngiu ában wéyu lun ligíaba lan wéyu lagúseragüdüniña gürígia ja uboúagubaña láu ísuruni láu ában wügúri le anúadaja láalibei, wügúri ligía, ligía Jesucrístubei, arúfuda lumúti woun láu lásaaragüdüni Jesúsú lídaangiñe oúweni lúnya labágaridun.

³² Dan le jagáambubei luágu ásaaruni lídaangiñe oúweni, ñíñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafíñerun jádaangiñe luágu Jesucrístu, ába jafálaruni. Ñíñein Dionísio jádan, lé meja ában jádaangiñe ábutigu lídan fulásu le gíríbei Areópago, túma gíñe ában wúri gírítu Dámaris, jámaya ámu gürígia.

18

Páblo ubúruyu Corínto

¹ Lárígiñe cátei le, ába láfuridun Páblo Aténasgiñe, ába lídin ubúruyu Corínto. ² Ñi ladárira ában juríu gírítu Aquíla, túma lúmari to gíríboun Priscíla, Póntona jagía. Málügili lueígiñe jayábin Itáliagiñe, jayábinbei ñígiñe ladúga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lífisiute jáma—tadáawagun quiámpu—ába leréderun jáma lun jawádímaridun lídan ában. ⁴ Ságüti wéyu le lídáani eméeraaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Aríñagati joun juríu furáangu luágu Jesúsú lan Crístubei le jagúrabajabei lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeíbei, anábagua buri jameí. Ábati láfuridun Páblo labíte jawágun, arúfudeí joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügúri gírítu Jústó, wügúri ligía, judúguati lun Búngiu, ñi toubagiñe ligílisi lagánawa. ⁸ Críspo, le tábuti jalígílisin juríu, ába lafíñerun luágu Wabúreme Jesucrístu, jáu sun tílana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún. ⁹ Ábati lasáliragun Wabúreme Jesúsú lun Páblo luágu ában áriebe, ába laríñagun lun.

—Manúfudebá, bapúrichija méme, mámanichabá, ¹⁰ ladúga anájein búma, úabei ni ában agúruruti buágu lun ladúgün wuríbani bun. Añájein sarágu gürígia lídan ubúruyu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajeí Lerérun Búngiu joun lílana fulásu.

¹² Lídan dan le Galión lan gumándanbei Acáya, ába jóúndaragun juríu lun járügüdüni Páblo. Ába janúgüni ligíbugiñoun lúruđu lun lagúserawagüdún. ¹³ Ába jaríñagun lun gumándan.

—Wügúri le, leréde arúfudaja joun gürígia lun jájuduragun lun Búngiu láu ában igáburi le múaraanbei lúma lúruđu.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wurfbani o dúru júrüti ladúgübei wügúri le, níchaaguña jamúga núngua lun nagáambunün, jugúya jurú, ¹⁵ quei luágu lan dimúrei buri, lúma íri, lúma jilúrudun, aráanse jumei júngua, ladúga mabúseeruntina nagúseragüdün luágu buri cátei le.

¹⁶ Ába labúgaguniña nígiñe. ¹⁷ Ábati járügüdüni sun güriégugu Sóstenes le tábuti jalígilisin jurú, ába jabúleiseiruni ñi guánarügü ligíbugiñe gumándan. Mebéresegúnti Galión láu líra.

Lagíribudun Páblo Antioquoun, lagúmeseruni lúruwan luweýyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layóuragun joun affñetiña, ába lídin Síria úara túma Priscíla lúma Aquíla. Ába lásaruni lídburi lídan ubúrugü Céncrea lubáragiñe ládinun, lun lagúnfulirun láu ában méja darádu le ladúgübei lúma Búngiu. ¹⁹ Dan le jachúlürün ubúrugü Éfeso, ába lígiruniña Páblo Priscíla lúma Aquíla lun jeréderun ñi lídan ubúrugü ligía. Lubáragiñe lígiruni Páblo Éfeso, ába lídin ligílisirugü adímureja jáma jurú. ²⁰ Ába jamúriajan lúma lun leréderun méme ñi jáma, májati. ²¹ Ábati layóuragun joun, laríñaga joun.

—Mósu ñi nan Jerusalén lubá fédu le lúnbei ladügün, nagíribudayaba aríjaün ánjein busén Búngiu.

Ába ládinun, ába lídin Éfesogiñe. ²² Túrúti Cesaréa, nígiñe ába lídin Jerusalén abúsurá joun tílana ligílisi, lárigiñe, ába larágachun Antioquoun. ²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajaina dúgüdaguau joun affñetiña.

Lapúrichijan Apólos ubúrugü Éfeso

²⁴ Lídan dan ligía, ába lachúlürün ában jurú gíriti Apólos ubúrugun Éfeso, Alejandríana jurú ligía. Gapúrichijati, áni subúdi lumúti gíñe Lerérun Búngiu buídu buídu. ²⁵ Subúdi luáguti Asálbaragülei le lúnbei líabin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsú, inárüni, láu sun lougua lan lasúbudirun luágu, le rügüñein larúfudajabei Juan le abásteragüdajabei luágu Jesúsú le lúnbei líabin lárigiñe, lasúbudira. ²⁶ Luágu ában wéyu, dan le ladímurejaña lan Apólos tídan jalígilisin jurú láu sarágu ichóuruni, ába jagáambuni Priscíla lúma Aquíla. Dan lagúmunchun lapúrichijan, ába janúgüni Priscíla luma Aquíla jábiñoun lun jafúnraanguagüdünitima luáguti Jesúsú le Wasálbaragülei lun, luma luáguti cátei le larúfudajabei. ²⁷ Dánti le labúseerunbei Apólos lídin loubawagun Acáya, lúmagiñeñanu affñetiña Éfeso lun lídin, ába jóunajan ában gárada joun affñetiña ja níbaña Acáya lun jerésibiruni buídu. Dan lachúlürünbei Apólos Acáya, íderagua lumútiña ja lafñeragüdúbaña Búngiu luágu Jesúsú, láu lareíni, ²⁸ arúfuda lumúti joun gürgia láu richaú le siñá jamuti asígenera, luágu marícha lan le jarúfudajabei jurú, arúfudaleí joun tídaangiñe Lerérun Búngiu luágu Jesúsú lan Crístu le jagúrabubei lun lasálbaruniña.

19

Páblo ubúrugü Éfeso

¹ Sun niján lan Apólos ubúrugü Corínto, ligía lásügürün Páblo labádinaguagiñe buri fulásu, ába lachúlürün Éfesoun ñi lubei ladárra sarágu affñetiña. ² Ába laríñagun joun.

—¿Resíbi jumútisan Sífiri Sándu dan le jaffñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásteragüdün Juan.

⁴ Laríñaga Páblo joun.

—Labásterágüdüniña méja Juan güriña, arúfudei luágu sáansi jamáali lan jouserun, aríñagati gíñe joun luágu lúnti lan jafíñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmugugiñe. ⁷ Jawáraañanu dúusu wügúriña jádan sùngubei.

⁸ Úrüwañein játi láu Páblo abásija tídoun jalígílisin juríu le ñi lubeija lapúrichija, admureja ligíaja furáangu luágu larúeijan Búngiu, afíñegüda láña güriña luágu. ⁹ Níñanu gíñe, edéragüdütu janígi, májatiña jafíñerun, admurejarúgü jagía wuríba luágu lémeri Crístu jagíbugiñe güriña. Ábati ladíreirun Páblo jaweí, ába lanúgüniña ja afíñebaña luágu Jesucrístu tídoun ában lescuéla to ñi lubei larúfudaja ában wügúri gíríti Tiránno, ábaja ladímurejan ságü wéyu joun, ñi. ¹⁰ Ítara líña lasígirun luágu bián irúmu, súnti ja aganoúbaña loúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adúgati buríti Búngiu oúnwenbun buri miláguru lídaangiñe Páblo, ¹² darí lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

¹³ Níñanu juríu eíbugañajádügütiña, aságajatiña gíñe espíritugu wuríbatiña jaweí güriña, álugatiñá yebe jayúsuruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

¹⁴ Níñanu sédü lirájüñü ában juríu gíríti Escéva, jábuti méja fádirigu, jádan ja adúgübalin buri cátei le. ¹⁵ Níjein ában jadúgüni, ába loúnabuniña espíritugu wuríbati ligía.

—Subúdi numúti Jesúsu, subúditi gíñe nun cátei lan Pálobei, ánjein jugúya, ¿cátaün?

¹⁶ Ába lachúragun wügúri le láubei espíritugu wuríbati lúngua jawágun, gabáfuti sügü jáu sùngubei, ába labúleiseiruniña buídu, ába jeíbaagun ñígiñe surúsu luma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíríti linébedun líri Wabúreme Jesúsu joun.

¹⁸ Sarágu gíñe buri jádaangiñe ja afíñerubaña, ába jayábin agúfeserei buri cátei wuríbati lé meja jadúgübei, ¹⁹ sarágu gíñe buri jádaangiñe já meja gabíñarajadibaña, ába janúgünun jalíburun buri, ába jágdunun jagíbugiñe sùngubei. Dan jabájüdünbalin tebégi líburu buri tugúya, gebégitu quei buri dimí-san mílu murúsun seínsu le pláta. ²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáan-siragüdüni jagáburu güriña.

²¹ Lárigiñe sun cátei le, ába laráanserun Páblo lun lídin aríjaña afíñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárigiñe lanme lídin Jerusalén, lídiba lan gíñe Róma. ²² Ábati loúnajan bíama jádaangiñe ja íderagubalin lubá, Macedónia, wügúriña jagía, Timotéo luma Erásto, ligía, ába leréderun átiriraüya dan Ásia.

Chagáguai ubúru Éfeso

²³ Lídan dan ligía, níñein ában oúnwenbun achágaraguní Éfeso jaweígíñeti ja afálarubalin lémeri Crístu, ²⁴ lídaangiñeti ában wügúri gíríti Demétrio, ladáawagun cátei láuti pláta lífisiutebei. Wügúri ligía, adáaguati tirájüñü ligíli láu pláta to tilígílisin sándu to gíríboun Díana, belútiti sarágu seínsu joun ja ñadágimeinbaña luma. ²⁵ Ábati loúndaruniña ja ñadágimeinbaña luma úara jáma ámu ja ñadágimeintiña ámu físu le lenége jafísiute, ába laríñagun joun.

—Wügúriña, subúdi jumúti luágu ñulú lan wabágari láu físu le, ²⁶ agáamba jumáali, aríja jumeí ída líña lan lídin Páblo aríñaga luágu máma jamá búngiugu sándu ja

jadügübaña wügüriña, áni gíbeeña gürígia jafíñeragüdún, mámarügü ya Éfeso, lídan gíñe líbe-ágei Ásia. ²⁷ Ñónguati cátei le, ladúga gayáraabei weféridiruni wabísínisin, gayáraabei gíñe teféridiruni tilígílisin búngiu Diána tuweírigun, ábame tanügún búngiu Diána to únoun jajúduragua sun gürígia Ásia lúma lídan sun uboú quei ni cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

²⁹ Níñeinti ában oúnwenbun achágaraguní lídan sun ubúru gu ligía. Ába járügüdüni Gáyo lúma Aristárco, biáma wügüriña Macedóniana ja úarabaña lúma Páblo, ába jadúruguduniña chúlú tuágun múna to ñi lubeíja jóundaragua. ³⁰ Álugatí yebe Páblo lebélorun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélorun. ³¹ Níñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélorun lan ñíjin. ³² Níti lídan adámurini, jíbiri agúaragua ában cátei, jíbiri agúaragua ámu, ladúga chagágujaña gürígia, jíbe-ágei, ibídiñeti joun ca lan lébubei jadámuridagun. ³³ Níñanu jádaangiñe gürígia, ába jafún-raanguágüdüni cátei le lun Alejandro, le jádajabei juríu ligíbugiñoun guríriguaü lun ladímurejan luágu jafúleisein. Ába ladügün Alejandro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigutu Diána to jabúngiute Éfesona!

³⁵ Dánti le gálumagüda láaña abúrújati le láni ubúru gu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígílisin búngiu Diána, túma tiyáwa to áburujaboun siélu gíñe. ³⁶ Quei úa lan ni ában lun lasígeneruni cátei le, gáluma jumá, madúga jumá ni cáta masáminarunga jumeí buídu. ³⁷ Wügüriña ja, ja janügübaña ñájoun, míwerujan jamágiru jilígílisin, madímurejan jagía wuríbatí tuágu jubúngiute. ³⁸ Ánjein níjein lubeí cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubeí agúseragüdüti lúma agúseragülei, gayáraati jidin ligíbugiñoun lúru du lun ladímurejan cáda ában lueígiñegua. ³⁹ Ánjein ámu lubeí cátei jamúriajabei, lúnti laráanserún lídan ában adámurini le richáti, ⁴⁰ ladúga gayáraabei laríñawagúniwa luágu wagúbujaña lan wuríbani ladúga cátei le asúseredubei ugúñe, ibídiñebei woun cába lan wounabagüle ánjawa álügüdüwa luágu chagáguau le.

⁴¹ Lárigiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchunbei chagáguau Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábati loúburuniña, ába layóuragun joun, ába lídin Macedónioun. ² Luágu luweíyasun, chúlúgueina líña jámagiñe afíñetiña lídan buri fulásu le ídaangiñebei lásügüra, ru ligía sarágu dúgüdaguaü joun láu lerérun. Ítara líña lachúlürün lídoun ageíraü le Grécia. ³ Reídeiti úrüwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíribudun múarugugíñe, sügüina ligíaya Macedóniagiñe. ⁴ Gíbetiña wügüriña ñúdüntiña úara lúma. Sópater, le liraú Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbegiñe, Timotéo gíñe, lúma gíñe Tíquico lúma Trófimo, Ásiana. ⁵ Afíñetiña ja, ába jóudin wabá, ába jagúrabuníwa ubúru gu Tróas. ⁶ Wagía, lárigiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárigiñe, ligía wátürün Tróas, le ñi lubei wúwarada jáma ja ñúdünbaña wabáragiñe, ába weréderun ñi sédü wéyu.

Bisída láni Páblo ubúruгу Tróas

⁷ Samúdi gúñoun, ába jóundaragun affñetiña lun jeígin fein le jarítaguagüle luágu loúnwen Crístu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebe. ⁸ Íñuñanu lídan lúruwan túbanana múna to ñí lubei jóundaragua, ñíñein sarágu lámpu durúngu. ⁹ Ñíñein ában irájü agáambaja, ñun líña luágu funédere, Eútico líribei. Queíti lílúbei lapúrichijan Páblo áriebe ligía, ába ladábudun lágu irájü ligía, ába larúmugun ñi, ába leíguadun lídaangiñe lúruwan túbanana múna, múarugun. Dan le jarárirunbei lun jiñúraguni, jiláali. ¹⁰ Ábati larárirun Páblo, ába laroúnrun ligíbuagu irájü ligía, ába loúburuni. Ába laríñagun joun afíñetiña.

—Madíjeri jumá, gabágaríyaali.

¹¹ Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaaali lídin. ¹² Irájüti buga ligía, ába janúgüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába gíñe woúdin, ába wádinun tídoun ugúnein, ába woúdin chülú Asón, le ñí lubei lúnti lan wabúduni Páblo quei wadáradun, ladúga busén lan lídin Asón múarugugiñe. ¹⁴ Dan le wadúnragun lúma ñi Asón, ába ládinun wáma, ába woúdin Mítiléne. ¹⁵ Larúgan, ába wáfuridun ñígiñe, sügüína wagía ligíbugiñe uboúju Quío, ában wéyu lárigiñe, ligía wachúlürün uboúju Sámos. Ába weméraagun ubúruгу Trojílio, larúgan, ligía wachúlürün ubóruгу Miléto. ¹⁶ Mátürüntiwa ubóruгу Éfeso luágu waweíyasun ladúga mabúseerun lan Páblo leréderun sarágu dan ageíraü Ásia, buséti lachúlürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachúlürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachúlürün Ásioun.

¹⁹ Sun dan le jagánaguañadina lubeí, seríwitina lun Búngiu láu únabuni, láu sarágu águiraiü, súfuri áu sarágu láu cátei lé buri jabúseerubei juríu jadúgün nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaiü lúma júbiñe. ²¹ Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jaffñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügúñein nasúbudirubei, luágu sun lan ubóruгу le ñí lumuti nídin, aríñagati Sífiri Sándu nun luágu nadaürúba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebéresera, ni nibágari guánarügü, mebégiti ni cáta nun, adúgarügü náali ligía le uágubei loúnajana Búngiu láu ugúndani darí lúmoun lagúmujoún, lun nadímurejani ugánu buíti luágu línsiñejabu Búngiu.

²⁵ ‘Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. ²⁶ Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ ladúga subúdigüda náali sun laráansejan Búngiu jun, marámuduntina ni cáta jueí. ²⁸ Toúnigigua jumá lubeíti júngua, toúnigi jumáñame affñetiña ja líchugubaña Sífiri Sándu lun jóunigiruniña, ja tánigu líligílisin Búngiu, ja lagáñijabaña láu líta Liraú guánarügü. ²⁹ Subúdi numúti luágu dánme lan nídin, jayábinba lan ámu áluga jagúnrinchaguni jafíñen, quei lebélurun geígusi jádoun mudún áfaraguaña. ³⁰ Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña affñetiña. ³¹ Toúnigi jumá lubeíti, jarítagua jumeí luágu úruwa lan irúmu náu ewéridijaün wéyuagu áriebe, ayájua buri áu.

³² ‘Guetóti, nidújeñu, derége numútün lun Búngiu lúma lun ugánu le luáguti lín-siñejabu, le gabáfubei lun léredagüdüni jafíñen lúma lun líchugun ubáraü jun siélu jádan ja derégeguáañabaña jóungua lun. ³³ Mabúseerun nágili ni liseínsun ni ában, ni lanáangun, ³⁴ lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemegeirubei ja nómabaña. ³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemegeirun, luágu gíñe lúnti lan larítawagún luágu dimúrei le laríñagubei Wabúreme Jesúsu dan le laríñagunbei. “Gúndaatimáati le íchugubei sügú láu le erésibirubei.”

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súnigubei. ³⁷ Ába jayájun súnigubei láu igárigu, ába jóúburuni Páblo, ába jachúuruni. ³⁸ Jírutiñati ladúga laríñagun joun luágu maríjindügüya jamáali lánme. Ába jóúdin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña affíñetiña, ába woúdin sügúlügü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara. ² Ñi Pátara wadárira ában ugúnein tebuga Fenícia, ába wádinun tídoun, ába woúdin. ³ Dan wásügürün, ába waríjini uboúju le Chípree, ába wígiruni lueígiñe wabaúna, ába wasígirun darí wachúlürün Síria. Queíti taráriguágüdüba lan ugúnein lídan ubúrgu le gíribei Tíro, ába warárirun ñi. ⁴ Áluaja wamútiña affíñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun mídin lan. ⁵ Dan lásügürün sédü wéyu ligía, ába woúdin. Sun affíñetiña jáu jámarigu jáma jasáanigu, ñúdüntiña íchaajawa chúlú boúgudi lueí ubúrgu, ñi béyabu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchuni waweíyasun baránaja lúmagiñe ubúrugugiñe Tíro darí Tolemáida, le ní lubei wabúsura joun affíñetiña, ába weréderun ában wéyu jáma ñi. ⁸ Larúgan, ába láfuridun Páblo wáma, wagía le lúmabei, ába wachúlürün ubúrgu Cesaréa. Ñi woúdin lúbiñe Felípe le apúrichijabalin ugánu luáguti Jesucrístu, ába gíñe jádaangiñe sédü wügúriña já meja anúadajoúbaña Jerusalén lun jeténirun lun le jemegeirubei affíñetiña, ába weréderun lúma. ⁹ Gasáaniguti Felípe gádürü wúriña irájüñü ja máfuridungiña, íbja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachúlürün ában proféta Judéagiñe, gíriti Ágabo, ¹¹ liábiña aríjawa. Ába lanúgüni lubélitin Páblo, ába lagúraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagúraguni juríu labúreme bélitin le ubúrgu Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába laríñagun Páblo.

—¿Ca uágu jayájua, írudagüdána? Aráansetina mámarügü lun nagúrawagún Jerusalén, aráansetina darí lun noúnwen lueígiñe Nabúreme Jesúsu.

¹⁴ Quei siñá wamani larítagun agáñeira, ába wígiruni, ába waríñagun lun ladügüniwa lugúndan Búngiu.

¹⁵ Dan le gumújali webélujan ñi, ába waráanserun, ába woúdin Jerusalén. ¹⁶ Ñúdütiña jádaangiñe affíñetiña wáma Cesaréagiñe, ñíñein ában Chípree jádan, gíriti Mnasón, lújali lueígiñe lafíñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachúlürün Jerusalén, ába jerésibiruniwa affíñetiña láu ugúndani. ¹⁸ Larúgan, ába woúdin lúma Páblo aríjei Jacóbo, ñíñanu gíñe sun tábutigu ligílisi Jerusalén. ¹⁹ Ába

labúsurun Páblo joun, ába labájüdaguni sun cátei le ladúgübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Páblo.

—Wadúje, aríjabásan, añájein sarágu mílu juríu affínerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madúgün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadúga? Joúndaragubátia juríu dánme le jasúbudiruni luágu chülújadibu lan, lun jadúgün wuríbani bun. ²³ Niján cátei le lúnbei badúgüni. Añájein gádürü wügúriña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárigiñeme gayárajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni affíñejaña luágu Búngiu, abúrújaadiwa joun lun madíjeri jamá luágu buri cátei le, lúnrügü meigin jamá úwi le dagágüdawaali joun sándu, ni jítaü, ni anímaalu le tigíwarügüti, lun gíñe úa lan ni ában agámariduti wúri to mamárieiduntu lúma.

Járügüdüni Páblo adáüra tídan témpulu

²⁶ Ábati lanúgüniña Páblo gádürü wügúriña jagía, larúgan, ába larúmadaguagüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügúriña jagía lun jarúmadun, léme lidáani jadágaragüdün cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába jarügüdüni Páblo, ²⁸ ába jagúaragun.

—¡Wügúriña Israelítagu, íderagua jumáwa! Niján wügúri le ešbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladúga meja jaríjini Páblo ubúru luágu lúma Trófimo le Éfesona, jarítaguatíñati luágu barúlaani témpulurugun.

³⁰ Ába jachágaragun sun lílana fulásu, ába jayábin gürígia ešbaagueina. Ábati jarügüdüni Páblo, ába jadúruguduní bougudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachúlürün ugánu lun gumándan luágu chagágujaña lan sun lílana ubúru Jerusalén. ³² Ábati loúndaraguniña gumándan lisúdaaranigu jáma jábutigu, ába lachúlürün ešbaagueina le ñíjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagúraguágüdüni láu bián güríngüri, lárigiñe, ába lálügüdajan cátei lan, lúma ca lan lidúnrunbei. ³⁴ Ámuñegueinarügüti cátei jaríñagun gürígia, siñátiti gunfaráanda lan gumándan ni cáta ladúga ireíni le jadúgübei, ába lanúgagüdüni jábiñoun súdaara. ³⁵ Dan le jachúlürünbei luágu testépute múna, ába janúgüni súdaara Páblo oýuajaina lueí jáfaruni gürígia jilágubei, ³⁶ ladúga jayábiña súnagubei jarígi agúarajaina.

—¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu? ³⁸ ¿Máma lubei bugúya Ejíptona lé meja adúgübei ában mabúchajaü luágu ában dan, ába lanúgün gádürü mílu wügúriña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adúgabá fuleísei nun lun bígirunina lun nadímurejan joun güriégia.

⁴⁰ Ába líchugun gumándan úma lun, ába laráramun Páblo luágu estépu, ába líchugun seíni láu lújabu joun güriégia lun jámanichun. Dan le manígaali, ába ladímurejan joun lídan hebreo, le jerérun juríu, ába laríñagun.

22

¹ —Nidújeñu jáma jagúbürigu, agáamba jumei le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³ —Juríu áu, le gumúti, ubúrugú Társo louábawagu Cilícia nagúriajouá, ya Jerusalén naweírída. Lábugiñe larúfudajan Gamáliel natúriaja, úarati larúfudajan lúma jalúrudun binádu wagúbürigu. Joúchatina súnwandan lun nesériwidun lun Búngiu táu sun nanígi, queígubeirügü ligáburi jadúgüni jugúya ugúñe wéyu. ⁴ Áu, eíbaaja numútiña meja lánigu Crístu darí náfaraguniña jilágubei, barúgua áu wügúriña furísunrugun. ⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Núdüntina ñi áluajaña afíñetiña luágu Crístu lun nanúgüniña ñájoun lun nasúfuriragüdúniña.

Labájüdaguní Páblo luáguti lasáansiragun ligáburi

⁶ ‘Dan luáguñadina lubei úma, yaráfaadina lun nachúlürün Damáscó, queíburi amídirugu, sódini ligía ladúnraagun ában oúnwenbun larúgounga siélugiñe náu, ⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun. ¹⁰ Ábati naríñagun. “¿Cábagi nadúga, Nabúreme?” Ába laríñagun nun. “Sarába, beíba luágu buweíyasun Damáscoun, ñíba laríñawagúa sun le lúnbei badúgüni bun.” ¹¹ Queíti maríjingüda láadina lubei buga larúgounga ligíra, ába járügüdüni ja nómabaña nújabu darí wachúlürün Damáscó.

¹² ‘Ñiñein ában wügüri Damáscó gíriti Ananías, gúnfuliti buídu lúma lilúrudun Moisés, sun juríu ja aganoubaña Damáscó adímurejatiña buídu luágu wügüri ligía. ¹³ Ába liábin Ananías aríjana, dan lachúlürün, ába laráramun nubádu, ába laríñagun nun. “Nidúje Sáulo, íbjayabei baríjin lárigoún.” Lídan méme óra ligía, ába léfegechun nágu, ába naríjjini. ¹⁴ Ábati laríñagun nun. “Anúadaja láadibu Jabúngiute binádu wagúbürigu lúmagiñe binárü lun basúbudiruni lugúndan, lúma lun baríjjini Jesúsu le richáguabei, lun bagáambuni lumálali, ¹⁵ ladúga bíchuguba lan fe luágu Jesúsu joun sun güriégia, abájüdagubeíme le aríja báalibei lúma le agáamba báalibei. ¹⁶ Guetóti, ¿ca uágu badárasaja? Sarába, badíseibá jeméniñiñu luágu Wabúreme lun lachíbun bifígoun.”

Labájüdagun Páblo luágu louñajouñ apúrichija joun ja mámabaña juríu

¹⁷ ‘Dan nagíribudun ubúrugun Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun, ¹⁸ ába laríñagun nun. “Furíba yágiñe

Jerusaléngiñe, oúfuda, ladúga madúgünbaña juríu gásu láu le baríñagunbei nuágu lídan fulásu le.”¹⁹ Ábati naríñagun lun. “Nabúreme, subúdi jamúti luágu ñúdü nán buri méja tídan sun jalígílisin afíñetiña anáajaña ja afíñebaña buágu furísunurugun, beí buri náña.²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubárun janáangun ja áfarubalín.”²¹ Ába laríñagun Nabúreme nun. “Beíba, ladúga nouñajadibu díse, apúrichija joun ja mámabaña juríu.”

Páblo lújaburu gu gumándan

²² Agáamba jamúti chülú lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchatí lun labágaridun!

²³ Queíti jasígirun agúaraja, achújoun buri janáangun, achúja calíqui íñun le jagáñi,²⁴ ába laríñagun gumándan lun ladarúniwa Páblo jábiñoun súdeara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara.

²⁵ Dan le gürágua jamáali lun jabeíchuni, ába laríñagun Páblo lun jábuti súdeara le ñíbei.

—¿Garíchatúnsan lun jabeíchun ában wügúri Rómána, magúserunga ligía?

²⁶ Dan le lagáambuni jábuti súdeara cátei le, ába lídin aríñaga lun gumándan.

—Toúnigibátia láu le lúnbei badúgüni, Rómanatia wügúri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómána ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómána nan.

Laríñaga Páblo.

—Ánjein áu, ñi nagúriajóua.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómána lan Páblo, ába lanúfudedagun luegíñe lagúraguni.

Páblo jagíbugiñe lúrudugu juríu ja íñutimáabaña

³⁰ Larúgan, buséti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágüdüniña jábutigu fádirigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülú lúmoun wéyu le.

² Ábati loúnajan Ananías, fádiri le íñutimaabei, lun jagáyujajan ja yaráfabaña ñi luágun liyúma Páblo. ³ Ába laríñagun Páblo lun.

—¡Lagáyujajaba Búngiu buágu, biángua tigíbu bugúya le! Ñun bíña ñi lun bagúser-agüdüniña quei laríñaguni lúrudu, ¿cáti uágu bagáyujajaba nuágu, adúraaguei lúrudu?

⁴ Ába jaríñagun ja ñíbaña lun.

—¿Ítara liñasan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladúga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagúbürigu, áni jagúseragüdüñadina ladúga afíñe nan luágu jásaaruba lan jiláaña lídaangiñe oúweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafanreinragun adámurini. ⁸ Ladúga jaríñajare saduséogu luágu másaarunbaña lan jiláaña lídaangiñe oúweni, úatiña nege gíñe ánjeligu, ni espíritugu, ánjañati fariséogu, affíñetiña luágu sun cátei le. ⁹ Jareínchati súngebei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu gíñe jagía, ába jaríñagun.

—Wügúri le, úati ni cáta wuríbati ladúga, áni ánjeindügü ában lubeí espíritu adímurejabei lun o ában lan ánjeli, toúnigi wamátia lueí wadárirún oúcha weréderuni luwádigimari Búngiu.

¹⁰ Weírijali sigénei darí lun lanúfudedun gumándan lueí jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janúgüni jábiñoun súaara.

¹¹ Le ában áriebe, ába lasáliragun Wabúreme Jesúsú lun Páblo, ába laríñagun lun.

—Manúfudebá, Páblo, ladúga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejani lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Jougiñe bián-wein wügúriña ja aríñagubalin cátei le. ¹⁴ Ábati jóudin jámoun jábutigu fádirigu lúma jámoun wügúriña weírigutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanúgüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachúlürün.

¹⁶ Ába lachúlürün cátei le lábun lagáambun tiraú lítu Páblo, ába lídin jábiñoun súaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

—Barúbei irájü le lúmoun gumándan, níjein cátei lun laríñaguni lun.

¹⁸ Ába lanúgüni jábuti súaara lúmoun gumándan, ába laríñagun lun.

—Wáti adaürúti Páblo nun, ába lamúriajan núma lun nanúgüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanúgüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banúgüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun. ²¹ Maffínerabá joun, añájein jóugiñe bián-wein jawúgüriña arámudagu jabá úmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügúñein boúnabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoun Páblo lun gumádimati le Félix

²³ Ába lagúarun gumándan joun bián jádaangiñe jábutigu súaara, ába laríñagun joun lun jaráanserun bián-san súaara lun jóudin Cesaréa eíbu, úara jáma úrúwa-weindísi ja jawágutiña gabáyu, jáma bián-san ja táutiña efeín, lun jóudin ladaúnrun néfu gúñoun. ²⁴ Aráansegüdüti gíñe gabáyu lun laweínjaniña Páblo, ru ligía dimúrei lun

jachúlüragüdúni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun. ²⁷ Niján wügúri le, le noúnajabei bun, daújamaali yebe juríu áni jáfaraali yebe jilágubei, dan le nasúbudirúnbalin luágu Rómana lan, ába nídin jáu nisúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanúgüni jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürún. ³⁰ Quei lachúlürün lábun nagáambun luágu jaráansejaña lan juríu lun jáfaruni jilágubei, ligía lébubei noúnajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánibeí lúma.”

³¹ Ábati janúgüni súaara Páblo quei laríñawagúniwa joun, árieibu, chúlú Antípatris. ³² Larúgan, ligía jagíribudun súaara ja efbubaña, súaara ja jawágubaña gabáyu, ába jasígiruni jawéiyasun láu Páblo. ³³ Dan le jachúlürünbei Cesaréa, ába jedéregerunun gárada lun gumádimati, derége jameí gíñe Páblo. ³⁴ Lárigiñe lalíjanun gumádimati gárada, ába lálügüdajan jalána lan Páblo, dánti le lasúbudirúnbalin luágu Cilíciana lan, ³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachúlürün Ananías, fádiri le íñutimaabei, ubúrugun Cesaréa jáu wügúriña jádaangiñe juríu weírigutiña, lúma ában wügúri le subúdijabatí lun lúrudu, gíríti Tértulo. Ába jayábin lúmoun gumádimati lun jíchugun lidúnrun Páblo. ² Dan le lanügúniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lújadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibu luágu. ⁴ Lun magídarun wamáni bidáani sarágu, amúriajatina búma lun badúgün murúsun fuleísei woun lun bagáambuniwa luágu murúsun óra. ⁵ Niján wügúri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichúgüdinabei jadámurin nazarénugu. ⁶ Álugati gíñe lawíyedagüdünun témpulu ligíbugiñe Búngiu láu lebélaagüdün ában wügúri le mámabei juríu tídoun. Ába wárügüdüni, ába yebe wabúseerun wagúseragüdúni láu ligáburi walúrudun, ⁷ ába leméterun gumándan Lisías ñíjin, ába lagídaruni wawéí láu érei, ⁸ ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹ Juríu buri ja ñíbaña, aríñagatiña gíñe luágu inárüni lan sun le laríñagubei Tértulo.

¹⁰ Ába ladúgün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladúga subúdi náani luágu lúmagiñe lan sarágu irúmu bagúseragüdajan lídan fulásu le. ¹¹ Gayáraati bálügüdagun ánjein inárüni lubeí le lúnbei naríñaguni bun. Dúusurügügili wéyu lueígiñe nachúlürün ubúrugun Jerusalén lun nájuduragun lun Búngiu, ¹² madárirúnwatina asígeneja ni ca úma, ni achágaraguagüdaña gürígia témpulurugu, ni tídan buri tíbiri jalígílisin juríu, ni lídan buri ámu fulásu ubúrugú. ¹³ Gürígia ja, siñáti jarúfuduni luágu inárüni lan ni ában lídaangiñe sun cátei le jaríñagubei nuágu. ¹⁴ Ában cátei naríñagubei bun, luágu nesériwiduña lan lun Jabúngiute nagúbürigu quei larúfudajani Jesucrístu, le uágubei

jaríñaga luágu marícha lan. Afñetina luágu sun le bürúwañubei tídan buri líburu to lánina lilúrudun Moisés lúma lé meja jabúrújabei profétagu. ¹⁵ Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbabaña. ¹⁶ Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

¹⁷ ‘Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdün lun Búngiu. ¹⁸ Nadúgüñein yebe cátei le témpulurugu lárigiñe narúmudaguagüdün núngua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürígia ñi, ni chagáguai. ¹⁹ Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubei lúnti jaríñaguni nuágu, ²⁰ jaríñaguni lan ja yábaña ánjein darí jabei nidúnrun dan le ligíbugiñe nubei líñun-ágei lúrudu juríu. ²¹ Siñáti jaríñagun ni cáta nuágu, lueídügüya luágu lan ában wéyu dan le jádaañadina lubei, ába nagúaragun aríñaga. “Jagúseragüdüñadina ugüñe lueígiñe afíñe nan luágu jásaaruba lan jiláaña lídaangiñe oúweni lúnya jabágaridun.”

²² Subústiti sarágu luágu larúfudajan Jesúsu lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachúlürün gumándan Lisías.

²³ Ábati laríñagun Félix lun jábuti súaara lun lasígirun Páblo daúwañu, lun furáangu lan lun gayára lan jóudin lumádagu aríjei, eténira lun.

²⁴ Átiri wéyu lárigiñe, ábaya lachúlürün Félix túma Drusíla to lúmari, to juríu, ubúrugun Cesaréa, ába lagúaragüdün luágu Páblo lun ladímurejan lun luágu Jesucrístu. ²⁵ Dan le ladímurejaanbei Páblo lun luágu ibágarí le surúbei, lúma luágu ágüdaagüni únguaü luei le wuríbabei, lúma luáguti wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

²⁶ Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma. ²⁷ Sügúti bián irúmu ítara, ábati lagúmuchun lagúmadijan Félix, ába lárügüdüni Pórcio Fésto lufúlasun. Queíti busén lan Félix leréderun buídu jáma juríu, ába lígiruni Páblo daúwañu.

25

Páblo ligíbugiñe Fésto

¹ Ábati lachúlürün Fésto lun lárügüdüni lufúlasun queísi gumádimati, úrúwa wéyu lueígiñe, ába lamúdeirun Cesaréagiñe lun ubúrugun Jerusalén. ² Ába jachúlürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleísei lúma lun loúnajan anúgei Páblo Jerusalén. Le jaráansejanbei, lún yebe jáfaruni jilágubei luágu úma. ⁴ Ába loúnabun Fésto luágu Cesaréa lan ladaürúwa Páblo, áni jarítagua lan lídin ñi madíse. ⁵ Ába laríñagun joun.

—Ligía lúnti lubei jóudin ja weírigutimaabaña jídaangiñe Cesaréa úara núma, áni ánjein adúgaali lubei wügüri ligía dúru, gayáraabei jaríñaguni.

⁶ Wídü rügüñein o dísi lan wéyu láu Fésto Jerusalén, ába lagíribudun ubúrugun Cesaréa. Larúgan, ába lárügüdüni lufúlasun lun lagúseragüdüni, ába loúnajan luágu Páblo. ⁷ Dan le lebélorunbei Páblo, ába jagúriridágun juríu ja núbínbaña Jerusaléngiñe láu, ába jíchugun sarágu lidúnrun le júrüti, áni siñáti jarúfuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madúgüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñí lubei lúnti lan nagúserún. Queísi basúbudiruni buídu, madúgüngidina dúru joun juríu. ¹¹ Ánjein adúgaadina lubei dúru le garíchatu lun nafarún jilágubei lueígiñe, mebéresegúntina nouñwen, ánjein úa lubei ni cáta lánina inárüni lídan sun le aríñawagúbei nuágu, úati ni ában garíchatu lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladúga láu Páblo, ába laríñagun lun. —Amúriaaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reídei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügúri lígirun Félix dáüwañu ya. ¹⁵ Dan le Jerusalén nubeí, rútiña jábutigu fádirigu jáma wügúriña juríu weírigutiña lidúnrun nigíbugiñe, amúriajatiña núma lun nasíadiruni. ¹⁶ Ába naríñagun joun luágu magáburi láani lúruđu Rómata lun lasíadirun ában güriña lun ouweni maríjina láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába nouñajan luágu wügúri ligía. ¹⁸ Ja ñübinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítagua. ¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma luágu ában nege wügúri gríiti Jesús—jiláti nege, laríñajare Páblo luágu wíñwanya lán nege. ²⁰ Queíti íbídíñe lan nun cába lan nadúga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdei, ába naríñagun lun lasígirun dáüwañu daríme gayára lan nouñajani lun Augústo César.

²² Ábati laríñagun Agrípa lun Fésto.

—Buséntina gíñe nagáambuni wügúri ligía.

Ába laríñagun Fésto lun.

—Bagáambubei jarúga.

²³ Larúgan, dan le jachúlürünbei Agrípa túma Bereníce, ába jebélurun láu ouñwenbun uweíriguni múnadoun, jáma jábutigu súdaara jáma wügúriña weírigutiña ñi ubúruđu. Ába loúnajan Fésto luágu Páblo, ²⁴ ába laríñagun.

—Urúei Agrípa, jáma wügúriña ja adámurigubaña wáma ya, niján wügúri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loñwen. ²⁵ Laganouñ nun camá madúgüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, nouñajaali lun. ²⁶ Queíti úa lan cába lan cátei uágu nabúrúja lun Augústo luágu wügúri le, ligía nanúgübalin jigíbugiñoún, bigíbugiñoúntimá urúei Agrípa, lun bálügüdaguni, níjein lámuga cába lan nabúrúja. ²⁷ Ladúga garábaguati nun lun nouñajan ában adaürúti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

² —Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibei juríu nuágu, ³ gúndaatimáatina ladúga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúrugun Jerusalén, lúmagiñe irájügídina. ⁵ Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía juríu. ⁶ Guetóti, jagúseragüdúñadina luágu eménigini le nuágubei, luágu lásaaragüdúbaña lan Búngiu jiláaña lídaangiñe oúweni lúnya jabágaridun, queí meja laríñaguni joun binádu wagúbürigu. ⁷ Dúusugubei família le jadúgawagunbei lirájüñü Israél agúrabiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárra juríu nidúnrun, urúei Agrípa. ⁸ ¿Mafíñetün funági luágu gayára lan lásaaragüdúniña Búngiu jiláaña?

Labájüdagun Páblo luágu meja leíbaajaniña afíñetiña

⁹ ‘Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsu Nazarétna, ¹⁰ áni ítara líña nadúgüni ubúrugun Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasádirúniwa lun jóunwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígilisin afíñetiña, áni weíríti meja nigáñi joun darí lun neíbaajaniña chülú lídoun buri ubúrugun le díseti.

Labájüdagunya Páblo luágu lasálbarun

¹² ‘Ligía yebe cátei le gabúgürübalina ubúrugun Damáscó ában dan, jóunajan jábutigu fádirigu. ¹³ Luágu úma, nurúeite, amídirugu, ába naríjin ában larúgounga siélugiñeti, jéreti sügü lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdúñatia búngua láu bamánjarun nun quei ladúga bágasu dan le líchaagun quíqui luágun cátei gágiríti.” ¹⁵ Ábati naríñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beíbaajabei. ¹⁶ Sarába, ráramabá, ladúga narúfudagunbei núngua bun lun besériwidun nun, lun geféen ban luágu le aríja báalibei guetó lúma le lúnbei narúfuduni bun. ¹⁷ Neséfurubadibu jawéi juríu lúma jawéi ja mámabaña juríu, ja únbaña noúnajabu guetó. ¹⁸ Noúnajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Noúnajañadibu joun, afíñe jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ ‘Ítara líña lubeíti, urúei Agrípa, ába nadúgüni le laríñagunbei Jesúsu nun lídan le lasáliragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíríbudun lun Búngiu, lun jadúgün cátei buíti, arijúa lámuga luágu sáansiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járugüdünina juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja

weírigubaña queísi ja únabugubaña, chülú lúmoun óra le. Maríñaguntina ni cáta joun gürígia bougudin lueí le uágubei jaríñaga Moisés jáma profétagu luágu lasúsereduba lan — ²³ luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmuchaditi, luágu gíñe líchugubei lan larúgounga luáguti asálbaruni dándu joun jurú quei joun ja mámabaña jurú.

Láfaagun Páblo lun lafiñeragüdüni Agrípa luágu Jesucrístu

²⁴ Lídan le laríñagunbalin Páblo cátei le buri lídan ladímurejan lueígiñegua, ába lagúaragun Fésto.

—¡Lúlüjaali báu, Páblo! Lúlügüdá sarágu atúriajani báu.

²⁵ Ába loúnabun Páblo, ába laríñagun.

—Málülünti náu, gumádimati, inárüni le naríñagunbei. ²⁶ Niján urúei Agrípa le subúdíjabúbei lún buri cátei le buídu, ligía gayára lubeí nadímurejan ligíbugiñe, furáangu, ladúga choúru náni luágu subúdi láani gíñe sun cátei le asúseredubei lun Jesúsu, ladúga máma cátei le adügúti arámudaguarügü. ²⁷ ¿Affíñetibu luágu le jaríñagubei profétagu, urúei Agrípa? Subúdi numúti luágu affíñe ban.

²⁸ Ába laríñagun Agrípa lun.

—¡Jarítaguatibusan luágu bafíñeragüdübadina lan luágu Jesucrístu ítara ufúresen?

²⁹ —Furése yébe, o darása yébe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jaffíñerun quei nugúya, úouga güríngüri jawágu.

³⁰ Lárigiñe laríñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja ñúnbaña ñi, ³¹ ába jadíñurun ñígiñe lun jadímurejan luágu cátei le. Jaríñagatí buri jámagua.

—Wügúri le, madúgünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügúri le lun lagúseragüdüni Augústo César, gayáraati jamúga lígirawagüdún.

27

Loúnajóin Páblo ubúrugun Róma

¹ Lídan le jaráanserunbei lun jóunajaníwa Itálioun, ába ledéregerún Páblo jáma ja jíbiri adaürútiña lábu laríjin ában súdeara gíríti Júlio, ligía gumándanbei lun jadámurin súdeara le gíríbei “lisúdearanigu Urúei Augústo.” ² Ába wádinagun tídoun ában ugúnein ñúbintu Adramítioigiñe lun Ásioun. Ñíñein gíñe Aristárco wáma, le Tesalónica, Tesalónica ában ubúrugü láni Macedónia. ³ Larúgan, ligía wachúlürün Sidón, lídan fulásu ligía, buíti loúseruni Júlio, le gumándan, Páblo, ígira lumúti lun bisída láníña lumádagu lúma lun jeténirun lun. ⁴ Lídan wáfuridun Sidóngiñe, ába woúdin únabugiñe libíti uboúju Chípree ladúga wabánrouñein lan garábali. ⁵ Ába wájiñuraguni barána ligíbugiñe lubéyaari Cilícia lúma Panfília, ába wachúlürün lídoun fulásu le gíríbei Míra, ában ubúrugü láni Lícia.

⁶ Ñi ladárra gumándan ában ugúnein Alejandría teíbuga Itália, ába ládinagüdüniwa lun wasígiruni waweíyasun. ⁷ Áfayajatiwa jámaru luágu sarágu wéyu, láu lénreengun wachúlüra ligíbugiñe ubúrugü le gíríbei Gnído. Queíti wabánroun mémegili lubeí garábali, ába wáfayajan únabugiñe libíti uboúju Créta, sügüína wagía ligíbugiñe Salmón, ⁸ wasígira láu méme lénreengun láru láru, ába wachúlürün lídoun ában ubúrugü gíríti Buíti Fulásu, yaráfa lun ubúrugü Laséa.

⁹ Féridijadiwa sarágu dan, dénychajaliti áfayajani baránaja ladúga yaráfaali lidáani luríbouga, sügújali jafédun juríu le lánina ferúdun figoú. Ligía lewéridirunbaliña Páblo, laríñaga joun.

¹⁰ —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹ Lubáragiñe ladúgün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubeí fulásu ligía lun lásügürún luríba dan ñi, ába jarítangun jíbe-ágei luágu buídutima lán yebe lun wáfuridun ñígiñe, lun waríjin ánjein gayára wachúlürün Feníce, ában fulásu láni uboúju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanúgüniwa. ¹⁶ Ába wásügürün únabugiñe libíti ában liraúraü uboúju gíríti Cláuda, le ñi lubei mére lan láfujan garábali, ába wádinagüdünun tisálufun wagúne to atoújeina waboún, láu ában lénreengun. ¹⁷ Lárigiñe wiñúrunun ugúneirugun, ába lásügüragüdúniwa gúrudu tábugiñegiñe ugúnein lun jagúragunun, derébugu támuga. Queíti janúfudebei lueí joudin adágara luágu sándala le giríbei Síрте, ába jagídaraguní bíra, ába jígiraguagüdün joúngua lun lanúgüniwa garábali. ¹⁸ Larúgan, quei jére mémegili lubeí dan, ába jagúmeserun achágajei tíla ugúnein baránajoún, ¹⁹ luágu lúruwan wéyu, ába jachágajani lídaangiñe tumégegün ugúnein baránajoún láu jájabu guánarügü. ²⁰ Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafíñen luágu weséfuruba lan.

²¹ Queíti sügújadiwa lubeí sarágu dan meíginga, ába laráramun Páblo wádan, ába laríñagun.

—Wügüríña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu. ²² Gagúraasun jumá, úabei ni ában jídaangiñe ouweti, láu sun teféridiruba lan ugúnein. ²³ Chülújali ában láni Búngiu ánjeli númoun áriebu to, loúnagüle Búngiu le Nabúreme le gíñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladúga barúfudaguba búngua ligíbugiñe urúei César Augústo, áni badúgaba leséfuraña Búngiu sun ja tídaanbaña ugúnein búma lueí ouweni.” ²⁵ Gagúraasun jumá lubeíti, ladúga jeménigitina luágu Búngiu, áni choúru numúti luágu ítara lúba lan quei laríñaguní ánjeli luágu nun, ²⁶ láu sun, wadágaruba lan luágun ában uboúju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémeñadiwa garábali, ligía, amídi áriebu, ába jasándirun mádulungu luágu achúlüreina wáña lan luágun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguoun mémeraü, gádürü-wein-díisi ugúdi. ²⁹ Léti janúfude lueí jabúguchun luágu dúbü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añaja mádulungu asáminara lun jeséfuragun joúngua láu jefbaagun tídaangiñe ugúnein, ába jagúmeserun aráriragüdoún salúfu dúnarugun, jadúga camá jágura oúnguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdaara tugúrudun salúfu, ába jígiragüdünun dúnarugun.

³³ Lubá larúgan, ába laríñagun Páblo joun súngebübei lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladúga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanúgün ában fein lújaburugu, ába líchugun eteingiruni lun Búngiu jagíbugiñe súngebei. Ábati lagúbachagunun, ába leígin. ³⁶ Ába járügüdün ja jíbiri gurásu, ába gíñe jeígin. ³⁷ Bián-sañadiwa úruwa-wein-díisi-sísi gürígia tídan ugúnein. ³⁸ Dánti le jóujáña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ní jabei mádulungu joun, ába jaríjin ában beídi gebéyaariti, ába jóuchun lun janúgünun ugúnein ñíjin. ⁴⁰ Ába jíbuguni lagúruga óunguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya. ⁴¹ Ába tídin lídoun ában fulásu le ní lubei bíangua lan ébeeni, ába tadágarun, siñá lánjingichun tígiri ni murúsun, ába tagúmeserun aboúchagua tiyúnagiñe, le lére lugúdi barána. ⁴² Ába yebe jabúseerun súdeara jáfaraguniña adaürítiña jilágubei lueí janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti lun jadúgüni súdeara le jarítagebei. Ábati laríñagun lun lan jachúbaragun ja gáfulijadíbaña baránajoun furúmiñe lun jachúlürün múarugun, ⁴⁴ jáme jíbiri, jóudinme ligíbuagu buri fuláansu lúma buri tífe ugúnein. Ítara líña jachúlürün súngebei múarugun séfuñu.

28

Páblo luágu ubóju le gíribei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei ubóju ligía. ² Buíti jóuseruniwa gürígia ja aganoúbaña ñi, ába jáfuragun ában oúnwenbun wátu quei dilíga lubeí áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñe in yebe wáturugun, ligía táfuridun ában jéwe tanúrajaña lueí lára wátu, ába tárügüdün luágu lújabu, ába tágürüni. ⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügúri gáfarajati wügúri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredun ni cáta lun. ⁶ Agúrabatiña yebe súngebei láludun lújabu, o láburujan lan oúwe. Lílúwagu jagúrabajan, dan le jaríjinbei luágu masúseredun lan ni cáta lun, ába lasáansirun jarítage, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügúri le weírigutimaabei lídan sun ubóju ligía, Públío líribei, resíbi lumútiwa lúbiñe, seríwi láwa buídu luágu úruwa wéyu.

⁸ Roun líñáti lúguchi Públío láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídagun. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun.

¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachúlürün dan lúnya wádinagun lun wasígiruni waweíyasun, ába jíchuguni sun le wemegeirubei woun lun waweíyasun.

Lachúlürün Páblo ubúrugun Róma

¹¹ Lárigiñe úruwa játi wáu luágu ubóju ligía, ába wádinagun tídoun ában ugúnein to éréderuboun ásügürei luríbouga ñi luágu ubóju ligía. Alejandríana ugúnein tugúya,

ñíñanu jayáwa bián sándu luágu tigíbu ugúnein tugúya, Cástor lúma Pólux. ¹² Ába wachúlürün ubúругu Siracúsa, ába weréderun úrüwa wéyu ñi, ¹³ ñígiñe wasígira láru láru darí wachúlürün ubúругu Régio. Larúgan, ába láfujan suédi, luágu libíaman wéyu ába wachúlürün lídoun liraúraü aúdü le gírubei Puteóli. ¹⁴ Ñi wadárira átiri affñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúругun Róma. ¹⁵ Agáambaña affñetiña ja Rómabaña wawágu luágu awánte lan, ába jóudin wabároun, jíbiri chülú lúmoun fulásu le gírubei Fóro, le luágubei úma gíríti Ápio, jíbiri, dúnguatiña wáma lídan fulásu le gírubei Úrüwa Jában Chülúdügütiña. Dan le laríjinbaliña Páblo, ába líchugun eteíngiruni lun Búngiu, ába lárügüdün gurásu. ¹⁶ Dan le wachúlürünbei Róma, ába ledéregeruniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábugua láu ában súdaara oúnigirei.

Lapúrichijan Páblo Róma

¹⁷ Úrüwa wéyu lárigiñe lachúlürün Páblo, ába loúnajan jawágu juríu weírigutiña ja Rómabaña, dan le adámuriguanaña, ába laríñagun joun.

—Nidújeñu, láu sun madúgün nan ni cáta wuríbati joun juríu, ni lun le uágubei jéchuda binádu wagúbürigu, derégawatina dáüwañu joun Rómana ubúругu Jerusalén. ¹⁸ Lárigiñe jálügüdagúnina, álugatiñá yebe jígiragüdünina ladúga madári jamá nidúnrun le lúnti náfarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubeíti lébubei noúnajan juágu lun naríjinün lúma lun nadímurejan jun, ladúga lueígiñe cátei le uágubei weménigida wagía Israelítagu anája lubeí gürágu láu güríngüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili gíñe ni ában wapaísanu jádaangiñe ja núbinbaña ñígiñe aríñaguti wuríbati woun buágu. ²² Buséntiwa jamúga wagáambuni ca lan barítagebei, ladúga subúdi wamúti luágu adímurejóu lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachúlürün sarágu gürígia le ñí lubei lagánawa Páblo. Ába ladímurejan joun lúmagiñe bináafin darí gúñoun luágu larúeijan Búngiu. Louchun lun lafíñeragüdúniña luágu Jesúsu lan asálbaragüleibe le jagúrabajabei láu layúsuruni lilúrudun Moisés lúma le jabúrújabei profétagu. ²⁴ Jíbiri, affñetiña luágu le laríñagubei Páblo, jíbiri maffñetiña. ²⁵ Queíti múaradun jamá jámagua luágu jarítangun, ába jagúmeserun ñúdüngua, ábati laríñagun Páblo joun.

—Ligía laríñagunbei Sífiri Sándu joun binádu wagúbürigu lídaangiñe proféta Isaías.

²⁶ Beíba, baríñagame joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dímuerei le jagáambubei.

Jaríjuba sarágu cátei, meféenbadün luágu,

²⁷ ladúga deréeru janígi gürígia ja, áni wuríbati jagáambun,

darú jamuti jágu, lueí jaríjini laníchigu cátei le jaríjubei,

úati gíñe gunfaráanda jamáni cátei le jagáambubei,

derétu gíñe janígi,

máluajan jamútina lun nareídaguagüdünun jawáni.

²⁸ Subúdi jumeí luágu oúnaja láali lan Búngiu ugánu luáguti Jesúsu le méme Wasálbaragüleibe joun ja mámabaña juríu, áni jagía, jánjaruba lun.

²⁹ Dan le laríñagunbei Páblo ítara, ába jóudingua juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajóutu, resíbi lumútiña sun ja ñúdünbaña aríjei. ³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebéresejanga ni ában lun.

LIGÁRADAN PÁBLO JOUN RÓMANA

Labúrujan Páblo joun tílana ligílisi to Rómaboun

¹ Anája áu, Páblo, nabúrújañoun gárada to jun, jugúya lánigu Búngiu ja aganoúbaña ubúru Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse láalibei jaba gürígia. ² Sabúdigüda lumúti Búngiu ugánu le lúmagiñé meja binárü jádaangiñe profétagu, bürúwati le jadímurejabei tídan Lerérun Búngiu. ³ Núbinti asálbaruni ligía woun lídaangiñe Wabúreme Jesucrístu. Gürígia uboúaguna Jesucrístu, Búngiu méme giñe. Queisi gürígia, jádaangiñeti méja lufámilian Urúei Davíd Jesucrístu, ⁴ arufudúati luágu Liraú lan Búngiu láu luweírín miláguru le ladúgübei láu lásaaragüdüni Jesucrístu lídaangiñe oúweni. ⁵ Fuleísei lumútiwa Búngiu lídaangiñe Jesucrístu lun loúnajaniwa lídan líri lun wasúbudiragüdün joun gürígia luágu queisi Wasálbaragüle lídan sun fulásu, gayára lámuga jafíñerun luágu, adúga jameíme le lubeíbei. ⁶ Anjúnjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabúrújaña lubeíti jun, jugúya le aganoúbei ubúru Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírín neteíngiruni Nubúngiute lídaangiñe Jesucrístu juágu, sun jugúya, lugúndun adímurejóati luágu jafíñen luágu Jesucrístu lídan sun fulásu. ⁹ Áni Búngiu, le únbei nesériwida táu sun nanígi apúrichijeí ugánu luáguti Liraú, geféenti luágu luweírín nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jafíñen, lúntima derégüdagú jumá, ¹² lun giñe wíchugun gurásu wádaangua láu affíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeíbugun lúma Búngiu, queisi naríjini jawáanserun jíbiri affíñetiña lídan buri ámu fulásu. ¹⁴ Lúnti níderaguniña sun gürígia, dándu ja chülúguatiña queisi ja machúlaaguntiña, dándu chu táu queisi ibídiougua táu. ¹⁵ Lueígiñe lubeíti noubadina, buséntina giñe lun napúrichijani ugánu luáguti Wasálbaragüle jun, jugúya le aganoúbei ubúru Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja affíñebaña luágu, juríu furúmiñe, lárigiñe, ja mámabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queisi lánigu. luwúyeri igáburu ligía, láurügü laffíñerúniwa luágu, libijúa. Ítara líña tariñaguni Lerérun Búngiu. “Le gürígia le richáguabei ligíbugiñe Búngiu láu laffíñerun luágu, libíjubei ibágari magúmuchaditi.”

Jadúnrun gürígia ligíbugiñe Búngiu

¹⁸ Aríja wamúti láburujan lanárime ligáñi Búngiu siélugiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu

Búngiu buídu buídu lugúndun ligía guánarügü arúfuda láali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladúgübei. Arijúaaali furáangu lúmagiñe lagúmeserun uboú luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubefti luágu jaríban, ²¹ lugúndun láu sun subúdi jamáni Búngiu ítara, míchugugiña inébesi lun queísi Búngiu, meteíngirun jameí. Queísi libídiouniga láu ligáburu jarítangun luágu Búngiu, féridi jamúti murúsun larúgounga luágu Búngiu lé meja jabíjibeí. ²² Láu sun aríñaga jamá luágu chu lan jáu, ibídiouguati jáu, ²³ lubáragiñe jájuduragun lun Búngiu le weírígubei, le mouwedadibeí, jájuduraguaruğa joun jayáwa gürígia ja goúwedaditiña, lúma gíñe joun jayáwa dunúru, jéwe jáma anímaalu ja gádürügua tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadúgün cátei buri nibúsigarídünati jámagua. ²⁵ Ítara líña ligáburu jabágaridun lugúndun maffínerun jamá luágu inárüni luáguti Búngiu, jaffíñera luágu iyéeni, jájuduragua láu inébesi lún buri cátei le ladúgübei Búngiu lubáragiñe jamúga jájuduragun lun Búngiu, le gadúnabei inébesi súnwandan. Ítaralá.

²⁶ Ligía ígira láaña lubeí Búngiu lun jadáagun cátei nibúsigarídünati, ásta würiña adáagutiña cátei jáma würiña jáledi lubáragiñe jamúga jagámaridun wügúri queísi lubúdubu. ²⁷ Ítara méme gíñe ígira jamáali wügúriña jayúsurun würiña lun jayúsuragun jóungua. Adáaguatiña wügúriña cátei buri nibúsigarídünati jámagua, ábati jasúfuriruni lafáyeiruaja jawíye jawoúgua.

²⁸ Queísiti mabúseerúnjaña lan jíchuguni lilúgaarun Búngiu lun, ígira láañati láu lagúbüri jasáminan, lun jadúgüni le moún lubei jadúgüni. ²⁹ Buin jáña láu sun luwúyeri maríchaü, salúfuri, wuríbani, meménijabuni, iyéreejabúni, gimúgaü, áfarajadi, lanígiwa wuríbu, ayéeraguní, ibíbuni, marásualugu. ³⁰ Adímurejatiña wuríba jawágu jíbiri gürígia, iyéreeguti Búngiu joun, minébenejabutiña, barúguatiña jóungua, pántatiña. Gachúgütiña lun jaságarun iséri buri cátei wuríbati, mabájüdün jamútiña jagúbürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejaabutiña. ³² Subúdi jamúti le laríñagubei Búngiu buídu buídu, subúdi jamúti luágu ja lan adúgütí buri cátei le, lúnti lan jóunwen lueígiñe. Láu sun líra, adúga méme jamúti, darí lun gúnda jamá dan l jasáminan, lun jadúgüni lee jaríjin ámu gürígia adúgei.

2

Agúseragüdáti Búngiu láu inárüni

¹ Ligía gadúnrun lubeí le adímurejabei luágu le ladúgübei ámu, cáteinein lan, lugúndun dan le ladímurejan luágu wuríbani le ladúgübei ámu, líchuguña guánarügü dúru luouúgua, lugúndun líbe méme gíñe cátei wuríbati ligía ladúgübei. ² Subúdi wamúti luágu láu lan inárüni lagúseragüda Búngiu dan le lasádiruniña ja adúgübalin buri cátei l jasáminan, lun jadúgüni lee. ³ Bugúyati le adímurejabei jawágu ja adúgübalin buri cátei wuríbati le, áni ligía méme gíñe badúgübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Ódi mebéresentibu láu lareíni Búngiu le magúmuchadibeí lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburu, máma lun basígirun afígounja? ⁵ Derétu banígi, májatibu basáansiruni bigáburu. Ligía abúnja lubeí agánwoundagüda lafáyeija bifígoun lubáme luwéyuri lagúseragüdüni Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladúgübei. ⁷ Líchuguba ibágaru magúmuchaditi joun ja áluajabalin uweíríguni, inébesi, lúma cátei lé buri magúmuchaditi yágüta siélu láu jadúgüni le buídubei súnwandan ya uboúagu. ⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarei wuríbani, lafáyeirubaña

Búngiu láu sun ligáni. ⁹ Níjeinbei asúfuriruni lúma igárigu joun sun ja adúgübalin le wuríbabei, joun juríu furúmiñe, lúma gíñe joun ja mámabaña juríu. ¹⁰ Anjeinti joun sun ja adúgübalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanúgüniña Búngiu sun gürígia. ¹² sun ja affígounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdúba boúgudin lueí lúrudu ligía, tídiba jawáni máfiougatin. Játi affígounjabaña láu sun subúdi jamáni lilúrudun Búngiu, jagúserawagüdúba láu lúrudu ligía, tídiba gíñe jawáni máfiougatin. ¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadúgüni le lubeíbei Búngiu láurügü laríñagun jarítangun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürúñu tídan janígi, arúfuda tumúti janígi líra, áni laríñagubei jarítangun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucrístu, larítaguba luágu sún buri cátei le, ladúga lagúseragüdübei gíñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüniti Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buíduti-maabei. ¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bíchugun larúgounga joun ja eíbugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñabaña lídan jafíñen, queísi barítangun luágu ibíja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? ²² Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegi badúgei? Ánjein iyéreegu lubeí cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísín jalígílisin? ²³ Pántatibu láu lilúrudun Búngiu, ába bíchugun minébesei lun Búngiu láu magúnfulirun báani. ²⁴ Tinárün Lerérun Búngiu dan le tariñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumúti jugúya juríu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manúgünti circuncisión ni cáta jun, queígubeirügü madúgüniwa lan. ²⁶ Gürígia ja mámabaña juríu, ánjein jadúga buri cátei le lubeíbei lilúrudun Búngiu, janügúba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalibei circuncisión, ja magúnfulirunbalin Lerérun Búngiu, láu sun jun lan labúrüdúwa. ²⁸ Le juríubei le tímatimaati, máma boúgudigiñerügü libíti juríu lan, máma gíñe láurügü wadúgün cátei le boúguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadúgüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítangun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuíduña lerésibirúniwa circuncisión? ² Sarágu, áni gíbetei gíñe lébuna. Furúmiñeti cátei, rúlumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladúga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Taríñajare Lerérun Búngiu.

Babájüdüba queísi richáti lídan le baríñagubei, áni buídubei báfuridun dánme le bagúserawagüdún.

⁵ Ábanya álügüdajani. ánjein seríwi lubeí luríban wagáburi lun larúfuduni luágu richágua lan Búngiu, ¿cábagi waríñaga? ¿Maríchatí funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdüniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügún wuríbani lun larijóuniwa le buídubei? Niján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasiadirúniwa.

Sun wagía gadúnruntiwa ligíbugiñe Búngiu

⁹ ¿Ída liñági? ¿Buítimaatiwa wagía juríu sügú jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figoú. ¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan,

úati ni ában áluajati Búngiu.

¹² Yuríguaaña súnigubei, ñúdünjaña lídoun féridi.

Úati ni ában adúgüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagúbüri dimúrei le mínsiñeguti queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jírí gürígia furése queísi láfarajan lupeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barúti jagáburi gürínguaü lúma igárigu,

¹⁷ áni ibídiñeti úma lánina darángilaü joun.

¹⁸ Marítagungubeñiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei binádu lilúrudun Búngiu, joun lan ja lábugiñebaña lúrudu ligía laríñagei, lun jasúbudiruni gürígia jagía luágu gafígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu. ²⁰ Lugúndun úabei ni ában eréderuti richágu ligíbugiñe Búngiu lueígiñerügü ladügüni le lubeíbei lúrudu, lúnrügü lasúbudiragüdüni lúrudu woun luágu gafígoun wamá lesériwida.

Lídaangiñe afíñeni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudín lueí lúrudu lé meja líchugubei lídaangiñe Moisés. Gayáraati wasúbudiruni líra láu walíjanun lílburuna to meme lilúrudun Moisés, túma jalíburun profétagu. ²² Láu wafíñerun luágu Crístu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia, ²³ lugúndun afígounjaaña sun gürígia áni siñáti lagúndaarun Búngiu jáu. ²⁴ Láu lareíni Búngiu, resibi lumútiña sun gürígia queísi lánigu, mafáyeijaanga jagía luágu, lugúndun fáyeijali

Crístu luágu wafígoun lun gayáraabei lan weréderun richáguañu ligíbugiñe Búngiu. ²⁵ Adúgati Búngiu lun lébunabei lan ferúdun Crístu láu loúnwen luágu wafígoun, áni lídaangiñe wafíñerun luágu queísi Wasálbaragüle liábin ferúdun woun. Láu loúnwen Crístu queísi afáyeiragülei luágu figou, ába larúfuduni Búngiu luágu úaragua lan áni iyéereguti figou lun. Ába lachíbuni líta Crístu jafígoun güri-gia já meja aganoubaña lídan dan le sügújalibei, le uágubei mafáyeijagüdün láañabaña lan, ²⁶ chibá lumuti gíñe jafígoun ja aganoubaña lídan buri dan le, lun larúfuduni luágu úaragua lan, áni sun ja afíñebaña luágu Jesucrístu queísi Jasálbaragüle barú lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan güri-gia luágu lubuídun jagáburi? Gumúguati. ¿Cáti uágu? Lugúndun lun jamúga gayára lan wasálbarun láu lubuídun wagúnfulirun luma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Crístu, gumúgua lébuna wanáangun woúngua. ²⁸ Subúdi wamáali lubeí buídu luágu resíbi láani Búngiu güri-gia le afíñeti luágu Crístu queísi güri-gia richáguati, mebéresegúnga ánjein gúnfulijali lubeí luma lilúrudun Moisés lúmoun magúnfulirungili lan.

²⁹ ¿Juríu rügúñanu funági Gabúngiutei Búngiu? ¿Ma funági gíñe Jabúngiute ja mámabaña juríu? Jabúngiute gíñe, ³⁰ lugúndun ában rügúñein Búngiu, le erésibirubaliña sun güri-gia ja afíñebaña luágu Jesucrístu queísi Jasálbaragüle, mebésenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeí afíñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábatí waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladúgün cátei buíti lerésibirei Búngiu queísi ában güri-gia richáguati, gébunati jamúga lapántajan, máma ligíbugiñe Búngiu. ³ Taríñajare Lerérun Búngiu. “Afíñetí meja Abrahám luágu Búngiu, luágu lafíñen lerésibirei queísi wügúri richáguati.”

⁴ Dan le ladúgün güri-gia ában wadágimanu, fáyeiti le libíjubei lebégi luwádigimari, máma edéweejani. ⁵ Ánjeinti güri-gia le asálbaruti lídaangiñe lifígoun láurügü lafíñerun luágu Búngiu le erésibirubaliña gafígountiña, lerésibirubei Búngiu queísi ában güri-gia richáguati luágu lafíñen, anáti líra, edéweejani. ⁶ Davíd guánarügü adímurejati luágu jagúndan güri-gia ja lerésibirubaña Búngiu queísi richáguatiña luágurügü jafíñen, mebésenga ligía ca lán meja jadúgübei. ⁷ Laríñajare Davíd.

Gúndaatiña güri-gia ja ferúduna lubáña Búngiu jaríban, áni chibáwa ligía jafígoun.

⁸ Gúndaati güri-gia le lanúgübei Búngiu queísi güri-gia mafígounjaangili.

⁹ ¿Joúnti rügúñein funásan ja erésibirubalin circuncisión, ódi joúnti gíñe ja merésibirunbalin? Joúnti sun jawúyeri güri-gia ugúndani ligía. Aríñagaadiwa luágu resíbi láani Búngiu Abrahám queísi wügúri richáguati, luágu lafíñen. ¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe.

¹¹ Lárigiñe larúfuduni Abrahám lafíñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügúri richáguati ladúga lafíñen luágu. Ítara líña gíñe liábin Abrahám lun jáguchibei lan sun ja afíñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña.

¹² Jáguchi gíñe ja resíbi jamáalibei circuncisión Abrahám, ja afíñebaña luágu Búngiu queísi lafíñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagatí meja Búngiu lun Abrahám luágu líchugubei lan ubou lun jáu sun linébaanfaangu queísi jalágaante, máma ladúga lagúnfuliruni Abrahám lilúrudun Búngiu

líchugúá dimúrei le lun, ladúga lafiñerun luágu Búngiu, ába lerésibiruni Búngiu queísi ában wügúri richáguati. ¹⁴ Lun jamúga já rügúñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeíti jamúga jaffñerun ja eménigidubaña luágu jaffñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúnfulirun lúma lilúrudun, ¹⁵ barúrügü lumúti lilúrudun Búngiu ligáni jawágun gürígia luágu magúnfulirun jamáni. Ánjein le ñí lumuti úa lan lúrudu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti affñeni. Mámarügü jóunti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, jóunti gíñe sun ja mámabaña juríu áni máma gíñe lábugiñeñanu lúrudu ligía, ába jaffñerun luágu Búngiu queísi lafiñerun Abrahám luágu. ¹⁷ Ligíbugiñe Búngiu, ñúbinti lubeíti Abrahám lun wáguchibei lan sun wagía le affñebei luágu Búngiu, queísi taríñagun Lerérun Búngiu. “Adúga náadibu lun jáguchi ban sarágu mútu.” Gabáfuti Búngiu lun ladúgüni líra queísi gabáfu lan lun líchugun ibágari joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaú lan ladúga weíyaali lan, weíya tugúya Sára, afíñeti dán meja le laríñagubei Búngiu lun luágu ítara lúba lan jibe ladúgawagun queísi warúguma. Ába lasúseredun ítara lun jáguchibei lan sarágu mútu. ¹⁹ Meféridirun lumúti lafiñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gíñe Sára lun tagáraüdü. ²⁰ Maloúguadunti lafiñen luágu dimúrei le laríñagubei Búngiu lun, weíritimáarügüti lafiñen. ²¹ Rúti uweíriguni lun Búngiu láu ában ichouruni le tímatimaati luágu gabáfu lan Búngiu lun ladúgüni sun le uágubei laríñaga. ²² Ligía lerésibirunbalin Búngiu queísi wügúri richáguati, luágu lafiñen.

²³ Cátei le, luáguti lerésibiruniña Búngiu gürígia luágu jaffñen, mámarügü luágu Abrahám labúrújoúa, ²⁴ labúrújoúña gíñe wawágu. Lugúndun luágu waffñen, resíbi lumútiwa gíñe Búngiu queísi richáguatiña, wagía le affñebei luágu le ásaaragüdübalin Wabúreme Jesúsu lídaangiñe oúweni. ²⁵ Jesúsu le edéregerúabei lun loúnwen luágu wafígoun, ába lásaarun lídaangiñe oúweni lun larúfuduníwa richáguañu ligíbugiñe Búngiu.

5

Niján lébubei weréderun madúnrunga

¹ Queísiti resíbi láadiwa lubeí Búngiu láu waffñerun luágu, lídaanjadiwa dan lúma, lídaangiñe Wabúreme Jesucrístu. ² Ladúga Crístu, biníwadiwa lubeí láu waffñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu. ³ Áni máma rügúñein líra, gúndaatiwa gíñe lídan wasúfurirun ya uboúagu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburi, áni láu líra, gayára lan weménigidun lun gafánraanbadiwa lan lídan luweírigun Búngiu yágüta siélu. ⁵ Áni máburujanbei warúna lurúma eménigini le, ladúgübei Búngiu le aríñaga láalibei woun ladúga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbei woun.

⁶ Ladúga línsiñejabu Búngiu woun, queí meja le mabáfu wabeí lun wasálbaragun woungua lídaangiñe figoú le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei. ⁷ Máma cátei ménreengunti lun loúnwen ában gürígia jawágu ámu gürígia, ni fbini lueígiñe ában gürígia le buídubei, láu sun níjein lan gürígia gayáraati jamúga loúnwen lueígiñe ában gürígia le buíti le tímatimaati.

⁸ Ánjein Búngiu, ába larúfuduni luweírin línsiñejabu woun láu loúnajani Jesucrístu le Liraú lun loúnwen wawágu, láu sún meja gáfíngondiwa lan. ⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei lábुरुjan jawágun gáfíngountiña lídaanme luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraú dán meja le láganigídiwa, choúrutimaati luágu lasálbarubadiwa lan le gumúti, luágu Liraú le wínwañubei lúma, siélu. ¹¹ Áni máma rügúñein cátei le, gúndaatiwa gíñe lúma Búngiu lídoun buri dan le, lídaangiñe Wabúreme Jesucrístu, le ídaangiñebei lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügúri le gíribei Adán lebélura figoú uboúagun, ába lanúgüni figoú oúweni lúmagua queísi lafáyeija, ítara líña gíñe jóúweguba lubeí sun gürígia lugúndun afígounjatiña súnugubei. ¹³ Lubáragiñé meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígounjaña uboúagu, láu sun úagili lan lúrudu ligía lun gayáraabei lan jadúraaguni. ¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladúga magáambadi jamá jafígounbei queísi ladúgüni Adán le magáambadíbei lun lerérun Búngiu lun. Lueígiñe ában oúbai, Adán liyáwa Crístu le lúnbei liábin, ladúga biángubei jagía barútiña som cátei joun gürígia.

¹⁵ ¡Ámuñegueinarügü gíñe cátei le janúgübei joun gürígia! Barúti Adán oúweni joun sun gürígia láu lafígounjan, ánjeinti Crístu, barúti asálbaruni joun sun gürígia, áni weíriti asálbaruni le líchugubei Búngiu láu lareíni woun lídaangiñe Crístu sügú láu lifígoun Adán. ¹⁶ Weíriti gíñe le líchugubei asálbaruni sügú láu le líchugubei lifígoun Adán woun. Ladúgarügü ában figoú, chülúti oúweni joun sun gürígia, ánjeinti ladúga loúnwen Crístu wawágu, ferúdnawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubeí oúweni jawágu sun gürígia ladúga lidúnrun ábanrügü wügúri—Adán, choúrutimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágari magúmuchaditi lúma Búngiu, jarúejaba úara lúma Crístu, ladúga ábanrügü wügúri ligía.

¹⁸ Ítara queísi líchuguniña Adán sun gürígia lábugiñe lisádin Búngiu lun jóúnwen láu ladúgüni le áubei magúndan lan, ítara líña gíñe lagídaruniña Crístu gürígia lábugiñegiñe asíadiruni ligía, rúleí ibágari magúmuchaditi joun láu ladúgüni lugúndan Búngiu lun loúnwen jawágu. ¹⁹ Ladúga lubeíti lumágaambadi ábanrügü wügúri, núbintiña sun gürígia lun jafígounjaba lan, ítara méme gíñe, ladúga lagáambadi ábanrügü wügúri, gayáraati jayábin sun gürígia lun richágua jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoúbei. Láu sun gíbe lan figoú uboúagu, weíritimaabei lareíni Búngiu lun lachíbuni sun figoú ligía. ²¹ Ítarati queísi gabáfu lán meja figoú lun lanúgüni oúweni, ítara gíñe gabáfuti lareíni Búngiu lun ladúgüniña gürígia richágua ligíbugiñe, lúma lun líchugun ibágari magúmuchaditi joun lídaangiñe Wabúreme Jesucrístu.

6

Jiláñu wáña lun figoú, wínwañu lun wesériwidun lun Crístu

¹ ¿Cábati waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figoú, ¿ída lubáti gayára lan wasígirun afígounja? ³ ¿Ibídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lídan loúnwen, lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara

lúma Crístu, áni reídeitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweírin lubáfu, sarágüda láadiwa gíñe lun isérijali lan wabágari.

⁵ Lugúndun ánjein ñúbin wabeí lun lídaanbadiwa lan ában lúma Crístu lídan ában oúweni líbe loúnwen, ítara wába gíñe lídan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagúnrinchawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri. ⁷ Lugúndun le jiláalibei, furíjali lídaangiñe figoú. ⁸ Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma, ⁹ lugúndun subúdi wamúti luágu sará lan Crístu ában weíyaasu lídaangiñe oúweni, moúnwendügúyaali, mabáfujali oúweni luágu. ¹⁰ Dan le loúnwenbei Crístu, ába lagúmchaguagüdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúya gíñe, rúgua jumá júngua queísi jiláguaña lun figoú, áni wínwañu lun jesériwidun lun Búngiu, lídan ában lúma Crístu Jesúsu le Wabúreme.

¹² Ligía, mígira jumá lubeí lun gabáfu méme lan figoú juágu, afósuraün lun jadúgüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadúgüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladúga líra? ¿Siñáti! ¹⁶ ¿Ibidiñeti jun luágu le lan únti jíchaagua júngua lun jidin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jiábin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanúgübeí buri cátei ligía jun le áubei buri nibúsigari jumá guetó? Ni cáta buíti, féridi rügúñein lanúga jun. ²² Ánjeinti guetó, mámaadün lábugiñe lugúmadin figoú, lidámu-jadün Búngiu, barútiti cátei le arúmani tun janígi lúma ibágari magúmchaditi jun. ²³ Lugúndun oúweni lafáyeijabei figoú, ánjeinti edéweejani le líchugubei Búngiu woun, ibágari le magúmchaditi ladúga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdijabúbei lun lúrudu, subúdi jumáali luágu dán rügúñein lan wínwangili ában gürígia, ligía lábugiñeñein lan lúrudu. ² Quei jamúga, ában wúri to maríeitu, rulumutu lúrudu lábun lagúmadijan túmari sun dan le wínwangili lan, ánjein oúwe túmari, boúgudijaru lueí lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wügúri sun wínwangili lan túmari, tadúgüña figoú

le gíríbeí adultériu, ánjein ouwe túmari, gidáaru lábugiñegiñe lúrudu ligía, áni gayáraati tamárieidun lúma ámu wügúri, madúgüntu adultériu.

⁴ Ítara giñe jugúya, nidújeñu, láu lounwen Crístu, furíjadün lábugiñegiñe lagúmadijan lilúrudun Moisés queísi wúri to jiláali túmari, ába tagámaridun ámu. Guetó, lánijadün Crístu, le saráalíbeí lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñe meja werésibiruni Crístu, seríwiti meja lilúrudun Moisés lun lagáguduni luríban ayúmajaní wádan, áni ligía cátei le anúgübalíwa lídoun ouweni. ⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le búrúwabei.

Igáburi lánina figoú le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdúbalin figoú nun. Ibídiñeti jamúga nun luágu figoú lan lawámadirun jamégen ámu ánjein jamúga maríñagunti lúrudu. “Mawámadirabeí jamégen ámu.” ⁸ Ladúga méme gumádi le, ába lagáguduni igáburi lánina figoú le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figoú. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan úma lun féridi. ¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaja. ¹¹ Lugúndun lárügüdün igáburi lánina figoú le nídaanbei lueígiñe lúrudu ligía, ába leyéeragunina lun nadúgüni le wuríbabei, ába lanúgünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³ ¿Ligía funásan cátei buíti le anúgübalina lídoun féridi? ¡Máma líña! Nífígoun anúgübalin neféridirun nun, áni ítara líña larúfuduni luágu figoú lan, láu cátei le buídubei, le méme lúrudubei, lanúgana igáburi lánina figoú le nídaanbei lídoun féridi, áni ítara líña larúfuduni lilúrudun Búngiu luágu wuríba lan figoú le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügúri garaúwarügüti, alúgurúañu níña queísi idámuni lun lubáfu figoú. ¹⁵ Úati gunfaráanda náani ca lan susérebei nun, madúgün numúti cátei buíti le nabúseerubei nadúgün, nadúgei cátei le iyéreegubei nun. ¹⁶ Ánjein le lubeí mabúseerun nubeí nadúgün ligía nadúga, úaraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúrudu quei cátei buíti. ¹⁷ Mámaadina lubeíti áu adúgübalin cátei wuríbati le nadúgübei, igáburi lánina figoú le nídaanbei, ligía adúgübalin. ¹⁸ Subúdi numúti luágu úa lan ni cáta buíti nídan bougudín lueí Búngiu, áu queísi wügúri garaúwarügüti. Buséntina jamúga nadúgüni le buídubei, siñáti nadúgüni. ¹⁹ Madúgün numúti cátei buíti le nabúseerubei nadúgün, nasígirarüga adúgei wuríbati le mabúseerun nubeí nadúgün. ²⁰ Ánjein lubeíti le lubeí cátei le mabúseerun nubeí nadúgün ligía nadúga, lídan linárün cátei, máma áu le láni Búngiu adúgübalin, igáburi lánina figoú le nídaangilíbeí, ligía adúgübalin.

²¹ Niján cátei le asúseredubei nun. dan le busén nan nadúgüni le buídubei, wuríbati rügúñein nadárrira nídan. ²² Lídan nisáminan, jnsiñeti lilúrudun Búngiu nun, ²³ áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figoú le nídaanbei, le gámabalina adaürúwañu.

²⁴ ¡Fugiábu áu! ¿Cába eséfurana lídaangiñe igáburi lánina figoú le nídaanbei, le anúgübalina lídoun ouweni? ²⁵ Búngiu gubeírügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeíti luágu áu lan láu náni núngua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladúga igáburi lánina figoú le nídaanbei, seríwirügütina lun figoú queísi lidámun.

8

Wabágari lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsu. ² Rúlaali Crístu láni Espíritu woun, áni Espíritu ligía, rúti iséri ibágari woun, furígüda láadiwa lábugiñegiñe lubáfu figoú le anúgübaliwa lídoun ouweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figoú ladúga turíban wanígi, wagía gürígia garaúwarügütiña. Ába ladúgüni Búngiu le lásiñerubei lilúrudun adúga láu loúnajani Liraú uboúagun queísi gürígia garaúwarügüti le gíñe gayáraati lafigounjan (láu sun, mafígounjan lan). Ába loúnwen Liraú Búngiu, le Jesucrístubei, luágu wafígoun, ába lagúmuchaguagüdüni lubáfu figoú wawágu láu loúnwen. ⁴ Ladúgünbalin Búngiu líra, lun gayáraabei lan wadügüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaúwarügütiña, luágu rügüñein cátei le lánina uboú jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua. ⁶ Dan le jabágaridun gürígia queísi jagúndan, maríttagunga jagía luágu Búngiu, barú lumútiña lídoun ouweni, ánjeinti dan le jabágaridun queísi lugúndan Sífiri Sándu, barú lumútiña lídoun ibágari tímatimaati lúma darángilaü. ⁷ Ja arítagubaña luágu cátei le lánina uboú le, láganiñu Búngiu lugúndan mája jáña, áni siñá ligía jíchaagun joúngua lábun lilúrudun. ⁸ Ligía, ja lubeí abágaridubaña láu jagúndan queísi gürígia garaúwarügütiña, siñáti jadúgüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaúwarügütiña, jabágariduña lídan ában lúma láni Búngiu Espíritu, queísi aganoúa lubeí jídan. Le úabei láni Crístu Espíritu lúma, máma lánigu Crístu. ¹⁰ Ánjein wínwan lubeí láni Crístu Espíritu jídan, wínwanboun juwáni lun sun dan ladúga tarúfudúniwa richáguañu ligíbugiñe Búngiu, láu sun loúweba lan júgubu ladúga figoú le lídaanbei uboú le. ¹¹ Ánjein wínwan lubeí láni Espíritu jídan, Búngiu méme le ásaaragüdübalin Jesucrístu lídaangiñe ouweni, líchuguba ibágari iséri lun júgubu le goúwedadibei, lídaangiñe láni Espíritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña. ¹³ Lugúndan ánjaün abágaridarügü queísi jugúndan, queísi gürígia garaúwarügütiña, jeféridiruba, mídinbadün siélu, ánjein jáfara igáburi lánina figoú le jídaanbei jilágubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña láni Búngiu Espíritu, lirájüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdüñün lueí láburujan ligáni Búngiu juágun, Espíritu le jerésibirubei, ligía le adúgübalün lun lirájüñü jumá Búngiu. Ligía gayára lubeí wagúaruni Búngiu Wáguchi. ¹⁶ Geféenti láni Búngiu Espíritu woun luágu lirájüñüjadiwa lan Búngiu. ¹⁷ Áni ladúga lirájüñü wamá Búngiu, garíchatywa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein sáfuri wabeí luágu Crístu ya uboúagu, gafánraanbadiwa lídan luweírigun yágüta siélu.

¹⁸ Jarítaguatina luágu ni cáta lan le wasúfurirubei ya ubouágu lúmoun uweírighuni le lúnbei wabíjini siélu. ¹⁹ Láuñein sarágu ayúmajani lúma eménigini sun ubou le ladúgübei Búngiu, agúrabei dan le lúnbei jerésibiruni lirájüñü Búngiu jalágaante. ²⁰ Níjein mégeiti luágu sun ubou, máma jamúga ladúga labúseerun, ladúga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan ubou lídaangiñe asúfuriruni lúma agádeiruni le gádaanbalin lun gafánraanbei lan lídan jaweírighun lirájüñü Búngiu. ²² Subúdi wamúti luágu chülú lan lúmoun dan le, sun ubou le ladúgübei Búngiu ayájuati láu igárigu camá ában wúri to agáridutu. ²³ Áni máma rügúñein ubou asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñüjadiwa lánme Búngiu le tímatimaati, dánme le liséridun wágubu. ²⁴ Ligía lágüdaja wasálbarun. Merésibirun wamágili sun ubuiduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga ibíja wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le ibíja jamáalibei. ²⁵ Queíti merésibirun wamágili lubei sun le lúnbei wabíjini queísi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguniwa Sífiri Sándu lun waríñaguni luweírín cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe, ába loúnabuniwa Búngiu lugúndun ayúmuraguati Espíritu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanúgün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni. ²⁹ Lugúndun ja lasúbudirubaña Búngiu lúmagiñe lubáragiñe ladúgüni ubou luágu lánigubaña lan, fánrein lumútiña lun ítara jamá queísi Liraú, lun Liraú lan íbugañau joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírighun queísi lirájüñü.

³¹ ¿Cábati waríñaga luágu buri cátei le? Queísi lueígiñeñein lubei wafúleisein Búngiu, ¿cábagi jabáfu wáganiñu wawágu? ³² Mamájaanti Búngiu lun líchuguni Liraú guánarügü lun loúnwen luágu wafúleisein, lubáragiñe líra, ába ledégereruni lun loúnwen waweígiñe, sun wagía, ¿ída lubáti míchugun láani sun líbiri cátei woun queísi líchuguni Liraú woun? ³³ ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasíadiruniwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuragua wawágu. ³⁵ ¿Cábati gayára lagídaruniwa luei línsiñejabu Crístu? ¿Liyáraabadiwa funági asúfuriruni, o lénreengúnga, o eibaajóuni, o ilamáü, o manáanguni, o pelíguru, o ouweni? ¡Uá!

³⁶ Laríñajare tídan Lerérun Búngiu.

Yaráfatiwa lun wounwen bueígiñe ságü wéyu,

ítara líña jouseruniwa wáganiñu queísi mudún anügútiña lun jafarún.

³⁷ Lídan sun cátei le, ibíja wamúti luweírín lubáfu Crístu, le jínsiñejabúbei woun, lun wagáñeirun lídan sun lénreengúnga. ³⁸ Choúru numúti lubeíti luágu úa lan ni cáta lun lagídaruniwa luei línsiñejabu Búngiu—ni ouweni, ni ibágari, ni ánjeligu, ni máfianu, ni cátei le guetóbei, ni le lúnbei liábin, ³⁹ ni le siélubei, ni le ubouáguabei, ní buri ámu

cátei le ladúgübei Búngiu—siñáti lagídaruníwa lueí línsiñejabu le larúfudubei woun lídan Wabúreme Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei naríñaguni guetó jawágu nirásan, áu queísi ában affíneti luágu Crístu, áni meyéejantina, aríñaga tumúti nanígi nun to úaraguaboun lúma Sífiri Sándu luágu inárüni lan. ² Weíríti nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun gíñe lábugiñe nan líñaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queísi lirájüñü. Reídeití meja Búngiu jádan láu sun luweírigun áni rúlumuti gíñe darádu buri joun lúma lilúrudun lídaangiñe Moisés. Arúfudati igáburi joun lun jesériwidun lun, ligílisirugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadúnamabei lun liñurúniwa líri lun sun dan. Ítaralá.

⁶ Mámata luágu jamúga reídei lan lerérun Búngiu joun ladúgawagun Israél magúnfulirunga, ladúga máma sun Israelítagu lánigu Búngiu le tímatimaati. ⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraú Búngiu luágurügü lirásan, ja rügúñanu lirájüñü ladúga jaffínerun luágu lerérun, jagía anügúbaña queísi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachúlürün dan ligía, ábame tagáraüdün Sára ában irájü.”

¹⁰ Áni máma rügúñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magúriajoungiña, madúgüngiña gíñe ni cáta ni buíti ni wuríbati, ába laríñagun Búngiu tun Rebéca. “Lumúsunbei amúleñein le íbugañau.” Úaraguati gíñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña guffrümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebésenga ligía ca lan jadúgübei.

¹⁴ ¿Cábatí waríñaga? ¿Waríñaguba luágu múaran lan Búngiu? ¿Siñáti! ¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerún o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérun Búngiu, bürúwañu líña dimúrei le laríñagubei lun urúei Ejíptona. “Nadúgünbálibu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéreragüdünnun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu güriía? ¿Cági gayáraabei ladúgün cátei bouguditi lueí lugúndan Búngiu?”

²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soúdiéru lun le adúgübalin. “¿Cáme badúgana ítara?” ²¹ Garíchatí le adáagubei soúdiéru lun ladúgüni le labúseerun láu lubúñe soúdiéru, gayáraati ladúgün ában soúdiéru le díseguati layúsurun, lúma ában le ayúsurúti lun furúmiegurügü cátei lídaangiñe ában méme ubúñei.

²² Ítara méme líña, gabáfuti Búngiu jawágu güriía, aráanseñu líña lun larúfuduni luweírin ligáñi jawágu güriía ja gadúnabaña jagúnrinchawagún. Áfaaga lumúti jaríban láu sarágu gurásu darí guetó ²³ lúnrügü gayára lan larúfuduni luweírin luweírigun woun, wagía le únbaña gudémejabu lan, ja gíñe laráanserubaña lúmagiñe binárü lun

gafánraanbadiwa lan lídan luweírigun. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”,
gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ñí lubei laríñawagúa joun. “Máma nánigu jugúya”,
ñíba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladúgawagun Israél quei ságoun láru béya, biánraürügúbaña jádaangiñe erédera lun jasálbarun, ²⁸ lugúndun lagúnfulirubei Búngiu lerérun ligíbuagu ubouú lun lagúnrinchaguniña ja magáambadibaña lun, lídan ában igáburi le gumúti, le gíñe furéseti.” ²⁹ Queísi méja laríñagun méme Isaías.

Lun jamúga meja mígirun lan Súnti Gabáfu jádaangiñe wadúgawagun woun,
wayábiña jamúga lun ítara wamá queísi ubúru gu buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña juríu, ja mibíjinbalin lilúrudun Búngiu lun jasúbudiruni le buídubei lúma le wuríbabei, jagía anügúbaña quei richáguatiña ligíbugiñe Búngiu ladúga jafíñerun luágu. ³¹ Ánjañati ladúgawagun Israél, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machúlüntiña lun richágua jamá ligíbugiñe Búngiu. ³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafíñen, jadúgeirüga láu cátei le guánarügü jadúgübei. Ligía jachúgeragunbei luágu Jesucrístu queísi “dúbü le achúgeraguágülei”, ladúga siñá lan jafíñerun luágu queísi Jasálbaragüle. ³³ Laríñajare tídan Lerérun Búngiu.

Rútina ában wügúri le queísigubeirügübei dúbü le achúgeraguágülei Sión, dúbü gíñe le eíguadagüdúti gürígia.

Ánjeinti le afíñeruti luágu, maságürijanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juríubaña, lun jasálbarun. ² Aríñagatina luágu jafúleisein luágu níjein lan ában óunwenbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madúgünga jameí le labúseerubei. ⁴ Lugúndun Crístu lébejabei lagúnfulirúniwa lilúrudun Moisés, áni adúgati lun sun lan ja afíñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, laríñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.” ⁶ Luáguti lerésibiruniña Búngiu gürígia queísi richáguatiña ligíbugiñe luágu jafíñen, laríñajare. “Maríñagabá tídan banígi. ¿Cába amúdeira siélun?” — queísigubeirügü barárigüdúñein lan Crístu le Wasálbaragüle siélugiñe. ⁷ Maríñagabá gíñe. “¿Cába arárira le ñíjin jabeí jiláaña?” — queísigubeirügü bamúdeiragüdúñein lan Crístu jádaangiñe jiláaña ítara. Úati ni cáta lun wadúgüni lueídügüya lun wafíñerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein gíñe ugánu ligía tídan banígi.” Ugánu le, elun?” — queísigubeirügü barárigüdúñein lan Crístu le ligía ugánu le lánina afíñeni luágu Crístu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsú lan Babúremebei, afíñe amúrü tídan banígi luágu sarágüda láani Búngiu lídaangiñe óúweni,

basálbaruba. ¹⁰ Láu bafíñerun luágu Jesucrístu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le affíñeruti luágu Jesucrístu lun laságürijan luágu lárigiñe.” ¹² Ában jáu juríu jáma ja mámabaña juríu, Wabúreme Jesucrístu, ligía Jabúremebei súnigubei, áni fuleísei lumútiña sun ja agúarubaña lun lun líderaguniña. ¹³ Ítara líña quei laríñawagún tídan Lerérun Búngiu. “Sun ja aguáruti líri Wabúreme, jasálbaruba.” ¹⁴ ¿Ída lubáti gayára lan jagúaruni lun lasálbaruniña ánjein maffíñerungiña lubeí luágu? ¿Ída lúba giñéti gayára lan jafíñerun luágu, ánjein magáambungiña lubeí luágu? ¿Ída lubáti gayára lan jagáambun luágu, ánjein uá jabeí apúrichijati ugánu luáguti asálbaruni joun? ¹⁵ ¿Ída lubáti gíñe gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérun Búngiu. “¡Ma lubuídun jachúlürün ja anúgübalin ugánu luáguti aráandaruni lúma Búngiu, apúrichija jameí ugánu buíti luáguti asálbaruni!”

¹⁶ Másutiña gürígia ja agáamba jamáalibeí ugánu luáguti asálbaruni ebéresera láu. Queísi laríñaguni Isaías tídan lilíburun. “Wabúreme, míbetiña affíñerutiña luágu ugánu luáguti asálbaruni le wapúrichijabei.” ¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába naríñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Taríñajare Lerérun Búngiu.

Agaambúaali jamálali lídan sun fulásu,
chülújali jerérun lídoun lagúmujoún larígei uboú.

¹⁹ Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés.

Naméendidagüdúbadün jadúga ában rása ja máma náni,
nagáñidagüdúbadün jadúga ában rása ja ibídiñegidina joun.

²⁰ Aríñagati gíñe Búngiu liyúmulugugiñe Isaías.

Darí jamutina ja máluajaanbalina,
arúfudaguatina núngua joun ja málügüdajánbaña nuágu.

²¹ Ábaya laríñagun jawágu Israelítagu. “Sun wéyu náu agúaja joun gürígia magáambadi-tiña, mabuídun.”

11

Israelítagu ja sálbabaña

¹ Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. ² Barú lumútiña Búngiu Israel-ítagu queísi lánigu lúmagiñé meja binárü, guetó, mamájaanti joun. ¿Magáambun jumúti le taríñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga. ³ “Nabúreme, áfaragua jamá profétagu jilágubei, güríngua jameí buri báni latárü, áu rügáali erédera jádaangiñe bánigu, áni buséntiña gíñe jáfarunina jilágubei.” ⁴ Ába laríñagun Búngiu lun. “Anuádajaadina sédü mílu wügúriña nubárua ja májuduragúngiñabaña ligíbugiñe liyáwa búngiu le Baal.” ⁵ Ítara méme gíñe lídoun buri wéyu le, reídeijaña átiri jádaangiñe juríu ja anúadaja láañabaña Búngiu láu lareíni. ⁶ Ánjeinti láu lubeí lareíni Búngiu lanúadiraña, mámaali láu cátei le liyáraati gürígia guánarügü adúga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei affíñeni luágu

Búngiu, ába lígiruniña Búngiu táu tidére janígi. ⁸ Queísi taríñagun Lerérun Búngiu. “Adúga lumútiña Búngiu lun deré lan jachúgü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülú lúmoun dan le.” ⁹ Aríñagati David.

Garábagua lámuga jefédujan lun sádarama,
lun jáburujan tídoun, lun jasúfurirun.

¹⁰ Darú lámuga jágu, maríjin jamámuga,

sebúgua lámuga gíñe janágan lábugiñe janúgün lun sun dan.

Jasálbarun ja mámabaña juríu

¹¹ Nálügüdajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadúgübei juríu buítima lun ubou, áni ánjein buíti lubeí lanúgübei jeféridirun joun ja mámabaña juríu, ¿sarágume buídutimaabei lan dánme le jasálbarun sun juríu!

¹³ Níjein gíñe ában cátei lun naríñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíriri nubéresen láu nuwádigimari, ¹⁴ lun gayára lan jabúseerun nirásan jáyeijanün, lun gíñe jasálbarun.

¹⁵ Ánjein ladúga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni. ¹⁶ Ánjein derégewa tubeí furúmiñetu fein to adúgútu tídaangiñe fulúwaaru añóundawagutu lun Búngiu, derégewatu gíñe sun fulúwaaru ñounwaguatu to ídaangiñeboun tiábin fein tugúya. Ánjein gíñe derégewa lubeí títlagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olívo tímatimaati, chaúnwatiña, gidáwatiña jagánaguagiñe lumútuniña Búngiu ladúga maffíñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jíabin lun gabára jumá lídan títlagüle lúma lídan tibágarí olívo, resíbi jugúyame labínirun Búngiu, queísi lumútuniña. ¹⁸ Marítagua jumátia luágu buídutimá jumá lueí límu le ñígubeibeí méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalin ílagülaü, luágu ílagülaü lan ágüdajabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun maffíñen jamá luágu Wasálbaragüle, jugúya, gabára jubeí ladúga jaffíñen luágu. Manángua jumá lubeíti júngua, duárirügü jumá. ²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámabei juríu, ánjaün ñúbin lun maffíñen jumá. ²² Aríja jumeí lubeí luweíriri lareídun Búngiu, derégüdati gíñe. Derégüdati joun ja maffíñebaña, areídati joun ja affíñebaña. Lúnti jasígirun lídan lareíni láu sun jaffíñen luágu, ánjein madúgün jumá ítara, jagídarúba gíñe. ²³ Ánjaña ñúbin juríu lun jaffíñerun luágu Crístu, jíchugúyayaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña jarigoún. ²⁴ Jugúya le mámabei juríu, chaúnwatün tueígiñe ában olívo to áraabuna, ába jíchugún tuágun olívo to buítu, gúbume ladúgüwa joun juríu ja tilímunbaña olívo buítu ja tímatimaatiña, jíchugúyayaba jarigoún tuágun olívo to ñígiñe lubeí jagídarúa, naríñaguña luágu lachúlürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügüdagun júngua

luágu buri cátei le. luágu deréragüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu. ²⁶Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe,
ábame lagídarun wuríbani jádaangiñe juríu.

²⁷Nijánba nidáradun jáma,
dánme le nagídaruni jafígoun.

²⁸Luágu ugánu le luáguti asálbaruni, barúwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagúbürigu juríu. ²⁹Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹Magáambaditiña juríu lun Búngiu guetó, ánjein líra, lúnrügü gudémejabu lan Búngiu joun queísi gudémejabu lan jun. ³²Ígira lumútiña Búngiu súnqubei lun magáambun jamáni, lun gayáraabei lan gudémejabu lan joun.

³³¡Uweírín lareídun Búngiu, lúma lichú láu! Siñáti wasúbudiruni larítangun, siñá gunfaráanda wamáni lémeri. ³⁴¿Cági gunfarándabalin larítangun Búngiu? ¿Cági arúfudajabei lun? ³⁵¿Cági gürígia rújalíbei som cátei lun Búngiu furúmiñe lun lerésibirun som cátei fáyeitime lárigiñe? ³⁶Úati ni ában, lúmagiñe Búngiu liábin sun cátei, ligía gíñe ágüdajabalin sun cátei, áni lúngua gíñe ladúgei. ¡Uweíríguni lun Búngiu lun sun dan! Ítaralá.

12

Ibágari le derégewati lun Búngiu

¹Amúriajatina lubeíti júma, nidújeñu, lun jedéregeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadúgüni lugúndun weíríti lareíni woun. ²Jebé jabágaridun queísi lirájüñü ubou le, lubáragiñe líra, sáansi jumeí ligáburí jisáminan, sáansi lámuga gíñe ligáburí jabágaridun. Ítara lúba jíábin lun jasúbudiruni le lugúndaanbei Búngiu jun—le buídubei, le uáraguabei.

³Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luougua weíri sügú láu le ligíabei. Lubáragiñe líra, cáda ában lúnti lasúbudiragun lúngua, según affíñeni le rúlaalíbei Búngiu lun. ⁴Lugúndun ítara quei gíbe lán buri umégeguni luágu ábanrügü úgubu, áni máma ában méme lifísiute sun umégeguni ligía, ⁵ítara wáña gíñe, wagía affíñetiña, láu sun gíbe wamá, ában rügúñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadúgüni según affíñeni le wádaanbei, ⁷ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸Le gíchigaditi dúgüdaguau joun ámu, lúnti líchaagun lúngua lun ladúgüni. Le edéweejati, lúnti magúrabun lan láguyun lun, le ábutíbei, lúnti lagúmadijan láu sarágu duári, le íderaguti gudémetiña, lúnti ladúgüni láu ugúndani.

Ligáburí jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ínsiñeni le ináruniti. Iyéeregulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jinúragüdüni jiri jidújeñu.

¹¹ Mamágualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteingirei, súnwandan.

¹³ Íderagua jumáña afíñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaaja jumá labínirun Búngiu jawágun ja oúserutün wuríba, amúriaaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadúgüni le buídubei jagíbugiñe súngubei. ¹⁸ Adúga jumeí sun le juáraati lun jabágaridun lídan dan jáma súngubei. ¹⁹ Nidújeñu jínsiñetiña nun, mágyuyüda jumeí wuríbani, ígira jumeí lun Búngiu lan afáyeigüda luágu. Taríñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.” ²⁰ Aríñagati gíñe Búngiu. “Ánjein lamá lubeí bágani, rúba eíginí lun, ánjein mágürabu lubeí, rúba dúna lun, lugúndun láu badúgüni líra, lebéloruba busíganu lun luágu luríban louserunibu.” ²¹ Mígiraguagüdabá búngua lun lagáñeirunibu wuríbani lun báguyugüdüni wuríbani luágu wuríbani, lubáragiñe líra, gáñibeí wuríbani láu buídu le badúgübei.

13

¹ Lúnti jíchaagun súngubei júngua lábun jalúrudun gumádimatiña, lugúndun ítara líña laráansejan Búngiu lun ñíbeí lan lúrodu, áni gumádimatiña ja lídaanbaña jabára, labúseerun Búngiu añájein lubeí ñi. ² Gürígia lubeíti le awúgürijoúti lun gumádi, múaraanti láu le laríñagubei Búngiu, áni ja awúgürijoútiña ítara, gadúnruntiña luágu líra áni jafáyeiruba luágu. ³ Máma lúnñanu jíchugun gumádimatiña anúfudei joun ja adúgübalin le buídubei, aná joun ja adúgübalin le wuríbabei. ¿Buséntibu babágaridun manúfudeiga lueí lúrodu? Buídulá bouserun, ábame buídu ban lurúma lúrodu, ⁴ lugúndun lesériwiduña lun Búngiu luágu bufúleisein. Ánjein wuríba bouserun, lúnti janúfude ban, ladúga máma luágu ni cáta gabáfu lan lúrodu lun lafáyeijagüdüni luágu dúru, quei lesériwiduña lubeí lun Búngiu lun lafáyeijagüdüni luágu dúru. ⁵ Ligía lúnti lubeí úragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítagan. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñúbinbei jun bougudigiñe lueí jageíra. Gagáambadi jumá joun gumádimatiña, ru jugúyame inébesei joun queísi lubúdubu. ⁸ Máni jumá dúweiti ni ca úma, lueídügüya lidúweitina ínsiñeni le jadúweirubei júmagua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladúgüni líra. ⁹ Taríñajare Lerérun Búngiu. “Magámaridabá gürígia maríetiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bínsiñegua búngua.” ¹⁰ Le jínsiñejabúbei, madúgünti wuríbati lun ni ában, ánjava lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburi wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaajali óra lun

lagírribudun Wasálbaragüle ubouágun sügú láu dán meja le wafínerunbei luágu ugánu luáguti asálbaruni. ¹² Belújali áriebe buídu, yaráfaali larúgadun, ligía lúnti lubeí wígiruni wadúgüni cátei wuríbati le adúgúbei lábugiñe lubúriga, lun wadáurunun wadáuragun queísi súdeara ja lábugiñetiña larúgounga. ¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburi lun jarámudagun lueí jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgau. ¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagúburi ayúmajani.

14

Madímurejabá luágu bidúje lueígiñe Jesucrístu

¹ Ánjein débili lubeí ában gürígia lídan laffínen, resíbi jumeí, maríñagunga ni cáta lun luágu cátei le machourunbei luágu. ² Queí buri, añájein derégudati jaffínen, jarítaguatiña luágu gayára lan jeígin affíñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jaffínen, meígintiña úwi. ³ Le eígiti furúmieguaügü cátei, moún lumuti únabu lan lanúgüni le meíginbalin, le gíñe májabei leígin furúmieguaügü cátei, moún lumuti gíñe ladímurejan luágu le eíginbalin, lugúndun resíbi láali Búngiu gürígia ligía queísi lánigu. ⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdúni buídu.

⁵ Nijánya ában jémpulu. Añájein gürígia weíríti janúgüni ában wéyu lueí ámu wéyu, añájein jíbiri, affíñetiña luágu ában lan lábu sun wéyu. Cáda ában lúnti lachouuruni le uágubei larítagua. ⁶ Le areídubei som wéyu, ladúgüñein lun líchugun inébesi lun Búngiu. Le eígibe furúmieguaügü cátei, leígini lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladúga liloúguan laffínen, lun líchugun inébesi lun Búngiu ladúgei, rúti gíñe eteíngiruni lun Búngiu luágu cátei le gayáraabei leígin según laffínen.

⁷ Naríñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadúgüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágari queísi lídan ouweni, lání Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi taríñagun Lerérun Búngiu.

Inárüni ítara quei gabágarí nan, líña laríñagun Búngiu, luágu jájuduraguba lan sun gürígia nigíbugiñe,
áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luógu lúma Búngiu.

Machúgeraguagüdadeí bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madúgün jumá ni cáta le gayáraati lachúgeraguagüdüni jíbiri, o láburugüdúni lan lídoun figoú. ¹⁴ Subúdi numúti luágu úa lan ni cáta le leígibe gürígia lun lawíyeduni ligíbugiñe Búngiu, áni chouuru numúti líra, áu queísi affíñeti luágu Jesucrístu. Láu sun líra, ánjein jarítagua lubeí ában gürígia luágu marúman lan ában cátei, marúmaanti lun, áni figoú lun lun leígini. ¹⁵ Ánjeinti bañáwurija laffínen bidúje láu cátei le beígibe, mámaali bagáburiduña láu ínsiñejabuni. Madúgabá lun leféridirun ában

gürígia le ueígiñebei louwe Crístu, ladúgarügü beígin ítaga cátei. ¹⁶ Míchiga jumá lubeíti lúgaaru lun ladímurejóun wuríba luágu cátei le gayáraabei jadúgüni queísi affíñetiña luágu Crístu. ¹⁷ Larúeijan Búngiu máma cátei luáguti le eigíbei o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu. ²⁰ Magúrinchaguabeí luwádigmari Búngiu lídan libágari ában gürígia láu cátei le beígíbei. Inárüni luágu jarúma lan sun eígini ligíbugiñe Búngiu, le wuríbabei, lun leígín cátei le áburugüdütiña ámu gürígia lídoun figóu. ²¹ Buíti lun meígin ban úwi, matún bínu, madúgún ni cáta le achúgeraguagüdüti bidúje, o láburugüdüni lan lídoun figóu, o ledébiliragüdüni lan laffínen. ²² Affíñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei laríñagun luágu buídu lan cátei le ladúgübei, masándiragunga ligía lúngua láu dúru! ²³ Ánjeinti le eigíbei ában cátei láu machouruni luágu buídu lan leígini queísi affíñeti luágu Crístu, gadúnrunti ladúga leigíni, lugúndun meígin lumúti láu affíñeni. Sun le wadúgübei, ánjava arítagua luágu fágua lan moun láani wadúgüni, figóu woun.

15

Gúndaagüdabá gürígia bíledi, máma amúrü guánarügü

¹ Wagía le jerebei lídan waffínen, lúnti gagúraasun wamá jabá ja louguagiñabaña affíñe, lúnti warítangun luágu le buídubei joun, mámarügü luágu wíchugun ugúndani wouniwagua. ² Cáda ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni laffínen. ³ Ni Crístu, míchugunti ugúndani lúniwagua, lubáragiñe líra, suséreti le abúrújóubei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binárü, lun larúfudajoún woun labúrújóúa, bürúwatí meja dimúrei buri ligía lun wanúgün gurásu lúma dúgüdaguau lídaangiñe, gayára lámuga weménigiduntima luágu Búngiu. ⁵ Búngiu le íchugubei gurásu lúma dúgüdaguau, íderagualaún lun jabágaridun lídan dan jáma jíbiri, queísi ladúgüni Jesucrístu. ⁶ Ítara lúba, sun lan wagía lídan ában, láu ábanrügü umálali, wíchuguba uweíriguni lun Búngiu, le Lúguchi Wabúreme Jesucrístu.

Agáambatiña ja mámabaña jurú luágu Wasálbaragüle

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le naríñagubei, luágu liábinbei lán meja Crístu lun lesériwidun joun jurú, lun lagúnfulirun dimúrei le íchugúbei joun binádu wagúbürigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña jurú uweíriguni lun Búngiu luágu lareídun, quei taríñaguni Lerérun Búngiu.

Ligía níchuguba lubeí uweíriguni bun jagánaguagiñe ja mámabaña jurú, nerémujaba gíñe luágu buweírigun.

¹⁰ Taríñajare gíñe Lerérun Búngiu.

Gúnda jumá, jugúya le mámabei jurú, úara jáma ja lánigubaña Búngiu.

¹¹ Taríñajare gíñe.

Rújuma sun ja mámabaña jurú inébesei lun Búngiu, adímureja jamá sun gürígia luágu luweírigun.

¹² Laríñajare gíñe Isaías tídan Lerérun Búngiu.

Liábiba ában ladúgawagun Isaí, le lúnbei lagúmadiruniña ja mámabaña jurú. Jagía, jeménigiduba luágu.

¹³ Búngiu, le íchugubalin eménigini woun, buíngüdalaún láu ugúndani lúma darángi-láü lídan jafíñerun luágu, lun buíñu jumá láu eménigini, láu lubáfu Sífiri Sándu.

¹⁴ Nidújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crístu, luágu gíñe gíchigadi jumá dimúrei buíti joun jíbirigu. ¹⁵ Tídan gárada to, abúrijaadina jun láu sun furáangu luágu buri cátei le lun mabúlieidun jumáni. Nadúgüñein luágu wadágimanu le rúlaalíbei Búngiu nun láu lareíni, ¹⁶ lun nesériwidun lun Jesucrístu jagánagua ja mámabaña juríu. Seríwi le nadúgübei, napúrichijani ugánu lúmagiñeti Búngiu luágu Wasálbaragüle lun nanúgübaña lan ja mámabaña juríu lun Búngiu, lun lerésibiruniña queísi güriquia ja jarúmaaru janígi láu luwádigimaridun Sífiri Sándu jádan.

¹⁷ Ítara líña lubeíti, áu queísi ában afíñeti luágu Jesucrístu, gébunati gúnda nan lídan nesériwidun lun Búngiu, ¹⁸ luágu rügüñein buri cátei le ladúgübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírín buri seíni lúma buri miláguru le nadúgübei láu lubáfu Sífiri Sándu nídan, lun lanúgüniña ja mámabaña juríu lúmoun. Láu igáburi le, jóustagüda náali lapúrichijóun ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ñí lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ñí lumuti chülúljalí lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladúga nesériwiduña lan lun Crístu lídan ámu fulásu, siñágili lubeí nídin bisídaün, láu sun gíbeeli lan weíyaasu nabúseerun nadúgüni. ²³ Guetóti, quei gumúnaali lan nuwádigimari lueígiñe oúbaü le, áni quei lúmagiñe lan binárü nabúseera nídin aríjaün, ²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, barüína cátei joun wadújeñu lueígiñe Jesucrístu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóunajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadúgüni cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni afíñetiña ja juríu jarísín le lánina siélu jáma ja mámabaña juríu, lúnti giñéti jíderaguniña afíñetiña ja mámabaña juríu afíñetiña ja juríu luágu jemegeirun ya uboúagu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naúnme dánme le násügürün. ²⁹ Choúru numúti luágu dan lánme nachúlürün júmoun, nachúlürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jaweí maffíñetiña ja Judéabaña, lun gíñe buídu lan lerésibirúniwa íderawaguni le nanúgübei joun wadújeñu ja Jerusalénbaña, ³² lun gúndaabadina lan dánme le nachúlürün júmoun eméraagua murúsun, ánjein ligía lubeí lugúndaabei Búngiu. ³³ Júmalá Búngiu le íchugubei darángiláü. Ítaralá.

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligilisi to Cencreáboun, jun. ² Dánme le tachúlürün júmoun, resibi jumoún buídu lídan líri Wabúreme, queísi lúnti lan ladügún jádan idújeñu lídan affñeni. Íderagua jumoúnme lídan furúmiegurügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun gíñe wadújeñu ja tílana jalígilisin ja mámbaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei affñeruti luágu Crístu ubúругu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómána. ⁷ Mábuga níña joun nupaísanu Andrónico lúma Junías já meja nfbirigubaña furísunrugü, buíti jadímurejan láni Crístu apóstolugu jawágu, jagía gíñe affñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba lídan wawádigimari luágu Jesucrístu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda láalibeí lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupaísanu Herodión lúma joun tílana lúban Narcíso ja affñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügúri le buídubei igáburi le tímatimaati ligíbugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun. ¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámbaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámbaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana lilígilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdübaña güriñe, ru jagía achúgeraguágüleí lun jaffíñen. Múaraanti le jadúgübei lúma le arúfudajoubei jun. Díse jumá jaweí güriñe jagía, ¹⁸ lugúndun güriñe jagía, mesériwiduntiña lun Wabúreme Jesucrístu, jóungua guánarügü jesériwida. Jeyédañati güriñe ja únabugutiña láu buri liñúlun lúma lubuídun lagaambún jerérun. ¹⁹ Subúdi jamúti sun güriñe luágu ñúdun jumá láu le lubeíbei Búngiu, ligía gúnda nubeí, buséntina gíñe lun furése jumá lun jadúgüni le buídubei, máma lun le wuríbabei. ²⁰ Búngiu le íchugubalin darángilau, lagáñeiragüdübadün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le nouba lídan wadágimanu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abúrújabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganoúña tídan lúban to gíñe lafúrederúboun joun sun tílana ligilisi. Mábuga líña gíñe Erásto jun, le ágüdajabalin liseínsun fulásu, lúma gíñe wadúje Cuaróto.

²⁴ Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesi lun Búngiu, le gayáraabei ladúgünün lúntima derégüdagü jumá lídan jaffíñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abúrúja jamá meja profétagu luágu. ²⁶ Guetó,

láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jaffñerun luágu, gagáambadi jagíame lun Búngiu.

²⁷ ;Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucrístu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürüjan Páblo joun títana ligílisi Corínto

¹ Áu Páblo, wáladina Búngiu láu lugúndan lun ábanbadina la láni Jesucrístu apóstolu, le méme giríbei ában le loúnajan. Nabürüjañoun gárada to, úara lúma wadúje Sóstenes, jun, ² jugúya le wadújeñu lueigiñe Jesucrístu ja tílanabaña lilígílisin Búngiu to ubúruguboun Corínto, ja lánigubaña Búngiu ladúga lídaañadün lan ában lúma Jesucrístu. Wájali Búngiu jun lun jedéregeragun júngua lun le gumúti, queísi wájali lan joun sun ja agúarubalin líri Wabúreme Jesucrístu lídan sun fulásu lun jedéregeragun joúngua lun. Jesucrístu Jabúremebei, ligía gíñe Wabúremebei. ³ Resíbi jumeí abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Abíniruni le wánibei lídaangiñe Jesucrístu

⁴ Súnwandan neteíngiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu. ⁵ Ladúga lídaañadün lan ában lúma Crístu, rújali Búngiu sun luwúyeri irisini le lánina siélu jun, rújali ában oúnwenbun subúdi jun luóguua, lun gayáraabei lan jadímurejan luágu láu ában lichú áu. ⁶ Ítara líña geféen jumá luágu inárüni lan le waríñagubei jun luágu Crístu. ⁷ Láu igáburi le, úati ni cáta jemégeirun lídaangiñe le líchugubei Crístu, sun anjúnja lan agúrabajei wéyu le lúnbei lagíribudun Wabúreme Jesucrístu uboúagun. ⁸ Lágüdañadün Búngiu derégüdagu lídan jafíñen darí lúmoun lagúmujóun, lun úa lan ni ában íchuguti jidúnrun luágu ni cáta dánme le líabin Wabúreme Jesucrístu. ⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucrístu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Naríñagunbalin le, nidújeñu, lugúndun aríñagaña ja jádaangiñebaña lufámilian Cloé luágu níjein lán nege múarani jagánagua. ¹² Ámuñegueinarügü lán nege cátei laríñagun cáda ában jídaangiñe, añájein nege jídaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pédro áu”, jaríñaga jíbiri. “Áu, lánigu Crístu áu”. ¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabástera? ¹⁴ Teínqui níña lun Búngiu luágu mabásteragüdün nan ni ában jídaangiñe lueídügüya Críspo lúma Gáyo, ¹⁵ ítara, úati ni ában lun laríñagun luágu lídan lan níri labástera lun nánigu lan. ¹⁶ Narítaguñein guetó luágu badíseigüda náani gíñe Estéfanos jáu sun títana lúban, marítaguntina ánjein badíseigüda nubeí ámu. ¹⁷ Moúnajan lumútina Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíríguburiti, lueí lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

¹⁸ Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia. ¹⁹ Bürúwati tídan Lerérun Búngiu. Nagúrinchagubei lichú áu le lánina uboú le, nadúgübei jafúrendeí furéndeitiña lun ni cárame ánjein máma lubeí númagiñe líabin.

²⁰ ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina uboú le? Úati ju lan lun ni cáta, adúga láali Búngiu lichú láu uboú le lun libídiounigame áu. ²¹ Láu lichú láu, adúgati lun masúbudirun jamáni ja lánigubaña uboú láu lichú áu le jawágubei. Láu gíñe lichú láu, ába laráansejan lun lasálbaruniña ja afñeabaña luágu lárigiñe jagáambuni ugánu luágu loúnwen Crístu jawágu, láu sun barú jamaani jíbiri gürígia ugánu le quei libídiouniga áu.

²² Buséntiña juríu jaríjin miláguru lun jafñerun luágu Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni. ²³ Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragülei le ouwebei láu ában luwúyeri ouweni le busíganudünati líbe líra, játi mámabaña juríu, janúgüni quei libídiouniga áu. ²⁴ Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruníwa ítara. ²⁵ Joun lirájüñü uboú, libídiouniga áu laráansejan Búngiu, wel, weíriti lichú láu Búngiu sügú láu le chútimaabei áu uboúagu. ²⁶ Nidújeñu, lúnti jasúbudiruni luágu wájali lan Búngiu jun, láu sun míbe jamá jídaangiñe chúti jáu según uboú, áni míbetiña gíñe jídaangiñe weírigutiña, o jádaangiñetiña lan família íñugutiña. ²⁷ Anúadaja láaña Búngiu ja ibídiouguabaña áu según uboú lun líchugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láaña gíñe ja lanúgübaña uboú quei mabáfutiña lun líchugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu. ²⁸ Anúadaja láaña Búngiu ja maweírigunbaña uboúagu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña jóungua uboúagu. ²⁹ Úati lubeíti ni ában gayáraati lanáangun lúngua ligíbugiñe Búngiu. ³⁰ Rúláadün Búngiu guánarügü jugúya afñetiña lídoun ában lúma Jesucrístu. Ladúga cátei líra, ibíjatiwa lichú áu lúmagiñe Crístu, gayáraati lerésibiruníwa Búngiu queisi richáguatiña, derégeguañu woúngua lun, sálbañu. ³¹ Ítara líña lubeíti adúga wameí quei taríñagun Lerérun Búngiu. “Le busénti ladímurejan luágu uweíriguni, adímurejalá luágu luweírin cátei le adúga láalibeí Wabúreme Crístu woun.”

2

Ugánu luáguti Crístu le ádarawagúbei luágu gurúwa

¹ Nidújeñu, dán meja le nídinbei lun nadímurejan jun luágu linárün Búngiu, adúga numúti mayúsurunga dimúrei buri íñuguti. ² Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagúbei luágu gurúwa. ³ Ába narúfudagun núngua jun queisi ában wügúri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme. ⁴ Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügúriña chu táu. Lubáragiñe líra, láurügü lubáfu láni Búngiu Espíritu nadímureja jun, ába jasúbudiruni luágu inárüni lan le naríñagubei jun. ⁵ Ítara líña jafñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe láni Espíritu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafñen. Ánjeinti lichú áu ligía, máma lánina uboú le, máma gíñe jáni ja agúmadijabaña ya uboúagu, ja madíseelibeí ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladúgüni uboú lun lasálbaruníwa lun sun dan, gafánran wamámuga lídan sun luweírigun Crístu. Ligía rügüñein meja asúbudirei aráansejani ligía, guetó, subúdigüda láali woun. ⁸ Játi gumádimatiña lánina

ubou le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Crístu luágu gurúwa. ⁹ Ítara líña queísi taríñaguni Lerérun Búngiu.

Maríjiñaja jamágili gürígia cátei buíti lé buri laráansejabei Búngiu joun ja jínsiñe-jabúbaña lun,

magáambuñajagiña gürígia luágu cátei buíti líbeina líra, marítaguntiña ída lúba lan.

¹⁰ Ába lasúbudiragüdüni láni Búngiu Espíritu, le méme Sífiri Sándu, luáguti buri sun lubuídun cátei ligía woun, wagía afíñetiña. Aríaaaja lumúti Sífiri Sándu sun cátei, áni subúdi lumúti lujúlilin-ágei larítangun Búngiu.

¹¹ ¿Ca jádaangiñe gürígia gayáraabei lasúbudiruni ca lan tídaanbei lanígi ában gürígia, lueídügüya espíritu le lídaanbei gürígia ligía? Ítara líña gíñe, láni rügüñein Búngiu Espíritu asúbudirei sun cátei le lánina Búngiu. ¹² Wagía afíñetiña, máma ában espíritu le lánina ubou werésibirubei, Sífiri Sándu le nüñbinbei lúmagiñe Búngiu, ligía werésibirubei, lun gunfaráanda wamáni le rúlaalíbei Búngiu woun láu lareíni. ¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja ibíjubalin Sífiri Sándu.

¹⁴ Gürígia le mibíjínbalin Sífiri Sándu, májati lun larítangun Búngiu le larúfudajabei láni Búngiu Espíritu jádaangiñe gürígia, lugúndun libídiouniga áu lanúgüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan. ¹⁵ Ánjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubou, siñáti gunfaráanda jamáni cáteiñein lan gürígia le eíbugubei lídan larúgounga le líchugubei Sífiri Sándu.

¹⁶ Queísi laríñawagun tídan Lerérun Búngiu. “¿Ca gunfaráanda jamáalíbei lisáminan Búngiu? ¿Ca gayáraabei larúfudajan lun Búngiu?” Láu sun líra, wagía afíñetiña, níjein lisáminan Crístu wádan ladúga ibíja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

¹ Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña jóungua lábugiñoun lagúmadijan Sífiri Sándu le gumúti—queísi joun irájüñü—luágu buri cátei le luáguti Crístu. ² Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítangun Búngiu gunfaráanda, áni chülú lúmoun dan le, siñá meme jumágili, ³ lugúndun gagáburigidün queísi jagáburi lirájüñü ubou. Níjeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífiri Sándu, áni jadúgüñein le jadúgübei sun mútu. ⁴ Lugúndun láu laríñagun ában. “Lánigu Páblo áu”, laríñagaya ában. “Áu lánigu Apólos”, jadúgüña queísi gürígia ja lánigu ubou le.

⁵ ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñebaña jíabin afíñera luágu Crístu. Wadágimanu le líchugubei Wabúreme lun cáda ában wádaangiñe, ligía wadúgübei. ⁶ Áu ábunagubalin Lerérun Búngiu queísi nádü tídoun janígi, Apólos áturaguei nádü ligía láu larúfudajan méme jun luágu Crístu. Búngiu aweíridagüdúbalin nádü, ligía edébugüdúbalin jafíñen. ⁷ Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdúbarun nádü. ⁸ Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun. ⁹ Íbirigu wagía lídan

wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gíñe queísi ában múna to lábunaguñounboun Búngiu. ¹⁰ Fuleísei láadina Búngiu láu líchugun ubáfu nun lun nuwádigimaridun úara lúma. Niábíti queísi ában wügúri le subúsijabúbei lun labunún wagábu buídu—áu le íchugubalin ébuu lun jafñen. Ámuti gürígia ábunagubei ligíbuagu ébuu ligía—jagía maésturugu ja arúfudajabaña luágu Jesucrístu jun, nárígi. Cáda ában, lúnti goúnigi lan ída líña lan lábunagun ligíbuagu ébuu ligía. ¹¹ Rúaali ébuu lun jafñen, áni siñáti líchugúniwa ámu ébuu. Ébuu ligía, Jesucrístu guánarügü. ¹² Gayáraati lábunagun gürígia ligíbuagu ébuu ligía laú cátei gebégiti le siñábei lágudúniwa, queísi gólu, pláta, lúma dúbü gebégiti, o gayáraati lábunagun láu cátei le mebégibe sarágu, le gayáraabei lágudúniwa, quei fuláansu, murísi o mabúru. ¹³ Lachúlürüba wéyu lun loúchuni Búngiu jawádigimari sun gürígia ubouágu lun laríjini ída líña lán meja, ánjein gebégi lubeí lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí. ¹⁴ Ánjein buídu lubeí wawádigimaridun luágu Búngiu áni madúnamati lun lagúnrinchawagúniwa, queísi siñá lan tagúnrinchawagúniwa múna to adügútu láu cátei derébuguti, werésibirubei wafáyeiruaja lúmagiñe Búngiu. ¹⁵ Ánjein mabuíddun lubeí wawádigimaridun luágu Búngiu, lagúnrinchawagúba sun wawádigimari, weféridirubei sun cátei, wawánirügüba wasálbara, quei le séfuguarügüti lúngua lídaangiñe wátu geméti.

¹⁶ ¿Ibídíñetísan jun luágu lilígílisin lan Búngiu jugúya, áni agánawa lan Sífiri Sándu jídan? ¹⁷ Ánjoun lagúnrinchagua ában gürígia lilígílisin Búngiu tugúya, lagúnrinchagubei gíñe Búngiu gürígia ligía, lugúndun Búngiu jabúremebei tílana lilígílisin, áni jugúya guánarügü tílanabei ligílisi tugúya.

¹⁸ Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúlieiduni lichú áu ligía, lun lanügúniwa queísi ában ibídiougua táu según ubou, gayára lámuga lerésibiruni lichú áu le tímatimaati le líchugubei Búngiu. ¹⁹ Lugúndun lichú áu le lánina ubou le, ában libídiouniga áu lun Búngiu. Taríñajare Lerérun Búngiu. “Áburugüda lumútiña Búngiu ja chúbaña áu según ubou le tídoun lisádaana jabíun guánarügü.” ²⁰ Aríñagatu gíñe. “Subúdi lumúti Wabúreme Búngiu luágu mála lan jasáminan sábiugu.” ²¹ Ligía moún lubei lun janáangun júngua luágu arúfudajati le jafálarubei, ladúga gürígia rügúñadiwa sun wagía, áni rúlaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúlaali gíñe sun cátei le ubouagubei jun lun jayúsuruni. Rúlumuti gíñe ibágarí lúma ouweni jun. Sun le asúseredubei jun ugúñe lúma sun le lúnbei lasúseredun jun, jáni. ²³ Jáni sun cátei ladúga lánigu Crístu jugúya, áni Crístu láni Búngiu.

4

Jawádigimari apóstolugu

¹ Lúnti lubeíti janügúniwa queísi rügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun. ² Le lubeíti ibíjiti ában wadágimanu, lúnti ladúgüni buídu lun larúfuduni luágu gadúna lan lun leménigidun liyúbudiri luágu. ³ Ánjein luágu noubadina, mawérinti nebéreserun luágu ída líña lan janügúni nesériwidun lun Búngiu, ni jugúya ni furúmieguarügü le ubouaguna. Ni áu guánarügü, siñáti naríñagun ánjein buídu lubeí nesériwidun lun, o ánjein níjein lubeí mégeiti luágu, ⁴ láu sun madúnrun nan luágu ni cáta lurúma narítangun, máma lueígiñe líra lun madúnrunbadina lan, Nabúreme agúseragüdübalina. ⁵ Magúseragüda jumá lubeíti luágu buri cátei lubáragiñe dan, agúra jumá lagíribudun Wabúreme Jesucrístu ubouagun lun laságaruni cátei le arámudaguabei lídoun larúgounga. Lasúbudiragüdübei

Wabúreme tarítangun cáda ában anígi, ca lan ueígiñe wadúgei sun le adúga wamaálabei. Ábame ladímurejan Búngiu buíti luágu gürígia le buídubei adúga.

⁶ Nidújeñu, adímurejaadina nuougua luma luágu Apólos queísi ában jémpulu jun lun gayáraabei lan jafúnrendeirun lídaangiñe le naríñagubei wawougua. Le lúnbei jafúnrendeiruni, lun manúgün jumá ában gürígia weíri lueí le lúnbei lanügúniwa, queísi bürúwañu lan, lun gíñe manáangun lan ni ában lúngua luágu ában arúfudajati le lafálarubei, áni lanúgeime le ában quei ni cáta. ⁷ ¿Cági adúgübalibu buídu jaweí jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga íbjarügü bumúti le búmabei láu báni búngua?

⁸ Jaganoún camá jamuga rísijadün lídan cátei lánina Búngiu, íbija jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña luma Crístu, ígira wagía. ¡Buíti jamúga lun urúeigu jumá le tímatimaati lun jamúga gafánran wamá lídan jarúeijan! ⁹ Laganoún nun luágu ígira láadiwa lan Búngiu wagía apóstolugu lídan lagúmujoún ubáraü. Ítara wáña queísi gürígia ja siádiwañabaña lun ouweni, ñúbinjadiwa lun ábanbadiwa lan aríawasei lun jaríaguniwa sun lílana ubouú, dándu ánjeligu queísi gürígia. ¹⁰ Barúwatiwa queísi íbídiougua táu lueígiñe wesériwidun lun Crístu, sun jarítaguñu jumá juougua luágu chu lan jáu lídan cátei lánina Crístu. Según jugúya, wagía débilitiwa, jugúya jéretün. Barú jamutiwa gürígia quei ni cáta, ánjein jugúya, inébetün joun. ¹¹ Chülú lúmoun wéyu le, áfagaadiwa ilámaü, mágürabu, luma manáanguni, wuríbatí jouseruniwa gürígia, mábantiwa, ¹² weírítí wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajouatiwa, awánda wamúti. ¹³ Adímurejatiña wuríba wawágu, rútiwa dimúrei buíti joun láu gurásu. Chülú lúmoun wéyu le, ousera jamútiwa camá ífei láni ubouú, quei cátei le mabúseerun jamáli gürígia.

¹⁴ Máma nabúrújañein le jun lun janúgün busíganu, nabúrújañein jun lun narúfudajan jun queísi joun nisáanigu jínsiñetiña nun. ¹⁵ Láu sun jamúga añájein lan dísi-míflu maésturugu arúfudajatiña jun luágu Crístu, áu rügúñein júguchi lídan jaffñen luágu, ladúga áu lan anúgübalin ugánu jun luágu Wasálbaragüle lun gayáraabei lan jaffñerun luágu. ¹⁶ Amúriajatina lubeíti júma lun jáyeijani nigáburi.

¹⁷ Ligía nouñajaanbalin Timotéo lun líderangunün luágu cátei le. Jínsiñeti nun sarágu, ítara líña queísi ában niraú lídan Jesucrístu, gayáraati neménigidun luágu. Larítaguagüdübadün luágu ligáburi nabágaridun queísi affñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu. ¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisídaün ladúga nanúfudei lun nagágibudagun júma. ¹⁹ Bulíeiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barúgua túngua ja adúga lun jesériwidun lun Búngiu, mámarügü le jaríñagubei. ²⁰ Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadúgüni lugúndan. ²¹ ¿Cáteiti jímeín jubeí. lun nabeíchunün dánme le nachúlürün, ódi lun nídin aríjaün láu ínsiñeni luma uálini?

5

Lagúserawagüdüñ ában le adúgübei figou

¹ Agaambúali luágu níjein lan ában jídaangiñe lagámariduñoun lúmari lúguchi. Ában ouñwenbun iwíyei líra, le majouabei lun ni jádan ja íbídiñejabubaña lun Búngiu. ² ¡Áni laú sun líra, anáanguagidün júngua! ¡Lúntirügü jamúga jírudagun luágu líra! Gürígia le adúgübalin lanárime iwíyei le, lúnti labugún jídaangiñe. ³ Láu sun úa nan júma le ñí jubei, anájein júma narítangunrugu, áni darínaali lidúnrun le adúgübalin figou le, camá jamuga

ñíñadina júma lun nagúseragüdüni. ⁴ Guetó, le lúnbei jadúgüni, lun joúndaragun lídan líri Wabúreme Jesucrístu, ñíbadina júma narítangunrugu, ñíbei gíñe lubáfu Wabúreme Jesúsu júma. ⁵ Lúnti lubeíti jedéregeruni wügúri ligía lun Máfia láu jaságaruni lídaangiñe jidámurin, lun lagúnrinchawagún lúgubu, sálba támuga luwáni dánme le lagíribudun Wabúreme Jesúsu ubouágun.

⁶ Moún lumuti janáangun júngua luágu le jadúgübei. ¿Magáambun jumágili cátei le. résigüda lumútu murúsun ísi sun fulúwaaru to ídounboun líchugúa? Ítara méme gíñe, murúsun figoú jagánagua gayáraati lagádeirunün súngebui. ⁷ Gidájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáali. Ábame jarúma jumá le tímatimaati. Ítara júba quei fein to eigíoun lídan fédu le páscua, to adúgúoun táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíbugiñe Búngiu ladúga derége láani Búngiu Crístu lun loúnwen luágu wafígoun quei meja ladágaragüdüniwa mudún lídan fédu le páscua luágu figoú. ⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme inárüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri. ¹⁰ Mára meja naríñaguña jun lun jadísedun le gumúti jaweí sun lirájüñü uboú le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun ubouáguagiñe. ¹¹ Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucrístu áni salúfuriti, o meménijabuti, o judúguati joun sándu, o marásualuguti, bachárua o jíweru. Moún lumuti ni lun jeigin lúma idújei le ítarati. ¹²⁻¹³ Mára áu lúnbei nagúseragüdüniña ja bougudibaña lueí Crístu, Búngiuba agúseragüdaña. Wagía, lúnti wagúseragüdüniña wadújeñu lueígiñe Jesucrístu ánjein jadúgüña lubeí wuríbati. Ligía gidájumei lubeí gafígounti le jagánaguagiñe.

6

Wuríbu buri jagíbugiñe agúseragüdütiña ja máma afíñetiña

¹ Dan le níjein lan cátei lúnti laríñaajan ában jídaangiñe líri ámu, ¿cági uágu jídin jámoun agúseragüdütiña ja ibídiñebei Crístu joun, lubáragiñe jamúga jídin jámoun lánigu Búngiu? ² ¿Ódi ibídiñeti jun luágu jagúseragüdübaña lan lánigu Búngiu lánigu uboú? Ánjeinti jagúseragüdübaña lubeí lánigu uboú, ¿siñá jumuti buri cátei ñúbüríti le aráansera? ³ ¿Ibídiñeti jun luágu wagúseragüdübaña lan gíñe ánjeligu? ¿Gúbuméti gayára lan wagúseragüdüñ luágu buri cátei lánina ibágari le! ⁴ Ánjein níjein lubeí buri wuríbu jagánagua luágu buri cátei le lánina ibágari le, ¿cámegi jídin aríñaaja joun ja maffínebaña luágu Jesucrístu, ja málabei lichú áu le jádaanbei ladúga máma lan lúmagiñeti Búngiu? ⁵ Naríñaguñein le lun janúgün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueígiñe Jesucrístu? ⁶ ¿Lúnti lídin ában idújei aríñaaja líri lidúje joun agúseragüdütiña ja maffíñetiña luágu Crístu?

⁷ Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adúgübei jun sügú láu jageíndagun ladúga. Buítimaati lun jígirun lun líwerujoún jueí. ⁸ Ánjein jugúya, lubáragiñe líra, adúgatün maríchaü, íweruja jugúya, íbini jaweí jidújeñu guánarügü.

⁹⁻¹⁰ ¿Ibídiñeti jun luágu ja lan adúgübaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja maríetiña, ja wügúriña ja agámaridutiña wügúriña jáledi, jíwerutiña,

meménijabutiña, bacháruatiña, marásualugutiña, ja anúgübalin láni ámu láu jabíbun—sun ja adúgübaña wuríbani líbe buri le, siñábei jebélurun lídoun larúeijan Búngiu siélu. ¹¹ Añájein jídaangiñe, ítara jañá meja, ánjein guetó, chibáwaali jifígoun, derégeguaadün júngua lun Búngiu, áni resíbi láadün queísi lánigu ladúga le ladúgübei Wabúreme Jesúsu juágu, lúma sun le ladúgübei láni Búngiu Espíritu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladúgüni gürígia le labúseerun ladúga.” Inárüni líra, áni máma sun cátei lun buídu lan lanügún. Gayáraati ladúgüni gürígia le labúseerun, wel, moún lumuti lígiraguagüdün lúngua lun lagúmadiruni layúmajan. ¹³ Inárüni le aríñawagübei luágu ladúgüni lan Búngiu eíginí lun weígini, adúgaleí warágeirugu lun ladúgüni wadágimanu láu weígin. Inárüni, áni lagúmochaguagüdübei Búngiu biángubei cátei le, mamégeirun wamáalime. Ánjeinti wágubu, madúgünti lun wadúgün salúfuri láu, ladúgün wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴ Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadíwa gíñe láu sun wágubu, láu lubáfu.

¹⁵ ¿Ibídíñetisan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanúgeiméti nógubu le líbiríbei lúgubu Crístu lun nadúgüni líbirime túgubu ában jóru? ¡Madúgün nubeí! ¹⁶ ¿Ódi ibídíñeti jun luágu dan lan le leméterun ában gürígia túmoun ában jóru, biángubei jagía ñúbintiña lun ítara jabá lan quei ában méme úgubu? Taríñajare Lerérun Búngiu. “Jayábinba biángubei lun ítara jamá quei ábanrügü.” ¹⁷ Ánjein dan le liábin ában gürígia lun lídan lan ában lúma Crístu, ában liábin láni Crístu Espíritu lun ában lan lúma láni gürígia ligía espíritu lun ábanrügü jamá espíritu.

¹⁸ Anúraja jumá lubeíti lueí salúfuri. Mítaraanti salúfuri queísi ámu figoú, furúmiñeguarügü ámu figoú le jadúga gürígia, bougudin lueí jágubu ladúga dáñu, ánjein le agámariduti mamárieidunga, ladúgüña figoú luágu lúgubu guánarügü. ¹⁹ ¿Ibídíñeti jun luágu lúban lan Sífiri Sándu wágubu, le líchugubei Búngiu woun lun laganoún wádan? Máma wagía labúriñabei wágubu, Búngiu labúremebei. ²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espíritu lugúndun láni Búngiu biángubei.

7

Dimúrei buri luáguti maríei

¹ Guetó noúnabaali lé buri uágubei jálügüdana tídan jigáradan to jabúrújaboun nun. Inárüni luágu buídu lan lun wügúri lun magámaridun lan, ² quei níjein lubeí sarágu salúfuri, buítimaati lun lagámaridun wügúri, lun gíñe tagámaridun wúri, súnwandan láu amárieiduni. ³ Lúnti lagúnfulirun wügúri túma lúmari queísi úmari, lúnti gíñe tagúnfulirun wúri lúma túmari. ⁴ Máma úmari to wúri labúremeboun túgubu guánarügü, láni gíñe túmari. Máma gíñe úmari le wügúri labúremebei lúgubu guánarügü, táni gíñe lúmari. ⁵ Mamájara jumá lun jesériwidagun júniwagua, ánjaün gubeírügü adúga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, lueí lásiñerun jágüdaagun júngua, ábame laffgoungüdünün Máfia láu jeméterun jámoun ámu jaweí jámarigu.

⁶ Máma naríñaguña luágu lúnti lan jagámaridun, gayáraarügüti jáluajan úmari lun jamárieidun jáma ánjaün busén. ⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queísi áu. Subúdi numúti luágu siñá lan

ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queísi áu, ⁹ ánjein siñá lubei jágüdaagun jóungua, buíti lun jagámaridun (súnwandan láu amárieiduni) sügü láu lun jeréderun láu ában luweírin ayúmajani le siñábei jawánduni.

¹⁰ Ánjaña ja maríeijañabaña, aríñagatina joun lun mígirun táani wúri túmari. Gumádi le, lídan lubúdubu máma nugúmadin, lugúmadin Wabúreme. ¹¹ Láu sun líra, ánjein tígira wúri túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügúri lúmari.

¹² Joun jíbiri, aríñagatina queísi dimúrei le náni, máma lání Wabúreme, luágu ánjein lan mafíñen tubeí lúmari ában le afíñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma. ¹³ Ánjein gíñe mafíñen lubeí túmari ában wúri to afíñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma. ¹⁴ Úmari le mafíñebei, derégewaali lun Búngiu láu lídaañein lan ában túma lúmari to afíñetu luágu Crístu, úmariti to mafíñetu, derégewaaru gíñe lun Búngiu láu lídaañoun lan ában lúma túmari le afíñebei luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafíñebaña, ítara, derégewañu jáña lun Búngiu. ¹⁵ Ánjein busén lubeí úmari le mafíñebei luágu Crístu lun lígirunun lúmari, o wúri to mafíñeboun lun tígiruni túmari, ígiragua jamá. Lídan oúbaü líra, moún lumuti jafósuruniña úmarigu ja afíñebaña úmarigu ja mafíñebaña lun jeréderun jáma, lugúndun wájali Búngiu woun lun wabágaridun lídan darángiläü. ¹⁶ Ában gíñe cátei, ¿cági basúbudirubei, amúrü wúri, ánjeindügü gayára lubeí basálbaruni búmari láu beréderun lúma? ¿O cági basúbudirubei, amúrü wügúri, ánjeindügü gayára lubeí basálbarunun búmari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubeí meja gíñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi. ¹⁸ Ánjein agúara Búngiu lun ában güriquia le resíbi láalibeí circuncisión, lé meja liseíni lidáradun Búngiu jáma lánigu, lúnti leréderun ítara, ánjein gíñe agúara lun ában le merésibirungili circuncisión, moún lumuti lerésibiruni. ¹⁹ Mebéresenwati ánjein resíbi lubeí circuncisión lúmoun merésibirún lán, le busénwabei, lun lagúnfulirúniwa lugúmadin Búngiu. ²⁰ Cáda güriquia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubeí dan le lagúarunbei Búngiu bun, madíjeribá luágu líra, ánjeinrügü liñáti gayára lubeí báfuridun lídaangiñe idámuni ban, adúgabeí. ²² Lé meja idámunibeí lun labúreme ya ubouágu dan le lagúarúnbei lun lun lafíñerun luágu Crístu, gidáali lueí lubáfu figoú lun lesériwidun lun Wabúreme Jesucrístu, ítara méme gíñe, lé meja mámabei idámuni lun ában güriquia ubouágu dan le lagúarúnbei lun, lidámunjali Crístu, ligíajali Labúreme. ²³ Agáñija láadün Búngiu luágu oúnwenbun ebégi, mígira jumá lun janúgünün wügúriña lidámunme jagúndan, lidámun jumá lugúndan Búngiu. ²⁴ Ítara líña lubeíti, nidújeñu, madíjeri jumá cátañañadün lan boúgudigiñe jibíti, reídei jumá ligíbugiñe Búngiu lídan méme igáburi lé meja gádaanbalün dan le lagúarunbei jun.

²⁵ Jawágu güriquia ja mámarigiñabaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queísi ában le gadúnati lun lafíñerúniwa luágu, luágu lareíni Wabúreme le rújalibeí murúsun lídaangiñe lichú láu nun. ²⁶ Lídan narítangun, lúnti leréderun güriquia quei lubeí, ladúga buri lidére dan le gádaanbaliwa. ²⁷ Ánjein gámari bubeí, málugabá bígiragun, ánjein mámari bubeí, málugabá bagámaridun. ²⁸ Ánjabu amárieida, máma figoú, ánjoun gíñe amárieida ában irájü, máma

gíñe figoú, láu sun líra, ñlbei asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei naríñagun. Murúsun rügáali dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña. ³⁰ Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagídaruniwa lueí wadúgüni le lúnbei wadúgüni quei esériwidutiña lun Búngiu, ladúga loúguati dan. ³¹ Masáminara jumá sarágu luágu lubuídun cátei lánina uboú le, le jánibei lun jayúsuruni, ladúga uboú le, le waríjibei, lagúmuchuña, lúnti jarítangun luágu cátei le magúmuchadibei.

³² Buséntina lun madíjeri lan jarítangun luágu ni cáta. Dan le máhari lan ában wügúri, larítangun luágu buri cátei le luáguti Búngiu lúma lun lesériwiduni buídu. ³³ Ánjeinti dan le gámarijali, larítangun luágu buri cátei le lánina ibágari le, lúma lun lesériwidunun lúhari buídu, ³⁴ biánguañein cátei lun leténirun lun—lun lesériwidun lun Búngiu lúma lun latoúnigirunun lúhari. Ámuti gíñe toúserun wúri maríeitu tueí to mámariboun. To mámariboun, tarítangun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to gámariboun, tarítangun luágu buri berésegu lánina ibágari le, lúma lun tesériwidun buídu lun túhari.

³⁵ Naríñaguñein le jun luágu jáni fuleísei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítangunga sarágu luágu cátei lánina ibágari le.

³⁶ Agúbürigu ja arítagubaña luágu buídutima lan lun tamárieidun jaraú lugúndun taweíyaaduña lan, áni ánjein buítima lubeí líra, lúnti jadúgüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figoú líra.

³⁷ Ánjein añájein lubeí ámu agúbürigu, derégüdagutiña lídan jarítangun luágu moún lumuti lan lun tamárieidun jaraú, áni memégeiruati lun tíchugúniwa, áni gayáraati jadúgüni le jabúseerunbei, buíti jadúga lun míchugun jamánun jaraú lun tamárieidun.

³⁸ Ja lubeíti íchugutu jaraú lun tamárieidun, buíti jadúga, ja míchuguntu, buítimaati jadúga.

³⁹ Wúri to maríeitu, lábugiñeñoun leréreejan túhari, lurúma lúruudu, sun wínwangili lan, ánjein ouwe túhari, gayáraati tamárieidun lúma le tabúseerun, affñeti rügáali ligía luágu Crístu. ⁴⁰ Láu sun líra, buítimaabei dan tun ánjounya mamárieidun. Ligía narítangunbei, áni affñetina luágu ligía lan gíñe larítangunbei láni Búngiu Espíritu.

8

Eígini buri le adágarawagüdüti joun sándu

¹ Guetó nadímureja luágu eígini le adágarawagüdüti joun sándu. Inárüni luágu subúdi wamáni luágutí buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi. ² Le arítaguti luágu níjein lan lasúbudirun, ibídiñegilirügü líña ni cáta lun queísi lubúdubu. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu uboúagu, máma jamá búngiugu ladúga subúdi wamúti luágu ában rügúñein lan Búngiu. ⁵ Añájein mútu uboúagu, jarítaguatiña luágu añájein lan bürúbünu búngiugu jáma abúremeigu siélu lúma uboúagu, ⁶ ánjeinti woun, wagía le affñebei luágu Crístu, ában rügúñein Búngiu, le Wáguchibei. Ligía adúgübalin sun cátei, áni ligía le únbei wesériwida táu sun tarúman wanígi. Ában rügúñein gíñe Wabúreme, le Jesucrístu, le ídaangiñebei ladúgüwa sun cátei, áni ligía le ídaangiñebei wibíjei ibágari magúmuchaditi.

⁷ Másutiña ja afiñebaña luágu Crístu gayára jaffínerun luágu ni cáta jamá sándu, añájein já meja jéhubaña ájuduragua joun sándu, jou jamágili eígin ligía queísi cátei adágarawagüdúti joun búngiugu. Queíti lougua lubeí jaffínen luágu gayára lan jeígini affínetiña eígin ligía, ába mabuídun lan lasándiraguagüdúniña joúngua ligíbugiñe Búngiu láu jeígini eígin ligía. ⁸ Inárüni le jaríñagubei luágu máma lan cátei le weígibei gayáraagüdúbalin lerésibiruniwa Búngiu, mabuíduñtímaabadiwa ligíbugiñe Búngiu lueígiñe weígin, maríbaduntíma wagíame lueígiñe meígin wáma. ⁹ Gayáraati jeígin eígin le adágarawagüdúti joun sándu, lúntirügü goúnigi jumá lueí jeíguadagüdúniña jidújeñu lueígiñe Crístu ja louguabaña jaffínen ánjein buídu lubeí lúmoun mabuídun lan. ¹⁰ Quei jamúga guetó, amúrü le subúdijabúbei luágu gayára lan beígin furúmiegurügü eígin, bañúura eíga lídan ában fulásu le joúnti sándu, laríjabu ában idújei le débiliti laffínen luágu buri cátei le, ñi, lanúgüba gurásu buágu lun gíñe leígin lídaangiñe eígin le, le adágarawagüdúti joun sándu. ¹¹ Ítara, ladúga bisúbudin, féridigüda bumúti bidúje le débilibei lídan laffínen le gíñe ueígiñebei louwe Crístu. ¹² Dan lubeíti le jañawarijani jarítangun idújeñu ja débilibaña lídan jaffínen, jadúgüña lun jaffígounjan jidújeñu, áni jugúya guánarügü jaffígounjaña gíñe. ¹³ Ligía, ánjein lubeí náburugüda nidúje lídoun figoú ladúga cátei le neígibei, buítimaati lun meígingüya nan úwi lueí naffígounjagüdúni.

9

Lirícha buri ában apóstolu

¹ Áu, furángutina lun nadúgüni le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálirubaña lídaangiñe nuwádigimaridun luágu Wabúreme. ² Fágua manúgün jabádina jíbiri queísi apóstolu, ánjeinti jugúya, gásu janúgünina queísi apóstolu, lugúndun láu affíne jumá luágu Crístu, arúfuda lumúti líra luágu inárüni lan luágu ában nan apóstolu.

³ Niján noúnabagülebei joun ja adímurejabaña nuágu. ⁴ Garíchatina lun nerésibiruni sun le íchugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei. ⁵ Garíchatina gíñe lun namárieidun túma ában wúri to affínetu luágu Crístu, lun gíñe nanúgünun númagua luágu nuweíyasun quei ladúgüni Pédro jáma ja jíbiri apóstolugu, jáma gíñe ja lamúlenu Wabúreme. ⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüdaja júmagiñe lun gayára lan wígiruni wawádigimaridun láu wájabu lun wapúrichijani Lerérun Búngiu? ⁷ Queísigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, joúti tídaangiñe, le oúnigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu naríñaguñein lan le queísirügü jarítangun gürígia, lugúndun aríñaga lumúti gíñe lilúrudun Moisés. ⁹ Laríñajare tídan lilíburuna lúrudu. “Magúraguabeí liyúma bágasu le lánina wadágimanu lueí leígin lídaangiñe ílaü le léferejabei.” Máma laríñaguñein Búngiu líra jawágurügü bágasu, ¹⁰ laríñaguñein gíñe queísi ában jémpulu woun. Luágu wáni fuleísei labúrüdúwa lúrudu le, lugúndun dándu le awoújabalin múa, queísi le éferejabalin líla nádü, lúnti jadúgüni láu eménigini luágu jerésibirubei lan jafánran lídaangiñe alúbajani. ¹¹ Queísi bunágua wamáali lubeí Lerérun Búngiu tídan janígi, ¿gíbeti funági laríjín jun lun walúbajan murúsun cátei júmagiñe lun wágüdaagun woúngua? ¹² Ánjein garícha jabeí ámu lun líra júmagiñe, garíchatimáatiwa.

Mayúsu wamúti íríchaü le wawágubei. Lubáragiñe líra, awánda wamáali sun le wemegeirubei lueí lejénreendun jun agáambeí wapúrichijani Lerérun Búngiu, ladúga wamúriajan wágüdaja júmagiñe. ¹³ Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñí lubei líchugúa adágaragüdúni, joútiña úwi jádaangiñe anímaalu ja adágarawagüdúbaña

ñi. ¹⁴ Ítara líña gíñe laríñaguni Wabúreme Jesúsu lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe iríchaü le, máma gíñe nabúrújañein le jun lun jíchugun som cátei nun. ¡Ímein numúti nouñwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadúgüni. ¡Fugiábu áu ánjein mapúrichijan nan ugánu le!

¹⁷ Lun jamúga mínsiñe lan nun lun napúrichijan, láu sun luwúyeri mósu nadúgüni ladúga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina, ¹⁸ afáyeiruajaiü ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigimari queísi apúrichijati.

¹⁹ Láu sun mábuti nan ubouágu lun nagáambuni, rúguaadina núngua jadámunme súngubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadúgün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía. ²¹ Lun nagáñeiruniña ja mámabaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubeí lilúrudun Crístu.

²² Dan le jáma nan ja louguabaña afíñe luágu cátei le gayáraabei jadúgüni affñetiña, madúgüntina ni cáta le uágubei jarítagua luágu mabuídun lan ladügúniwa, lun gayára lan nagáñeiruniña. Rúguaadina núngua queísi cáda jawúyeri gürígia lun añájein lan nasálbarun lídan furúmieguarügü luwúyeri. ²³ Nadúgüñein sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanúgübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügúñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, jóuchatiña lun madúgün jamá ni cáta le gayáraabei lásiñeragüdüni jájurerun. Áni jadúgüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjin ában rídi siélu le lúnti ladúrarun lun sun dan. ²⁶ Áu, neíbaaguña lídan ibágari le, rúñuneí naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu, ²⁷ lubáragiñe líra, áfara numúti lugúndan nógubu, fósuneí lun lagáambunina, lueí lubeígia neféridiruba lan lárigiñe buga arúfudajadina lan joun ámu luágu lubuídun úma lun wachúlürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdüñun luágu lé meja asúseredubei joun binádu wagúbürigu lídan lé meja lídan jamá fulásu mageírawati, luágu ñíñein lán meja Búngiu lídan ában juánriñu jóugiñe lun loúnigiruniña. Séfuti gíñe lanúgüniña súngubei dan le jájiñuragunbalin Barána Funáti. ² Ítara líña queísi ában abásteruni joun láu jásügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladúga ligía lan abúgurubaliña. ³ Jóutiña gíñe sun jagía lídaangiñe ában méme eígini le líchugubei Búngiu joun, siélugiñe, ⁴ rúati gíñe dúna joun súngubei lídaangiñe ában dúbü lun játun. Ñíñein Crístu jáma luágu sun jaweíyasun lun fuleísei láníña láu dúna lun játun. ⁵ Láu sun líra, madúgün jamúti jíbe-ágei lugúndan Búngiu, ába lamágundarun Búngiu jáma. Ligíati jóúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadúgüni. ⁷ Ligía májuduragua jumá lubeí joun sándu queí meja jadúga jádaangiñe, queísi taríñaguni Lerérun Búngiu luágu jefédujan joun sándu. “Ába jañúurun güriña eíga lúma áta, lárigiñe, ába jásaarun eféduja.” ⁸ Moún lumuti wadúgün salúfuri queí meja jadúga jádaangiñe, ába larúfuduni Búngiu luágu wuríba lan le jadúgübei láu louwegüdüniña mílu güriña jádaangiñe lídan ában wéyu. ⁹ Moún lumuti gíñe wáluajani lében lugúraasun Búngiu woun láu luríban wagáburi, queí jadúgüni jádaangiñe, ába jóuwegun láu lágüragüdüniña joun jéwe. ¹⁰ Mamágundara jumá gíñe lúma Búngiu queí jadúga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agúbürigu, ába labúrüdún tídan Lerérun Búngiu queísi jémpulu woun, wagía le wíwanbei lídan lagúmujoún dan le, lun wasúbudiruni buídu luágu mínsiñe lan figoú lun Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú. ¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin ouchawaguni le jásiñerun awánda. Lubáragiñe líra, dánme liábin ouchawagüni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun güriña gunfaráandatiña, samína jumá júngua ánjein buídu lubeí le naríñagubei jun, lúmoun mabuídun lan. ¹⁶ Dan le werésibirun, dan le wátun lídaangiñe uníñein le uágubei wíchiga eteíngiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun ouweni luágu gurúwa ligía. ¹⁷ Queísi jou wabeí tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násiñun le linásiñun Israél. Ja eígibaña lídaangiñe eígini lé buri adágarawagüdúti lun Búngiu luágu latárü, lídaañañu lan ában jámagua, lúma lúma Labúreme latárü. ¹⁹ Máma naríñaguña luágu wíwan jamá sándu, maríñaguntina gíñe luágu weírgutima lan úwi le adágarawagüdúbei joun sügú láu ámu úwi. ²⁰ Le naríñagubei, luágu dan lan le jadágaragüdün ja ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu. ²¹ Siñáti játun lídaangiñe licópun Wabúreme Jesucrístu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucrístu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

²³ Inárüni le aríñawagúbei luágu gayára lan jadúgüni güriña le jabúseerun, láu sun líra, máma sun cátei buíti láburujan. Gayáraati jadúgüni güriña le jabúseerun, láu sun, máma lan sun cátei lun líderaguniña ámu güriña lun jóúdin jabáruaguoun lúma Crístu. ²⁴ Lúnti warítangun luágu le buídubei joun ámu güriña, mámarügü lan wawouguoun warítagua.

²⁵ Niján le lúnbei jadúgüni luágu úwi. Jóujuma lídaangiñe sun cátei le alúgura-jóubei mágidirugu, málügüdajanga jugúya ánjein dágüdawa lubeí joun sándu lúmoun madágarawagüdún lan, ²⁶ maríbadalá jarítangun luágu, gayáraati jeígini, lugúndun lání Wabúreme múa láu sun le lídaanbei.

²⁷ Ánjaün lamísuraja ában güriña le maffñeti luágu Crístu lun jídin eíga lúma, gayáraati jídin ánjaün busén. Jóujumei le íchugúti jun, málügüdajanga ni cáta,

mebéresen jumá ánjein dágüdawa lubeí eígini ligía joun sándu furúmiñe, lúmoun madágaragüdúnwa lan. ²⁸ Ánjein aríñawagua jun luágu dágüdawaali lan eígini ligía joun sándu, meíga jumeí, lueí jadúgün dáñu lun le aríñagubalin jun, lueí gíñe laríbadun larítapun. ²⁹ Nadímurejañatia luágu larítapun le ában, máma luágu barítapun.

Gayáraati jamúga funa laríñapun mútu. “¿Cásan uágu lúnti lubeí lafálaruni ában gürígia le larítapun ámu? ³⁰ Ánjein gayára lubeí níchugun eteíngiruni lun Búngiu luágu le neígibeí, ¿cábagi uágu jadímureja nuágu lueígiñe neígini?” ³¹ Ánjaün lubeíti eíga o áta o jadúgün furúmieguarügü cátei, adúga jumeí súnugubeí lídan ában luwúyeri le íchugubeí inébesei lun Búngiu. ³² Míchiga jumá lébuna eíguaduni lun ni ában, ni joun juríu, ni joun ja mámbaña juríu, ni joun ja lánigu Búngiu. ³³ Áu, jóuchatina lun nagúndaaragüdúniña súnugubeí lídan sun cátei, máma rügúñein nuóguua narítagua, jarítaguatina gíñe jawágu jíbiri lun gayáraabei lan jayábin lun jafíñerun luágu Jesucrístu lun jasálbarun.

11

¹ Áyeija jumeí nigáburi queísi náyeijani ligáburi Crístu.

Würíña lídan jóúndarapun afíñetiña

² Nidújeñu, gúndaatina jáu luágu súnwandan lan jarítapun nuágu, lúma luágu falá jumani arúfudajani le níchugubeí jun. ³ Guetó, níjein ámu arúfudajani le nabúseerubeí lun gunfaráanda jumáni, luágu Crístu lan lichúgüdinabei cáda wügúri, wügúri tichúgü-dina lúmari, ítara queí Búngiu lan lichúgüdinabei Crístu. ⁴ Nibúsigarídünati lun ladáurapun ában wügúri láu lábulugu dan le layúmurapun lun Búngiu, eteíngireí lídan jadámurin afíñetiña, o dan lan le laríñapun ugánu le ladímurejan Búngiu liyúmulugugiñe wügúri ligía, ladúga láu líra, larúfuduñein luágu níjein lan ában wügúri weírigutimaati lanúgüni lueí lídan adámurini ligía, áni Crístu rügúñein weírigu jádan sun wügúriña. ⁵ Nibúsigarídünati gíñe lun madáurapun tan wúri láu tábulugu dan le tayúmurapun lun Búngiu, eteíngireí lídan jadámurin afíñetiña, o dan lan le ladímurejan Búngiu tiyúmulugugiñe, ladúga láu líra tarúfuduñein tamájarun lun tanúgüni wügúri weírigu sügú táu, wuríbati líra, queísigubeirügü jamúga lasarún tídíburi queísi wügúri. ⁶ Ánjoun madáurapun ában wúri láu tábulugu, buítimaati lun tásaruni sun tídíburi, áni ánjein busíganudúna lubeí tíbuguni wúri tídíburi o tásaruni lan tábulugu, darúguatá láu tábulugu. ⁷ Moún lumuti ladáurapun wügúri láu lábulugu lídan jadámurin afíñetiña lugúndun liyáwa Búngiu ligía, áni arúfuda lumúti luweírigun Búngiu. Ánjounti wúri, arúfuda tumúti luweírigun wügúri, ⁸ lugúndun dan le ladúgünbalin Búngiu wügúri, máma tídaangiñe wúri ladúgei, wúri ladúgüboun lídaangiñe wügúri. ⁹ Adúga lumútu Búngiu wúri lun wügúri, máma wügúri tun wúri. ¹⁰ Ligía lúnti lubeí tadáurapun wúri láu tábulugu lídan jadámurin afíñetiña queísi liseíni derégüdaguaü lábugiñe lagúmadijan wügúri, lúma lun jagúndaarun ánjeligu láu tagúfurumadun. ¹¹ Láu sun líra, lídan wabágari queísi afíñetiña, mégei lumútu wügúri wúri, mégei tumúti gíñe wúri wügúri. ¹² Queísi inárüni lubeí luágu lídaangiñe lan wügúri tadúgúwa wúri, ítara líña gíñe inárüni lan luágu wúri lan íchugubalin wügúri ubouágu, áni sun cátei lúmagiñe Búngiu líabin.

¹³ Ítara líña lubeíti, samína jumá júngua ánjein buídu lubeí lun tayúmurapun wúri lun Búngiu lídan adámurini madáurapunga láu tábulugu. ¹⁴ Jéchutiwa wagía gürígia lun warítapun luágu busíganu lan lun migínagu lan lídíburi wügúri. ¹⁵ Ánjoun wúri, ában uwéndeni tun lun migínagu lan tídíburi, ligía líchugúnbei ídíburi migínaguti tun lun tadáurapun láu tábulugu. ¹⁶ Ánjein níjein lubeí busénti lasígenejan luágu cátei le, lúnti lasúbudiruni luágu ni lan wagía, ni já buri jíbiri tílana lilígilisin Búngiu masúbudiruntiwa ámu igáburi lueí líra.

Luríban jagáburi afíñetiña dan le jeígin luágu lidábulan Wabúreme Jesucrístu

¹⁷ Nabúrüja jun guetó luágu ában cátei le siñábei naríñagun luágu buídu lan jadúgüni, lugúndun genége lumúti luágu adúga lán buri joúndaragun dáñu jun lubáragiñe jamúga ladúgün buíti. ¹⁸ Furúmiñeti cátei, aríñawagúati nun luágu dan lan le joúndaragun, níjein lan fánreinguaü jídan, áni afíñetina luágu níjein lan inárüni lídan le aríñawagúbei. ¹⁹ ¡Fágua lúnti ñi lan fánreinguaü jídan lun lasúbudirúniwa cátaña lan afíñetiñabaña ja tímatimaatiña! ²⁰ Láu buri fánreinguaü le, dan le joúndaragun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubei inébesi lun, ²¹ lugúndun dan le lachúlürün óra lun jeígin, meígintún nege lídan ában. Lubáragiñe líra, cáda ában, ába loúfudajan eígei eígini le lanúgübei. Ja siñábei janúgün gíbeti, ába jeréderun láu jaláma. Jayábiti jídaangiñe, ába játun sarágu darí lun jabácharuadun. ²² ¿Mábantün funági lun jeígin luma lun játun ñi? Láu igáburi le, barú jumutiña tílana lilígílisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi naríñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu loúnwen Wabúreme

²³ Lúmagiñe guánarügü Wabúreme Jesucrístu nerésibirei igáburi le warítaguagüle luágu loúnwen, lé meja níchugubei jun. Queisi le nubeíbei jun, luágu le lan áriebe le lalúgurúnbei Wabúreme, ába lanúgünun fein lújaburugu, ²⁴ lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába laríñagun. “Jóujuma, núgubu le, le nederegerubei luágu jufúleisein. Adúga meme jumeí cátei le, jarítaguagüleme nuágu.” ²⁵ Ítara gíñe, lásun jeígin, ába lanúgüni cópu táu diweín lújaburugu, ába laríñagun. “Cópu le táu diweín to, liseíni iséri lidáradun Búngiu júma, le achoúrurúabei láu níta le lúnbei láwiyrun lídaangiñe núgubu juágu. Ságüme játuni, adúga jumeí lun jarítagun nuágun.” ²⁶ Ítara líña lubeíti, daríme le lagíribudun Wabúreme ubouágun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti loúnwen Jesúsu wawágu.

Ligáburi leigín eígini le arítaguagülei luágu Jesúsu

²⁷ Furúmieguarügü le eígitu fein tugúya, guráloun diweín to lání Wabúreme Jesucrístu lídan ában igáburi le míchuti inébesi lun Búngiu, ladúgüña figoú ladúga líchuguña lan minébesi lun lúgubu Wabúreme luma líta. ²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun. ²⁹ Lugúndun ánjein erésibira marítagunga luágu laníchigu lánina lúgubu Wabúreme, labeíchubei Búngiu. ³⁰ Ligía añájein lubeí sarágu jídaangiñe, sánditiña, débilitiña, jilágua jíbiri. ³¹ Anjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara. ³² Dan le labeíchuníwa Wabúreme, ladúgüñein líra lun wasúbudiragun woúngua, gayára lámuga wasáansiraguni wagáburi lueí weféridirunme úara jáma lirájüñü uboú.

³³ Ítara líña lubeíti nidújeñu, dan le joúndaragun lun jerésibirun, agúrabagua jumá júngua. ³⁴ Ja lamátiña, jóujama jábiñe, mabeíchun lámugaña Búngiu luágu luríban ligáburi joúndaragun. Lé buri líbiri cátei naráanserubei dánme le nídin aríjaün.

12

Ubáfu buri le líchugubei Sífiri Sándu lun cáda afíñeti

¹ Nidújeñu, níjein buri cátei nabúseerun lun jasúbudiruni luáguti buri ubáfu le líchugubei Sífiri Sándu lun cáda afíñeti luágu Jesucrístu.

² Subúdi jumúti buídu luágu dan lán meja le mámagidün lánigu Crístu, adajouátün meja lun jeíbugun járigi sándu ja maríñagadibaña. ³ Ligía nabúseerunbei naríñagun jun guetó lun gayára lan jasúbudiruni ánjein lubáfu lubeí Sífiri Sándu adajabálin ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsu láu laríñagun luágu máma lan Liraú Búngiu, espíritu

wuríbati ádjabalín lun ladúgüni líra. Áni láu rügüñein lubáfu Sífiri Sándu gayára lan laríñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afíñebei luágu Jesucrístu, áni ában méme Sífiri Sándu íchugubalín. ⁵ Níjein sarágu luwúyeri ligáburí eseríwiduni lun Wabúreme Jesucrístu láu ubáfu burí le líchugubei Sífiri Sándu woun, áni lun méme ában Abúremein weseríwida. ⁶ Lídan gíñe sarágu luwúyeri wayúsurei ubáfu burí le rúaalíbei woun, áni ában méme Búngiu le íderagubaliwa lun wayúsuruni ubáfu ligía. ⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri afíñetiña. ⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi. ⁹ Jíbiri resíbitiña ában afíñeni weíríti lúmagiñe méme Sífiri Sándu ligía, jíbiri resíbitiña ubáfu lun jareídaguagüdün sánditiña. ¹⁰ Añájein resíbitiña ubáfu lun jadúgün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubeí ádjabalín ában gürígia lun ladímurejan o ámu lan luwúyeri espírítu, jíbiri íbjatiña ubáfu lun jadímurejan ámuñegueinarügü luwúyeri dimúrei luej jerérun. Añájein íbjatiña ubáfu lúmagiñe Sífiri Sándu lun jafúnraanguagüdüni le aríñawagúbei lídan burí dimúrei teréncha ligía. ¹¹ Sún burí cátei le, ában méme Sífiri Sándu le ábanrügübei, ligía adúgübalín, le afánreinjabalín ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súngubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladúga. Ítara líña gíñe le únbei wagúara lúgubu Crístu, cáda ában afíñeti ában lídaangiñe lumégegún lúgubu Crístu. ¹³ Sun wagía afíñetiña—juríu, máma juríu, idámuni, máma idámuni, furúmieguarügü le wawúyeríbei—láu wabásterun, ába ladúgüniwa Sífiri Sándu lun ában wamá jáma sun jíbiri afíñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegún lun jasúbudiruni luágu ítara wáña lan queísi lumégegún lúgubu Crístu. Wágubu, máma rügüñein ában umégeni luágu, gíbeti umégeguni luágu. ¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma luegíñe líra lun mámabei lan líbiri úgubu, ¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma luegíñe líra lun mámabei lan líbiri úgubu. ¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun? ¹⁸ Rúlaali Búngiu cáda lumégegún úgubu le ní lumuti labúseera. ¹⁹ Lun jamúga ában rügüñein lan umégeni luágu úgubu, moustarunti jamúga úgubu ligía. ²⁰ Láu sun gíbe lan lumégegún úgubu, ában rügüñein úgubu.

²¹ Siñáti laríñagun águu lun újabu. “Memégeirun numútibu”, siñáti gíñe laríñagun íchúgü lun ugúdi. “Memégeirun numútibu.” ²² Lubáragiñe líra, lé burí lumégegún úgubu le laganounbei camá débiliti, ligiatima burí megeiwabei, ²³ lé burí lumégegún úgubu le wanúgübei quei ni cáta, ligiatima wadáraguagüdübei láu uwéndeni. Le buríti líbiri lumégegún wágubu le arámudaguabei, ligiatima wouserunbei láu goúnigi, ²⁴ le madúgünwabei lún burí líbiri lumégegún wágubu. Ítara líña laráanseruni Búngiu úgubu lun le lán burí líbiri umégeguni le anúgübei quei ni cáta, ligiatima lan weírígu, ²⁵ lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi jóniwagua. ²⁶ Ánjein asúfurira ában lídaangiñe lumégegún úgubu, súfuriti gíñe burí le líbiri, ánjein gíñe oúserúa ában lídaangiñe buídu, ába lagúndaarun lé burí líbiri lídan ában.

²⁷ Ítara méme líña gíñe, lúgubu Crístu jugúya, cáda ában jídaangiñe, lumégegún úgubu ligía. ²⁸ Rújali Búngiu wadágimanu jun tídan lílígílisin lun juwádigimaridun luágu ában queísi luwádigimaridun lumégegún úgubu. Furúmiñetiña, apóstolugu

líchuguniña Búngiu lun jesériwidun joun jíbiri affñetiña, jabíaman, profétagu, júruwan, arúfudajatiña luágu cátei lání Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja ibíjubaña ubáfu lun jadímurejan dimúrei buri le teréncha. ²⁹ ¿Apóstolugu funági súngubei? ¿Profétagu funági súngubei? ¿Arúfudajatiña súngubei? ¿Ódi sun jagía adáaguatiña miláguru? ³⁰ ¿Gabáfutiña súngubei lun jareídaguagüdübaña sánditiña? ¿Adímurejatiña súngubei dimúrei buri teréncha? ¿Gayára jamúti súngubei míni lán buri dimúrei ligía arínaga? Uá. ³¹ Buíti lubeíti lun jáfaagun lun jibíjini lubuídun-ágei buri ubáfu lúmagiñe Búngiu, áni níjein ában cátei lun jáfaagun lun jibíjini, buítimaati sügú láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Ánjawa jamúga gabáfu lun wadímurejani sun luwúyeri dimúrei le adímurejoúbei uboúagu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asiedu le areínchuti. ² Ánjein jamúga gayára ladímurejan Búngiu wayúmulugugiñe, subúdi wameí sún buri lujúlilin-ágei inárüni arámudaguati áni níjein sun luwúyeri subúdi wáma, áni weíri ligía wafíñen darí jamúga lun gayára lan wagídaruni ában wúbü lídaangiñe lubára láu affñeni ligía, sun líra áni mínsiñejabutiwa, ni cáta wagía. ³ Ánjein wíchiga sun le wámabei murúsun murúsun joun gudémetiña darí lagúmuchun, madúgünga wameí láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

⁴ Le jínsiñejabúbei gagúraasunti, areídati, áni magímugati, mapántati, manáangun ligía lúngua. ⁵ Manárimeguti, máma rügúñein luóguua larítagua, magáñidunti, máguyugüdünti wuríbani luágu wuríbani. ⁶ Magúndaarunti láu jafígoun ámu, lagúndaarun dan le janúgün gürígia ában úma le richábei. ⁷ Awánda lumúti sun cátei, affñeti buídu jawágu súngubei, affñeti luágu gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachúlürüba dan, dánme le lagíribudun Jesucrístu uboúagun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime gíñe subúdi. Ánjeinti ínsiñeni, leréderuba lun sun dan. ⁹ Guetó, murúsun rügúñein wasúbudirun, murúsun rügúñein gíñe wafúraanguagüdüni dimúrei le ladímurejabei Búngiu wayúmulugugiñe. ¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibei guetó, memégeirunwabei, lagúmuchaguba.

¹¹ Dán meja le irájüñügiwiwa, quei meja irájüñü wadímureja, quei meja irájüñü wasáminara, quei gíñe meja irájüñü warítagua, ánjeinti dan le wügúriñajadiwa, ába wígiruni le jáni irájüñü. ¹² Guetó, loúguati wasúbudirun luágu Búngiu lúma luágu luwádigi-mari, waríjini camá buri cátei le maríjinti buídu tídan ában isúbusein. Lachúlürüba wéyu lun waríjini Búngiu furáangu. Guetó, loúguati wasúbudiruni buri cátei, wasúbudirubei Búngiu le gumúti lídanme wéyu ligía queísi lasúbudiruníwa Búngiu guetó. ¹³ Affñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe úruwagubei.

14

Ladímurejoún dimúrei teréncha

¹ Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá gíñe lun líchugun Búngiu ubáfu le líchugubei joun affñetiña lídaangiñe Sífiri Sándu

jun, létima ubáfu lánina ladímurejan Búngiu jayúmulugugiñe gürígia. ² Buítimaati lun jáluajan ladímurejan Búngiu jiyúmulugugiñe sügú láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügúñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati lueí jasúbudin gürígia. ³ Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dúgüdaguau joun lúma gurásu. ⁴ Le adímurejati dimúrei teréncha, lúngua rügúñein líderagua lídan lefbugun lúma Búngiu, ánjeinti le iyúmulugugiñebei ladímureja Búngiu, awáansegüda lumútiña lánigu Búngiu lídan jefbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügú láu ladímurejoún dimúrei teréncha, ánjein gubeírügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jefbugun lúma Búngiu. ⁶ Ligía lubeíti nidújeñu, ánjana ñúdün bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírügü gíñe adímureja jun lídan werérun luágu cátei le lasúbudiragüdün Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña quei ában jémpulu. ílagu buri ligía, mabágariti, quei buri fídu, gidára, ánjein wásiñera asúbudira furáangu ca lan nóta afarúbei, ibídiñebei woun ca lan urému le wagáambajabei. ⁸ Ánjein mínwirun fídu ában ínwiruni furáangu wurríburugu, úabei ni ában aráanseruti lun lídin ageíndagua. ⁹ Ligía méme gíñe asúseredubei wáma. ánjawa maríñagun dimúrei le gayáraati gunfaráandawa lan, ¿ída lubági lasúbudirúniwa ca lan waríñagubei? ¡Wadímurejaña lun garábali! ¹⁰ Gíbeti luwúyerigu dimúrei uboúagu, áni sún buri dimúrei ligía richáti joun ja gunfaráandabalin, ¹¹ ánjein úa lubeí gunfaráanda náni dimúrei le áubei ladímurejoúa nun, terénchabadina lun gürígia le adímurejabei nun, áni terénchabei gíñe gürígia ligía nun. ¹² Ligía, quei weíri lubeí jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía. ¹⁴ Ánjana ayúmuragua lun Búngiu láu dimúrei teréncha, inárüni luágu nayúmuraguña lan láu náni espíritu, líla le naríñagubei, ibídiñeti nun. ¹⁵ ¿Cáteiti lúnbei wadúgüni? Lídan adámurini gayáraati wayúmuragun láu dimúrei teréncha, lúnti gíñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati. ¹⁶ Ánjein badímurejaña lubeí lun Búngiu luágu luweírigan láu dimúrei teréncha, gürígia únabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei. ¹⁷ Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügú jáu sun jugúya, ¹⁹ áni jímei numúti naríñagun seíngü dimúrei le gunfaráandawati lídan joúndaragun tílana ligílisi, lun gayára lan jafúnrendeirun númágiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queísi weínamujaña lídan ligáburi jasáminarun. ²¹ Laríñajare tídan lílburun lúru. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.” ²² Ubáfu lubeíti lun ladímurejoúniwa

ámuñegueinarügü dimúrei, seríwiti liseínime lubáfu Búngiu joun ja maffñebaña, máma joun ja affñebaña. Ánjeinti ubáfu lun ladímurejan Búngiu jayúmulugugiñe güriquia, seríwiti liseínime lubáfu Búngiu joun affñetiña luágu Jesucrístu, máma joun ja maffñebaña. ²³ Dan lubeíti le oúndaragua jamá sun tílana ligílisi, ánjein jadímurejaña lubeí sun jugúya dimúrei teréncha, ába jebélurun maffñetiña jánwoun, o güriquia lan ja ibídiñegilibei luágu ubáfu le joun, ¿ma jaríñaguba luágu lúlújali lan jáu? ²⁴ Ánjein ladímurejaña lubeí Búngiu jiyúmulugugiñe, ába lebélorun ában le maffñeti, ladáriraguba lúngua luágu gafígoun lan dánme le lagáambuni le jaríñagubei. ²⁵ Ítara lúba lafúnraangudun cátei arámudaguati le tídaanbei lanígi, ábame lájuduragun íchiga inébesei lun Búngiu, aríñaga ligíame luágu níjein lan Búngiu júma le tímatimaati.

Adúga jumeí sun cátei lídan lubúdubu

²⁶ Nidújeñu, niján lubeíti igáburi le lúnbei jouseruni lídan jidámurin. Dan le jóundaragun lun jájuduragun lun Búngiu, añajeinbaña jídaangiñe láu urému o arúfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdúniwa adímurejani ligía, sun líra adúga jumeí lun méme jawáanserun tílana ligílisi lídan cátei le luáguti Búngiu. ²⁷ Dan le ladímurejoún lídan dimúrei teréncha, biámarügü jamá güriquia adímureja, o úruwa, áni ában ábanlá gíñe jadímurejan, lúnti gíñe níjein lan ában lun lafúnraanguagüdüni le jaríñagubei. ²⁸ Ánjein úa lubeí ni ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu. ²⁹ Ánjein gíñe luáguti lubeí ladímurejan Búngiu jayúmulugugiñe güriquia, biámarügü o úruwa jamá güriquia adímureja, ja jíbiri lun jaríjin ánjein lúmagiñeti lubeí Búngiu le aríñawagúbei lúmoun máma lan lúmagiñeti. ³⁰ Ánjein asúbudiragüda Búngiu ában cátei lun ámu güriquia le ñun umúti lun líchuguni lun guríriguaü, lúnti lámánichun le adímurejabei lun líchugun dan lun, lun ladímurejan. ³¹ Ítara, sun jugúya le iyúmulugugiñebei ladímureja Búngiu, gayáraabei jadímurejan ában ában lun jafúrendeirun súngubei, ragú jugúyame gurásu. ³² Ja iyúmulugugiñebaña ladímureja Búngiu, lúnti jágüdaagun jóungua darí lachúlürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queísi jagáburi jíbiri wadújeñu lídan wafíñen dan le jadámuridagun, ³⁴ moún lumuti jadímurejan wúrña lídan jadámurin affñetiña lugúndun majouáti lun cátei le. Lúnti gagáambadi jamá queísi laríñaguni lilúrudun Búngiu. ³⁵ Ánjein busén jabei jasúbudirun ában cátei, álügüda jameí jámari jábiñe, lugúndun mabuídunti laríajoún lun tadímurejan ában wúri lídan jadámurin affñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün gíñe jugúya erésibirei. ³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabúrjabei jun. ³⁸ Ánjein manügún lan ítara, reídeilá lídan libídiouniga láu.

³⁹ Ítara líña lubeíti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejoún lídan dimúrei teréncha, ⁴⁰ adúgarüga jumeí sun cátei lídan lubúdubu.

15

Lásaarun Crístu lídaangiñe ouweni

¹ Guetóti nidújeñu, buséntina lun jarítagun luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligía le jerésibirubei, le gíñe ídaanbei derégüdagu lan jaffñen. ² Sálbatün gíñe lun sun dan ladúga jafíñen luágu ugánu le, ánjein jafálara le uágubei napúrichija jun, ánjein gíñe láu lubeí jinárün jaffñera.

³ Furúmiñeti cátei, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queísi taríñaguni Lerérun Búngiu luágu lúnti lan lasúseredun. ⁴ Lárigiñe meja loúnwen, ába labunún, ába lásaarun lídaangiñe ouweni luágu lúruwan wéyu queísi taríñaguni Lerérun Búngiu luágu le lúnbei lasúseredun. ⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu. ⁶ Lárigiñe, ába larúfudagun lúngua joun sügú jáu seíngü-san afíñetiña ja oúndarañubaña lídan ában, áni añájeingua sarágu jádaangiñe, wínwangiña chülú lúmoun dán le, ja jíbiri, jilágua. ⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujoúni, járigiñe súngebey, ába giñe larúfudagun lúngua nun, láu sun ítara níña lan quei ában le agúriajóuti lídan ában igáburi le múaraanti, ⁹ lugúndun áu lan ni cátatimáabei jádan apóstolugu, madúnatina ni lun nanügún quei apóstolu, lugúndun eíbaaja numútiña méja tílana lílígilisin Búngiu. ¹⁰ Áu le áubei guetó lugúndun lareídun Búngiu nun, áni merédeti lareíni nun maságarunga ni cáta bufti nídaangiñe, lubáragiñe líra, ñadágimeinjaadina sügú jáu jíbiri apóstolugu, láu sun máma lan áu ñadágimeinbei, Búngiu le núbabei láu lareíni, ligía ñadágimeinbei nídaangiñe. ¹¹ Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe ouweni, áni niján giñe uágubei jafíñera.

Jásaarun jiláña lídaangiñe ouweni

¹² Queísi wapúrichijan luágu saráali lan Jesucrístu lídaangiñe ouweni, ába jerésibiruni, ¿ída líñati añájein lubeí jádaangiñe aríñagatiña luágu másaarun jamá jíbiri jiláña? ¹³ Ánjein másaarun jabei jíbiri jiláña, másaarunti lubeí giñe Crístu lídaangiñe ouweni, ¹⁴ áni ánjeinti másaarun lubeí Crístu lídaangiñe ouweni, málati ugánu le wapúrichijabei luágu asálbaruni, málati giñe afíñeni le juágubei. ¹⁵ Ánjein ítara líña lubeí, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe ouweni, ánjein máma lubeí inárüni luágu sará jamá jiláña, máma giñe inárüni luágu sarágüda láani Búngiu Crístu lídaangiñe ouweni. ¹⁶ Lugúndun ánjein másaarun jabei jiláña, ni Crístu, másaarunti giñe lídaangiñe ouweni, ¹⁷ áni ánjeinti jiláñugili lubeí Crístu, mesériwinti jafíñen lun ni cáta, lídaangidün jifígoun ligíbugiñe Búngiu. ¹⁸ Áni ánjein ítara líña lubeí, féridiñu jáña giñe ja ouwegubaña láu jafíñen luágu Crístu. ¹⁹ ¿Ánjein lúntirügü lubeí íbágaru le weménigi luágu Crístu, fugiábu wagía jádaangiñe súngebey!

²⁰ Le inárünitibey, saráti Crístu lídaangiñe ouweni lúnya labágaridun, ligía furúmiñetibey ásaaruti lídaangiñe ouweni lun moúnwendügúyaali lan, áni ítara lúba jásaarun sun lánigu. ²¹ Ítara quei lídaangiñe lan ában wügúri lagúmesera ouweni ubouágu, lídaangiñe giñe ában wügúri lagúmesera jásaarun jiláña. ²² Ítara quei jouwegun súngebey ladúga lídaangiñe lan Adán jayábin, ítara lubá giñe gabágaríya jamá súngebey lárigiñe ouweni ladúga lánigu jamá Crístu. ²³ Lúnti lásaarun cáda ában lídan lídáani. furúmiñeti meja ásaaruti, Crístu, lárigiñeme, dánme le lagíribudun Crístu ubouágun, ligíame jásaarun lánigu lídaangiñe ouweni. ²⁴ Ligíabati líabin lagúmuhagüle sun cátei, ábame lagúnrinchaguni Crístu sun líbiri luwúyeri arúejani, ubáfu, lúma érei le ubouágubei, ábame ledéregeruni arúejani lun Búngiu Úguchili. ²⁵ Larúejaba Crístu daríme gáñeigüda láali Búngiu wuríbu lun jawágu sun láganiñu, ²⁶ ouweni, ligíaba lagúmujoún ágani agúnrinchawagúti. ²⁷ Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu. ²⁸ Dánmeti le reídejali sun sun cátei lábugiñe lubáfu Crístu, ábame leréderun Crístu, le Liraú Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹ Añájein jídaangiñe, abásterutiña jewéñegua ja ouwetiña mabásterunga. ¿Cámegi jadúgei lira? Ánjein másaarun jabeí jiláaña, ¿cámegi ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnriügu weíbaa-joun lueígiñe. ³¹ Ságü wéyu yaráfa wamá lun wounwen, inárüni líra nidújeñu, queísi ugúndani le nasándirubei juágu queísi afñetiña luágu Wabúreme Jesucrístu. ³² Ageíndaguatiña wügúriña ja ítarabaña quei anímaalugu janárimetiña ya Éfeso núma, ladúga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubeí luágu úabei lan ibágari lárigiñe ouweni, richátiña jamúga ja aríñagubaña. “Jouwama, guráwama, lugúndun jarúga wouwegua.”

³³ Mayeedúa jumá. Aríñawagúati. “Féridigüda jamúti jagúburi umádagu lubuídun igáburi.” Inárüni líra. ³⁴ Darígua jumá júngua, giríbu jumá lun ában ibágari le surúti, mafígouja jumá. Añájein jídaangiñe, ibídiñeti Búngiu joun. Naríñaguñein le lun janúgün busíganu.

Ída lúba ligáburi jásaarun jiláaña

³⁵ Fágua níjeinbei álügüdjati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?” ³⁶ Libídiouniga láu álügüdjani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouchun. ³⁷ Máma nádü le lúnbei lájüchün abunúbei, ílaü abunúbei, furúmiegüarügü le luwúyeri. ³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü. ³⁹ Máma ában lábu sun úgubu, ámu luwúyeri jágubu güriñe, ámu jágubu anímaal, ámu jágubu dunúru, ámu jágubu úduraü. ⁴⁰ Níjein gíñe buri cátei siéluna queísi wéyu, játi, warúguma, queísigubeirügü níjein lan ubouáguna, ámu lubuídunmeraiü buri le siéluna lueí le ubouáguna. ⁴¹ Ámu larúni wéyu lueí larúni játi, ámu gíñe jarúni warúguma, áni jádaanguanarügü warúguma, ámuñegueinarügü jarúni jawáriuagua. ⁴² Ítara líña gíñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le moúnwenjali. ⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti. ⁴⁴ Labunúa ában úgubu le ídaanbei wabágarida ya ubouágu, lásaarame ában úgubu le ídaanbei wabágarida yágüta siélu. Ánjein íbíja wabeí wágubu lánina ubou, wibíjibeí gíñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügúri, ában meja wügúri wínwanti”, ánjeinti Crístu, le giríbei gíñe lagúmujoún Adán, ában espíritu ligía le íchugubei ibágari. ⁴⁶ Furúmiñe íbíja wamúti ibágari le ubouáguna, lárigiñe, ábame wibíjini ibágari le lánina siélu. ⁴⁷ Lé meja furúmiñeti wügúri le adügúbei láu múa, ubouáguna meja, libíaman wügúri le Wabúreme Jesucrístu, siéluna. ⁴⁸ Sun güriñe ubouágu ítara líña jágubu quei lúgubu Adán le adügúbei láu múa, sun lánigu Crístu, jabíjuba jágubu quei lúgubu Crístu, le siélunabei. ⁴⁹ Wágubu guetó, líbe lúgubu Adán, le lánina ubou, lachúlürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le naríñagubei, nidújeñu, luágu siñá lan jebélurun güriñe láu jágubu le ubouáguna lídoun larúejan Búngiu siélu, lugúndun cátei le gouwedadibeí siñáti gabára lan lídan fulásu le ní lubei úa lan ouweni. ⁵¹ Buséntina lun jasúbudiruni cátei lé meja arámudaguabei le. Máma sun lánigu Crístu lun jouweguba lan, jasáansirawagúba súnigubei, ánjein wínwangiña lubeí dánme lagríbudun Jesús o jiláaña lan, ⁵² lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fídu, le liseíni lagúmujoún sun cátei. Línwiruba fídu, ábame jásaarun lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía. ⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le

góuwedadibei, lasáansiraguba lídoun le moúwedadibei. ⁵⁴Dánme le sáansiguaali wágubu le goúwedadibei lídoun le moúwedadibei, ábameti lagúnfulirun le bürúwañubei tídan Lerérun Búngiu. “Gumúja lubáfu oúweni, féridilá wuríbu. ⁵⁵Oúweni, ¿jigeígi bubáfu lun bagúmuchaguagüdüniwa? ¿Jigeígi agáñeiruni lé nege lúnbei badúgüni?” ⁵⁶Figoú lébunabei oúweni, áni binádu lilúrudun Moisés, ligía arúfudubalin woun cátei lan figoúbei lun wayúmajani. ⁵⁷Teínqui wáña lun Búngiu luágu lagáñeiragüdüniwa luágu sún buri cátei le, láu lubáfu Wabúreme Jesucrístu.

⁵⁸Ligía lubeíti nidújeñu jínsiñetiña nun, ítara méme jumá derégüdagu lídan jaffñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadúgübei lídan ában lúma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adúga jumeí quei narúfudajani tídan sun ligílisi loúbawagu Galácia. ²Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachúlürün, merédedünme oúndaragua seínsu. ³Dánmeti le nachúlürün, nouñajabaña gürígia ja janúadajabaña ubúrugu Jerusalén, ábame níchugun gárada joun lun janúgüni seínsu le joúndarubei joun wadújeñu ja ñibaña. ⁴Ánjein gíñe lun lubeí nídin, jóúdiba núma.

Laráansejan Páblo lubá luweíyasun

⁵Lídan nuweíyasun, násügürüba loúbawagugiñe Macedónia lun neréderun átiri wéyu ñi, nachúlürüba lubeíti ubúrugu Corínto lárigiñe. ⁶Fágua neréderagun júma átiri dan, o násügürüni lan sun juyáabun ñi, gayáraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun. ⁷Mabúseerúntina chúlúguarügü nan aríjaün, buséntina neréderagun átiri dan júma, ánjein busén Wabúreme. ⁸Neréderuba ya ubúrugu Éfeso darí luwéyuri Pentecostés, ⁹lugúndun níjein ában oúnwenbun cháansi nuágu lun nadímurejan luágu Wabúreme Jesucrístu ya, áni buídubei lanúgün. Añájein gíñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubeí nígiruni Éfeso guetó.

¹⁰Dánme le lachúlürün Timotéo, jóucha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queísi áu. ¹¹Manúga jumeí quei ni cáta. Dánme le gumúlaali lidáani júma, jíderagueime lun gayára lan lagíríbudun númoun láu ában ugúndani tídan lanígi luágu lubuídun lidáani júma. Nagúrabajañein ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹²Ayúmuraquatina yebe lun Apólos lun lídin jáma jíbiri wadújeñu aríjaün, jénreenguti lídin guetó, lídiba dánme le gayára lan.

Lagúmujoún buri mábugaü

¹³Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagu jumá lídan jafíñen. Agáburida jumá quei wügúriña ja awáanserubaña lídan le inárünibeí, manúfudeiga, jere jumá, gáñei jumámuga luágu wuríbani. ¹⁴Sun cátei le jadúgübei, adúga jumeí láu ínsiñejabuni.

¹⁵Nidújeñu, subúdi jumúti luágu Estéfnas lan jáma sun tílana lúban furúmiñebaña loúbawagua Acáya ígirutiña binádu jagáburi lun jerésibiruni Crístu, luágu gíñe derégeguaaña lan jóungua lun jesériwidun joun wadújeñu lídan affñeni lídan furúmieguaarügü cátei le jayáraati. ¹⁶Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara. ¹⁷Gúndaatina láu jayábin

Estéfanas, Fortunáto, lúma Acáico ñájoun. Weíriñajati nisáminan juágu, áni siñáti jíabin sun jugúya, ¹⁸ ába jíchugun wügúriña jagía gurásu nun láu janúgün ugánu nun juágu. Afíñetina luágu janúgüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña tílana ligílisi buri to loúbawaguboun Ásia jun. Mábuga jáña gíñe Aquíla túma Priscíla jáma sun ja oúndaragubaña jábiñe jun, queísi afíñetiña luágu Crístu.

²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabúrüjabei láu nújabu lúma nilétüran.

²² Le mínsiñejabuti lun Wabúreme Jesucrístu, reídeilá lábugiñe líñaragun Búngiu. ¡Giríbubá furése uboúagun, Wabúreme!

²³ Binílaün Wabúreme Jesucrístu. ²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabúrújañoun gárada to jun, jugúra le tílanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ² Resíbi jumá abíniruni lúma darángilau lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü óra. ⁴ Rúti gurásu woun lídan sun wasúfurirun, lun gíñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵ Lugúndun ítara quei luweírin wasúfurirun luágu líri Crístu, ítara gíñe werésibirun ában oúnwenbun gurásu lúmagiñe. ⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun gíñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷ Derégüdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsiti woun luágu láu sun lan jasúfurirun luágu líri Crístu queísi wasúfurirun, jerésibiruba lan gíñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchwagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun ñígiñe. ⁹ Sandíguaadiwa yebe woúngua queísi gürígia ja síadiwaaña lun joúnwen. Wel, lasúseredunbei líra lun wafúnrendeirun lídaangiñe lun wemenigidun luágu Búngiu le gabáfubei lun lásaaragüdüniña jiláaña, máma lun wawoúgua lan wemenigida. ¹⁰ Séfu lumútiwa Búngiu dán buri meja ligía le yaráfa wabei lun woúnwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali wemenigi luágu, luágu leséfuramémebadiwa lan, ¹¹ ánjawa jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteingiruni lun Búngiu luágu fuleísei lániwa láu leséfuruniwa.

Ca lan uágu lasáansiragui Páblo larítangun luágu luweíyasun ubúrugun Corínto

¹² Níjein ában cátei agúndaaragüdütiwa. laríñagun warítangun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madúgüntiwa ni cátei láu lichú wáu guánarügü. ¹³ Lídan le wabúrújanbei jun tídan wagáradan, úati ni cáta arámudaguati ñi le jásiñerun alíja o gunfaráanda. ¹⁴ Guetó subúdiraüjadün luágu gayára lan jagúndaaragun wáu quei jumáesturungu, chülú lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíríbudagüle Jesucrístu uboúagun.

¹⁵ Queísi méja afíñe nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdünnün láu bisída nánün bián weíyaasu — ¹⁶ jarítagutiná yebe nachúlaagun aríjaün lídan nuweíyasun Macedónioun, dan jamúga le nagíríbudun Macedóniagiñe, ábaya jamúga nachúlaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun.

¹⁷ Madúgün numúti. ¿Jálügüdaguñasan júngua ca lan ueگیñe madúgün nubálin? ¿Masáminarun numúti funásan quei lubúdubu dan lé meja naríñagubei jun luágu nadúgübei lan cátei le? ¿Jarítaguatün luágu ítara níña lan queísi lirájüñü ubouú ja aríñagubaña ában cátei áni magúnfuliruntiña láu jerérun? ¹⁸ Geféenti Búngiu luágu maríñagun wamá ában cátei jun magúnfulirunga wagía láu. ¹⁹ Sun wagía—Silváno, Timotéo, áu—apúrichijatiwa jun luágu Jesucrístu, le Liraú Búngiu. Áni mítaraanti Crístu quei güriгіa ja aríñagubaña ában cátei áni magúnfuliruntiña láu jerérun, Crístu, súnwandan ladúgüni le laríñagubei. ²⁰ Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigin, ayúmuragua wagía lun, ába waríñagun “ítaralá” lun warúfuduni wafíñerun luágu ladúgüwaba lan lídan líri Jesucrístu. ²¹ Búngiu adúgübei lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun. ²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibeі lasúbudiraja le lúnbei werésibiruni queísi lánigu Búngiu. Queísi ítara líña lubeі, ¿gayáraati funásan ítara wamá queísi güriгіa ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedónioun queí yebe narítaguni lugúndunrügü mabúseerun nan nírudaguagüdüñün láu ában ébechuni, geféenti Búngiu luágu líra. Ánjein máma lubeі líña, aráansetina lun noúnabun láu nibágari guánarügü. ²⁴ Máma jamúgatia wabúseeruña waríñagun jun. “Nijánba jafíñera”, derégüdaguaadün lídan jafíñen, busénrügütiwa wíderagunün lúntima lagánwoundun jagúndaarun.

2

¹ Ligía mídinya nubeі bisídaün lun nírudaguagüdüñün. ² Lugúndun ¿ída lubásan gayára lan jamúga nagúndaarun lárigiñe níchuguni íruni joun güriгіa ja agúndaaraguagüdübalina? Siñáti jamúga. ³ Ligía nabúrújanbei jun ítara, lun gayára lan jaráanseruni cátei le mégeibeі jídaangua lubáragiñe nachúlürün júmoun, dánme lámuga nachúlürün, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga giñe ugúndani. ⁴ Dán meja le nabúrújanbarun gárada tugúya jun, weíríti meja nidíjeri juágu darí lun nayájun lídan le nabúrújabarun. Máma meja lun nírudaguagüdüñün nabúrújoun jun ítara, nabúrújanun lun jasúbudiruni luweírín nínsiñejabu jun.

Ferúduñ lun lé meja afígounjabei

⁵ Le rújalibeі íruni láu luríban leménerun, máma rügüñein nun líchiga íruni, rúlumuti giñe jun lídan ában luwúyeri. Naríñagunbei “lídan ában luwúyeri” lun maweírín lan naweírídaguagüdüni jun. ⁶ Abeíchuni lé meja jaríñagubei lídan jadámurin lun líchugúniwa luágu güriгіa ligía, buídurügaali. ⁷ Guetó, lúnti ferúduña jumáni, ru jugúyame gurásu lun lueí ladúgün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsiñejabu lun. ⁹ Abúrújatina jun luágu cátei le lun giñe nasúbudiruni ánjein aráanse jubeі lun jadúgüni le nubeіbei jun. ¹⁰ Guetóti, le únti ferúduña jumá furúmieguarügü cátei, ferúduña nubeі giñe, ánjein giñe níjein lubeі cátei le lúnti ferúduña náni güriгіa ligía luágu, ferúduña numúti ligíbugiñe Crístu, jueígiñe. ¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanúgün ában güriгіa le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítagun Páblo ubúruгу Tróas

¹² Dán meja le nachúlürünbei ubúruгу Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme. ¹³ Madárangilaanti narítagun lugúndun madári náni wadúje Títo Tróas lun nagáambun

lúma juágu. Ligía nayoúragunbei joun wadújeñu ja Tróasbaña, ába nídin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasálirun sun cátei. Teínqui wamúti Búngiu le anúgübaliwa lídoun sun fulásu, amáhareina wagía lábugiñe lagúmadijan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lirímichúniwa líjeme cupáli. ¹⁵ Lugúndun ítara wáña quei cupáli le lágudajabei Crístu lun Búngiu, ñúdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun jeféridirun. ¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷ Wagía le loúnajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérun Búngiu quei lubeí, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawóugua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruniwa, o wamúriajan lan gárada júmagiñetu joun ámu mútu, quei jadúga jíbiri mútu? ² Uá, lugúndun jugúya afíñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña quei ában gárada to bürúwañutu tídan wanígi, to gayáraaboun jalíjanun sun gürígia, asúbudiragüdei cátawa lan. ³ Ítara jíña queísi ában gárada to labúrújan Crístu guánarügü, to wedéregeruboun, ában gárada jugúya to abúrújouáoun láu láni Búngiu le wínwanbei Espíritu, máma láu tinta, áni tídan janígi ladúgei Espíritu ligía wadágimanu, máma luágu dúbü.

⁴ Gayáraati waríñagun luágu buídu lan wesériwidun lun Crístu ladúga wadúgüni jeménigiñu luágu Búngiu lun líchuguni ubáfu woun lídaangiñe Jesucrístu. ⁵ Mabáfutiwa lun ni cáta láu wáni woúngua, sun le wayáraabei adúga, lúmagiñe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu bürúwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiñe Búngiu, figóu ligía, ouweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abúrújouáti luágu dúbü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában oúnwenbun larúgounga lúmagiñeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíriri lámiridun ligíbu. Láu sun líra, ába énegucheina lan larúgounga ligía murúsun murúsun. Ánjein láu lubeí sarágu uweíríguni liábin lúrudu ligía le asáadijabei gürígia lun ouweni, ⁸ ¿weírítimaati luweírígoun ugánu le lanúgübei Sífiri Sándu woun luágu Wasálbaragüle! ⁹ Ánjein weíri lubeí luweírígoun meja lúrudu le esériwidubei lun larúfuduni wadúnrun ligíbugiñe Búngiu woun, ¿weírítimaati luweírígoun ugánu luágu Wasálbaragüle le adúgübaliwa richágua ligíbugiñe Búngiu! ¹⁰ Ni cáta luweírígoun lilúrudun Moisés ligíbugiñe luweírígoun Wasálbaragüle. ¹¹ Ánjeinti weírigu lubeí meja

darádu le lúnbei ladúrarun murúsunrügü dan, weíritimaati luweírigun darádu le lúnbei ladúrarun lun sun dan.

¹² Ladúga níjein lan eménigini le wawágu, luágu siñá lan leféridiruni ugánu luáguti Crístu luweírigun, wapúrichijánbei furáangu. ¹³ Madúgüntiwa queí meja Moisés, adáuragua láu ligíbu táu ában bélu lun maríjin jamáni Israelítagu léneguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chülú lúmoun dan le, dan le jalíjanun líburu buri to labúrújaboun Moisés, darúguatu ában bélu láu jachügü lueí gunfaráanda jamá. ¹⁶ Ánjeinti dan le lígiruni ában gürígia binádu ligáburu lun leíbugun lúma Crístu, ába tagídarún bélu tugúya lueí. ¹⁷ Wabúreme Crístu, ligía Espíritu le íchugubei ibágari. Láu Espíritu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubeí wagía afíñetiña luágu Crístu, gidáwaaru bélu lueí wasáminan, subúdi wamúti Crístu furáangu, láu sun luweírigun. Ítara wáña quei ában isúbusein to arúfudubalin luweírigun Wabúreme Crístu, áni láu wasígirun íchigei warítangun luágun, sáansiguagüda lumútiwa láni Espíritu murúsun murúsun lun ítara wamá quei ligía.

4

¹ Máburujalá lubeíti warúna, lugúndun rúlaali Búngiu wadágimanu le lábun waríaajan, láu lareíni. ² Mayúsuruntiwa ibíbuni lun wafíñeragüdüniña gürígia luágu Crístu, rúwamuti wanágan luágun cátei le adügúbei arámudaguarügü, le nibúsigarídünabei. Masáansiragun wameí Lerérun Búngiu, inárüni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu. ³ Ánjein mafúraangun lubeí werérun luáguti Wasálbaragüle, jóun rügüñein ja lúnbaña jeféridirun mafúraangun lan. ⁴ Quei mafíñen jabeí luágu werérun, darúlaali Máfia, le lubúngiutebei ubou le, jaríjin lun siñá lan larúgoungadagüdüni ugánu luáguti Crístu le weírigubei, le liyáwabei Búngiu wínwanti, jasáminan. ⁵ Dan le wapúrichijanbei, máma wawougua wapúrichija, luágu Jesucrístu wapúrichija, queísi Wabúreme, waríñagati wawougua luágu esériwidutiñarügü lan wagía jun, luágu wínsiñejabu lun Jesús. ⁶ Lugúndun Búngiu, le méme íchugubalin lámpu siélu lun lagídarúniwa lubúriga, ligía gíñe adúnraaguagüdübalin lilámpun tídan wanígi, lun gayáraabei lan wasúbudiruni luweírigun Búngiu le waríjibeí lídan Jesucrístu.

Abágariduni láu eménigi luágu Búngiu

⁷ Larúgounga le wibíjubei luágu luweírigun Búngiu le lídaanbei Crístu, ítara líña quei ában irisini woun. Barú wamuti irisini ligía lídan fugiábu wágubu, le ítarabei quei ában soudíeru, lun larijiniwa luágu lúmagiñe lan Búngiu liábin oúnwenbun ubáfu le wawágubei, máma wámagiñe. ⁸ Ítara, láu sun súfuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguarügü lénreengúnga. Níjein dan, weíriti wadíjeri luágu cába lan wadúga, máburujaanti warúna, lugúndun íderagua lániwa Búngiu. ⁹ Eíbaajouátiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláaña, siñáti jagúmuchaguagüdüniwa. ¹⁰ Le ñílumuti wouúdin, buséñtiña wáganiñu jáfaraguniwa jilágubei quei jáfaruni láganiñu Jesús jilágubei. Lúnti ítara lúba lan lun gayáraabei lan larijiniwa lubáfu Crístu le wínwanbei wádaangiñe. ¹¹ Wagía, sun awánja lan abágarida, yaráfañu wáña lun wounwen furúmieguarügü wéyu lueígiñe Jesús, lun gayára lan larijiniwa libágari Jesús wádaangiñe. ¹² Ítara líña lubeíti, láu yaráfañu

wamá lun ouweni lun wíchuguni ugánu jun luágu Wasálbaragüle, resíbi jumúti ibágari magúmuchaditi.

¹³ Laríñajare Davíd tídan Lerérun Búngiu. “Affñetina, ligía nadímurejánbei”, ítara giñéti affñetiwa luágu Búngiu láu méme ligáburi affñeni le meja luágubei Davíd. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdübalin Jesúsu lídaangiñe ouweni, lásaaragüdübalíwa lan gíñe lúnya wabágaridun, úara lúma Jesúsu, ábame lanúgüniwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja ánjarubaña lun lareíni Búngiu joun, gíbe jamámuga gíñe íchugutiña eteíngiruni lun luágu lareíni. Ítara lúba inurúañu lan líri Búngiu.

¹⁶ Ligía máburujan lubeí warúna. Oúwedeina líña wágubu murúsun murúsun, wawáni, tedébuguduña ságü wéyu. ¹⁷ Ni cáta le wasúfurirubei lídan ibágari le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigin. Maweírinti lidáani wasúfurirun woun ya ubouágu dan le wasáminarun luágu lúntibeí lan dan magúmuchaditi wagúndan siélu. ¹⁸ Marítaguntiwa sarágu luágu cátei lánina ubou le, ladúga murúsuraü lan dan ladúrarun. Le uágubei wíchigei warítagin, luágu cátei lánina siélu, ladúga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan wounwen lubáragiñe lagíribudun Jesucrístu ubouágun, gayáraati lounwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina ubou quei ában múna adügútu láu újabu, ábanbei úgubu lánina siélu. ² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu. ⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Mára jamúga wabúseeruña wounwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibeí furése furése lídoun wágubu le magúmuchadibeí, moúnwenga wagía. ⁵ Búngiu aráanserubaliwa lun gabágarí wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan ubouágu abágarida lídan wágubu, bougudiñadiwa lan tueí wában yágüta siélu, máma lan lúmañadiwa Wabúreme. ⁷ Ya ubouágu, siñáti waríjini Crístu, gayáaraügüti wafñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímeín wamáni lun wígiruni ibágari le ya ubouágu lun woúdin agánawa lúma Wabúreme Jesucrístu siélu. ⁹ Ligía wáfaagunbei lun wadúgüni lugúndan Wabúreme súnwandan, ya wagía yebe ubouágu, yágüta wagía yebe siélu. ¹⁰ Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbatí le meja wadúgübei dán meja le ubouágu idiwa.

Ugánu lánina darángilau

¹¹ Ligía, quei subúdi wabálin lanúfudewa lueí lagúseragüdün Wabúreme, áfaaguatiwa lun wafñeragüdüniña sun gürígia. Subúdi láali Búngiu cátawa lan, áni agúrabatina lun gíñe subúdi jumáni. ¹² Mára wadímurejañaya buídu wawoúgua, wíchuguña ában cháansi jun lun jasándiragun júngua gúndaañu wáu, lun gayára lan jounabuniña arúfudajatiña jagánagua ja apántajabaña luágu lubuídun jarúfudagun jóngua bougudi jabíti, áni tídan janígi mabuíduntiña. ¹³ Ánjein weíri lubeí wesériwidun lun Búngiu darí lun waríjín camá lúlüñein wáu, ladúga luweírín wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidfli ichúgü, ladúga

luweírin wínsiñejabu jun wadúgei. ¹⁴ Mósu nesériwidun lun Crístu táu sun nanígi lárigiñe larúfuduni luweírin línsiñejabu woun láu loúnwen lídan wafúlasun súngebei. Queísigubeirügü jamúga jilá jamá sun gürígia úara lúma dán meja le loúnwenbei. ¹⁵ Jiláti Crístu jawágu súngebei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni. ¹⁶ Ligía manúgün wabeí ni ában quei janúgün lirájüñü ubou gürígia, según bougudi jabíti. Luágu méja ában dan, barú wamuti meja Crístu quei janúgüni lirájüñü ubou, mítaranjaali guetó. ¹⁷ Le lubeíti lídaanbei ában lúma Crístu, ábanjali gürígia iséri, gumúja sun cátei le lánina binádu ligáburi, labágariduña ában iséri ibágari lúma Crístu.

¹⁸ Adúga lumúti Búngiu sun cátei le. Gáganiguatiwa meja lúma ladúga wafígoun, ába loúnajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun gürígia lúma. ¹⁹ Le naríñagubei, láu loúnwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia. ²⁰ Wayábiña lubeíti queísi wügúriña ja loúnajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueígiñe loúbadina Crístu. aráandara jumá lúma Búngiu. ²¹ Madúgünti Crístu ni ában figou, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachúlürün abágaridei ibágari lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburi luágu máma lan luágu ni cáta jerésibirei lareíni Búngiu jun.

² Laríñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun gürígia, níderagubadibu lídan nuwéyuri lun nasálbarun gürígia.

Chülújali lidáani Búngiu lun fuleíseijabu lan joun gürígia, niján buri wéyu le luwéyuribe Búngiu lun lasálbaruniña gürígia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa gürígia lueí jagáambuniwa. Mabúseerúntiwa jamúga wanúgün minébesi lun luwádigimari Búngiu láu wagáburi, ⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga. ⁵ Bejjamaadíwa, dáujamáwa, íchajouátiña gürígia lun jeíbaajaníwa, jéreti wawádigimari lun Búngiu darí lun wasándirun oúnwenbun lubúcha uágu. Reídejadiwa marúmugunga, áfaaga wagía ilámaü. ⁶ Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágari, dándu lun wouíndin jabároun wáganiñu quei lun waráramuniña dan le jayábin wabároun. ⁸ Níjein dan ibíjatiwa inébesi, níjein dan anábawaguatiwa. Níjein dan adímurejouáti buídu wawágu, níjein dan adímurejouáti wuríbatí. Níjein dan, ousera jamútiwa quei yéetiña, níjein dan quei wügúriña ja aríñagutiña inárüni. ⁹ Níjein dan, ousera jamútiwa quei ibídiñewatiña, níjein dan quei subúdiwatiña buídu, níjein dan, agúrabañu wáña lan wounwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe, ¹⁰ mouñwentiwa lídaangiñe asúfuriruni ligía. Láu sun níjein lan cátei lun lírudaguagüdüniwa, níjein gíñe ugúndani lúmagiñe Búngiu tídan wanígi. Láu sun gudéme wamá según ubou, aríñagatiwa joun gürígia luágu írisini inárüni le gayáraabei

jadáriruni lídan Jesucrístu, láu sun úa lan ni cáta wáma según jarítangun lánigu uboú, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírín jínsiñe nun. ¹² Masáansiragúnti wínsiñejabu jun, láu sun affíñetina luágu sáansigua lan jínsiñejabu woun. ¹³ Ayúmuraguatina jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürígia ja mafiñetiña luágu Crístu, lugúndun janúgüba ában ibágari le múaraanti. Mamádaguati ísuruni lúma wuríbaní, siñáti gíñe gamádagua lan larúgounga lúma lubúriga. ¹⁵ Siñáti níjein lan úarani lídan Crístu lúma Máfia, siñáti gíñe lúaradun ában affíñeti luágu Crístu lúma ában le mafiñeti. ¹⁶ Siñáti gadúnama jamá sándu tídan lúban Búngiu, áni lúban Búngiu le wínwanbei wagía, quei laríñangun Búngiu guánarügü.

Naganouba jagánagua, eíbuga áume jagánagua, áuba Jabúngiute, jagíame nánigu.

¹⁷ Ligía gíñe laríñangunbei Wabúreme Búngiu.

Furíjuma jagánaguagiñe ja mafiñebaña nuágu, díse jumá jaweí, líña Jabúreme.

Mádaragua jumá júngua lídoun le wíyebí.

Ábame nerésibirunün,

¹⁸ ábame ában nan úguchili jun,

jugúyame nirájüñü, líña laríñangun Jabúreme, le Súnti Gabáfu.

7

¹ Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbbuni sun luwúyeri iwíyeni wawárua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladúga luweírín inébesi le wawágubei lun Búngiu.

Lasáansiragun jagáburi Coríntona

² ¡Rújuma ában ubáraü woun tídan janígi! Madúgüngidiwa dáñu lun ni ában, maríbadagüdün wagía ni ában, mayéedagun. ³ Mára naríñaguñein le lun níchugun jidúnrun, lugúndun quei buga naríñaguni jun, tídaañadün nanígi, lídaañadiwa ában ínsiñejabúni le mébejati, lídan yebe ibágari o lídan yebe ouweni. ⁴ Weíríti naffíñen lúma nugúndan jáu, labádinagua sun le nasúfurirubei, sandítina dúgüdaguaü, áni buin níña gíñe láu ugúndani, jueígiñe.

⁵ Lúmagiñé meja wachúlürün Macedónioun, meméraagüngidiwa, darírügütiwa lénreengúnga lídan sun fulásu geyégua wáu, geyéguati wuríbu wáu, weíríti wadíjeridun juágu. ⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachúlürün Títo, ⁷ áni mámarügü láu lachúlürün, lugúndun gíñe gagúraasun lan juágu. Aríñagati woun luágu luweírín jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírín jabúseerun lun jóudin láu nerérun jun. Ábatima nagúndaarun láu líra.

⁸ Láu sun jírugua jumá tadúga gárada to nabúrüjaboun jun, maságürijaantina luágu, guetó. Aságürijatíná meja furúmiñe láu nasúbudiruni luágu jírugua jumá tadúga gárada tugúya luágu murúsun dan. ⁹ Guetó gúndaatina, máma ladúga jírudagun, ladúga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubeíti madúgüntiwa ni murúsun dáñu jun. ¹⁰ Lugúndun dan le wíchugun úma lun Búngiu lun layúsuruni íruni le wawágubei ladúga luríban wagáburi lun lasáansiraguni wagáburi, barú lumútiwa lídoun asálbaruni le magúmchaditi, maríbaanti íruni ligía woun. Ánjein wanúga íruni

ligía queísi janúgüni lirájüñü ubou, magáragunga wagía lun Búngiu, lanúgubadiwa lídoun féridi lun sun dan. ¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadúga gárada tugúya, ába jatátirun asáminara buídu cába lan jadúga láu wügúri le afígounjabei jagánagua. Arúfuda jumúti luágu magúndan jumá láu figou le ladúgübei, áni gáñitün luágu busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weíriti jabúseerun lun jadúgüni le richábei, lun jabeíchuni le adúgübalin figou, adúga jumáli sun le lúnbei jadúgüni lun jaráanseruni cátei le. Madúnrunjadün guetó. ¹² Dan lubeíti le nabúrújanbarun meja gárada tugúra jun, mámadügüya jamúga ladúga nasáminaruña lan sarágu luágu güri-gia le adúgübalin wuríbani, ni luágu le asúfurirubalin lueígiñe, nabúrújanbarun lun geféen júma ligíbugiñe Búngiu luágu luweírin jínsiñejabu woun. ¹³ Ligía ragúguaadiwa lubeí woungua.

Lánwoun sun gurásu le barú wamáalibei juágu, oúnwenbun wagúndan láu waríjini luágu gúnda lan Títo, íderagua jumáli sun jugúya lun lasándirun darángilaü. ¹⁴ Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Títo, luágu gunda wamá jáu. ¹⁵ Áni weíritimaati jínsiñe lun dan le larítapun luágu jadúgüni sun jugúya le lamúriajabei júma, lúma luágu jerésibiruni láu ában inébesi lúma idíjeri lueí jamúga jemegeiruba lan lídan jagúnfulirun láu lerérun. ¹⁶ Gúndaatina láu gayára lan nafíñerun juágu le gumúti.

8

Wíchugun joun gudémetiña

¹ Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loubwaguboun Macedónia. ² Láu sun ában lan oúnwenbun ouchwaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña. ³ Geféentina luágu rújamaali lan sun le jayáraabei láu sun tarúman janígi, ru jagía sügú láu lé yebe jayáraabei. ⁴ Ayúmuruaguatiña sarágu woun lun wígiruniña lun jíchuguni jafáran lídan jíderawagúniwa idújeñu lueígiñe Jesucrístu. ⁵ Adúgatiña sügú láu lé yebe wagúrabubei jadúgün, furúmiñe, ába jedéregeragun jóungua le gumúti lun Wabúreme Jesucrístu, lárigiñe ába jedéregeragun jóungua woun, queísi lugúndan Búngiu. ⁶ Weíriti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmochaguagüdüni labúdajoun seínsu lé meja lagúmeserubei jídan. ⁷ Jugúya ubáraübei lídan sun cátei—lídan jafíñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti gíñe ubáraü jumá lídan ídejani le.

⁸ Mára naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan gíñe jarúfuduni jínsiñejabu láu jíchugun táu sun janígi quei jagía. ⁹ Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu liábin ubouágun ladúga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei naríñagei narítapun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adúga jumúti gíñe táu sun janígi. ¹¹ Guetó lubeíti, ítara méme jumá darí jagúmochuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹² Lugúndun ánjein íchiga ában güri-gia sun le liyáraati según le lúmabei, láu sun

lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Mára lun jáfagun mégei ladúga jíderagun ámu, ¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵ quei taríñagun Lerérun Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídon tídoun lanígi Títo lun líderagunün. ¹⁷ Gúndaati Títo lúnya lídin aríjaün quei namúriajani lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸ Úara lúma Títo, wóunajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúrchagun ugánu luágu Wasálbaragüle.

¹⁹ Áni mámarügü líra, anúadaja jamúti gíñe tílana buri ligílisi idújei ligía lun ladúgün weýaasu wáma lun líderagun lídan loúndarún seínsu le. Wadúgüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá afíñetiña lun jíderaguniña jadújeñu ja gudémebaña. ²⁰ Waráanseruñein sun cátei lébei lun míchugun wamá lúgaaru lun ladímurejóun wuríba wawágu lueígiñe loúndarun seínsu le wadúgübei. ²¹ Wáfaaguña lun wadúgüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²² Wóunajaña gíñe ábanya jádaangiñe wadújeñu lúma Títo lúma le ában. Wügúri le, arúfuda láalíbei luweírin labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan. ²³ Le álügüdajati libúgürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabúgürü bíama idújeñu lueígiñe Jesucrístu ja lúmabaña, jaríñagame joun luágu jóunajan lan tílana ligílisi buri, luágu jínúragüdüñein lan líri Crístu láu lubuídun jagáburi. ²⁴ Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügúriña jagía luágu inárüni lan lubuídun werérun juágu, áni lun gíñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügúriña jagía.

9

Loúndarún seínsu joun idújeñu ja gudémebaña

¹ Luágu loúndarún seínsu joun idújeñu lídan afíñeni, memégeirunwati lun nabúrüjan jun, ² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügújalíbei, áni jíbe-ágei Macedóniana ragújaña gíñe dúgüdaguau láu jagáambun luágu luweírin jáfaagun luágu ídejani le. ³ Láu sun líra, nouñajaña idújeñu jun nubáragiñe lun jaráanseruni luáguti labúdajoún seínsu, lun mámabei lan iyéeni, buíti le naríñagubei juágu libúgürü cátei le, lun abúdajoúali lan sun seínsu lubáragiñe nachúlürün jumóun, ⁴ ñúdüdügü jañein jádaangiñe Macedóniana núma, jadáriráunme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafíñen juágu. ⁵ Ligía narítangunbei namúriajan jáma idújeñu ja lun jóudin bisídaün nubáragiñe, lun gíñe jíderagunün abuíchagüde seínsu le uágubei jaríñaga jóundarun. Ítara, aráanseñu lúba seínsu le jóundarubei lun jarúfuduni jareíni, máma quei ában cátei le lúnti wafósurunün luágu.

⁶ Jarítagua jumá luágu cátei le. Le louguati lábunagun, louguabei gíñe lalúbajan, le gíbeti lábunagun, gíbebei gíñe lalúbajan. ⁷ Cáda ában jádaangiñe, lúnti líchugun queísi

ligáburu larítágun, máma láu magúndani ni ladúga aríñawagúa lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligáme gíñe sarágu júma lun jídejan. ⁹ Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña,

áni reídeiti cátei buíti le ladúgubei lun sun dan.

¹⁰ Búngiu, le íchugubalin ílaü lun lábunún, ában lalúbajagüdún sarágu lídaangiñe lun gayára lan weígin buídu, líchuguba gíñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüni Búngiu murúsun fuleísei le jadúgubei joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani. ¹¹ Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, weírubei jateíngiruni Búngiu. ¹² Lugúndun láu wíchuguni íderawaguni le joun wadújeñu, máma wíchiga rügúñein seínsu le jemégeirun joun, wadúgüña gíñe lun jíchugun sarágu eteíngiruni lun Búngiu láu líra. ¹³ Jíchuguba uweíriguni lun Búngiu lugúndun arúfuda lumúti ídejani le joun luágu adúga jumáni le lubeíbei Crístu, jíchuguba gíñe uweíriguni lun Búngiu luágu íderawaguni le jíchugubei joun lúma joun súngubei. ¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírín lareíni Búngiu le larúfudubei jídaangiñe. ¹⁵ ¡Teínqui wáña lun Búngiu, luágu rújali lan ában oúnwenbun cátei woun le siña wabeí adárira dimúrei le buídurügüti ubuídun lun wadímurejan luágu! Cátei ligía, Liraú.

10

Lubáfu Páblo queísi apóstolu

¹⁻² Aríñawagúati luágu gudémegu nan dan le júma nan, ánjein lan dan le díse nan jueí, derégüda lan nouserun júma. Áu Páblo, ayúmuraguatina jun láu ában únabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünnün luágu wuríbatu le jadúgubei, dánme le nachúlürün júmoun. Sáansi jumeí ligáburu jarítágun wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madúgün jumá, aráansetina lun nagágibudagun júma. ³ Inárüni luágu uboúaguna wamá láu sun jadébilin gürígia uboúaguna, máma queísi wügúriña lánina uboú le wawúribuja luágu wuríbani. ⁴ Máma uboúaguna áruma to áuboun wawúribuja, larúmate Búngiu wayúsuruboun lun tagúnrinchagun érei. ⁵ Ítara líña lubeíti, láu lubáfu Búngiu güríngua wamúti sun arítáguni le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gíñe jasáminan gürígia uboúagu rúwamuti lábugiñoun lubáfu Crístu lun lúraduba lan láu le lubeíbei. ⁶ Áni lárigiñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüniña ja magáambadigiñabaña lun.

⁷ Barú jumuti cátei quei larijíníwa bougudigiñe libíti. Aríñagatina jun luágu ánjein lan choúruga lubeí ában gürígia lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu. ⁸ Fágua jarítágun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünnün lídan cátei lánina Búngiu, máma lun nagúnrinchaguni jaffíñen, queísi jadúgüni arúfudajatiña jagánagua guetó. ⁹ Mabúseerúntina lun jarítágun luágu náluguña lan nebélaagüdünnün anúfudei jídon táu nigáradan. ¹⁰ Aríñagatiña náganiñu luágu abúrúja nánun gárada queísi ában gürígia láuti sarágu ubáfu, áni derégüdatí nege nerérun jun tídan, dan le júma nan, débilitiná nege, áni mínsiñegu lán nege ligáburu nadímurejan. ¹¹ Furúmiegurügü le

aríñagubalin cátei le, lúnti gíñe lasúbudiruni luágu ítara lan quei nubeí láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawoúgua, mítaraantiwa quei jagía. Jagía, adúgatiña ában libídiouniga áu láu jamísuraagun joúngua láu guá-narügü jamísuraagüle lúma láu jíchaagun joúngua jámagua. ¹³ Wagía, mapántajaan-badiwa luágu wawádigimaridun lun Búngiu lídan ában fulásu le ñílumuti míchugun lan Búngiu úma woun lun wesériwidun lun ñi, queísi jadúgüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachúlürün júmoun ubúrugin Corínto. ¹⁴ Ligía mídin wabeí sügü láu le labúseerubei Búngiu wadúga lídan le wáfaagun lun wíderagunün, ladúga wagía anúgübalin ugánu luáguti Crístu jun furúmiñe. ¹⁵ Mapántajaantiwa láu wadágimanu le jadúgübei ámu, camá jamuga wadúga. Agúrabarügütiwa lun quei lan lagán-woundun jafíñen, gayáraabei lan wawádigimaritima jagánagua, súnwandan quei lugúndan Búngiu. ¹⁶ Lárigiñeme, jarítaguatiwa wadiseduntima lun wapúrichijani ugánu lánina asálbaruni lídan buri fulásu le díseti jueí, le ñí lumuti magáambungiña lan luágu Crístu, lueí wapántajan luágu wadágimanu le jadúgübei ámu, camá jamuga wadúga.

¹⁷ Le busénti ladímurejan luágu uweíriguni, ladímureja luágu luweírigun Crístu, máma luágu luweírigun guánarü. ¹⁸ Lugúndun gürgia le buídubei, máma le adímurejabei buídu luouúgua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídiouniga náu murúsun! Awánda jumá, ² lugúndun eméendütina jáu láu ában eméendüni le lúmagiñeti Crístu, lueí jamuga jí-giruni Crístu. Áu asúbudiragüdübalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügüri. ³ Ítara quei layéedunun Máfia Éva, janúfudetina lueí gíñe jígi-raguagüdün júngua lun jeyeedún lídan jarítagun, lueí jesériwidun lúnrügü Crístu táu sun tarúman janígi. ⁴ Naríñagubalin le, ladúga resíbi jumáaña ja ñúbintiña adímureja iyéeni jun luágu Crístu, áni buléiguatün lueí cátei inárüniti le warúfudajabei jun. Resíbitün gíñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün gíñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe. ⁵ ¡Afíñetina luágu mú nabun nan sügü jáu súper-apóstolugu ja jafálarubaña! ⁶ Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adúga wamáalibei.

⁷ ¿Ódi wuríbatí nadúga napúrichijani ugánu lánina asálbaruni jun magúburajanga áu ni cáta, únabudaguagüda núngua ítara lun niñúragunün lídaangiñe binádu jigáburi? ⁸ Barútina seínsu jámagiñe tílana ámu buri ligílisi láu nerésibiruni le jafáyeirubei nun, lun nayúsuri esériwida jun magúburajanga naün. ⁹ Áni dan lé meja níjein lan nemégeirun dan le júma nubeí, merédetina quei ijúrügu lun ni ában, idújeñu ja ñúbinbaña Macedóniagiñe, jagía íchugubalin le nemégeirubei nun. Ítara líña náfaagun lun mámadadina lan ijúrügu jun lídan ni cáta, áni ítara méme lúba nadúga. ¹⁰ Ítara quei choúru náni luágu subúdi náni linárün Crístu, ítara líña gíñe nasúbudiruni luágu manúgübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúburajanga. ¹¹ ¿Cásan uágu nadímureja ítara? ¿Ladúga funásan jimísiñe nun? Subúdi luweírin jínsiñe nun lun Búngiu.

¹² Nadúga mémebei le nadúgübei lun míchugun nan lúgaaru joun arúfudajatiña jagía ja áluajabaña lun gayáraabei lan jaríñagun luágu ítara méme líña lan jesériwidun jun queísi wagía. ¹³ Mاما Crístu oúnajabaliña yéetiña jagía jagánaguóun láu sun jafámurun camá lánigu Crístu apóstolu jagía. ¹⁴ Áni máma cátei terénchatu le, lugúndun Máfia guánarügü arúfudaguati lúngua quei ánjeli le íchugubalin larúgounga, ¹⁵ ligía giñéti jafámurubei ja esériwidubaña lun queísi gürígia ja adúgütiña buíti. Wel, lachúlürüba wéyu lun jerésibiruni le jadúnabei luágu wuríbani le jadúgübei.

Lasúfurirun Páblo luágu lesériwidun lun Crístu queísi apóstolu

¹⁶ Naríñaguñaya jun. Úa la ni ában arítaguti luágu ladúga lan lúlü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lúlü táu, lun gíñe gayára lan napántajan murúsun. ¹⁷ Dan le nadímurejan buíti nuóúgua, madímurejaantina láu ában únabuni quei ligáburi ladímurejan Crístu, nadímurejan quei jadímurejan ibídiouguatiña áu. ¹⁸ Queísi japántajan arúfudajatiña jagánagua láu buri cátei le lánina ubou le, napántajaba gíñe. ¹⁹ ¡Quei lanárimebei lichú jáu, awánda jumútiña lúlü táu láu ugúndani! ²⁰ Lugúndun awánda jumútiña ja afósurubalün lun jesériwidun joun, jáma gíñe ja aságarubalin le júmati, ja anúgübalün jánime, ja ouserubalün quei ni cáta, ja agáyuaajabaña jigíbuagun. ²¹ Láu sun nibúsigari nan lun naríñaguni, ¡weírítí buga wedébilin lun wadúgüni cátei líra!

Ánjeinti le uágubei gayára lan janáangun jóungua, gayáraati gíñe nanáangun nungua luágu (nadímurejaña méme queísi ában lúlü táu). ²² ¿Jarásan Hebréona jagía? Áu sun. ¿Linásiñuna Israel jagía? Áu sun. ¿Linébaanfaangu Abrahám jagía? Linébaanfan gíñe áu. ²³ ¿Esériwidutiña lun Crístu jagía? Sügútimaatina jáu láu sun nadímurejaña lan queísi ában lúlü táu dan le naríñaguni. Nadágimeinjaadina sügü jáu, beíwaadina sügü jáu, dáüwaadina sügü jáu, sarágujali weíyaasu yaráfa nan lun noúnwen. ²⁴ Seíngüjali weíyaasu jabeíchunina juríu láu darándi-néfu beíti. ²⁵ Úrüwa weíyaasu jíchaagun Rómána wéwe nuágu, ában weíyaasu jachúragun juríu dúbü nuágu. Úrüwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebe lúma ában wéyu anágü baránaja lárigiñe tabúluchun ugúnein náu. ²⁶ Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina nungua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguaadina nungua lídan pelíguru ubúrugu, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucrístu, le jayéeni. ²⁷ Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tilougua anáangun.

²⁸ Bougudi lueí buri cátei le lúma buri ámu cátei, ságü wéyu nasándiruni lijúrü nidíjeri jawágu tílana sun ligílisi. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figou, weírítí nigárigu luágu. ³⁰ Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíríguni lun sun dan, subúdi lumúti luágu inárüni lan naríñagubei. ³² Dán meja le ubúrugu nubeí Damásko, ába líchugun gumádimati le esériwidubei lun urúei Arétas oúnigirutiña luágu buri lubéneri fulásu ligía lun janúgünina adáüra. ³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúrugu, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucristu lun

¹ Magáñeirunti güriquia ni cáta láu nadímurejan buídu luógu. Láu sun líra, nabájüdagua jun guetó luágu buri cátei lé meja larúfudubei Jesúsú nun. ² Catoúrusu irúmu guetó lueígiñe nanügúniwa lídoun lúruwan siélu, áu le affiñebei luágu Crístu. Ibídiñeti nun ánjein láu sun lubei nógubu nídin, lúmoun máma lan láu, Búngiu asúbudirubalin. ³ Subúdi numúti luágu barúwa nan lídoun lúruwan siélu, le méme gríbebei paraíso, ibídiñeti nun ánjein láu sun lubei nógubu o máma lan láu sun nógubu, Búngiu rügúñein asúbudirei. ⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladúga arámudaguati buri cátei ligía lueí jasúbudin güriquia. ⁵ Gayáraati jamúga napántajan luágu naríjini buri cátei líra, láu sun líra, siñáti napántajan nuógu, nadímurejanrügü luágu luweírin mabáfu nan nurúmawagua. ⁶ Láu sun ánjana lan jamúga busén nadímurejan buídu nuógu, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madúgün nubei lun úa lan ni ában anügütina weíri sügú láu laríjinina o sügú lan láu le lagáambubei naríñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámbabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdüna. ⁸ Úruwaali weíyaasu namúriajan lúma Nabúreme Crístu lun lagídaruni sándi ligía nueí, ⁹ lariñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati larijín nubáfu jawágu güriquia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰ Ligía nagúndaarünbei láu débili, anabúni, mégei, eíbaajóuni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidíjeri Páblo jawágu tílana ligílisi Coríntona

¹¹ Ábanjadina lúlü táu láu nadímurejan buíti nuógu, áni jugúya adúgagüdübalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügú jáu súper-apóstolugu ja jafálarubaña, láu sun ni cáta nan. ¹² Lídan wadágimanu le nadúgübei láu sarágu gurásu jagánagua, arúfudúati láu seíni lúma miláguru weíriti le nadúgübei luágu ában lan apóstolu tímatimaati áu. ¹³ Mouserun numútün únabu jawei tílana tíbiri ligílisi, ánjein gubeirügü láu lubei meréde nan quei ában ijúrúgu jun. ¡Ferúduna jumána luágu líra!

¹⁴ Guetó aráanseedina lun nídin bisídaün lúruwan weíyaasu, áni mámbadina ában ijúrúgu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agúbürigu lúnbaña jóundarun seínsu jabá jasáanigu, máma isáanigu jabá agúbürigu. ¹⁵ Nagástarubei le númabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genége láni luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijúrúgu jun, aríñagatiña luágu barú nan seínsu júmangiñe lídan ámu luwúyeri láu ibíbuni. ¹⁷ ¿Ayéeda numútün funági láu ában jádaangiñe güriquia ja noúnajabaña jun lun lanügüni seínsu júmangiñe nubá? ¹⁸ Amúriajatina lúma Títo lun lídin bisídaün, oúnaja áu ában idújei lúma. ¿Yéegua lumútün funági Títo? ¿Ma ában láu wóuserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamáalibeí, waríñaguñein lúnriügü jawáanserun lídan jeíbugun lúma Búngiu, nidújeñu jínsiñetiña nun. ²⁰ Nidíjeritina lueí dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pántaü, lúma lídan chagáguau. ²¹ Nidíjeritina lueí lídan lánme nídinya bisídaün, lanúgagüdüniña Nubúngiute busíganu jáu, lueí gíñe nayájun jawágu sarágu jídaangiñe ja affígoun-jañabaña lúmagiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewerídijani lúma lagúmujoún buri mábugaü

¹ Nijánme lúruwan weíyaasu nídin bisídaün. Dánme le nachúlürün júmoun, lagúser-agüdüwaba cáda ában le gadúnrunti ánjein añajein lubeí biáma o úruwa geféentiña luágu lidúnrun. ² Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó, naríñaguñaya joun sun ja asígirubaña adáagua wuríbani, luágu dánme lan nídin bisídaün lúruwan weíyaasu, nasúfuriragüdübaña lan láu ában érei weíríti. ³ Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi louserunün, arúfudarügü lumúti luweírin lubáfu jagánagua. ⁴ Inárüni luágu jilá lan luágu gurúwa queísi débiliti, ába labágaridun láu lubáfu Búngiu. Débilitiwa gíñe queísi ligía dán meja le laganounbei ya ubouágu, áni quei sará lan Crístu lídaangiñe ouweni láu sun lubáfu Búngiu luágu, wachúlürüba júmoun láu sun lubáfu Búngiu wawágu ladúga lídaañadiwa lan ában lúma Crístu.

⁵ Joucháguá jumá júngua lun jaríjini ánjein lánigu jubeí Crístu le tímatimaati, joucháguá jumá júngua, mouchugua jumána. ¿Ibídiñeti jun luágu níjein lan Crístu jídan ánjein affíñe jubeí le tímatimaati luágu? ⁶ Agúrabatina jasúbudiruni luágu affíñe wamá luágu Crístu le tímatimaati, áni níjein lan agánawa wádan láu sun lubáfu, ⁷ ladúga mabúseerun wamá warúfuduni wabáfu quei apóstolugu láu wasúfuriragüdüniñu luágu luríban jigáburi. Busénrügütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu quei apóstolugu. ⁸ Dan rügúñein múaran lan lagáburidun güriégia lúma lináruñ Búngiu, labúseerúa larúfudúniwa nubáfu queísi apóstolu lun nasúfuriragüdüni güriégia luágu lífígoun, dan le buídu lan jóudin lúma Búngiu, mabúseerúnwati narúfuduni nubáfu láu abeíchuni. ⁹ Gúndaatina lun naganoun quei mabáfuti ánjein buídu lubeí jigáburi, áni wayúmuraguamémeba lun jíabin lun jabuídurun le gumúti. ¹⁰ Nabúrüjañoun gárada to jun lubáragiñe nídin aríjaün, lun gayáraabei lan jasáansiruni jigáburi lubáragiñe nachúlürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdüniñu. Lugúndun rúlumuti Búngiu ubáfu nun queísi apóstolu lun nawáanseragüdüniñu lídan jeíbugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburi, ragújuma dúgüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu. ¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³ Mábuga jáña sun wadújeñu lídan affíñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labúrújan Páblo joun tílana ligílisi buri to Galáciaboun

¹ Anája áu Páblo, le lání Jesucrístu apóstolu. Máma gürígia anúadirubalina lun apóstolu nan, máma gíñe gürígia óunajabalina apúrichija luágu, Jesucrístu guánarügü lúma Wáguchi Búngiu le ásaaragüdúbalin lídaangiñe óúweni, jagía óunajabalina quei apóstolu. ² Áu jáma sun wadújeñu lueígiñe Jesucrístu ja nómabaña ya, wabúrújañoun gárada to jun, jugúya le tílana sun ligílisi to Galáciaboun. ³ Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe. ⁴ Rulumuti Jesúsú libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboú le, queísi labúseeruni Búngiu. ⁵ ¡Uweíríguni lun Búngiu lun súnwandan! Ítaralá.

Ában rügúñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladúgübei Crístu juágu, láu luweírín línsiñejabu! Furéseti jasáansiruni jafíñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chülújaña wügúriña jagánaguóún, ja buséntiña jañawurijani jarítangun lun jafálarun ában úma le maríchatí—ámu lueí jafíñerunrügü luágu Jesucrístu lun jasálbarun. ⁸ Wel, furúmieguaügü gürígia le núbínbei adímureja jun luágu ámu luwúyeri asálbaruni lueí le arúfudaja wamáalibei jun, cáteiñein lan gürígia ligía, ¡reídeilá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Aríñaga náali meja áni naríñagayaali guetó. Ánjein núbín ában gürígia arúfudaja ámu luwúyeri ligáburi asálbaruni lídaangiñe figóú jun lueí le resíbi jumáalibei, ¡reídeilá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachúlürün Páblo lun ábanbei lan lání Jesúsú apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmagiñe ni ában gürígia nibíjei, máma gíñe larúfudajan ni ában gürígia nun, Jesucrístu guánarügü asúbudiragüdúbalin nun.

¹³ Agáamba jumáali ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáali ída líña lán meja lanárime neíbaajaniña tílana lilígilisin Búngiu, áfaagua áu lun nagúmuchaguagüdúniña. ¹⁴ Lídan ligáburi jagúnfulirun juríu lúma Búngiu, furésetina meja sügú jáu sarágu jádaangiñe nupaísanun ja madíseguati jagúriajoún núma, ladúga derégúdatimáatina meja lídan nagúnfulirun láu jagáburi binádu nagúbürigu. ¹⁵ Ánjeinti Búngiu, anúadira láadina méja lubáragiñe nagúriajoún lun nesériwidun lun, ába lagúarun nun luágu luweírín línsiñejabu lun lánibadina lan. ¹⁶ Lídan lidáani, ligía lugúndaanbei Búngiu lun lasúbudiragüdúni Liraú nun lun gayáraabei lan napúrichijani lubuídun ugánu joun ja mámbabaña juríu luágu ligía lan Wasálbaragülebei. Lárigiñe nasúbudiruni Jesucrístu, mídintina álügúdaja ni ca úma, ¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése loúbawagun Arábia. Lárigiñe, ábaya nagíribudun ubúrugin Damáscu.

¹⁸ Darí úrúwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsú. ²⁰ Ninárün jáu ligíbugiñe Búngiu luágu inárüni lan le nabúrújabei jun.

²¹ Lárigiñe líra, ába nídin loúbawagun Síria lúma Cilícia. ²² Ja wadújeñu lueígiñe Crístu ja tídaanbaña lilígilisin Crístu to loúbawaguboun Judéa, maríjin jamágidiná meja lídan dan ligía, ²³ agáambarügütiña laríñawagún. “Wügúri lé meja eíbaajabaliwa, lapúrichijañein ugánu le lánina affíñeni luágu Crístu queísi Wasálbaragüle guetó, áni ligía lé meja busénbei lagúnrinchaguni waffíñen luágu Crístu.” ²⁴ Ába jíchugun uweíriguni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barú numuti gíñe Títo númagua. ² Nídinbei ñi ladúga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu affíñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadúgünbalin líra lun gayára lan jánjarun lun le narúfudajabei, lueí leréderun le adúga náalibei lúma le nadúgübei quei ni cáta. ³ Resíbi jamúti, áni ni Títo, le nouíbabei, mafósurun jamúti lun lerésibirun circuncisión, láu sun máma lan juríu. ⁴ Inárüni luágu añajein lan eyéejatiña luágu idújeñu jamá lueígiñe Jesucrístu, ádaragutiña jóungua wagánaguoun arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubeí lun láni lan Búngiu. Belútiña yéetiña jagía quei aríaa-jatiña lun jaríjini ída líña lan wagáburi bougudi lueí lilúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúrudu ligía. ⁵ Mígiraguagüdüntiwa woúngua joun ladúga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadúgüni lun jasálbarun lueídügüya lun jafíñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladúga magúseragüdünti Búngiu luágu cátei le genégerügüti—míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijóun ugánu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani ugánu méme ligía joun juríu. ⁸ Aríja jamáali luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügúbaña quei weírigutimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun woúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu. ¹⁰ Amúriajarügütiña wáma lun warítangun jawágu gudémetiña, áni nijánti cátei le nouíchubei nadúgün láu sarágu goúnigi.

Ladeínjan Páblo lun Pédro ubúругu Antioquía

¹¹ Dan le lídinbei Pédro ubúругu Antioquía, ába nadeínjan lun ligíbuagun, lugúndun mabuídun lan le ladúgübei. ¹² Furúmiñe meja, jóuti meja jáma affíñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachúlürün gürígia loúnajan Jacóbo, ligía lagúmeserun Pédro adíseada jaweí ja mámabaña juríu, ába meíginjali lan jáma ladúga lanúfude lueí le gayáraabei jaríñagun ja afíñebaña luágu lúnti lan jerésibiruni wügúriña circuncisión lun jasálbarun, lun gíñe meígin jamá juríu lídan ában jáma ja mámabaña juríu. ¹³ Játi jíbiri juríu ja affíñebaña luágu Crístu, ába júaradun lúma Pédro lídan cátei

mabuíndunti le ladúgübei, ába gíñe lúaradun Bernabé jáma lídan cátei ligía. ¹⁴ Dan le naríjinbei luágu meíbugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lilúrudun Moisés), ába naríñagun lun Pédro ligíbugiñe sun adámurini. “Amúrü le juríu, berédera abágarida quei ja mámabaña juríu, mabágariduntibu quei juríu. ¿Ída liñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queísigubeirügü sun gürgia, luágurügü jafiñen luágu Jesucristu

¹⁵ Ába nasígirun aríñaga joun.

—Juríu wagía lúmagiñe wagúriajoun, aríñagatiwa luágu mafígoun wamá, luágu mítaran wamá quei ja mámabaña juríu ja agúriajoubaña bougudi lueí lilúrudun Búngiu. ¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladúgüni le lubeíbei lilúrudun Moisés, láurügübei lafiñerun luágu Jesucristu lerédera richágu ligíbugiñe Búngiu. Ligía gíñe lébubei wafiñerun luágu Jesucristu, wagía le juríubei, lun gayáraabei lan weréderun richágu ligíbugiñe Búngiu lídaangiñe afíñeni le, máma lídaangiñe wadúgüni le lubeíbei lilúrudun Moisés, lugúndun úabei ni ában eréderuti richágu ligíbugiñe Búngiu lueígiñe ladúgüni le lubeíbei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucristu, ába waríjin luágu gafígoun méme wamá queísi ja mámabaña juríu ladúga wabágariduña lan gíñe guetó bougudi lueí lilúrudun Moisés, ¿gayáraati waríñagun lueígiñe líra luágu Cristu lan gafígoungüdüwaliwa? ¿Ni cátei líbe líra! ¹⁸ Lubáragiñe líra, lun jamúga wagíribudun lun wemenigidun luágu wagúnfulirun lúma lilúrudun Moisés lun wasálbarun lárigiñe wemenigidun luágurügü wafiñerun luágu Cristu, warúfuduñein luágu magúnfulirun wamá lúma linárün laníchigu lúrudu ligía, áni gafígountiwa. ¹⁹ Áu, queígubeirügü jiláadina lan lun lilúrudun Moisés, lúrudu méme ligía ouwedagüdübadina lun, lun gayára lan nabágaridun lun Búngiu. ²⁰ Rúguatina núngua quei jiláadina lun figou, dáwaguañu luágu gurúwa lúma Cristu. Mámaadina lubeíti áu méme abágaridubei nídaangua, Cristu abágaridubei nídan. Ibágarí le nabágaridubei lídan núgubu, nabágariduñein láu sun nafíñen luágu Liraú Búngiu le jínsiñejabúbei nun, ába ledéregeragun lúngua lun loúnwen nuágu. ²¹ Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun gürgia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Cristu.

Lúrudu ódi afíñeni

3

¹ ¿Jugúya Galáciana, magáambaditün gíñe! ¿Ca abíñaragubadün lun magáambun jubeí lan ugánu le inárünibei libúgürü wasálbarun? Lídan meja wapúrichijan jun, arúfuda wamúti laníchigu loúnwen Cristu luágu lugúruwan jun, furáangu. ² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafiñerun luágu le jagáambubei luágu Cristu? ³ ¿Ída líña ítara lubeí jumágaambadi? Gumésetün eíbuga lúma Cristu láu lubáfu Sífiri Sándu, ¿guetó jarítaguatün funági luágu buítimaabei lan jeíbugun lun jígiruni Sífiri Sándu lun jagúnfulirun lúma jagáburi juríu? ⁴ ¿Marúfudajaangili sun le jasúfurirubei jun? ¿Arúfudajaali lámuga jun! ⁵ Dan le líchuguni Búngiu láni Espíritu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeíbei lilúrudun Moisés ladúgei, ladúgünbalin lugúndun afíñe jumá luágu le jagáambubei luágu Liraú.

⁶ Jarítagua jumá luágu Abrahám. Rúlumuti meja sun lafiñen luágu Búngiu, luágu lafiñen, ába lerésibiruni Búngiu queísi ában wügúri richáguati. ⁷ Ligía lubeíti jugúya,

lúnti jasúbudiruni luágu ja lan affínebaña, jagía lan linébaanfaanbaña Abrahám tíma-tímaatiña. ⁸ Queísi subúdi lání Búngiu lubáramegiwa luágu ñíbaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafíñerun luágu Jesucrístu, ába laríñaguni ugánu buíti lun Abrahám lubáramegiwa, queísi bürúwañu lan tídan lilíburun. “Jabínirúaba sun gürígia ubouágu bídaangiñe.” ⁹ Ítara líña lubeíti, ja affínebaña, biníwatiña úara lúma Abrahám le affínerubei luágu Búngiu.

¹⁰ Ja affínerubaña luágu jasálbaruba lan láu jagúnfulirun lúma lilúrudun Moisés, buléiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürúwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.” ¹¹ Furánguti lubeíti luágu úa lan ni ában eréderuti richágu ligíbugiñe Búngiu luágu ladúgüni le laríñagubei lilúrudun Moisés, lugúndun taríñajare Lerérun Búngiu. “Láu lafíñerun gürígia luágu Búngiu lerédera richágu ligíbugiñe, ibíjaleíme ibágari magúmuchaditi.” ¹² Ánjein lilúrudun Moisés máma cátei lánina affíneni, lánina cátei le adügúwarügüti ladúga laríñajare lúrudu ligía. “Láu rügúñein jamúga lagúnfulirun gürígia láu sun igáburi lánina lúrudu le, libíjei ibágari magúmuchaditi.”

¹³ Wagía queísi gürígia garaúwarügütiña, mabáfutiwa lun wagúnfuliruni sun lúrudu ligía. Ába laséfuruniwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barú lumuti Crístu líñaragun Búngiu luóúgua wewéñagua lídan le loúnwenbei luágu gurúwa, lugúndun taríñajare Lerérun Búngiu. “Íñarawagúati sun le ádarawagúti luágu gurúwa.” ¹⁴ Adúga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun gíñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu waffínen.

Lilúrudun Moisés, lúma lerérun Búngiu lun Abrahám

¹⁵ Nidújeñu, níchiga ában jémpulu jun lídaangiñeti jabágari gürígia. Dan le ladúgün wügüri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun. ¹⁶ Ítara líña gíñe, rulumuti meja Búngiu lerérun lun Abrahám lúma lun linébaanfan. Maríñaguntu Lerérun Búngiu “binébaanfaangu”, camá jamuga jawáguti sarágu gürígia, taríñajare “lun binébaanfan”. Laníchigu líra, “ábanrügü gürígia”, le Crístu. ¹⁷ Niján le naríñagubei. Adúgati Búngiu ában darádu lúma Abrahám, ába lachoúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubeí lé meja ladúgübei Búngiu lúma Abrahám siñáti lagúluudúniwa láu ában lúrudu le ñúbinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga. ¹⁸ Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibei cátei ligía madúgünga ni cátei lun lagáñeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruniwa? Ñúbinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladúgúwa darádu ligía. Rulumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia. ²⁰ Ánjeinti dán meja le ladúgübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adúgübalin sun cátei.

Ca lan uágu njein lubeí lilúrudun Moisés

²¹ ¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²² Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi laríñagun Búngiu tídan Lerérun. “Sun gürígia lábugiñeñanu lubáfu figóu.” Ítara líña lun lídaangiñerügü lan afíñeni luágu Jesucrístu gayára lan jáfuridun gürígia lábugiñegiñe lubáfu figóu lun jeréderun richágu ligíbugiñe Búngiu láu jafíñen luágu Jesucrístu, queísi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴ Ába lubeíti lanúgüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí liábin Crístu lun dánme lan wafíñerun luágu, gayáraajalíme weréderun richágu ligíbugiñe Búngiu. ²⁵ Guetóti, quei chúlújali lubeí Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Crístu, lídaañadün ában lúma. ²⁷ Sun jugúya le belújalíbei lídoun ában lúma Crístu láu jabásterun, ibíjaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügüri o wúri, ladúga láu lídaañadün lan ában lúma Crístu Jesús, sun jugúya ábanrügüñadün. ²⁹ Ánjein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám queí jalágaante.

4

¹ Niján cátei le nabúseerúbei naríñagun. Dan le loúnwen ában úguchili áni ñúraügili liraú le lúnbei lerésibiruni alágan, mabuíduntimaati dan lun irájü ligía sügü jáu lumúsuniña lúguchi, láu sun ligía lan labúremebei alágan, ladúga siñágili lan layúsuruni. ² Añájein gürígia oúnigiruti, aríja jagía láu lalágaante darí lachúlürün dan le líridubei lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu ubouágun, lábugiñeñadiwa meja lúrudu lúma buri igáburi le mámabei lúnti ladúrarun lun sun dan. ⁴ Dan le lagúnfulirunbei dan, ába loúnajani Búngiu Liraú, le agúriajoubei tídaangiñe ában wúri, ába liábin quei juríu lábugiñe lilúrudun Moisés. ⁵ Liábinbei ítara lun laságaruniwa lábugiñegiñe lúrudu ligía, lun lerésibiruniwa Búngiu queísi lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraú Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!” ⁷ Lirájüñü lubeíti Búngiu wagía, mámaadiwa idámuni, áni ladúga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afíñebaña

⁸ Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹ Ánjein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu —¿ída lubáyan gayára lan jarítangun lúnya jíchaagun júngua queísi idámuni lábugiñoun lúrudu lúma buri igáburi le mabáfubei lun ladúgün ni cáta jun? ¹⁰ Adáaguatün buri fédu ítaga wéyu, ítaga játi, ítaga dan, ítaga irúmu queísi laríñaguni lilúrudun Moisés lun jeréderun richágu ligíbugiñe Búngiu, lídan jarítangun. ¹¹ Janúfudetina lueí masériwidun lan wadágimanu le nadúgübei jagánagua lun ni cáta.

¹² Nidújeñu, ayúmuraguatina jun lun jarítangun queísi áu luágu buri cátei le, ladúga furíjadina lun mámaadina lan lábugiñe lilúrudun Moisés queísi meja mámaañadün lan lábugiñe lúrudu ligía. Madúgüntün ni ában wuríbani nun lídan meja júma nan, ¹³ quei subúdi jumáni, ladúga meja ában sándi le nuágubei gayára lubeí neréderun júma

furúmiñeti dan lun napúrichijani ugánu lánina asálbaruni jun. ¹⁴ Sándi ligía lé meja nuágubei, ában meja ouchúni nun, múnabunti janúgünina luágu líra. Lubáragiñe líra, ába jerésibirunina queísi ában láni Búngiu ánjeli, camá jamuga Jesucrístu guánarügü áu. ¹⁵ ¿Ca susébebei lun ugúndani lé meja jasándirubei náu? Gayáraati naríñagun luágu jáni fuleísei luágu ánjein lan jamúga meja lúnti, jaságaruñein lan jamúga jágu lun jíchuguni nun. ¹⁶ Guetó, ¿jáganijadina funági lueígiñerügü naríñaguni inárüni jun?

¹⁷ Weíriti juwámaan joun mútu ja, mabuídunti jarítangun jubá. Le jabúseerubei, lun jadísedagüdünün waweí lun ában lánme jawámaadun jun. ¹⁸ Buíti lun juwámadirun joun ámu, ñi áu yebe júma o úaadina lan júma, ánjein láu lubei lubuídun arítangun ladügúwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Crístu jídan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le laríñagubei lilúrudun Moisés? ²² Laríñajare luágu garájüñü lán meja Abrahám bián irájüñü, ában táu lidámun, le ában táu lúmari to ában wúri to máma idámuni. ²³ Le tiraú idámuni, ítara líña lagúriajóun quei jagúriajóun sun irájüñü, ánjein le tiraú to máma idámuni, lagúriajóun lun lagúnfuliruba lan le uágubei laríñaga Búngiu lun Abrahám. ²⁴ Ítara líña cátei le queísi ában jémpulu. Bián wúriña ja, ítara jáña queísi bián darádu le ladúgübei Búngiu. Adúgati ában darádu lúma Moisés dan le líchugunbalin lilúrudun lun luágu wúbü Sinaí. Darádu ligía, ítara líña queísi Agár ladúga sun lan gürígia ja lábugiñebaña lúrudu ligía idámuni lun jagúnfulirun lúma, queísi idámuni jamá sun tirájüñü Agár. ²⁵ Wúbü le Sinaí lídaañein fulásu le gíribei Arábia (le ñí lubei jagánoua ladúgawagun tiraú Agár). Agár liyáwaboun wúbü ligía lúma lúrudu le íchugúbei ñi. Ubúru le Jerusalén le guetóbei, ítara líña quei wúbü Sinaí lídan dan le sügújalibei, ladúga ubúru le ligía jáu sun lílana, ítara jáña quei idámuni lun igáburi lánina lilúrudun Moisés. ²⁶ Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía. ²⁷ Taríñajare Lerérun Búngiu.

Gúndaaguabá, wúri maraújeitu, amúrü to maraúboun,
wáguabá láu ugúndani, amúrü to ibídiñebei agáriduni bun,
lugúndun amúrü to áuboun mebéresenwa lan, gíbetimaabaña birájüñü
sügú táu wúri to garaúboun láu búmari.

²⁸ Nidújeñu, queísigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladúgawagunbaña Abrahám ja uágubaña laríñaga Búngiu lun. ²⁹ Ítara quei meja dan ligía, isáani le agúriajóubei lídan ában igáburi quei furúmiegurügü agúriajóuni eíbaaja lumúti meja isáani le agúriajóubei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eíbaaja jamútiña ja mámabaña lábugiñe lúrudu ligía. ³⁰ ¿Cáteisán taríñagunbei Lerérun Búngiu? Taríñajare. “Bugáboun idámuni láu sun tiraú, lugúndun siñáti gafánran lan tiraú idámuni lídan alágan lúma tiraú to mámaboun idámuni.” ³¹ Nidújeñu, mítaraantiwa lubeíti quei tirájüñü idámuni, ítara wáña quei tirájüñü wúri to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburi. Reídei jumá lubeíti le ñí lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³ Naríñagayaali lun furúmieguarügü wügúri le resíbinbalin circuncisión luágu lúnti lan ladúgüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágu richágu jumá ligíbugiñe Búngiu láu jagúnfulirun lúma lilúrudun Moisés, ígira jumáali Crístu, díseedün lueí asálbaruni le láurügüti lareíni Búngiu. ⁵ Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesús, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun güriña wáledi.

⁷ Buíti meja jeíbugun lúma Crístu, ¿ca ígiragüdübalin lagaambúniwa inárüni jun? ⁸ Máma Búngiu le agúarubei jun adúgübalin líra. ⁹ Mabúlieida jumeí luágu furése lan lawáraüdagun arúfudajani le maríchatí lun lagúnrinchaguni jafíñen sarágu güriña queísigubeirügü resígüda lánun murúsun ísi sun to añóundawaguboun láu. ¹⁰ Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteiñein lan güriña le añáwuriabei jun, labeíchubei Búngiu.

¹¹ Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügúriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágu gurúwa joun. ¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, ¿gúndaatina jamúga lun jíbugunun jawáriu gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manúga jumeírügü liñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúnfulirun lúma lúrudu le aríñagubei. “Ínsiñelá güriña bíledi bun queísi bísiñegua búngua”, gúnfulijadün láu sun lilúrudun Moisés. ¹⁵ Góunigi jumá, ánjaün ageíndagua júmagua, jagúmuchaguagüdüba júniwagua.

Ugúndani le lánina ubou, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubou. ¹⁷ Ugúndani le lánina ubou máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubou. Gáganiguati ában lúma le ában, ligía lásíñerunbei jadúgüni jugúya cátei le jabúseerúbei yebe jadúgün. ¹⁸ Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

¹⁹ Ménreengúnti larijiniwa cátei lán buri cátei le jadúgübei ja afálarubalin ugúndani lánina ubou. Gámariguatiña jámagua mamáriedunga, adáaguatiña buri cátei wíyeti, úati nibúsigari jamá láu jasálufurin, ²⁰ judúguatiña joun sándu, abíñaraja jagía. Níjein iyéreejabuni jádan, gáganiguaü, lúma eméendüni. Ménreengúnti jagáñidun, jawougua rügúñein jarítagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Naríñaguñein jun quei naríñaguni lubáramegiwa luágu ja lan adúgübalin cátei le, mebélurunbaña lídoun larúejan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni, ²³ manáanguni únguauü, ragúguauü únguauü. Úaraguati buri igáburi le lúma furúmieguarügü lúrudu. ²⁴ Ja lánigubaña Crístu,

dágua jamáali sun luwámaan cátei le lánina uboú le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti gíñe wígirun lun labúguruniwa Sífiri Sándu lídan le wadúgübei.

²⁶ Moún lumuti wanáangun woúngua, añáwuriwatiwa joun wíbirigu ítara, rúti gíñe gimúgaü wádaangua.

6

Íderagua jumá júmawagua

¹ Nidújeñu, ánjaün aríja luágu áburujaali lan ában jídaangiñe lídoun figoú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figoú ligía, adúga jumeí láu maweíriguni. Lúnti gíñe goúnigigua jumá júngua lueí gíñe jáburujan lídoun figoú queísi ligía. ² Ídaragua jumá júmawagua lun jawánduni jijúrügu, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wíderaguniña wíbirigu lugúndun ánjein anáangua güriquia lúngua áni ni cáta ligía, leyéedagua lúngua. ⁴ Cáda ában güriquia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu, ⁵ lugúndun sun güriquia geféenbaña lun Búngiu jawoúgua, máma jawágu ámu.

⁶ Le únbei larúfudajoúa Lerérun Búngiu lúnti lafánreinjani sun luwúyeri ibíjini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei güriquia, ligíaba gíñe lalúbaja. ⁸ Ánjein ábunagua ában güriquia cátei le íchugubei ugúndani le lánina uboú lun, le méme lábunagubei, líchuguba ában alúbajani le lánina féridi lun. Ánjein ábunagua ában güriquia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina ibágarí magúmuchaditi lun. ⁹ Moún lumuti lubeíti labúchadun wawágu adúgei cátei le buídubei, lugúndun ánjawa ítara méme adúgei, walúbajaba buíti dánme le lachúlürün dan lun werésibiruni. ¹⁰ Ligía, adúga wameí lubeí le buídubei joun súnigubei ságü gayára lan, joúntima wadújeñu lueígiñe Crístu.

Ewéridijani lúma lagúmujoún ayóuraguni

¹¹ Aríja jumá luweínamu létera le áubei nabúrüja jun guetó láu nújabu guánarügü. ¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadúgüñein lúnügü jeréderun buídu jagíbugiñe juríu, lun meíbaajoúniwa jamá lueígiñe jamúga jaríñagun luágu lídaangiñe rügüñein lan loúnwen Crístu wasálbara.

¹³ Ni ja íchaagubaña joúngua lábugiñoun igáburi le lánina circuncisión, madúgün jamúti sun le laríñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina uboú nun áni jiláañu níña gíñe lun cátei le lánina uboú! ¹⁵ Lun Búngiu, ni cáta ánjein ibíja wabálin circuncisión lúmoun mibíjin wamáni, le busénwabei, lun iséri wamá güriquia. ¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudémejabu lúmagiñe.

¹⁷ Lúmagiñe dan le ugúñe, mabúseerúntina lun nibíjin lénreengúnga ni ca úmagiñe. Arúfuda lumúti lárigi buri bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílaün Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labúrïjan Páblo joun tílana ligílisi to Éfesoboun

¹ Anája áu Páblo, le lání Jesucrístu apóstolu láu lugúndan Búngiu, nabúrïjañoun gárada to jun, jugúya le lánigubei Búngiu ja afiñebaña luágu Crístu Jesúsu lídan ubúrugú le Éfeso. ² Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe.

Abíniruni le wánibei lugúndun lídan wamá ában lúma Jesucrístu

³ Rúwama uweírighuni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴ Lubáragiñebeí meja ladúgüni Búngiu ubou, anúadira lumútiwa lun lánigubadiwa lan láu le lúnbei ladúgüni Crístu wawágu, lun weréderun madúnrunga ligíbugiñe, derégeguñu woúngua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladúga ligía lan lugúndaanbei woun. ⁶ Ligía súnwandan lubeí wíchugun uweírighuni lun Búngiu luágu luweírín lareíni le áubei labínirawa dan le lídan wamá ában lúma Liraú le jínsiñebeí lun. ⁷ Láu luweírín lareíni Búngiu, sálba láadiwa láu líta Liraú le áwiyurubei wawágu dan le loúnwenbei luágu gurúwa, ferúdnaleí wafígoun. ⁸ Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun, ⁹ subúdigüda láali layúmajan lé meja arámudaguabei woun, o arítaguni lan le lasáminarubei ladúgün. ¹⁰ Según arítaguni le, le lúnbei lagúnfulirun quei lubúdubu dánme le lachúllürün lidáni, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le ubouagubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adúgübalin sun cátei quei labúseeruni. ¹² Anúadira lumútiwa lun wabágaridun, wagiá le afiñebeí luágu Crístu furúmiñe, lun liñurúniwa líri Búngiu luágu luweírighun. ¹³ Jugúya gíñe, dan le jagáambunbalin ugánu le lánina inárüni—ugánu le anúgübalin asálbaruni jun—ába jafínerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun. ¹⁴ Sífiri Sándu ligía ában lichoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruniwa, wagiá le lánigubei, lun liñurúniwa líri luágu luweírighun.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubeí nagáambunbei luágu afiñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagun juágu lídan nayúmuragun lun. ¹⁷ Amúriajatina lúma Lubúngiute Wabúreme Jesucrístu, Úguchili Weírighuti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu. ¹⁸ Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírighun lúma lirísín alágan le líchugubei Búngiu joun lánigu. ¹⁹ Amúriajatina gíñe lúma lun lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagiá le afiñebeí luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe ouweni, ába lañúuragüdüni lueígiñe loúnwenren yágüta siélu. ²¹ Rulumuti loúgiñe sun gumádi, ubáfu, érei lúma arúejani lé buri siélubei, lúma loúgiñe sun le gayáraabei liridún,

dáandu lídan dan le queísi lídan le lúnbei líabin. ²² Rúlumuti sun cátei lábun lubáfu Crístu, rúlei gíne Crístu guánarügü lun ligíaba lan ichúgüdinaü joun sun güriquia ja lánigubaña, ja gíribaña lilígilisin. ²³ Güriquia jagía, ja méme lúgububaña Crístu, buin jáña láu libágari Crístu (láu lubáfu lání Espíritu), áni Crístu guánarügü adúgübalin sun catei áni ágüdañaleí.

2

Sálbaadiwa láu lareíni Búngiu

¹ Rújali Búngiu ibágari magúmuchaditi jun úara lúma Crístu le lásaaragüdübei lídaangiñe ouweni, láu sún meja jiláñugidün lan lun cátei le luáguti Búngiu, lurúma wuríbani lúma figoú buri le gádaanbalün. ² Lídan meja dan ligía, falá jumuti lání uboú le jémpulu, adúgei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja gíne wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi güriquia garaúwarügütiña. Ligía lúnti lubeí yebe láburuhan lanárime ligáñi Búngiu wawágun queísi ja jíbiri. ⁴ Weíríti lugúdemejabu Búngiu, ⁵ ába larúfuduni luweírín línshiñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáraruni lubéneri ibágari magúmuchaditi woun láu lásaaragüdüni Crístu lídaangiñe ouweni. Sálbatiwa lubeíti láu lareíni Búngiu. ⁶ Sarágüda lumútiwa gíne Búngiu lídaangiñe ouweni lánina figoú láu lásaaragüdüni Crístu lídaangiñe ouweni, ába líchuguni wabára woun lúma Crístu yágüta siélu, lúma uweíríguni lánina ubáraü ligía. ⁷ Ladúgünbalin líra lun larúfuduni luweírín wínsiñe lun lúma lareíni woun lídan Crístu Jesúsu lídounme dan le lúnbei líabin. ⁸ Sálbawádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adúgübalin, Búngiu íchugubalin wasálbarun woun. ⁹ Máma lídaangiñeti cátei le jamúga ladúga mútu, lun úa lan ni ában apántajati lueígiñe. ¹⁰ Lugúndun Búngiu adúgübaliwa, iséri güriquia wagía lídan Crístu Jesúsu lun wadúgün cátei buíti, quei larítaguni lúmagiñe bináru.

Waráandarun lúma Búngiu lídaangiñe Crístu

¹¹ Jarítagua jumá lubeíti luágu ída jíña lán meja furúmiñe. Máma meja lídaangiñetün jarásan juríu, ligía lébubei güriquia ja juríu, ja erésibirubalin circuncisión, ába jagúarunün, “güriquia ja merésibirubalin circuncisión”, o güriquia ja mámabaña lánigu Búngiu. ¹² Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, boúgudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja uboúagu meménigiga, ibídiñega Búngiu le inárütibeí jun. ¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴ Barú laadiwa Crístu lídoun aráandaruni, ladúga adúga láaña juríu jáma ja mámabaña juríu lun ában méme jamá mútu, güríngua lumúti gáganiguaü lé meja afánreinragubaliña. ¹⁵ Gumúguagüda lumúti cátei le lilúrudun Moisés láu sún buri gumádi lánina lúrudu ligía láu loúnwen, adúgeina láña juríu jáma ja mámabaña juríu lun ában mémebaña lan lídan. Ítara líña ladúgüni aráandaruni wádaangua. ¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña biángubei lúma Búngiu, adúgeina láña biángubei lun ábanrügü lan mútu—lumútuniña Búngiu jagía.

¹⁷ Núbinti Crístu, ába lapúrichijani ugánu buíti luáguti aráandaruni lúma Búngiu joun sun güriquia, dáandu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu.

¹⁹ Ligía mámaadün lubeí teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya. ²⁰ Sun wagía affñetiña, dándu juríu quei máma juríu, ítara wáña quei ában ligílisi to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dúbü le weírigutimaabei lídan ébuu ligía. ²¹ Luágu ébuu ligía le Crístubei tiñúrawagua múna tugúya (wagía affñetiña), aráanseñu sun tumégeggun buídu darí lun tiábin lun ában tan ligílisi to derégewatu lun Crístu, to gíñe lídaantu ában lúma. Ítara wáña wagía le affñebei luágu Crístu. ²² Ítara líña lubeíti, jugúya gíñe le mámabei juríu, lídaañadün ában lúma Crístu, oúndaraguatün jáma súngebui ja jíbiri lun wayábin sun wagía lun ítara wamá quei ában múna to ní lubei lagánawa Búngiu láu lání Espíritu.

3

Luwádigimari Páblo lun lapúrichijan luágu Crístu joun ja mámabaña juríu

¹ Ligía lébubei nayúmragun, áu Páblo, lun Búngiu juágu. Daúwañu níña lueígiñe luwádigimari Crístu le adúga náalibei jagánagua, jugúya le mámabei juríu. ² Mósu subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei. ³ Queísi nabúrújan jun, adúga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴ Láu jalíjani le nabúrújabei, jasúbudirubei luágu gunfaráanda náni laráansejan Búngiu luágu Crístu, lé meja ligíarügúbei asúbudirei. ⁵ Masúbudirawagüdúnti aráansejani ligía lun ni ában lídan meja dan le sügújalibei, ánjeinti guetó, láu lubáfu Sífiri Sándu, arúfuda láali Búngiu joun lání apóstolugu jáma profétagu ja derégeguabaña jóungua lun le gumúti. ⁶ Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷ Fuleísei láadina Búngiu láu líchugunina lun napúrichijani ugánu ligía láu lubáfu, laú sun madúna náni yebe fuleísei ligía. ⁸ Únabutimaatina sügú láu le únabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírin jarísín lídan Crístu le mébejabei. ⁹ Rúlaadina Búngiu, le adúgübalin sun cátei, lun nafúraanguagüdüni joun sun gürígia ída líña lan lanúgün aráansejani ligía lé meja arámudaguabei fulásu. ¹⁰ Arámudaguati meja aráansejani ligía lun guetó lan gayára lan jayábin sun lání Búngiu ánjeligu ja arúeijabaña siélu lun jasúbudiruni lichú láu Búngiu lídan sun luwúyerigu jádaangiñe affñetiña, ja lilígilisinbaña Crístu. ¹¹ Úraguati sun le lúma larítagun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹² Lídaangiñe Crístu, gayáraati wayárafadun lun Búngiu láu eménigini le líchugubei waffñen luágu Jesucrístu woun. ¹³ Ligía nayúmragunbei jun lun máburujan lan jarúna lueígiñe le nasúfurirubei juágu, lugúndun weírirügüti cátei líra jun.

Línsiñejabu Crístu

¹⁴ Ligía lubeíti lébubei nájuduragun ligíbugiñe Lúguchi Wabúreme Jesucrístu, ¹⁵ le Jáguchibei sun lufámilian Búngiu ubouágu lúma siélu. ¹⁶ Amúriajatina lúma Búngiu lun líchugun érei lúma ubáfu jun según luweírin ubáfu le lúmabei, lun jídin jubáruaguóun láu Sífiri Sándu le jídaanbei. ¹⁷ Amúriajatina gíñe lúma lun jíchugun fulásu tídan janígi lun laganóun Crístu ní, láu sun jaffñen luágu, ¹⁸ lun gíñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígifen, lujúlilin lúma líñun línsiñejabu Crístu buídu, jáma sun jíbiri affñetiña. ¹⁹ Amúriajatina lubeíti lun jasúbudiruni ínsiñejabuni le, le weírítimaabei lueí sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladúgün gíbe sügü láu le wamúriajabei o le lan wasáminarubei, láu lubáfu le ñadágimeinbei wádan. ²¹ ¡Arijúalá luweírigun Búngiu lídaangiñe sun le ladúgübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

¹ Ladúga sun le adúga lálalibei Búngiu jun, ligía namúriajabei júma, áu le adaürúbei lueígiñe luwádigimari Crístu, lun jouseragun júngua quei lúnti lan jadúgüni ja únbaña wájali lan Búngiu lun lánigu jamá quei lagúarun jun. ² Únabugu jumá, jínsiñejabu, gagúraasun jumá, areída jugúyame joun jíbiri. ³ Joucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü júmagua, ítara lúba lídaanbadün lan ában súnwandan. ⁴ Lúnti wanáangun woúngua lídan ában, lúma jáma jíbiri lánigu Búngiu ladúga lumégegün lan ában méme úgubu le gírubei lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe. ⁵ Ligía méme Abúremein Wabúreme súngebui, ligía méme wafíñen luágu Jesucrístu, badíseitiwa sun wagía lídan líri Abúremein ligía. ⁶ Ában rügúñein Búngiu Jáguchi súngebui, jougiñeñein súngebui, ñadágimeinti jáu súngebui, áni níjein jádan súngebui.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun. ⁸ Ligía laríñawagunbei tídan Lerérün Búngiu luágu Crístu.

Múdeiti siélun barúina láña adaürútiña lúmagua, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei uboúagu. ¹⁰ Crístu le arárirubei lun uboúagun, ligía méme gíñe le amúdeirubei lídoun líñun-ágei siélu láu sun luweírigun lun labuínchagüdüni súngebui láu guánarügü. ¹¹ Ába líchugun ubáfu lun cáda ában jádaangiñe affíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibeí ugánu ligía, jíbiri lun jafádirijan lúma lun jarúfudajani Lerérün Búngiu. ¹² Ítara líña laráanseruniña lánigu lun gayáraabei lan jesériwiduni buídu, ¹³ lun jedérebudagüdüniña jíbiri lídan Crístu daríme wachúlürün sun wagía lun lídan wamá ában lídan wafíñen luágu Jesucrístu, le Liraú Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴ Mítaraanjádiwame quei irájüñü lun ménreengun lan wasáansijan lun ladúurujaniwa ligárabalin furúmieguaügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janúgüniwa lídoun úma le maríchabei. ¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichúgüdünaübei joun sun lánigu ja gírubaña lúgubu. ¹⁶ Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun súngebui lídan weíbugun lúma Crístu, awáanse wagíame lídan ínsiñeni.

Iséri ibágari lídan Crístu

¹⁷ Niján lubeíti cátei le naríñagubei jun lídan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úragua lúma jasáminan le málabei. ¹⁸ Darúgu líña láu jasáminan, úati ibágari le ñúbinbei lúmagiñe Búngiu jádan lugúndun ibídiñeti ni cáta joun lurúma tidére janígi. ¹⁹ Féridi jamáali jabúsigari, derégeguaaña jóungua lun wuríbani, adúgatiña sun luwúyeri iwíyei láu ugúndani.

²⁰ Ánjeinti jugúya, máma líña jafúnrendeirun lúmagiñe Crístu, ²¹ ladúga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun.

²² Ánjeinti luágu binádu ligáburi jabágaridun, arúfudajoúati jun lun jígiruni binádu meja jigáburi le mabuídunjalibei láu jagúnfulirun lúma luríban ayúmajani le gayéeraguadibei,

²³ arúfudajoúati jun lun iséri jumá lídan jáni espíritu lúma lídan jisáminan, ²⁴ lun iséri lan jigáburi, buíduñu, jarúmañu le gumúti queísi ligáburi Búngiu.

²⁵ Ligía jebé lubei jayéejan, adímureja jumeí inárüni jáma jíbiriugu lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina afígoujani, moún lumuti gíñe jálüdün sarágu dan arítagua luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagúriaragun lúngua, lun gíñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, íbija jagíame abíniruni lídaangiñe jerérun. ³⁰ Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachúlürün wéyu lun jasálbarun le gumúti.

³¹ Ígira jumeí sun magúndani, sun iyéeejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferú-dunagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburi jabágaridun lirájüñü Búngiu

¹ Quei lirájüñü jubeí Búngiu ja jínsiñetiña lun, jóucha jumá lun ítara lan jigáburi quei ligáburi. ² Jínsiñegua jumá júniwagua ítara quei wínsiñedun lun Crístu, ába ledéregeragun lúngua wawágu queísi ában mudún le adágarawagüdüti lun Búngiu. Ítara líña línsiñejabu Crístu woun queísi cupáli le buíti líjeme, le águdajoúbei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu. ⁴ Mawíyelá jiyúma, maríñagun jugúyame libí-diouniga áu, ni dimúrei málati, ladúga mabuídunti buri cátei le. Lubáragiñe jadímurejan cátei líbeina líra, yúsu jumeí jiyúma lun jíchugun eteíngiruni lun Búngiu. ⁵ Subúdi jumúti luágu le lan agámariduti mamárieidunga, o ladúgün lán buri cátei wíyetei, o labágaridun lídan luweínamu águu—le queísigubeirügübei lanúgüni irisini lisándunme —siñáti gafánran lan lídan jarúeijan Crístu lúma Búngiu. ⁶ Mayéedagualaún ni ában láu lagúbüri buri dimúrei, lugúndun ladúga buri cátei wuríbati le, láburuja lanárime ligáñi Búngiu jawágun ja magáambadibaña lun. ⁷ Dírei jumá jaweí jíbe gürígia jára.

⁸ Lídaañadün meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi gürígia ja eíbugubaña lídan larúgounga. ⁹ Gürígia jagía, areídatiña, surúti jabágarí, jínsiñeti inárüni joun.

¹⁰ Jóucha jumá jafúnrendeiruni ca lan jínsiñebeí lun Wabúreme. ¹¹ Mádanlaún buri cátei málati le jadúgübei ja lánigubaña lubúriga, sagárügü jumeí lídoun larúgounga láu lubuídun jigáburi. ¹² Rúti busíganu íbini lun ladímurejoúniwa luágu buri cátei le jadúgübei arámudaguarügü, ¹³ dan le larúfuduni larúgounga luágu wuríba lan jagáburi, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴ Ligía laríñawagúnbei.

Agáguduabá, bugúya le arúmugubei,
sarába jádaangiñe jiláaña,
ábame larúgoungadágüdü Crístu báu.

¹⁵ Toúnigi jumá lubeíti buídu ída líña lan jóuserun. Mabágarida jumá quei ibídiougu táu, jabágarida quei chu táu. ¹⁶ Yúsu jumeí jidáani lídan cátei buíti, lugúndun níjein

sarágu wuríbani lídoun buri dan le. ¹⁷ Ligía mabídiouniga lubeí jáu, jóucha jumá gunfaráanda jumáni ca lan lugúndaanbei Wabúreme. ¹⁸ Mabácharuada jumá, lugúndun barú lumútiña líra gürígia lídoun féridi, lubáragiñe líra, buínjuma láu Sífiri Sándu. ¹⁹ Adímureja jumá júmagua luágu luweírigun Búngiu, erémuja jumá luágu, jerémuja táu sun janígi lun Wabúreme. ²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburi le lúnbei wagáburiduni jáma ja wábiñebaña

²¹ Derégegua jumá júniwagua, ítara líba jarúfuduni linében Crístu jun.

²² Lúnti derégeguñu tan wúri túngua lun túmari quei lun Wabúreme Jesucrístu, ²³ lugúndun wügúri tichúgüdinabei lúmari ítara quei Crístu lan tichúgüdinabei lilígilisin. Crístu gíñe Jasálbaragülebei gürígia ja gíribaña lilígilisin, ja méme gíñe gíribaña lúgubu Crístu. ²⁴ Ítara quei jagáambadi afíñetiña lun Crístu, ítara líña giñe lúnti lan gagáambadi jamá wúriña joun jámarigu lídan sun cátei.

²⁵ Jínsiñetá lúmari wügúri lun quei luweírín wínsiñe lun Crístu, wagía le lilígilisin, ába líchuguni libágari wawágu. ²⁶ Ladúgünbalin líra lun larúmadagüdüniwa lídaangiñe le binádubei láu wabásterun lúma gíñe láu lerérun, ²⁷ lun larúfuduniwa ligíbugiñe queísi ában wúri to ayarafaduboun lun túmari—buídumeraütü, jarúmañu, aráanseñu, ni cáta mégeiti tuágu, ában wúri derégüdaguatü, úaraguatü. ²⁸ Ítara líña lúnti lan tínsiñedun lúmari wügúri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladúga ábanjali lan láu jágubu. ²⁹ Úati gürígia mebéresenti láu lúgubu guánarügü, jóügüdarügü lumúti, toúnigileí. Ítara líña gíñe ladúga Crístu tun lilígilisin, ³⁰ ladúga lúgubu tan, áni wagía líbiri úgubu ligía, ábanjadiwa lúma. ³¹ Laríñajare tídan Lerérun Búngiu. “Ligía lígirubei lubeí wügúri lúguchi túma lúguchu lun lamáriedun túma lúmari, ábame jayábin jagía biángubei lun camá jamá ábanrügü.” ³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúradagun Crístu jáma lánigu ja gíribaña lilígilisin. ³³ Laríñaguña gíñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun gíñe inébe lan túmari wúri tun.

6

¹ Isáanigu, le lúnbei jadúgüni queísi afíñetiña lun gagáambadi jumá joun jagúbürigu, lugúndun ligía richábei. ² Niján ában gumádi weírüti lídaangiñe ligúmadin Búngiu le anúgübei buíti woun láu wagúnfuliruni. “Inébelá búguchi túma búguchu bun lun buídu lan dan bun, ³ gabágari amúrúme migífe ya uboúagu.”

⁴ Jugúya agúbürigu, magáñidagüda jumáña jisáanigu, agúriajarügü jumáña buídu lun gagáambadi jamá, arúfudajeina joun lun jafíñerun luágu Wabúreme.

⁵ Músu, gagáambadi jumá joun jiyúbudirigu ya uboúagu láu inébesi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶ Seríwi jumáña buídu, mámarügü dan le aríagu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Crístu, adúgeina lugúndan Búngiu táu sun janígi. ⁷ Adúga jumeí juwádigimari láu ugúndani, camá jamuga lun Wabúreme jadúgei máma joun gürígia, ⁸ ladúga subúdi jumáli luágu cáda lan ában jídaangiñe, dándü idámuni quei máma idámuni, lafáyeirubei Wabúreme según buíti le ladúgübei.

⁹ Jugúya iyúbudirigu, buídulá gíñe jóuseruniña jumúsuniña, masíadira jumáña. Jarítagua jumá luágu dándü lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanúgüniña Búngiu sun gürígia.

Cátei lé buri áubei wageíndagua lúma Máfia

¹⁰ Guetóti nidújeñu, jére jumá lídaañu ában lúma Wabúreme, láu lére le gabáfubei. ¹¹ Daújumoun sun daúguaü to líchuguboun Búngiu joun sun lánigu lun derégüdagu jumá lueí leyéedagunün Máfia. ¹² Lugúndun máma jáma gürígia ja láutiña úgürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan ubou le wageíndagua. ¹³ Ligía ragújumoun lubeí sun daúguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴ Derégüdagu jumá lubeíti, daúgu táu láni Búngiu daúguaü queísi ában lisúdaaran. Daúgua jumá láu inárüni queísi láu ában béliti le gürágu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súaara. ¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súaara dan le ladáürunun lisábadun. ¹⁶ Lougiñe sun cátei, barújumei jafíñen quei lárügüdüni súaara cátei láuti gürábu ligíbugiñe, lun jaráramunun sun gimára durúnguatú to lachúüjaboun Máfia juágun. ¹⁷ Barújumei jeménigidun luágu jasálbarun quei ladáüruni súaara lubúnidin lun latoúnigiruni lábulugu, barú jumeíme Lerérun Búngiu quei efeín to líchuguboun Sífiri Sándu jun. ¹⁸ Adúga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun giñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mámbaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebei nadaürúwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadúgübei. ²² Ligía noúnajaanbalin jun lun laríñaguni jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu afíñeni jun, wadújeñu lueígiñe Jesucrístu, ²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labúrrijan Páblo furísunrugugiñe joun títana ligílisi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabúrrijañoun gárada to jun, sun jugúya fádirigu jáma esériwidutiña ligílisirugu ja ubúrugubaña Filípos, jáma jíbiri lánigu Búngiu ja lídaañabaña giñe ában lúma Crístu Jesúsu. ² Binílaün Wáguchi Búngiu lúma Wabúreme Jesucrístu, ibíja jumá giñe darángilau jámagiñe.

Layúmuragun Páblo jawágu afñetiña

³ Ságü narítangun juágu neteingiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítangun luágu luweírin jíderangunina abúruchaguagüdei ugánu le lánina asálbaruni lúmagiñe wéyu le jagáambubalin chúlú lúmoun wéyu le ugúñebei. ⁶ Choúru numúti luágu Búngiu lan le agúmeserubei adúgei lubuídun luwádigimari jídan, lasígira mémeba lan adúgei daríme wéyu le liábingüle Jesucrístu. ⁷ Richáti lun narítangun juágu ítara lugúndun weíriri jínsiñe nun, lugúndun giñe gafánran jumá lídan abíniruni le nánibebei dan le furísunrugunadina lan luágu nesériwidun lun Crístu, o dan lan le naráramun ligíbugiñe lúru lu nadímurejan lueígiñe loubadina ugánu le lánina asálbaruni lun nachoururuni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweíridun jínsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában ibágarí jarúmati, madúnrun jumámuga dánme liábin Crístu. ¹¹ Amúriajatina lúma Búngiu lun buin jumá láu lubuídun igáburi, láu lubáfu Jesucrístu le jídaanbei, lun líchugúniwa uweíriguni lun Búngiu luágu.

Crístu ibágaribebei nun

¹² Nidújeñu, buséntina jasúbudiruni luágu cátei lán buri le suséelibebei nun, ñúbinjali lídan linárün lun líderagun lídan lapúrichijoún ugánu le lánina asálbaruni. ¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürúña lan lueígiñe nesériwidun lun Crístu. ¹⁴ Játi jíbiri idújeñu, láu jaríjin luágu nadaürúña lan lueígiñe napúrichijani ugánu luágu Crístu, ragújaña anígi lun japúrichijani méme ugánu ligía manúfudeiga, láutima afñeni luágu Crístu.

¹⁵ Inárüni luágu añájein lan adímurejatiña luágu Crístu ladúga jagímugan, busén jagía janúgüniña gürígia jánigume. Ánjaña jíbiri, japúrichijan luágu Crístu láu lubuídun arítangun. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürúña lan. ¹⁷ Ánjaña ja jíbiri, máma láu janárün japúrichija, lun jarijiniwa weírigu jadúgei, lúma lun jíchugun líbe samínaü nun guetó le nadaürúña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba giñe, ¹⁹ lugúndun subúdi numúti luágu buídubei lan nasálirun lídan sun cátei le, ladúga jayúmuragun lun Búngiu nuágu lúma ladúga líderangunina láni Jesucrístu Espiritu. ²⁰ Cátei le nabúseerubei lúma le nagúrabubei, lun madúgün nan ni cáta lun jamúga nanúgün busíganu luágu, gayáaarügü lámuga nadímurejan manúfudeiga, arijúa mémetima lámuga luweírigun Crístu nuágu guetó quei súnwandan, wínwañu áu yebe, jiláñu áu yebe. ²¹ Lugúndun ánjana abágarida méme, lúnba Crístu nabágarida, ánjana ouwe, buítimaabei nun lugúndun lúmounbadina Crístu. ²² Ánjein gayára lubei nasígirun ñadágimein luágu láni nabúreme Crístu fuleísei láu nasígirun

abágarida, ibídiñeti nun ca lan buítimaabei, ánjein lun lubeí nasígirun wínwañu ódi lun noúnwen. ²³ Jénreenguti nun lun nanúadajan lídan bián cátei le. lídan ában oúbaü, buséntina jamúga noúnwen lun nídin erédera lúma Crístu, lugúndun buítimaati jamúga líra nun, ²⁴ lídan le ában oúbaü, buítimaati jun lun nasígirun abágarida. ²⁵ Ani quei choúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguóun, lun gíñe jagúndaaruntima lídan jaffñen. ²⁶ Ítara lúba jiñúragüdüni líri Crístu Jesúsu luágu lagíribudagüdüni júmoun.

²⁷ Joúcha jumá lun úaragua lan ligáburu jabágaridun lúma larúfudajan Crístu. Ítara lúba, ánjana ñídüni aríjaün o ánjein díseñu níña lubeí jueí lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan gíñe ában, áfaagua súngebui lídan ában lun labúruchagun affñeni luágu Jesucrístu queísi Wasálbaragüle, ²⁸ mígiraguagüdünga júngua lun janúfudedagun jaweí jáganiñu. Ladúga jáganiñu lan gürígia jagía, arúfuda lumúti líra furáangu luágu joúdiña lan lídoun gürínguau, arúfuda lumúti gíñe jasálbarun jugúya le affñebei, áni lúmagiñe Búngiu líabin cátei le. ²⁹ Ladúga Crístu, gayáraati mámarügü lun jaffñerun luágu, gayáraati gíñe jasúfurirun luegiñe. ³⁰ Jugúya núma, lídaañadiwa ában méme áfaaguni. Aríja jumáli meja ída líña lan náfaagun, guetó agáambatün luágu ída líña méme lan náfaagun.

2

Lúnabugun Crístu lúma luweírigun

¹ ¿Sandítünsan dúgüdaguaü ladúga lídaañadün lan ában lúma Crístu? ¿Barútünsan gurásu luágu línsiñejabu jun? ¿Eíbugatünsan sun jugúya lúma Sífiri Sándu? ¿Subúdi jumútisan lugúdemejabu Crístu jun lúma lareídun? Affñetina luágu ítara líña lan. ² Ligía lébubei namúriajan júma lun jaganoún lídan úarani lúma ínsiñejabuni júmawagua, lun ában lan jarítangun, ában lan gíñe jáfaagun luágu buri cátei le lani Crístu. Láu jabágaridun ítara, buin lúba nugúndan jáu. ³ Madúga jumá ni cáta juoúguarügü lun janügüniwa weíri, ni luágu pántaü, adúga jumeí cátei láu únabuguni. Buídulá janügüniña ámu gürígia jueí guánarügü. ⁴ Mámarügülá cátei le buídubei jun jáluaja, áluaja jumeí gíñe le buídubei joun ámu.

⁵ Ítaramemelá ligáburu jasáminarun queí meja ligáburu lasáminarun Crístu Jesúsu. ⁶ Láu sún meja Búngiu Irájü lan ligía, málugunti lárügüdüni lirícha quei Búngiu. ⁷ Lubáragiñe líra, ába lígiruni le lánibeí, ába ladúgün quei músu láu lagúriajoún quei wügüri. ⁸ Dánti le ítarajali quei wügüri, ába lúnabudaguagüdüntima lúngua, áni ladúga lagáambadi, ába loúnwen luágu gurúwa láu sun nibúsigarídüna lan oúweni luágu gurúwa. ⁹ Ligía líchugunbalin Búngiu líñun-ágei uweíriguni lun lúma íri le weírigutimaabei lídaangiñe súngebui, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun, ¹¹ lun gíñe jasúbudiruni súngebui, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga ubouágu

¹² Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguóun lídan lémeri Crístu láu únabuguni lúma inébesi lun Búngiu daríme jebélurun siélun. ¹³ Búngiu íchugubalin lubuídun ayúmajani jun lun jeíbugun lúma, íderagualaün lun jadügüni quei labúseeruni.

¹⁴ Adúga jumeí sun cátei láu ugúndani, masígenejaanga, ¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürígia wuríbatíña, magáambaditiña lun Búngiu. Jugúya, jarúgoungadagüdatün jagánagua gürígia jagía quei warúguma lídan ában fulásu búrigati, ¹⁶ íchigeina ugánu luáguti íbágaru magúmuchaditi

joun. Láu jigáburidun ítara, gúndaabadina juágu dánme le lachúlürün wéyu le liábingüle Jesucrístu, láu nasúbudiruni luágu máma lan luágu ni cáta nuwádigimarida jagánagua. ¹⁷ Íbini lun lan níchuguni nibágari guánarügü lun loústarun jaffínen, le queísibei ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu. ¹⁸ Lun jamúga lasúseredun ítara lun noúnwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodító

¹⁹ Ánjein busén lubei Wabúreme Jesucrístu, noúnajabei Timotéo aríjaün madíse, lun gayáraabei lan nagúndaarun dánme le lagíribudun láu ugánu nun juágu. ²⁰ Úati ámu núma le asáminaruti quei áu, le áfaaguti lun buídu lan lídin jun, ²¹ súngubei jawoúgua rügúñein jarítagua, mebéreseguntiña láu le labúseerubei Crístu Jesúsu. ²² Ánjeinti Timotéo, subúditi ligáburu jun, ída líña lan lesériwidun núma lídan lapúrichijoún ugánu le lánina asálbaruni queísi ában isáani le íderaguti lúguchi. ²³ Agúrabatina lubeíti noúnajani aríjaün lárigiñeme nasúbudiruni ánjein náfuriduba lubei furísunrugugiñe, ²⁴ láu sun affíne nan luágu niján lan lugúndaanbei Búngiu, lun nídin aríjaün núngua madíse.

²⁵ Genége lumúti gíñe nun luágu lúnti lan noúnajani nibíri Epafrodító lárigoún júmoun. Quei jasúbudirun, ligía noubabei lídan luwádigimari Crístu lúma lídan áfaaguni, le joúnajabei jugúya guánarügü nun lun leténirun lun le nemégeirubei. ²⁶ Weíríti labúseerun laríjinün áni gíbeti larítangun ladúga jagáambun luágu lasándirun. ²⁷ Inárüni luágu sándi lán meja, yaráfa lun loúnwen, ába gudémejabu lan Búngiu lun lúma nun lun mabíjin nan íruni lánwoun le núagubei, ába lareídaguagüdüni. ²⁸ Ligiatima nabúseerúnbei noúnajani lun jagúndaarun láu jaríjini. ²⁹ Resíbi jumeí láu sun ugúndani queísi idújei lueígiñe Wabúreme Jesucrístu, áni jínsiñe jagíame sun ja ítaraña quei ligía jun súnwandan, ³⁰ quei chülú lubei yaráfa lun loúnwen ladúga lesériwidun lun Crístu. Derégeguati lúngua, mebéresegunga cába lan asúsereda lun, lun lesériwidun nun, cátei le jásiñerubei adúga lugúndun díseñu jíña lan nueí.

3

Úma le inárüti lun weréderun richágu ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchati nuágu abúrújei le abúrúja náalibei jun, lugúndun buíti jun. ² Cátei ligía, lun toúnigigua jumá júngua jaweí ja ítaraña ouserun quei oúnli, ja adúgübalin le wuríbabei, ja íbagubalin úgubu. ³ Aríñagatiña yéetiña jagía luágu lúnti lan jerésibiruni wügúriña circuncisión lun lánigu jamá Búngiu, iyéeni líra. Lirájüñü Búngiu le tímatimaati wagía le agúnfulirubei lúma láu lubáfu láni Espíritu le wádaanbei, wagía le gúndaabei láu lánigu wamá Crístu Jesúsu áni míchu wamúti weménigi luágu cátei bougudinti lueí lun wasálbarun. ⁴ Lun jamúga gayára lan wasálbarun luágu cátañañadiwa lan bougudin lueí Jesucrístu, garíchatina jamúga lun neménigidun luágu buri cátei ligía, úati jamúga ni ában garíchati nueí lun leménigidun luágu buri cátei ligía. ⁵ Wídü wéyu lueígiñe nagúriajoún, ligía nerésibiruni circuncisión lugúndun jarásan israelítagu áu, jádaangiñetina lufámilian Benjamín, hebréo áu lúmagiñe nagúriajoún, hebréogu gíñe nagúbürigu. Fariséo meja áu lídan ligáburu gunfaráanda nání jalúrudun juríu, ⁶ janárimeti meja neméendün darí neíbaajaniña affíñetiña luágu Jesucrístu. Luáguti lísurun íbágari según jalúrudun juríu, úati meja ni ában lun gayára lan laríñagun ni cáta nuágu. ⁷ Ánjeinti guetó, sún buri meja cátei le, lé meja weírítibei cátei nun, barú numuti quei ni cáta lun gayáraabei lan nasígiruni Crístu. ⁸ Sügú láu líra, sun cátei le gayáraabei jamúga níjein lan núma, rúnumuti quei ni cáta ligíbugiñe oúnwenbun agáñeiruni le luágubei nasúbudiruni Wabúreme Crístu Jesúsu. Féridi náali sún buri cátei le ladúga nasúbudiruni Crístu, áni

barú numuti sun le quei ífei lun nagáñeiruni Crístu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barúlaadina Búngiu richágu ligíbugiñe láu nafíñerun luágu Jesúsu. Richáguauí ligía ában cátei le lídaangiñeti affíñeni, máma adúgüni. ¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdúbalin Jesúsu lídaangiñe ouweni nuouguá, lúma lun nasúfurirun luágu queísi lasúfurirun nuágu, ¹¹ lun ítara nan quei ligía lídan loúnwen láu eménigini luágu násaaruba lan lídaangiñe ouweni quei ligía.

Áfaaguni lun lachúlürün lídoun lébeja

¹² Máma naríñaguña luágu chúlújadina lan lúmoun lébeja lídan sun cátei le, maríña-guntina gíñe luágu buídujali lan nigáburi lídan sun cátei, le nadúgübei, nubáru-aguoúñadina méme lun ítarabadina lan queísi meja labúseerun Crístu lun ítarabadina lan dán meja le lasálbarúnbalina. ¹³ Nidújeñu, maríñaguntina luágu íbija náali lan sun cátei le, le nadúgübei, nabúlieiduni sun le eréderubei árigi lun náfaagun lun nárügüdüni le nigíbugiñebei, ¹⁴ lun nachúlürün lúmoun lébeja eíbaaguni ligíbuagu ubou le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsu.

¹⁵ Sun wagía le weínamujalibei lídan wafíñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei gíñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibei.

¹⁷ Nidújeñu, amúriajatina júma lun ában lan jarítangun lun jafálaruni náni jémpulu, aríja jumáña gíñe ja abágaridubaña según jémpulu le wíchugubei jun. ¹⁸ Aríñaga náali jun sarágu weíyaasu áni naríñagayaali jun láu águiraü, luágu añájein lan sarágu ja aríñagatiña luágu affíñe jamá luágu Crístu, abágaridutiña queísi láganiñu Crístu le ouwebei lun larúmadagüdüniwa. ¹⁹ Lídaanme lagúmujoún dan, gürínguabei cátei joun —jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei ubouáguna jarítagua. ²⁰ Ánjein wagía, siéluna wagía, áni wagúrabuña liábin Wabúreme Jesucrístu le Wasálbaragüle siélugiñe. ²¹ Lídaanme wéyu ligía, lasáansirubei wágubu le emégeirubei sarágu lun ítara lan quei lúgubu, le úabei lemégeirun. Áni ladúgübei láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queísi idújeñu lueígiñe Crístu. ³ Ánjein bun, nouba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noubagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürúwaali jíri sun jagía tídan lilíburuna íbágarí magúmuchaditi.

⁴ Gúnda jumá súnwandan ladúga lídaañadün ában lúma Wabúreme. Aríñagaya numúti. ¡Gúnda jumá! ⁵ Subúdiwa jumá quei gürígia areídatiña ladúga madíseeli liábin Crístu.

⁶ Magíbedalá jarítangun luágu ni cáta, aríñagarügü jumeí sun cátei lun Búngiu súnwandan dan le jayúmuragun lun, amúriaja jumá lúma, mabúlieidagunga lun jíchugun

eteíngiruni lun. ⁷ Ábameti líchuguni Búngiu lidárangilan jun, darángilaü le, weíríti-maabei lubáfu lun lagídarun jidíjeri sügü láu jubáfu lun jarítaguni cátei le lúnbei jadúgüni, áni darángilaü ligía, loúnigiruboun janígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesúsu.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibe, sun le gadúnabei inébesei, sun le richábei, sun le jarúmabei, sun le gúndaawabei láu, sun le uágubei buídu lan ladímurejoúa. Samína jumá luágu sun le buídubei lúma sun le gadúnabei uweíriguni.

⁹ Falájumei sun le arúfuda náalibe jun lúma sun le resíbi jumáalibe númeriñe. Gúnfuli jumá láu le naríñagubei jun, áyeija jumeí nigáburi. Ábame júma lan Búngiu láu lidárangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríña-guntina luágu bulíei jumáadina lán yebe, madárirügü jñáalin ligáburi ída lúba lan líderagunina. ¹¹ Mabúseerúntina jamúga jarítagun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati, ¹² subúdi numúti labágaridúniwa lídan gudémeín, subúdeí gíñe gámawa lan gíbe. Furéndeijadina lawandúniwa furúmieguarügü igáburi, ilámaü yebe o quimúle, njein lan darí lun lígiragún o úa lan ni cáta. ¹³ Úati cátei jénreenguti nun ladúga lídaañadina ában lúma Crístu le íchugubei ubáfu nun. ¹⁴ Láu sun líra, buíti jadúga láu jíderagunina lídan lénreengúnga nun.

¹⁵ Queísi gíñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügúñadün tílana ligílisi oúnaja seínsu nun quei ateíngiragülei luágu nesériwidun jun. ¹⁶ Sun meja anájagua lan ubúругu Tesalónica, oúnajatün edéweejani nun, mámarügü ában weíyaasu, lun le nemégeirubei. ¹⁷ Máma jamúga nasáminarun lun gubeírügü nibíjin som cátei, le nabúseerúbei, lúntima lagánwoundun le lúnbei jibíjini lúmeriñe Búngiu. ¹⁸ Áu, resíbi náali súnugubei lúma sügü láu lé yebe lúnbei nerésibiruni, láu le jóunajabei nun lúma Epafrodíto ígiraguaali núma. Le jóunajabei nun, ítara líña quei líjeme cupáli le águdajóuti lun Búngiu, ában edéweejani le lerésibirubei láu ugúndani. ¹⁹ Líchugubei lubeíti Nubúngiute sun le jemégeirubei jun queísi buri luweírigun lirísín, lídaangiñe Crístu Jesúsu. ²⁰ ¡Uweíriguni lun Wáguchi Búngiu lun sun dan!

Lagúmujoún buri mábugaü

²¹ Rújumei numábugaü lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun. ²² Sun ja yábaña Róma ja lánigu Búngiu, játima tílana lúban urúei, mábuga jáña gíñe jun.

²³ Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓSASNA

Labúrrijan Páblo joun tllana liglisi to Colósasboun

¹ Anája áu Páblo, le ában lání Jesucrístu apóstolu láu lugúndan Búngiu. ² Úara lúma Timotéo le wadúje lueígiñe Jesucrístu nabúrrijañoun gárada to jun, jugúya le lánigu Búngiu ja gúnfulibaña lúma Crístu le uágubei jafñiera, ja ubúrugubaña Colósas. Binflaün Wáguchi Búngiu, ibíja jumá gíñe darángilaü lúmagiñe.

Layúmuragun Páblo jawágu afñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu. ⁴ Agáambaadiwa luágu jafñien luágu Crístu Jesúsú lúma luágu jínsiñejabu joun sun ja lánigubaña Búngiu, ⁵ ladúga eménigini le juágubei luágu le areidúañubei jubá siélu. Chülútün árügüdei eménigini le lárigiñe jagáambuni ugánu le inárütibe, ugánu le luáguti asálbaruni. ⁶ Ugánu méme le, lé meja apúrichijóubei jun, labúruchaguña lídan sun uboú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le. ⁷ Ligía cátei le larúfudajabei Epáfras jun, le ñadágimeinjalibe wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua. ⁸ Barújali ugánu woun juágu lúma luágu jínsiñejabu le rúlaalíbe Búngiu jun.

⁹ Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei lání Espíritu jun. ¹⁰ Ítara lúba gayára lan jagáburidun queísi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun gíñe jasúbudirunitima Búngiu. ¹¹ Amúriajatiwa lúma lun léredagüdünn láu luweírín lubáfu lun gayára lan jawánduni sun cátei láu sarágu gurásu lúma ugúndani, ¹² lun gíñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgouna. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraú le jínsiñebe, ¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábei jaríjini gürígia, ába liábin uboúagun lídan ában luwúyeri le gayáraati jaríjini gürígia lídan Liraú le Jesucrístu, le weírgutimaabei lídaangiñe sun cátei le níjeinbei. ¹⁶ Lídaangiñe Crístu ladúgei Búngiu sun cátei le siélurugubei lúma le uboúagubei, dándu buri cátei le marijínbei quei le arijúabei. Lídaangiñe Crístu ladúgei arúeijani, gumádi, lúrudu buri lúma buri ubáfu le jáni ánjeligu, áni lun gíñe Crístu ladügúwa. ¹⁷ Lubáragiñebe sun cátei, níjeinjali meja Crístu, áni láu lubáfu, níjein lubeí sun cátei lídan lubára. ¹⁸ Lougiñe sun líra, Crístu jachúgüdinabei lánigu, ja gíribaña lúgubu, ja gíñe gíribaña lilígílisin. Ligía le íchugubei ibágari lun úgubu ligía, ligía furúmiñebeí ásaara lídaangiñe oúweni lun moúnwendügüyaali lan, lun ligía lan láu furúmiñeti ubáraü lídan sun cátei. ¹⁹ Ítara líña labúseeruni Búngiu lun níjeinbei lan sun le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun uboú dayárugubei lúmagua, dándu buri cátei le uboúagubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladúga buri cátei wuríbatí le jadúgübei. ²² Ánjeinti guetó, aráandaragüda

láadün Búngiu lúmagua láu loúnwen Crístu lun larúfudunün jarúmañu, madúrunga, queísi lánigu ligíbugiñe. ²³ Ítara méme lúba gíñe ánjaün asígira derégüdagu lídan jafíñen, ragúñu buídu luágu Crístu, mígirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijóubei lídan sun uboú, le gíñe napúrichijabei, áu Páblo.

Rúlumuti Búngiu Páblo lun lesériwidun joun tílana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu nógubu guánarügü lun loústaragüdüniwa le lúngilibei lasúfuriruni Crístu jawágu lánigu, jawágu lilígílisin ja lúgubu. ²⁵ Núbínjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu. ²⁶ Ugánu ligía, cátei lé meja arámudañu lubeí Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu Búngiu labúseera lasúbudiragüdüni luweírín irísini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíríguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürígia lun járügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírín lidíjeri narítangun juágu, lúma jawágu afíñetiña ja Laodicéabaña, lúma jawágu sun jíbiriugu afíñetiña ja maríjin jamágidinabaña. ² Weíríti nayúmajan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbiriugu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafíñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibei ában oúnwenbun irísini woun. ⁴ Naríñaguñein buri cátei le jun lun mayéedun lánün ni ában láu buri dimúrei buíduburiti. ⁵ Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafíñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafíñen luágu, lúnti ítara lan jabágaridun lídan ában lúma, ⁷ lun ragúñu lan jibágari luágu lídan le jídin jubáruaguóun lúma, derégüdagu lídan jafíñen ítara queísi larúfudajóuniwa jun, láu eteíngiruni lun Búngiu súnwandan.

Iséri ibágari lídan Crístu

⁸ Toúnigi jumá, mígiraguagüda jumá júngua joun ja busénbaña jayéjean láu buri arúfudajani málati. Máma lúmagiñeti Crístu cátei le jarúfudajabei, lúmagiñeti jagáburi binádu mútu lúma buri ligáburi jarítangun gürígia lánina uboú le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le uboúagubei lúma le siélubei. ¹¹ Láu gíñe lídaañadün lan ában lúma Crístu, queísigubeirügü resíbi jumáali lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibíjubei, máma le adügúbei láu bíti luágu úgubu, jáni circuncisión, láu jasálbarun lídaangiñe figoú le áubei jíábin uboúagun. Niján luwúyeribei ladügüniwa Crístu lun lánigu wamá Búngiu. ¹² Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátün gíñe lúma lun ibágari le

iséribei ladúga jaffñerun luágu lubáfu Búngiu le ásaaragüdübalin lídaangiñe oúweni. ¹³ Luágu meja ában dan, jiláñu jiñá meja lun cátei lánina Búngiu ladúga jifígoun, ladúga gíñe jabágariduña lan queísi gürígia bouguditiña lueí lilúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu. ¹⁴ Láu loúnwen Crístu, ferúduna láali Búngiu sun wafígoun, ába lagúmochaguagüdüni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágua láni Búngiu lúrudu ligía luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüdüniña ligíbugiñe gurírighuáü, ába lanúgüniña quei adaürútiña lun.

Áluaja jumeí buri cátei le lánina siélu

¹⁶ Úa la ni ában añáwarijati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraguagülei. ¹⁷ Sún buri cátei le, lúntirügü lagúnfulirúniwa lúma darí meja liábin Crístu ubouágun, liyáwa rügüñein le lúnbei liábin, Crístu ligía linárünbei. ¹⁸ Mígiraguagüda jumá júngua joun ja afámurubaña quei únabugutiña, ja ájuduragubaña joun ánjeligu, lun janúgüni jagáñirun jueí. Weíriti jadímurejan luágu nege buri cátei le ayáwadaguti joun, ába buri janáangun jóungua luágu ligáburi jasáminan, le jáni gürígia. ¹⁹ Mámáñanu lídan ában lúma Crístu, le ichúgüdünaü joun sun lánigu ja gíribaña lúgubu, le ágüdajabalin úgubu ligía, le awáanseragüdübadüba lúma lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰ Jugúya, ígira jumáli binádu jigáburi, queísi lídaanjadün lan ában lúma Crístu, gidáadün lídaangiñe ligáburi jarítangun gürígia luágu buri cátei. ¿Cáti uágu jabágaridunbei camá jamuga lánigugidün ubou, ²¹ ichaagua júngua lun ligáburi ubou lun jagúnfulirun lúma Búngiu queí buri jamúga lúrudu le aríñagubei. “Magúurabeí le, meígabeí líra, márügüdübeí cátei ligía?” ²² Sún buri gumádi le, luáguti buri cátei le gagúmochaditi láu layúsurún, áni máma ámu cátei lueí gumádi buri lúma arúfudajani le jáni gürígia. ²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma únabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmajan gürígia.

3

¹ Queísiti jabágariduña lan ában ibágari iséri ladúga lídaanjadün lan ában lúma Crístu, áluaja jumeí buri cátei le lánina siélu, le ñí lubei Crístu ñun lueígiñe loúnwenren Búngiu. ² Samína jumá luágu buri cátei le lánina siélu, máma luágu buri le lánina ubou. ³ Jilátün lúma Crístu lun ubou le, guetó, níjein jibágari le tímatimaati lúma Crístu le yágütabei siélu lúma Búngiu. ⁴ Dánme lagíríbudun Crístu, le úmabei lídan wamá ában, wachúlaaguba gíñe lúma, ábame gafánran wamá lídan luweírigun.

Binádu ibágari lúma iséri ibágari

⁵ Ígira jumeí sun le jigáburibei le láninabei ubou le. Úa la ni ában jídaangiñe agámariduti mamárieidunga, madúgün jugúyame cátei wíyeti, mafálara jumeí luríban ayúmajani, maweínamulá jágu luágu cátei le máma jáni, le méme ájuduraguni joun sándu. ⁶ Lueígiñe buri cátei le, láburujan lanárime ligáñi Búngiu jawágun ja madúgünbaña gásu láu. ⁷ Jugúya, adúga buri jumúti meja cátei le lídan meja binádu jibágari, ⁸ ánjeinti guetó, ígira jumeí sún buri cátei le. igáñi, iyéreejabuni, wuríbani, anábajani, lúma buri dimúrei wíyeti. ⁹ Maríñaga jumá iyéeni júmagua quei ígira jumáli lan binádu jigáburi lúma lé buri meja jadúgübei. ¹⁰ Isérijali jigáburi le isérideinábei quei méme ligáburi Búngiu guánarügü le adúgübalin, daríme jasúbudiruni Búngiu buídu buídu.

¹¹ Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machúlaaguntiña, idámuni, máma idámuni, Crístu, ligía sun cáteibi, áni níjein gíñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queísi lánigu, láu gudémejabu, areíduni, manáanguni únguäü, gagáambadi, lúma gagúraasuni. ¹³ Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítara lá gíñe jadúga. ¹⁴ Lougíñe sun cátei, jínsiñejabu jumá, ligía cátei le íchugubalin sun cátei lídan ában, áni jóústagüdaleí lubuídun jigáburi. ¹⁵ Abúguraleí lidárangilan Búngiu sun le jadúgübei, ladúga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteíngiradi jumá gíñe.

¹⁶ Buíngüdalóun láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigun Búngiu láu eteíngiruni lun tídan janígi. ¹⁷ Furúmiegurügü cátei le jadúga o le lan jaríñagun, adúga jumeí lídan ában luwúyeri le íchuguti inébesi lun Wabúreme Jesucrístu, eteíngireina Búngiu Úguchili lídaangiñe Jesucrístu.

Igáburi le lúnbei wagáburiduni jáma ja wábiñebaña

¹⁸ Würíña, gagáambadi jumá joun jumarigu, ligía cátei buíti le lúnbei jadúgüni queísi afíñetiña luágu Wabúreme Crístu. ¹⁹ Wügúriña, jínsiñe jamá jumarigu jun, magáñida jumá jáma. ²⁰ Isáanigu, agáamba jumáña jagúbürigu lídan sun cátei, ladúga ligía jínsiñebei lun Búngiu. ²¹ Agúbürigu, másügüragualá jagúmadiruniña jisáanigu, ragú jáñein magúraasuni. ²² Esériwidutiña, gagáambadi jumá joun jiyúbudirigu lídan sun cátei, mámarügü dan le aríagu jáña lan jun lun jeréderun buídu jagíbugiñe, adúga jumeí súnwandan táu sun janígi ladúga luweírin linében Búngiu jun. ²³ Furúmiegurügü cátei le jadúga, adúga jumeí láu ugúndani, camá jamuga jadúgüñein lun Wabúreme Crístu máma joun gürígia. ²⁴ Subúdi jumáali luágu líchugubei lan Búngiu alágan jun queísi jafáyeiruaja, ladúga lun Wabúreme Crístu le Jabúreme le tímatimaati jesériwida. ²⁵ Ánjeinti le adúgüti wuríbati, lerésibirubei lafáyeiruaja wuríbati le ladúgübei, áni ában láu lanúgüniña Búngiu sun gürígia.

4

¹ Iyúbudirigu, lúnti buídu lan jigáburi jáma jumúsuniña, oúsera jumáña láu úarani lúma iríchaü, jarítagua jumá luágu níjein lan gíñe ában Jabúreme yágüta siélu.

² Ítara méme jumá ayúmuragua lun Búngiu sarágu, agáguduañu, eteíngireinei Búngiu. ³ Ayúmuragua jumá gíñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaürúwa. ⁴ Ayúmuragua jumá lun nasúbudiragüdüni furáangu quei lubúdubu.

⁵ Buídulá jóuserun jáma ja mafíñebaña, yúsu jumeí jidáani lídan cátei le buídubei. ⁶ Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan jóunabuniña gürígia.

Lagúmujóun buri mábugäü

⁷ Laríñaguba wadúje Tíquico nuágu jun. Jínsiñeti wügúri ligía woun sarágu, ligía ában ídejati buíti le gíñe esériwidubei lun Wabúreme Crístu núma. ⁸ Ligía nouñajaanbalin jun lun laríñagun jun ída wáña lan, lun gíñe líchugun gurásu jun. ⁹ Níngira gíñe Onésimo lúma, wadúje úraguati le jínsiñebei woun, le jupaísanun. Jagíaba abájüdagua jun luágu sun le asúseredubei ya.

¹⁰ Mábuga líña Aristárco le nouba furísunrugu jun, mábuga líña gíñe Márcos le lidúje Bernabé jun. Aríñawagúaaali jun luágu Márcos, ánjein nüdün aríjaün, resíbi jumeí buídu.

¹¹ Mábuga líña gíñe Jesúsú, le gíñe gíríbei Jústo, jun. Jagía rügúñanu jádaangiñe juríu afíñetiña ja ñadágimeinjáñabaña núma luágu larúeijan Búngiu, áni jayábin nun quei ában oúnwenbun dúgüdaguáü. ¹² Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu buídu lun jadúgüni lugúndan Búngiu. ¹³ Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis. ¹⁴ Mábuga líña Lúcas, le wasúrusian, le jínsiñebei woun, jun, lúma gíñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu buídu lun jadúgüni lugúndan Búngiu. afíñetiña ja oúndaragubaña túbiñe lun jájuduragun lun Búngiu. ¹⁶ Lásunme jalíjanun gárada to júmagua, jóunajounme lun jalíjanun tílana ligílisi Laodicéa, alíja jumóunme gíñe gárada to achúlürüboun jun Laodicéagiñe to nabúrújaboun. ¹⁷ Aríñaga jumá lun Arquípo lun ladúgüni wadágimanu le rúlaalfbei Wabúreme Crístu lun, buídu.

¹⁸ Niján numábugaü le nabúrújabei jun láu nújabu guánarü—áu Páblo. Jarítagua jumá luágu nadaürúña lan. Binílaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labúrüjan Páblo jáma líbirigu joun títana ligílisi to ubúruguboun Tesalónica

¹ Áu Páblo lúma Silváno láu Timotéo, wabúrüjañoun gárada to jun, jugúya títana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumei abíniruni lúma darángilau jámagiñe.

Jémpulu lánina afíñeni lé meja jarúfudubei Tesalónica

² Súnwandan wetéingiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladúga jafíñen luágu, lúma lubuídun jóuseruniña wánigu ladúga buin tíña lan janígi láu ínsiñejabuni, lúma lubuídun jawánduni sun asúfuriruni ladúga jeménigidun luágu Wabúreme Jesucrístu le ídaangiñebei lan jachúlúra siélun. ⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun woúserun jagánagua, lun ábanbadiwa lan jémpulu buíti jun.

⁶ Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barú lan jerésibiruni Crístu asúfuriruni jun. ⁷ Ítara líña jíabin lun ábanbadün lan jémpulu joun sun afíñetiña ja louúbawagubaña Macedónia lúma Acáya. ⁸ Burúguaali ugánu luágu Wabúreme Jesucrístu júmagiñe, mámarügü louúbawagu Macedónia lúma Acáya, burúguaali lídan sun fulásu, áni subúdiwaali luágu afíñeni le jibíjubei luágu Búngiu lídan sun fulásu. Memégeirunwati wabájüdagun luágu jafíñen joun güriña, ⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibe. ¹⁰ Abájüdagutiña gíñe juágu luágu jagúrabajañein lan lagíribudun Liraú Búngiu siéluñe—Jesúsu le lásaaragüdübei Búngiu lídaangiñe ouweni, le asálbarubáliwa lueí lanárime afáyeiruajaü luágu figoú le lúnbei líabin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta woúdin aríjaün. ² Queísi jasúbudiruni, wuríbati meja jóuseruniwa güriña ja Filíposbaña, ába wayábin júmoun ladúgarügü líchugun Búngiu anígi woun lun wadúgüni. Ába wapúrichijani ugánu le lánina asálbaruni jun, mebésesenga wagía láu le lúnbei wasúfuriruni jámagiñe güriña ja mísiñejabubaña lun ugánu ligía. ³ Máma wapúrichijaña ladúga jamúga bulíeiguaü, queísi jaríñaguni wáganiñu, ni láu luríban arítangun, ni lun wayéedagunün. ⁴ Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaagutiwa lun gúnda jamá güriña wáma, wáfaagun lun gúnda lan Búngiu wáma, le asúbudirubarun wanígi. ⁵ Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶ Máluajantiwa lun wibíjin uweíriguni jámagiñe ámu güriña, ni júmagiñe, láu

sun gayára lan jamúga wasándiragüdüni lijürü wagúmadijan queísi láni Crístu apóstolugu. ⁷ Lubáragiñe líra, ouserarügü wamútün láu ában uálini queísi ában úguchuru to agúriajabaliña tirájüñü, oúnigira táña. ⁸ Weíríti jínsiñe woun darí lun máma rügüñein lan jamúga láni Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírín jínsiñe woun. ⁹ Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Ñadágimeintiwa meja wéyuagu áriebu lun mámabadiwa lan ijürügu lun ni ában jídaangiñe, sun awánja lan apúrichijeí láni Búngiu ugánu jun.

¹⁰ Geféentün, geféenti gíñe Búngiu luágu reídei wamá meja láu ában igáburi le jarúmati áni surú jídan, jugúya le affíñebei, míchugunga wagía lúgaaru lun ni ában lun líchugun wadúnrun. ¹¹ Subúdi jumúti gíñe ída líña lan wíchugun gurásu jun lúma derégüdaguaüi lun jaffíñen, cáda ában jídaangiñe, quei ladúga ában úguchili joun lirájüñü. ¹² Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeijan lúma luweírigin.

¹³ Ligía, súnwandan lubeí weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísi ugánu láni Búngiu, máma queísi ugánu jáni wügúriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le affíñebei. ¹⁴ Nidújeñu, dan le jeíbaajanbalün jupaísanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, eíbaaja jamútiña gíñe juríu ja japaísanun. ¹⁵ Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa gíñe bougudin lueí jageíra. Magúndaanti Búngiu jáu, jáganiñu gíñe sun gürígia. ¹⁶ Dan le wabúseerun wadímurejan joun ja mámabaña juríu lun gíñe jasálbarun, májatiñá yebe juríu lun wadúgüni. Láu igáburi le, gánwounguagüda jamúti jafígoun. Ánjeinti guetó, liábindügúriuga lanárime ligáñi Búngiu jawágun.

Busényati Páblo lídin aríjaña Tesalónica

¹⁷ Nidújeñu, murúsun dan lárigiñe wígirunün (láu sun ajúnja méme lan tídan wanígi) oúnwenbun wabúseerun woúdinya aríjaün. ¹⁸ Jóuchatiwá yebe woúdin, áu Páblo, sarágu weíyaasu yebe noúchun nídin, áni ságü noúchun nadúgüni, mígirun lumútina Máfia. ¹⁹ Ladúga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan wemenigidun lun werésibiruni wafáyeiruaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰ Jugúya lébunabei wagúndan, áni rújadün lébuna wadímurejan buíti joun ámu juágu.

3

¹ Dán meja le siñá wamaali awánda masúbudirunga ída líña lan sun cátei júma, ába warítagun luágu buídutima lan lun weréderun Aténas, áu lúma Silváno, ² lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágu Crístu le Wasálbaragüle, aríjaün. Oúnaja wamúti júmoun lun líderagunün arárama buídu lídan jaffíñen, ru ligía gurásu jun, ³ lun úa lan ni ában eíguaduti larúna lueígiñe buri lénreengúnga le lasúfurirubei luágu lafíñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le. ⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵ Ligía lébubei dán meja le siñánaali lan awánda, ába noúnajan álügüdaja ída jíña lan lídan jaffíñen, ladúga nanúfude lueí jamuga línchajanün Máfia lun jígiruni jaffíñen luágu Crístu, ába jamúga liábin wawádigimari jídan lun ni cátime.

⁶ Guetó, giríbuljali Timotéo Tesalónicagiñe, áni barúti ugánu buíti woun luágu jafíñen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu gíñe luweírín jabúseerun jaríjiniwa, ítara gíñe quei busén wamá waríjinün. ⁷ ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbei woun? ¹⁰ Wéyuagu, áriebe, wayúmragun lun Búngiu lun gayáraaya lan waríjinün, gúnfuli lámuga le mégeibeí lídan jafíñen.

¹¹ Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan woúdin aríjaün, ¹² lun gíñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³ Derégeguagüda lámugaün Wabúreme Búngiu júngua lun le gumúti, madúnrunga jugúyame ligíbugiñe dánme líabin Wabúreme Jesúsú jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsú. ³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamáriedunga, ⁴ lun cáda lan ában lálujanun lúmari lau lubuídun arítaguni queísi labúseeruni Búngiu, lídan lubúdubu, ⁵ máma láu luríban ayúmajani quei jadúgüni gürígia ja ibídiñejabubaña lun Búngiu. ⁶ Úa la ni ában adúgüti wuríbani lun lidúje láu lagámaridunun lúmari, jéreti labeíchuni Búngiu le adúgüti cátei le, queísi waríñaguni jun. ⁷ Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu woúngua lun. ⁸ Ítara líña lubeíti, le amájaruti lerésibiruni arúfudajani le, máma lun ni ában wügúri lamájara, lun Búngiu lamájara, Búngiu le íchugubalín Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabúrújani jun lugúndun arúfudajaali Búngiu guánarügü jun lun jínsiñegua jumá, ¹⁰ áni ítara líña jadúgüni joun sun jidújeñu lueígiñe Jesucrístu ja lídaanbaña sun ubúrugu Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹ Jóucha jumá jabágaridun darángilañu, beréseguñu lídan le lúnbei jadúgüni. Nádágimein jumá lun janúriragun júngua, quei waríñaguni jun, ¹² inébe jumámuga joun ja maffínebaña luágu Jesucrístu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, lueí jajírudagun quei ja meménigidunbaña luágu níjein lan ában ibágari lárigiñe ouweni. ¹⁴ Ítara quei affíne wamá luágu jilá lan Jesúsú áni sará ligía lídaangiñe ouweni, ítara líña gíñe affíne wamá luágu lásaaragüdübaña lan Búngiu ja ouwegubaña affíneñu luágu Jesúsú.

¹⁵ Ligía waríñagunbei jun queísi larúfudajan Wabúreme Jesúsú, luágu wagía lánme le wíngangilibeí dánme líabin, mámaba wagía ñúdün jabáragiñe ja jiláguaañabaña. ¹⁶ Dánme le arárireina lan Wabúreme Jesúsú siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifídun Búngiu. Gürígiamei ja ouwegubaña affíneñu luágu Crístu, jagíaba ásaara furúmiñe. ¹⁷ Lárigiñeme, ábame wásaarun, wagía affínetiña ja wíngangiñabaña, ábame wanügúniwa úara jáma lídoun juánriñu lun wadúnragun lúma Wabúreme Jesúsú garábalirugu. Ábamei weréderun

lúma Wabúreme Jesúsu lun sun dan. ¹⁸ Ligíati rújuma lubeí gurásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabúrújan jun. ² Subúdi jumáli buídu buídu luágu lachúlürüba lan wéyu ligía dánme magúrabúniwa lan, queísi liábin ában íwerujati áriebu. ³ Dánme añája lan güriquia aríñaga. “Lídaañein dan sun cátei áni úati mégeiti”, ligíame liábin güriinguaü jawágun sódini quei liábin agáriduni tun wúri dageínatu, siñábeiti jeséfurun. ⁴ Ánjeinti jugúya, nidújeñu ja afiñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti. ⁵ Lídaañadün larúgounga sun jugúya, máma wagía lánina áriebu lúma lubúriga. ⁶ Ligía moún lubei lun maráanserun wamá quei ja mafñebaña luágu Jesucrístu, lúnti deréñuma wamá lubá lagíribudun, lídan wagíame lubuídun wachúgü. ⁷ Ja arúmugubaña, áriebu jarúmuga, ja abácharuadubaña, áriebu jabácharuada. ⁸ Ánjein wagía le lánina wéyuagu, lúnti lídan wamá lubuídun wachúgü. Lúnti wadáuragun woúngua láu afñeni lúma láu ínsiñeni queísi ladáuragun súaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súaara lábulugu lun loúnigiruni. ⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa. ¹⁰ Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin. ¹¹ Ligía rúmeme jumá lubeí gurásu lúma érei júniwagua ítara quei jadúgüni guetó.

Laríñaguni Páblo joun afñetiña ida lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu. ¹³ Lúnti jínsiñe jamá jun sarágu luágu wadágimanu le jadúgübei. Abágarida jumá lídan dan jáma jíbiri.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jidéraguniña ja débilibaña lídan jafñen, lun gíñe gagúraasun jumá jabá súnigübei.

¹⁵ Úa la ni ában afáyeiruti wuríbani luágu wuríbani. Joúcharügü jumá jadúgün buíti jagánagua, lúma joun sun güriquia.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumeí luágu sun le asúsereduti—buíti, wuríbati, niján le labúseerúbei Búngiu júmagiñe, queísi afñetiña luágu Jesucrístu.

¹⁹ Merédera jumeí luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucrístu. ²¹ Joúcha jumeí sun arúfudajani aríja jumeíme ánjein lúmagiñeti lubeí Búngiu, ábame jeréderun lau le inárünibe. ²² Dise jumá lueí sun luwúyeri wuríbani.

²³ Búngiu guánarügü, le íchugubei darángiläü, derégeguagüdalaún júngua lun le gumúti, areída loúme juwáni, janígi luma júgubu dayáruagu, jarúmañu, lubá liábin Wabúreme Jesucrístu. ²⁴ Úaraguati Búngiu le agúarubei jun lun lánigu jumá, lagúmuchubei ladúgüni sun cátei buíti le jídan.

Lagúmujóun buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸ Binílaün Wabúreme Jesucrístu. Ítaralá.

TIBÍAMAN LIGÁRADAN PÁBLO JOUN TESALÓNICANA

Labúriujan Páblo jáma líbirigu joun títana liglisi to Tesalónicaboun

¹ Áu Páblo lúma Silváno láu Timotéo, wabúrijañoun gárada to jun, jugúya títana liglisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu. ² Resíbi jumeí abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadúgüni, lugúndun laweíriduña jafíñen sarágu, áni ínsiñeni le jídaanbei jubáruagua aweírideinatima líña súnwandan. ⁴ Adímurejatiwa buíti juágu tídan buri lilígilisin Búngiu, luágu gurásu lúma affíñeni le jarúfudubei lídan sun eíbaajóuni lúma idíjeri buri le jasúfurirubei lueígiñe Crístu. ⁵ Arúfuda lumúti lubuídun jawándun luágu úaragua lan Búngiu lídan ligáburi lagúseragüdüñ, láu lanúgünün quei garíchatiña lun jebélurun lídoun larúeijan, le uágubei jasúfurira.

⁶ Ladúga gíñe úaragua lan Búngiu, lachúlürüba wéyu lun lasúfuriragüdüniña ja asúfuriragüdübalün, ⁷ lúma gíñe lun líchugun eméraguni jun, jugúya le asúfurirubei ítara quei wagía, lídaanme wéyu le lúnbei lachúlaagun Wabúreme Jesúsú siélugiñe lídan wátu geméti jáu láni ánjeligu ja gabáfubaña. ⁸ Liábinba lun labeíchuniña ja masúbudirunbalin Búngiu, madúgün jagía gásu láu ugánu luáguti asálbaruni le wabíjibeí lídaangiñe Wabúreme Jesúsú. ⁹ Agúnrinchawagúni le magúmuchaditi, ligíaba jabeichúagüle, jabugúba díse lueí laríjin Búngiu lúma luweírigun lúma lubáfu. ¹⁰ Dánme le liábin Crístu, larijúba luweírigun jádan lánigu, ábame laweíridun janígi sun ja affíñeñabaña luágu, áni jugúya, jádaanbadün gürígia jagía queísi affíneedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuraguatiwa gíñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadúgübei ladúga jafíñen. ¹² Láu igáburi le, líchugúba uweíriguni lun líri Wabúreme Jesúsú lídan jibágari, ábame líchugún uweíriguni jun luágu lareídun Wabúngiute lúma Wabúreme Jesucrístu.

2

Le lúnbei lasúseredun lubáragiñe lagíribudun Jesucrístu uboúagun

¹ Guetóti, nidújeñu, libúgürü liábin Wabúreme Jesucrístu, dánme liábin oúndaraguawa lúma, ² amúriajatiwa júma lun masáansirun jumáni ligáburi jarítangun ítara uménrengun, masústárun jugúyame luágu ni ában ugánu, o dimúrei buri le uáguti laríñawagua luágu lúmagiñeti lan Búngiu, ni tuágu gárada to uáguboun jaríñaga luágu wámagiñetu lan, to aríñaguboun luágu chúlújali lan luwéyuri Wabúreme lun lagíribudun uboúagun. ³ Mígiraguagüda jumá júngua lun jeyeedúniwa ítara. Lugúndun lubáragiñeme lachúlürün wéyu ligía, níjeinbei awúribujani lúma Búngiu, lachúlaaguba gíñe lágani Crístu, le lunbei lagúnrinchawagún. ⁴ Ligía láganibeí Búngiu, liñúraguba lúngua luágu sun cátei le luáguti Búngiu, lachúlürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítangun jumútisan luágu aríñagañaja náni méja buri cátei le jun dán meja le anájeingua lan júma? ⁶ Subúdi jumúti gíñe ída líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáni. ⁷ Luwádigimariña wuríbani guetó, arámudagu, áni lúnti lagídarúniwa le eréderubalin lágani Crístu ligía

lubáragiñe gayára lan láfuridun lídoun larúgounga. ⁸ Ligíaba larijóuniwa, áni lagúnrin-chagubei Wabúreme Jesúsu ágani ligía láu ában dimúrei, lúma láu luweírigun le áubei liábin. ⁹ Ladúgaba Máfia liábin lágani Crístu ligía, lachúlürüba láu sarágu ubáfu, ladúgüba buri miláguru yéeti lun layéedaguniña güriquia. ¹⁰ Layúsuruba sun luwúyeri wuríbani lun layéejaniña ja lídaanbaña úma lun güringuau, quei mája jabeí lun jerésibiruni inárüni luáguti Crístu lun jasálbarun. ¹¹ Ligía líchugunbáliña Búngiu lídoun bulíeiguau lun jeyeedúniwa lúma lun jafíñerun luágu iyéeni, ¹² lun jasádirúniwa lun máfiougati sun ja májabaña jafíñerun luágu Crístu, jínsiñerügü ligía wuríbani joun.

Anúadajóutiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucrístu, le uágubei jafíñera. ¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigun Wabúreme Jesucrístu.

¹⁵ Ítara líña lubeíti nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalíbei jun láu dimúrei lúma táu gárada. ¹⁶ Wabúreme guánarügü Jesucrístu lúma Wáguchi Búngiu, le arúfuda láalíbei línsiñejabu woun láu lareídun, ¹⁷ ru ligía ámalijouni le magúmchaditi woun lúma ában eménigini buíti, rúla dúgüdaguau tun janígi, derégüdaguagüda laúnme lun jaríñaguni lúma lun jadúgüni sun le buídubei.

3

Amúriajati Páblo jáma lun jayúmuraqun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queisi lasúseredun jagánagua. ² Ayúmuragua jumá gíñe lun gayára lan weséfurun jaweí wügúriña wuríbatiña, lugúndun máma sun güriquia ubouágu afíñetiña luágu Crístu. ³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdubadün derégüdagu, goúnigilaúnme tuei lisádarán Máfia. ⁴ Jeménigitiwa luágu Wabúreme Búngiu luágu adúga jumáni le waríñagubei jun áni luágu jadúga mémebei lan. ⁵ Íderagualaún Búngiu lun jasádiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe. ⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebe, lun mámabadiwa lan ában ijúrügu lun ni ában jídaangiñe. ⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.” ¹¹ Agáambatiwa luágu añájein lan jídaangiñe májatiña jawádigimaridun, jerédera madúgünga ni cáta, eténira lun le moún lubei jeténirun lun. ¹² Waríñaguña joún buri güriquia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adúga buíti. ¹⁴ Ánjein ñi ában le madúgünti gásu láu le waríñagubei tídan gárada to, aríja jumeí cátei lan, memétera jumá lúmoun, barú lámuga busíganu. ¹⁵ Manúga jumeí quei ágani, erérarügü jumá lun queisi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabúrújañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to. ¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labúrüjan Páblo lun Timotéo

¹ Áu Páblo, láni Jesucrístu apóstolu áu, noúnajoún láu lugúmadin Búngiu le Wasál-baragüle lúma Wabúreme Jesucrístu, le uágubei weménigida lun webélurun siélun.

² Nabúrüjañoun gárada to bun, Timotéo, niraú le tímatimaati lídan wafñen luágu Jesucrístu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúrugu Éfeso lun bariñagun joun ítaga güriquia lun marúfudajan jamá cátei le maríchabei, ⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barúrügüti sigénei le málati, ani míderagun lumútiña güriquia lun jesériwiduni Búngiu láu jafñerun luágu.

⁵ Le lúnbei barúfudajani joun afñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafñerun. ⁶ Añájein, adíreirutiña lueí buri cátei le, ába jíchaagun jóungua lídoun buri sigénei málati. ⁷ Buséntiña buri lun arúfudajatiña jamá lídan lúruudu le líchugubei Búngiu lun Moisés, úati gunfaráanda jamáni ni le guánarügü jariñagubei ni le jarúfudajabei luágu lúruudu ligía láu sarágu afñeni.

⁸ Subúdi wamúti luágu buídu lan lúruudu, yúsuwarúgaali ligía quei lubúdubu. ⁹ Lúnti lasúbudirúniwa luágu máma lan joun ja adúgübalin le buídubei ladügúwa lúruudu, lúruudu jóunti ja wuríbabaña, ja magáambadibaña, ja mebéresenbaña láu Búngiu, ja gafígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰ joun ja agámaridubaña mamárieidunga o ja agámaridubaña wügúriña jáledigu, joun ja íwerujabaña güriquia, joun ja yéebaña, jáma ja áfiñurubaña luágu iyéeni. Jóunti gíñe sun ja adúgübaña ámu cátei múaradunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibeí güriquia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanúgünina queísi ában wügúri derégüdaguati, lúma luágu líchugunina lun nesériwidun lun. ¹³ Adúga láali sun cátei lé buri nun láu sún meja anábagua náni, eíbaaja numútiña meja ja afálarubalin, adúga numúti meja sun le nuáraati lun nagúmuchaguagüdüni jafñen. Ába gudéme nan lun Búngiu lugúndun mámagidina meja afñeti luágu Jesucrístu áni ibídiñetí meja nun ca lan nadúgübei. ¹⁴ Ligía luweírínbei nasándiruni labínirunina Búngiu, úara lúma afñeni lúma ínsiñejabuni le gíñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafñerun súngubei luágu inárüni lan. luágu “líabin lan Jesucrístu ubouágun lun lasálbaruniña gafígountiña”, áu furúmiñeti jádaangiñe. ¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jafñerun luágu, lun jabíjini íbágarí magúmuchaditi. ¹⁷ ¡Ligía rúwama lubeí uweíriguni lúma inébesi lun Búngiu le Warúeitebei lun sun dan, súnwandan, le mouwedadibeí, siñá ligía larijíníwa, le Búngiu le ábanrügüti, le sábiu! Ítaralá.

¹⁸ Timotéo, niraú, rúnumuti gumádi le bun lun bageíndaguni luwúribun Búngiu buídu, queí meja laríñaguni Búngiu jayúmulugugiñe wadújeñu lueígiñe Jesucrístu bun, ragúñubeí inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jafíñen ladúga madúgün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagon jamáni Búngiu.

2

Arúfudajani libúgürü ayúmuraguni lun Búngiu

¹ Furúmiñeti cátei, amúriajatina lun ladúgüniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágarí darángilati, le derégewati lun Búngiu, le gíñe inébewati lídan sun luwúyeri. ³ Buíti cátei le, gúndaati gíñe Búngiu le Wasálbaragüle láu, ⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵ Ában rügúñein Búngiu, ában rügúñein gíñe gayára ladímurejan waweígiñe ligíbugiñe Búngiu, wügúri le Jesucrístubei. ⁶ Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáani. ⁷ Lun cátei le, loúnajana Búngiu lun narúfudajan joun ja mámabaña juríu libúgürü inárüni le, lun gayára lan jafíñerun luágu Crístu queísi Jasálbaragüle. Áu, queísi ában affíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügúriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹ Manárimelá tuwéndegun jadáüragun würíña, lun máma lan láu amúriguni janárimeguti jaráanseragua jóungua, ni láu gólu, pérlas, o daúguaü séruburitu, ¹⁰ lun láu lan lubuídun igáburi jadáuragua jóungua queí lúnti lan jadúgün würíña ja derégeguañabaña jóungua lun Búngiu. ¹¹ Lúnti maní jamá würíña dan le larúfudajóuniwa joun, lúnti jerésibiruni arúfudajani ligía láu ában únabuni. ¹² Májatina lun tarúfudajan wúri lídan jadámurin affíñetiña, ni lun tagúmadiruni wúri wügúri, lúnti teréderun maníñu. ¹³ Lugúndun Adán ladúgübei Búngiu furúmiñe, lárigiñe, ladúgoun Éva. ¹⁴ Máma gíñe Adán leyéedubei Máfia, wúri ayeedúaboun, áni láu tayedúniwa, ába táburujan lídoun figoú. ¹⁵ Láu sun líra, jasálbaruba würíña láu jagúnfulirun láu le lúnbei jagúnfuliruni queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádirigu

¹ Inárüni cátei le. Ánjein abúseera ában gürígia lun fádiribeí lan, ában wadágimanu buíti labúseerúbei ladúgün. ² Lun fádiribeí lan ában gürígia, lúnti labágaridun ában ibágarí le míchuti lúgaaru lun ladeinjóuniwa lun. Lúnti túmari lan ábanrügü wúri, lúnti gíñe lanúgün ában ibágarí sériuti, buíti lichúgü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára láníña tílana lúban agúmadira buídu, lun gíñe ladúgün lun gagáambadi jamá lirájüñü, inébejabu. ⁵ Lugúndun ánjein magúmadirun lubáliña wügúri tílana lúban, ¿ída lubági gayára lan laríjin jáu tílana lilígilisin Búngiu? ⁶ Moún lumuti lubeíti fádiri lan ában iséri affíñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti gíñe inébe lan joun

ja maffñebaña lueí ladímurejóun wuríba luágu, ábame láburujan tídoun lisábaran Máfia lun lagúnrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügúriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti járúgüdüni inárüni lánina affñeni le arúfuda lálalibeí Búngiu woun, buídu, lun gíñe jarúma tan janígi. ¹⁰ Lúnti jouchún, lárigiñeme, ánjein úa lubeí mégeiti luágu lubuídun jagáburi, ligíaba gayára lan jesériwidun ligílisirugu. ¹¹ Wúriña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü wúri, lúnti gíñe lagúmadiruniña lirájüñü buídu jáu sun tílana lúban. ¹³ Lugúndun esériwidutiña ligílisirugu ja adúgübalin jawádigimari buídu, buídubei ladímurejóuniwa jawágu, áni ragútimaatiña anígi lun jadímurejan luágu jaffñen luágu Jesucrístu.

¹⁴ Agúrabatina nídin aríjabu madíse, ¹⁵ nabúrújaní buri cátei le bun lun ánjana lan adárasaragua, lun subúdi báni ída líña lan lun louuserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigiteí inárüni ligía buídu. ¹⁶ Siñátí lasígenerúniwa luágu weírugu lan Wasálbaragüle Jesucrístu, le subúdigüda lálalibeí woun.

Arúfudaguati Búngiu lúngua queísi gürígia lídan Jesucrístu, arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijóuati luágu joun lílana sun fulásu,

affñewa luágu lídan sun fulásu,

resíbiwa ligía siélu.

4

Ja lúnbaña jígiruni jaffñen

¹ Furánguti laríñaguni Sífiri Sándu luágu lídoun lánme lagúmujóun dan, añájeinbaña lan gürígia ígiruti jaffñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. ² Jagáambajaba arúfudajani jámagiñe gürígia bíangua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu sùti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eíginí moún lumuti leigín, láu sun ladúga lan Búngiu eíginí buri ligía lun jeígini ja affñebaña jáma ja subúdibalin inárüni, láu ateíngiruni lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga lálalibeí, teínqui wameíme luágu. ⁵ Lugúndun láu wamúriajan lúma Búngiu lun labíniruni sun weígin, ñúbinti lun labuídurun láu lerérun, lúma láu wayúmragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüda jóuba buwáni láu buri dimúrei le lánina waffñen, lúma arúfudajani buíti le falábaalibeí. ⁷ Meféridirabeí bidáani asígeneja luágu buri libídiegun úraga le ni cáta ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini. ⁹ Inárüni cátei le, áni lúnti jaffñerun súngebei luágu. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejalibeí asálbaruni joun sun gürígia, áni ja affñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu. ¹² Sériulá bigáburí lun manügúniwa ban quei ni cáta lueígiñe nûraügídibu lan, lubáragiñe líra, lúnti ában ban jémpulu buíti joun ja affínebaña, lídan ligáburí badímurejan lúma bouserun, lídan ínsiñejabuni, lídan baffínen luágu Búngiu, lúma lídan larúma bibágari. ¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachúlürün. ¹⁴ Yúsubeí ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Derégeguabá búngua lún buri cátei le, lun gayára lan larijíniwa bawáanserun lídan cátei lání Búngiu. ¹⁶ Góunigiguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame gíñe ja agáambubalibu.

5

Ída lúba lan ligáburí louserun Timotéo jáma affíñetiña

¹ Madeínjabá lun ában weírei mútu, lubáragiñe líra, adímurejabá lun camá jamuga lun búguchi, ousera báñame wügúriña nûbüriñe queísi bamúlenu. ² Oúsera báña weýyaaña würiña quei bouserunun búguchu, ousera báñame würiña irájüñü quei bítunu, láu lubuídun arítaguni.

³ Íderagua báña würiña ja jiláañabaña úmari, ja arijúabei luágu mégei jamá iderúni. ⁴ Ánjein garájüñü tubei ában würi to jiláali túmari, gabáña tugúya, lúnti jafúnren-deirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati gíñe Búngiu láu. ⁵ Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebe, wéyuagu. ⁶ Ánjounti to edéregeraguboun túngua lun ugúndani lánina ubou le, jiláñu tíña lun cátei lánina Búngiu láu sun wínwangiru lan. ⁷ Aríñagabeí buri gíñe cátei le joun, úa lámuga ni cáta lun ladeinjoún joun luágu. ⁸ Le marítagunti jawágu lánigu, játima lidújeñu, magúnfulinjali lúma lafíñen, wuríbatimáatiti sügú láu ában gürígia le maffíñeti.

⁹ Lun labúrüdúniwa tíri würi to jiláalibeí túmari tídan gárada lánina íderawagúni, to rügúboun njeinjali lúmagiñe úrüwa-wein írúmu táu, lun gíñe ábanrügügili lán meja túmari. ¹⁰ Lúnti tasúbudirúniwa luágu buíti le tadúgübei queí buri jamúga ánjein meja agúriaia tubáliña tirájüñü buídu, ánjein buídu lubeí touserun jáma ja achúlürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguarügü ámu cátei buíti.

¹¹ Würiña ja jiláaña úmari ja nûbüriñe, mabúrüdabeí jiri tídan gárada, lugúndun lachúlürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamáriedun. ¹² Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügu súnwandan. ¹³ Ába jayábin lun jamáguualigudun, mámarügü jamáguualigudun, ába gíñe marásualugu jamá, eméteja lídoun sun cátei, adímureja cátei le moún lumuti. ¹⁴ Ligía nabúseerúnbei lun jamáriedunya ja nûbüriñe, lun garájüñü jamá, lun joúnigirunun jában, lun míchugun jamá lúgaaru joun ja maffínebaña lun jadímurejan wuríba jawágu. ¹⁵ Añájein würiña, ígira jamáali Búngiu, ába jafálaruni Máfia.

¹⁶ Ánjein añájein jabeí würiña ja jiláalibeí jámari jádan lufámilian ában affíñeti würi o wügúri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña tílana ligílisi würiña ja busénbaña jíderawagún.

¹⁷ Fádirigu ja lábugiñeñounboun jaríajaan ligílisi, ja adúgübalin jawádigimari buídu, lúnti inébewa jamá sarágu, játima gafísiutebalin apúrichijani lúma arúfudajani.

¹⁸ Taríñajare Lerérun Búngiu. “Magúragua jumeí liyúma jilúgün bágasu le lánina wadágimanu lueí lásiñerun leígin lídaangiñe tubúñe fulúwaaru le uágubei ladúgüragua lun lagídaruni túra.” Aríñagatu gíñe. “Garíchati ñadágimeinti lun libíjin lafáyeirujaja.”

¹⁹ Madúgabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidúnrun. ²⁰ Ánjaña ja asígirubaña lídan figóu, lúnti badeínjan joun jagíbugiñe sun afíñetiña lun janúfudedun súngebei lueí jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügúniwa sun gürígia. ²² Míchigabádúgabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidá ni ában queísi fádiri tídan ligílisi lídan loúfudagun, lúnti batúriajani ligáburu buídu lueídügü gafígoun lan, larijwameti camá gúndaatibu láu líffgoun. Dísebá lueí sun le wuríbabei.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügúriña lun jesériwiduni Búngiu ligílisirugu, jarítaguabá luágu añajein lan gürígia arijúati jafígoun furáangu lubáragiñe jagúserun, añajein gíñe, marijinti jafígoun darí lárigiñe. ²⁵ Ítara méme líña gíñe, cátei buíti le jadúgübei gürígia, arijúati furáangu, áni íbini marijín lan, siñáti leréderun arámudagu lun sun dan.

6

¹ Afíñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabei. ² Ánjein añajein lubeí esériwidutiña gayúbudiritiña afíñetiña, moún lumuti loúgua lan jinében joun ladúgarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubuídun jesériwidun, afíñetiña, idújeñu gíñe jínsinegutiña. Arúfudajabei cátei le, apúrichijabeíme.

Arúfudajani maríchati lúma irísini inárüni

³ Ánjein arúfudaja ában gürígia cátei maríchati áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu, ⁴ ában barúgua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, maffíñeni joun gürígia, ⁵ lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irísini agúnfuliruni lúma Búngiu. Dísebá jaweí gürígia ja ítarabaña. ⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei. ⁷ Manúgüntiwa ni cáta wámagua ñájoun ubouágun, siñábei gíñe wanúgün ni cáta yágiñe, ⁸ ánjein geígin wabeí, ganáangun, lúnti gufúruma wamá láu líra. ⁹ Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagúbüri ayúmajani le málati, le ásiñeragüdübei gürígia jebélurun siélun, ába jóudin máfiougatin. ¹⁰ Línsinegu seínsu ligía lílagülebei sun luwúyeri wuríbani, áni añajein sarágu gürígia ladúga jóuchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le láni afíñeni

¹¹ Ánjabuti amúrü, Timotéo, queísi ában ban wügúri derégeñuti lun Búngiu, anúrajabá lueí buri cátei le. Barúba ában ibágari le lánina ísuruni, le lánina gúnfuli lúma Búngiu, le lánina afíñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu luágu láni wafíñen fuleísei, ábame bagáñeiruni ibágari le magúmuchaditi, lun

líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibeí ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵ Dánme lachúlürün dan ligía, le lanúadajabei Búngiu, lagíribuduba Crístu uboúagun, Búngiu rügúñein weírigu, Súnti Gabáfu, Jarúeite urúeigu, Jabúreme abúremeinigu. ¹⁶ Ligía rügúñein moúwedadi, le abágaridubei lídan larúgounga le ñíjin lubeí mayárafadun lan ni ában. Maríjin lágili ni ában gürígia Búngiu, siñáti gíñe larijiniwa. ¡Rúalá uweíríguni lun, arúfudualá lubáfu lun sun dan! Ítaralá.

¹⁷ Ja gámabaña irisini lánina uboú le, aríñagabá joun lun manáangun jamá joúngua luágu, míchugun jameíme jeménigi luágu irisini ligía, lugúndun machoúrunti, lun jíchuguni jeménigi luágu Búngiu, le wínwanbei, áni rúleí sun cátei woun gíbe lun wagúndaarun luágu. ¹⁸ Aríñagabá joun lun jadúgüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹ Ítara lúba jóundaragun irisini jóungua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tídan gárada to

²⁰ Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin uboú, ni sigénei le lánina cátei le gíridügübei subúdi, ²¹ añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labúrüjan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu. ² Nabúrüjañoun gárada to bun, Timotéo le nanúgübei queísi niraú le jínsiñebei nun, resíbibá abíniruni, gudémejabu, lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmragun lun Búngiu buágu ságü nayúmragun áriebu lúma wéyuagu, teínqui numúti Búngiu le únbei nesériwida láu tarúma nanígi quei jadúgüni binádu nagúbüriugu. ⁴ Súnwandan narítangun luágu bayájun dán meja le nígirunibu, buséntina jamúga naríjinibu lun nabuínchun láu ugúndani. ⁵ Jarítaguatina luágu afíñeni inárüni le buágubei, Lóida to bagútü, túma Euníce to bóguchu, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñangunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadúgüni furúmieguarügü cátei, ínsiñeni, lúma ubáfu lun wasáminarun buídu líchugubei woun. ⁸ Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürübei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanúgün ában ibágari le derégewati lun, máma jamúga lueígiñe níjein lan cátei buíti wadúga, ladúga ítara líña lan laráanseruni lubáragiñe ladúgüni ubouú lun larúfuduni lareídun lúma línsiñejabun woun lídaangiñe Jesucrístu. ¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagúnrinchaguni lubáfu ouweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña jurú. ¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níchigei nafíñen, áni choúru numúti luágu gabáfu lan lun loúnigiruni le líchugubei lábugiñe naríaajan daríme lachúlürün wéyu ligía lun lagíribudun Crístu ubouúagún.

¹³ Mígirabeí luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun súngebubei ladúga lídaañadiwa ában lúma Jesucrístu. ¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríaajan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun afíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu weíyaasu, úati gíñe nibúsigari lan láu nadaürüña lan, ¹⁷ lubáragiñe líra, dan le liábinbei ubúru Róma, merédeti lálujanina darí ladárirunina. ¹⁸ Darí lámugei lugúdemejabu Búngiu lídaanme wéyu ligía le lagíribudagüle Wabúreme Crístu ubouúagun. Subúsiti gíñe bun buídu ída líña lan líderaguníwa ubúru Éfeso.

2

Ában lisúdaaran Jesucrístu buíti

¹ Ánjeinti amúrü, niraú, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ² Le cátei lánina wafíñen le agáamba báalibeí naríñangun

jagíbugiñe sarágu geféentiña arúfudajabei joun wügúriña ja afñewati jawágu, ja gayáarati jarúfudajani joun ámu.

³ Awándabei lubeíti sáfuri quei ában lisúdaaran Jesucrístu buíti. ⁴ Úati súdeara le esériwiduti ádaraguti lúngua lídoun ámu cátei lueí le lánina súdeara, lugúndun gásu leréderun dayárugu lábugiñe lerénjan lugúmandan. ⁵ Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶ Le ábunagubei, garíchatu lun ligía lan furúmiñe ibíjei lufánran lídaangiñe alúbajani. ⁷ Samínabá luágu úruwa jémpulu le, ábame gunfarándagüda láni Wabúreme súngubei bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúei Davíd, áni sarágüda lumúti Búngiu lídaangiñe ouweni. ⁹ Niján ugánu le lánina asálbaruni le napúrichijabei, áni lueígiñe napúrichijani, awándatina asúfuriruni darí lun nagúrawagún láu güríngüri camá ában gürígia wuríbati áu. Siñáti leréderuniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúadaja láñabaña Búngiu fuleisei, lun gíñe jayábin lun jabíjini asálbaruni lúma uweírighuni magúmuchaditi siélu ladúga lídan jamá ában lúma Jesucrístu.

¹¹ Inárüni cátei le.

Ánjein jiláadiwa lubeí lúma Crístu, wabágariduba gíñe lúma,

¹² ánjawa awánda sáfuri lueígiñe, gafánraanbadiwa lídan larúeijan.

¹³ Ánjawa múaran, ligía úaramemebei, lugúndun ítara líña ligáburi Búngiu.

Ában ñadágimeinti buíti

¹⁴ Jarítaguagüdebei cátei le joun ja afñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añáwurijarügü lumútiña ja agáambajabaña. ¹⁵ Jouchabei sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu. ¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, jóúdentimaaña lídoun wuríbani, ¹⁷ ábame labúruchagun jarúfudajan quei cásner. Niján le susérebei lun Himenéo lúma Filéto, ¹⁸ ígira jamáali inárüni, jaríñaga luágu sügújali lan lidáani ásaaruni lídaangiñe ouweni, jagúnrinchaguñeiti jafíñen sarágu gürígia ítara. ¹⁹ Wagía afñetiña, wagía lilígilisin Búngiu láu ébuu derégüdati le rúlaalíbei Búngiu, siñáti lánjingichúniwa. Bürúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun lueí wuríbani.”

²⁰ Tídan ában múna weírítu, máma rügüñein umégeni gólu o pláta ñi, níjein gíñe le láuti fuláansu lúma láuti múa, níjein lúnti luweírín-ágei ayúsuruni, níjein lúnti furúmieguarügü yúsu. ²¹ Lun lúnti lan ában ayúsuruni weíríguti ában gürígia le derégeguati lúngua lun Búngiu, ju ligía lun, lúnti jarúma lan libágari, díse ligía lueí sun le wíyebei, ítara lúba ju lan lun furúmieguarügü wadágimanu buíti.

²² Anúrajabá lubeíti lueí jayúmajan wügúriña ñúbürigiña, barúba ában ibágari le lánina ísuruni, afñeni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña. ²³ Madúgabá gásu láu sigénei málati, subúdi báali luágu barú lan líra wuríbu. ²⁴ Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun gürígia. ²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña lúma, lúnti larúfuduni joun táu anígi únabugutu luágu marícha jamá, ladúga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibeí. ²⁶ Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladúgüni labúseerun jáu.

3

Ída jába lan güriquia lídoun búrime lagúmujoún wéyu

¹ Lúnti gíñe basúbudiruni luágu liábin buríba lan wéyu jénreenguti lídounme lagúmujoún dan. ² Joúngua rügúbei buri güriquia jabúseera buíti, jínsiñe seínsu joun, pánta jagía, barúgua joúngua. Jadímurejaba wuríba luágu Búngiu, magáambun jabáña jagúbürigu, meteíngiradibaña, minébeme cátei lánina Búngiu joun. ³ Mínsiñejabubaña joun jarájüñü, magúdemejabu, marásualugubaña, siñábei járügüdagun joúngua, janárimebaña, láganibaña sun le buídubei. ⁴ Jalúgurubaña jamádagu, jadúgüba buri cátei mabuídunti mebéresenga jagía cába lan asúsereda lárigiñe, janárimebei janáangun joúngua, jáluajabei jagúndan guánarügü lubáragiñe jamúga jáluajani Búngiu. ⁵ Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe güriquia ja. ⁶ Jádán buri güriquia ja, añájein já buri ebélurubaña jábiñoun mútu ayéedaña würiña ja débilitiña, já buri buínbaña láu figou lúma láu sun luwúyeri ayúmajani. ⁷ Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸ Ítara quei jawúgürijoun Jánés lúma Jábres, ja gabíñarajadibaña, lun Moisés, ítara líña gíñe jawúgürijoun wügüriña ja lun inárüni. Wügüriña buri ja, wuríbati jasáminan, garábaguaaña luágun waffínen. ⁹ Mawáanserunbaña sarágu, ladúga geféenbei sun ubou luágu ibídiougua lan jáu, quei lasúseredun joun bián jagúra ja awúgürijoubaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Ánjein amúrü, falábaali narúfudajan buídu lúma ligáburi nagáburidun. ¹¹ Subúdi báali narítangun lúma nafínen, aríja báali nugúraasun lúma nísínejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúругu Antioquía, Icónio lúma Lístra. Subúsi gíñe bun ída líña lan leséfurunina Wabúreme Búngiu lídaangiñé buri sun cátei le. ¹² Inárüni luágu jeíbaajoúba lan sun ja busénbaña jabágaridun derégeguañu joúngua lun Jesucrístu. ¹³ Ánjaña ja wuríbabaña jáma ja gayéejadibaña, jaríbadatimaaba, ítara mémejaba ayéeja lúma ayeedúa.

¹⁴ Ánjein amúrü, ítaramemebá derégüdagu lídan le bafúnrendeirubei, le uágubei afíñeedibu lan. Subúdi bumúti luágu inárüni lan le bafúnrendeirubei ladúga gayára lan bafíñerun jawágu ja arúfudajabalin bun. ¹⁵ Subúdi bumúti Lerérun Búngiu lúmagiñe ñúraügidibu. Tídan Lerérun Búngiu, ladárirúa sun lichú áu le busénwabei lun gayára lan jasálbarun güriquia, láu jafíñerun luágu Jesucrístu. ¹⁶ Sun le bürúwañubei tídan Lerérun Búngiu, Búngiu guánarügü íchugubalin jarítangunrugun wügüriña lun jabúrüdüni. Jutu líburu tugúya lun tarúfuduni le inárünibei lúma gíñe lun tarúfuduni le maríchabei, adúgatu lun jígiruni güriquia cátei le mabuídunbei luágu le buídubei, arúfudajatu joun güriquia lun jabágaridun surúñu. ¹⁷ Líburu tugúya, jemégenboun güriquia ja esériwidubaña lun Búngiu lun jadúgüni sun luwúyeri wadágimanu le lúnbei jadúgüni lun.

4

¹ Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jiláguaaña, naríñaguña bun lun bapúrichijani Lerérun Búngiu, ² aráanseñubá lun bapúrichijani, busén jagía güriquia jagáambuni, mabúseerun. Afíñegüda báña, adeínjabá, eréra amúrúme, arúfudajabá joun láu gurásu. ³ Lugúndun lachúlürüba dan dánme le mawándun jamáni güriquia arúfudajani jarúmati, lubáragiñeme líra, jáluajabei arúfudajani le gúnfulibe lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerúbei jagáambun joun. ⁴ Íchugubei janágan luágun inárüni, ábame jadúgün gásu láu sun luwúyeri úraga. ⁵ Ánjein amúrü,

buídulá bisáminan súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶ Áu, sandíguatina núngua luágu nadúgüñein lan lagúmujoún le nuáraati lun Búngiu, yaráfaali lórate noúnwen. ⁷ Ageíndagua náali luwúribun Crístu buídu, eíbaguaadina chülú lúmoun lébeja, adúga náali sun le rúlaalíbei Búngiu nun lun nadúgüni, areída náali arúfudajani le lánina wafíñen jarúmañu. ⁸ Guetó, lagúrabuñadina nafáyeiruaja le lebégi ában ibágari le lánina ísuruni, afáyeiruajaü le lúnbei líchuguni Nabúreme nun, le agúseragüdüti le úaraguabei, lídaanme wéyu ligía. Áni mámarügüba nun líchigei afáyeiruajaü ligía, líchugubei gíñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése. ¹⁰ Ígira láadina Démas, jínsiñetimaati cátei le lánina uboú le lun, ñúdünjati ubúrugun Tesalónica. Ñúdünja Crescénte loúbawagun Galácia, ñúdüñ Títo loúbawagun Dalmácia. ¹¹ Lúcas rügüñein núma ya. Áluajabeí Márcos, banúgeime búmagua, gayáraabei líderagunina lídan wadágimanu. ¹² Oúnaja nan Tíquico ubúrugun Éfeso. ¹³ Dánme biábin, banúgounme cápa to nígiruboun lúbiñe Cárpo yágüta Tróas nun, barúbounme gíñe buri líburu, nigáradan burítima. ¹⁴ Adúgaali Alejandro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladúgübei. ¹⁵ Toúnigiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrodu, úati ni ában íderagutina, ígira jamútina súngubei. Agúrabatina lun mabájüdüñ láni Búngiu cátei le joun. ¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdaneí joun sun gürígia ja mámbaña juríu. Ítara líña leséfurunina Nabúreme lueí yebe ouweni, ¹⁸ áni leséfurubadina lueí sun wuríbani, areída láname lubá larúeijan siélu. ¡Rúalá uweíriguni lun súnwandan! Ítaralá.

Lagúmujoún buri mábugaü lúma abíniruni

¹⁹ Mábugaü tun Prísca lúma lun Aquíla lúma joun lufámilian Onesíforo. ²⁰ Reídeija Erásto ubúругu Corínto, ígira numúti Trófimo láu sándi Miléto. ²¹ Jouchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucrístu. ²² Búma lámuga Wabúreme Jesucrístu, biní laúnme Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN TÍTO

Labúrújan Páblo lun Títo

¹ Áu Páblo, le abúrújabarun gárada to, ában esériwiduti lun Búngiu áu, ában gíñe lání Jesucrístu apóstolu. Oúnaja lumútina lúntima níchugun dúgüdaguau lun jafíñen ja anúdaja láñabaña Búngiu quei lánigu, lun gíñe gayáraabei lan jasúbudiruni inárüni lánina wafíñen, gayára lámuga jabágaridun ában ibágari derégewati lun. ² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéejanbei, aríñaga lumúti luágu líchugubei lan ibágari magúmuchaditi le woun lúmagíñe lubáragiñe ladúgüni ubouú. ³ Guetóti, queisi chülüjali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía. ⁴ Nabúrújañoun gárada to bun, Títo, le nanúgübei queisi niraú le tímatimaati, lídan ában wafíñerun luágu Crístu. Ayúmajatina lun bibíjin abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu le Wasálbaragüle.

Luwádigimari Títo luágu ubouúju Créta

⁵ Léububei nígirunibu luágu ubouúju le gíribei Créta, lun baráanseruni le mégeigilibe lun laráanserún, lúma lun bíchugun fádírigo lídan ságü fulásu queisi naríñaguni bun. ⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti afíñe jamá lirájüñü luágu Crístu, gagáambadi, lun gíñe buídu lan jóuserun lirájüñü lueí gayára lan líchugúniwa jadúnrun. ⁷ Lábugiñeñein laríajaan fádiri luwádigimari Búngiu, ligía lúnti lubeí labágaridun ában ibágari le úaraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu. ⁸ Lubáragiñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügúri le jínsiñejabuti lun le buídubei, lun buídu lan lichúgü, buídume louseruniña sun gürígia, derégeguañu lúngua lun Búngiu, láu ubáfu lun lárügüdagun lúngua. ⁹ Lúnti lárügüdün luágu ugánu inárüniti le uágubei gayára lan weménigidun, le arúfudajoubei lun, lun gayára lan líchugun dúgüdaguau joun ámu láu arúfudajani le richábei, lun gíñe lafíñeragüdüniña ja asígenerubalin.

¹⁰ Lugúndun añájein sarágu magáambaditiña, jádaantima jarásan jurú, ja arúfudajabaña libídiouniga áu, ayéeda jamáña gürígia. ¹¹ Lúnti ladaurúniwa jayúma ja, ladúga chagáguagüdatiña sarágu famíliá láu jarúfudajani le moún lubei, lun jagáñeirun seínsu láu múarani.

¹² Aríñagatí meja ában chu táu Crétana, le ní bubei guetó, jawágu lupaísanun. “Gürígia Crétana, súnwandan yé jama, machúlaaguntiña, jalíluatiña, magúali.” ¹³ Áni inárüni laríñagubei. Ligía lubeíti, badeínja joun jére, lun jóúdin láu arúfudajani le richábei luágu wafíñen, ¹⁴ lun gíñe mebéresen jamá láu buri úraga le jadágun jurú, ni láu le jaríñagubei gürígia, játima íchugubalin janágan luágun inárüni.

¹⁵ Queisi laríñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu gíñe janígi. ¹⁶ Aríñagatiña luágu subúdi lan Búngiu joun, láu buri cátei le jadúgübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadúgüni le buídubei.

¹ Anjeinti amúrú, Títo, lúnti barúfudajani luwúyeri igáburi le lúnbei jagáburiduni afíñetiña luágu Crístu, ában ibágari le úaraguabei lúma inárüni le lúmagiñebei Búngiu. ² Lúnti mátun jamá wügúriña weíyaaña mútu, inébewa jagíame, buídu jachúgü, derégüdagu lídan jafíñen luágu Crístu, buin láu ínsiñejabuni lúma gurásu. ³ Würíña gíñe ja weíyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun, ⁴ lun jarúfudajan joun würíña ñúbürigiña jawéi lun jínsiñe jamá jámari joun, jínsiñe jarájüñü joun, ⁵ lun buídu lan jachúgü, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágarari würíña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu afíñeruni luágu Jesucrístu.

⁶ Arúfudajabá joun wügúriña irájüñü lun buídu lan jachúgü, ⁷ rúba ában jémpulu buíti joun lídan sun cátei. Arúfudajabei lérügü inárünibei joun láu ában igáburi derégüdati, ⁸ adímurejeina láu ában igáburi magádieti le uáguti lásiñera ladárirún mégeiti. Ítara lúba janúgüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰ lun míwerujan jamá, lun jarúma lan jagáburi le gumúti jáma jayúbudirigu lun larijñiwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürígia lídaangiñe luríban jagáburi. ¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubouú, lun wabágaridun ában ibágari le buíti ligíbuagu ubouú le, ragúguañu woúngua, derégeguañu woúngua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei laríñaga Búngiu—lagíribudun Wabúngiute, Wasálbaragüle Jesucrístu ubouúgun láu sun luweírigun. ¹⁴ Derégeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun láni wamá, aráanseñu lun wadúgüni le buídubei.

¹⁵ Ligía buri cátei le lúnbei barúfudajani, íchigeina dúgüdaguaü, arérejeina láu sun ubáfu. Míchigabá lúgaaru lun banügüniwa quei ni cáta.

3

Cátei lé buri lúnbei jadúgüni afíñetiña

¹ Jarítaguagüda báña afíñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadúgün furúmieguarügü cátei buíti, ² lun madímurejan jamá wuríba luágu ni ában, lun dilí lan jóuserun, areída jagíame, lun únabugu jamá lídan jóuserúniwa sun gürígia.

³ Lugúndun wagía afíñetiña, ibídiouguati meja gíñe wáu, magáambadi wagía meja lun Búngiu, barútiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adúga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Anjeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ ába lasálbaruniwa, máma jamúga ladúga wadúgün som cátei buíti, ladúga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucrístu, lun wámabei lan láu sun luweírin lubáfu. ⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu. ⁸ Inárüni cátei le.

Buséntina lun barúfudajani buri cátei le láu ában éregu, lun ja lan affíñebaña luágu Búngiu, lun súnwandan lan jíchaagun jóungua lun jadúgüni cátei le buídubei. Buíti cátei le, áni buíti lanúgün joun sun gürígia. ⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manúgünti buíti lun ni ában.

¹⁰ Ánjein ñí lubei ában tílana ligílisi le adúgübalin fáreinguaü, erérabá lun ában o bián weíyaasu, ánjein madúgün gásu báu, ígirabeí lúngua. ¹¹ Subúdi báali luágu ígira láali lan wügüri ligía úma le surúbei láu luwúyeri labágaridun.

¹² Dánme noúnajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügrei lidáni luríbouga. ¹³ Íderaguabeí Zénas, le subúdijabúbei lun lúruđu, lúma Apólos lídan sun le buáraati, rubeíme le jemégeirubei joun lun jasígiruni jaweíyasun. ¹⁴ Furéndeí jamá gíñe sun wánigu lun jadúgüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja nómabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN FILEMÓN

Labúrújan Páblo lun Filemón

¹ Áu Páblo, le nadaürúñabei lueígiñe napúrichijan luágu Jesucrístu, nabúrújañoun gárada to, úara lúma Timotéo, le wadúje lueígiñe Crístu, bun, Filemón, le weíribei ínsiñe woun, le gíñe woúba lídan wadágimanu. ² Gárada to, joúntu gíñe tílana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafíñen

⁴ Teínqui numúti Búngiu súnwandan lídan le narítangun buágu lídan nayúmuragun lun, ⁵ lugúndun agáambaadina luágu ínsiñejabuni lúma afíñeni le buágubei lun Jesús lúma joun sun ja lánigubaña Búngiu. ⁶ Amúriajatina lúma Búngiu lun ja lan afíñeñabaña luágu Crístu ladúga baffínen, lun jayábin lun gunfaráanda jamáni sun abíniruni le wabíjibei lúmagiñe Jesucrístu, buídu. ⁷ Nidúje, oúnwenbun nugúndan lúma dúgüdaguau le nídaanbei luágu bínsiñejabu, lugúndun darángilajaru janígi ja afíñebaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun naríñaguni le lúnbei badúgüni bun, ⁹ jímein numúti ayúmuraguarügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürúña lueígiñe napúrichijan luágu Jesucrístu. ¹⁰ Amúriajatina ában fuleísei búma lun Onésimo, le ítarajalíbei queísi niraú lídan Jesucrístu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügújalibei, ában meja idámuni moúnti Onésimo bun, ánjeinti guetó, gebégiti bun queísi nun. ¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun, queígubeirügü jamúga noúnajañoun lan nanígi, le luweírín línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürúwa lueígiñe napúrichijani ugánu le lánina asálbaruni. ¹⁴ Mabúseerúntina nadúgün ni cáta magúndaga amúru láu, lun máma lan láuti afósurun fuleísei le badúgübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúurunbei Onésimo bueí luágu átiri dan lun búmabei lan guetó lun sun dan, ¹⁶ guetó mámarügü queísi ában idámuni, queísi cátei buítimaati lueí idámuni—queísi ában idúje jínsiñeguti. Weíríti línsiñe nun, lúnti jínsiñetima lan bun, mámarügü queísi wügúri, queísi gíñe ában idúje lueígiñe Crístu.

¹⁷ Ánjein lubeíti barú bubálina queísi ában boúba lídan wesériwidun lun Crístu, resíbibeí queísigubeirügü jamúga áu lan berésibirubei. ¹⁸ Ánjein adúgaali lubeí dáñu bun, o ánjein dúwei lubálibu, agúburaja bána. ¹⁹ Áu Páblo, nabúrújañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdüniibu luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun. ²⁰ Ánja, nidúje, adúgabeí fuleísei le nun queísi afíñeti luágu Crístu, ámalijaboún nanígi queísi idúje lueígiñe Crístu.

²¹ Nabúrújaña bun lugúndun choúru nan luágu bagáambadi, áni subúdiiti nun luágu badúgüba lan sügú láu le uágubei namúriaja búma. ²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le nouba furísunrugu lueígiñe lapúrichijan luágu Jesucrístu, ²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraú

¹ Lídan meja dan le sügújalibei, adímurejati meja Búngiu joun binádu wagúbürigu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujoún dan le, adímurejaali woun lídaangiñe Liraú. Lídaangiñe Liraú le, ladúgei uboú, áni rúlaali sun cátei lun. ³ Arúfuda lumúti Liraú Búngiu luweírigun Lúguchi luóúgua, ligía méme Búngiubei, ligía ágüdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraú Búngiu sügú jáu ánjeligu

⁴ Núbinjali Liraú Búngiu lun weírigubei lan jaweí ánjeligu, resbíjali ában ubáraü íñugutimaati jaweí queísi lalágaante queísi Liraú Búngiu. ⁵ Maríñagunti Búngiu ni ában weíyaasu lun ni ában ánjeli.

Niraú amúrü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amúrüme nisáani.

⁶ Ánjeinti dán meja le loúnajaabalin Liraú le ábanrügüti uboúagun, aríñagati. Judúgua jamá sun náni ánjeligu lun.

⁷ Laríñaga jawágu ánjeligu.

Adúgatina lun ítara jamá náni ánjeligu camá garábali,
adúga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraú aríñagati Búngiu ítara.

Búngiu, lúntibei súnwandan bañúurun luágu bála lun barúeijan,
láu ában úraguni bagúmadija.

⁹ Jínsiñeti le richáguabei bun, iyéreeguti le wuríbabei bun,
ligía níchugunbei, áu le Bubúngiute, gíbetima ugúndani bídoun sügú jáu bíbirigu.

¹⁰ Áriñagati gíñe.

Amúrü le Abúremein, lídan lagúmeseja, adúga bumúti uboú,
láu bújabu badúgei siélu.

¹¹ Lagúmuchuba siélu lúma uboú, ánjein amúrü, beréderuba lun sun dan.

Liábiba siélu lúma uboú lun laweíyadun quei anáanguni,

¹² babáruchagubaña quei ában daúguaü,
jasáansirúaba quei anáanguni.

Ánjein amúrü, ában mémebadibu, magúmuchunbei bibágari.

¹³ Maríñagunti Búngiu ni ában weíyaasu lun ni ában ánjeli.

Ñurúba lueígiñe noúnwenren darí lun nagáñeiragüdünibu jawágu báganiñu,
ru náname bújaburugun.

¹⁴ Sun ánjeligu, espíritugu esériwidutiña lun Búngiu jagía, oúnajóutiña lun jíderaguniña ja lúnbaña jerésibiruni asálbaruni lídaangiñe jafígoun.

¹ Queí ítara líña lubeí luweírigun Liraú Búngiu, lúnti lubeí weténiruntima lun ugánu le agáamba wamaalíbei luágu, lun madíreirun wamá lueí úma. ² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madúgün jagía gásu láu, áburujati ligáni Búngiu jawágun láu iríchaü. ³ Gúbuméti wafáyeija luágu wafígoun ánjein mouñigirun wamá oúnwenbun asálbaruni le resíbi wamaalíbei lúmagiñe Jesucrístu le Wasálbaragüle. Wabúreme Jesucrístu guánarügü adímurejabei luágu asálbaruni le furúmiñe, lárigiñe, ja agáambubalin, ában jásiügüragüdüni woun láu ában achoúruruni luágu inárüni lan. ⁴ Nurúgüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu quei libíriña

⁵ Míchugun lumúti Búngiu ubouú líte le uágubei wadímureja lábun jagúmadijan ánjeligu, ⁶ lubáragiñe líra, laríñajare tídan Lerérun.

Búngiu, ¿cáteiñeinsan wügúri lun barítaguba lan luágu?

¿Cáteiñein wügúri gouwedaditi badíjeridunbei láu?

⁷ Rúbumuti únabu jaweí ánjeligu luágu murúsun dan,

daúguagüda bumúti láu uweíriguni lúma inébesei,

ru amúrü ubáfu lun luágu sun cátei le badúgübei,

⁸ rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñúdünti láu le lubeíbei wügúri. ⁹ Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu únabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun loúnwen Crístu jawágu sun gürígia, áni guetóti, daúgu líña láu uweíriguni luágu ouweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirájüñü lídan luweírigun. Ligía lúnti lubeí buga lasúfurirun Liraú Búngiu, le Jesucrístu, queísi ában gürígia lun ligíaba lan ában asálbaragülei gumúti láu asúfuriruni.

¹¹ Ja edéregerúabaña jarúma lun Búngiu lúma Liraú le edéregerubaliña ítara, sun jagía ában meme Úguchili—Búngiu. ¹² Ligía úa lubeí nibúsigari lan Liraú Búngiu lun lagúaruniña lamúlenu jáma lítunu dan le laríñagun lun Búngiu, queísi bürúwañu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigun lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában família, ában meme jítaü jagía, ítara gíñe, wügúri meja gíñe garaúwarügüti Jesúsú, lun meja gayáraabei lan loúnwen, gayára lámuga lagúnrinchaguni lubáfu Máfia le ídaangiñebei liábin ouweni joun gürígia. ¹⁵ Ítara líña gidá lumuti Jesucrístu janúfude gürígia, já meja aganoúbaña quei idámuni lun anúfudei lueí ouweni.

¹⁶ Masáliragunti Crístu queísi ánjeli lun líderaguniña ánjeligu, salíti queísi wügúri garaúwarügüti lun líderaguniña gürígia líledi, ja linébaanfaangu Abrahám, ja lúnbaña jafíñerun luágu. ¹⁷ Lúnti líra, gásu meja ítara lúba lan queísi libíriña, lun liábinba lan lun ábanbei lan fádiri íñutimaati, le úaraguati, láu gudémejabu joun gürígia, lun gíñe lachíbuni jafígoun gürígia láu ledéregeragun lúngua luágu gurúwa. ¹⁸ Áni queíti súfuri lan, áni ouchagualeí Máfia, guetó gayáraati gíñe líderaguniña lídan le wouchawagún.

Weírigutimaati Jesúsu lueí Moisés

3

¹ Ítara líña lubeíti, nidújeñu derégeguatiña jóungua lun Búngiu, quei jádaangiñetün lan ja únbaña wájali lan Búngiu lun jaganoun luma siélu, téni jumá buídu lun Crístu le loúnajabei Búngiu, le gíñe fádiri ínútimaati le lánina affñeni le wawágubei. ² Úaraguati Jesúsu luma Búngiu lídan sun wadágimanu le únbei lanúadirei, queísi meja gíñe úaragua lan Moisés lídan sun lesériwidun jádan lufámilian Búngiu. ³ Gadúnatimaati Jesúsu uweíriguni sügú láu Moisés ítara quei resíbitima lan le adúgübei ában muna uweíriguni sügú táu muna to ladúgüboun. ⁴ Sun muna adúgarügü lumútu som gürígia, áni Búngiu adúgübalin sun cátei le níjeinbei. ⁵ Ítara liñáti, úaraguati meja Moisés lídan lesériwidun jádan lufámilian Búngiu queísi ában esériwiduti lun Búngiu, wadágimanu lé meja ladúgübei, ában liyáwa inárüni le lúnbei lasúbudiragüdúniwa lídan dan le lúnbei liábin. ⁶ Ánjeinti Crístu, úaraguati queísi isáani jádan lufámilian Búngiu, áni jádaangiñetiwa família jagía ánjawa derégüdagu méme, ánjawa gíñe affñe darí lúmoun woúnwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le laríñagubei Sífiri Sándu tídan Lerérun Búngiu. Ánjein jagáamba le laríñagubei Búngiu ugúñe, ⁸ medéreratá janígi queí meja tedérerun janígi magáambaditiña ja ouchagubalin Búngiu lídan fulásu mageírawati. ⁹ Lídan bián-wein irúmu le jáubei ñi, jóuchagua jamútina binádu jagúbürigu lídan fulásu ligía, líña Búngiu, láu sun aríja jamáni buri cátei le nadúgübei. ¹⁰ Ligía nagáñidunbei jáma gürígia jagía, ába naríñagun. “Súnwandan charárañu jamá tídan janígi, májatiña jafálaruni úma le narúfudubei joun.” ¹¹ Ligía nagáñidunbei jáma, ába náfiñurun luágu mebélubaña lan lídoun fulásu lé yebe aráanse náalibei jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wíñwanbei láu maffñerun jumá luágu. ¹³ Lubáragiñe líra, rújuma gurásu júniwagua ságü wéyu, sun níjangua lan dan. Toúnigi jumá lueí leyéedagunün figoú, edéreragüdounme janígi, ¹⁴ lugúndun ánjawa ítara méme derégüdagu darí woúnwen lídan affñeni le wawágubei lúmagiñe furúmiñeti, gafánraanbadiwa luma Crístu.

¹⁵ Níjangua dimúrei le, le gíñe woúnbei, wagía le wíñwanbei lídoun buri dan le.

Ánjein jagáamba le laríñagubei Búngiu guetó, medéreratá janígi queí jagúra ja magáambadibaña lun Búngiu. ¹⁶ ¿Cátañati agáambubalin lumálali Búngiu, larigiñe, ába jagáñidagüdüni láu luríban jagáburi? Sun ja laságarubaña Moisés Ejíptogiñe. ¹⁷ ¿Cáti úma lagáñida Búngiu bián-wein irúmu? Jáma ja afígounjabaña, ja ouwegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse láalibei joun lun jeméraagun ñi? Joun ja adúraagubalin le lubeíbei. ¹⁹ Ítara líña lubeíti, goúnigi jumá lun jaffñerun meme darí lúmoun jóunwen, lugúndun ladúga maffñeni le jawágubei binádu wagúbürigu, siñá lubeí meja jebélurun lídoun fulásu le aráanse láalibei yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibei Búngiu woun siélu, lúnti goúnigi wamá, siñádügü liñeín lebélurun ában wádaangiñe, dánme lachúlürün óra lun woúnwen. ² Lugúndun apúrichijoúali

gíñe ugánu luáguti asálbaruni woun queísigubeirügü joun binádu wagúbürigu, meséri-winti lun ni cáta joun jagáambuni ugánu ligía lugúndun agáamba jamúti, maffínerunga luágu. ³ Ánjeinti wagía le affíneelibe, wagíaba ebélura lídoun eméraaguni le, le uágubei laríñaga Búngiu.

Ligía nagáñidunbei jáma,

ába náfiñurun joun luágu mebelubaña lan lídoun fulásu le aráanse náalibe yebe jabá lun jeméraagun.

Ítara líña lerérun Búngiu jawágu binádu wagúbürigu. Aráanserúati fulásu lánina eméraaguni joun lúmagiñe wéyu le lagúmuchuni Búngiu ladúgüni ubou, ⁴ queísi labúrüdúniwa tídan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya ítara.

Mebélubaña lídoun fulásu le aráanse náalibe yebe jabá lun jeméraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméraaguni jabá gürígia, ja binádu wagúbürigu, ja furúmiñebaña agáambe uáganu lánina asálbaruni, mebelutiña ladúga maffíñeni le jawágubei lun Búngiu. ⁷ Ligía laráanserunbei Búngiu ámu dan lun gayáraabei lan jebélurun iséri gürígia lídoun jeméraagun, lugúndun adímurejati Búngiu lídaangiñe lé meja laríñagubei Davíd sarágu dan lárigiñe, tídan Lerérun Búngiu. Ugúñe, láu jagáambuni le laríñagubei Búngiu, medéreratá janígi lun.

⁸ Lun jamúga fulásu lan lé meja ñíjin lubeí lanúgaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu irúmu lárigiñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun. ⁹ Ítara líña lubeíti, njeingua ában eméraaguni le gumúti joun lánigu Búngiu, ¹⁰ lugúndun le ebéluruti eméraagua lúma Búngiu siélu, eméraaguati lueí luwádigimari ítara quei leméraagun meja Búngiu lueí luwádigimari lárigiñe ladúgüni ubou. ¹¹ Lúnti lubeíti waffínerun le tímatimaati luágu Jesucrístu lun gayára lan webélurun lídoun eméraaguni siélu, faládügü liñálin ában wádaangiñe jáni já meja maffínerunbaña jémpulu, ábame leféridirun.

¹² Lugúndun mítaraantu Lerérun Búngiu queísi ában cátei le jiláalibe, lubáragiñe líra, gabáfuti lun lasáansiraguni wagáburi. Belútu tídoun wanígi queísi ában efeín to biángua tamána, belú tugúya chülú túmoun wawáni lúma wáni espíritu. Furáangugüda tumúti sun warítangun lúma sun wayúmajan, arúfuda tugúya cátañañadiwa lan. ¹³ Úati ni ában gürígia le ladúgübei Búngiu lun gayára lan larámudagun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiriñebei le tímatimaati

¹⁴ Jesúsu le Liraú Búngiu, ligía wafádiriñebei le tímatimaati, le belújalibe siélun lun laráramun ligíbugiñe Búngiu abúyeija luágu wafúleisein. Ligía lunti lubeí derégüdagu méme wamá lídan ligáburi waffíñen. ¹⁵ Gayáraati gudémejabu lan Jesucrístu le wafádiriñebei woun luágu wadébilin, lugúndun ligía guánarügü súfuriti sun luwúyeri ouchwaguni quei wagía, maffígounjaanti. ¹⁶ Ligía lúnti lubeí wayarafadun lun Búngiu le jínsiñejabúbei woun, láu affíñeni, lun gudémejabu lan woun, íderagua lówame láu lareíni lídan wemegeirun.

5

¹ Según wagáburi, wagía juríu, ságü ában fádiri le íñutimáabei anúadajouati wádaangiñe lun ligíaba lan wachúgüdina ligíbugiñe Búngiu, lun gíñe líchuguni edéweejani lun Búngiu lueígiñe joubadina gürígia, lúma adágaragüdüni luágu lifígoun lúma luágu jafígoun jíbiri gürígia. ² Quei débili lan fádiri guánarügü quei furúmieguarügü gürígia, gayáraati gudémejabu lan joun gafígountiña jáma acháragadutiña, ³ áni ladúga lidébilin

guánarügü queísi furúmieguarügü gürígia, gásu gíñe ladágaragüdün luágu lifígoun guánarügü queígubeirügü luágu jafígoun jíbiri gürígia.

⁴ Siñáti ladágun ában gürígia lúngua fádirimle le íñutimaabei láu lání lúngua, Búngiu anúadirubalin, rúleí ubáraü le lun queísi meja lasúseredun lun Aarón lé meja furúmiñeti fádiri le íñutimaabei. ⁵ Ítara líña lasúseredun lúma Crístu, máma ligía íchaagubei lúngua fádirimle íñutimaati láu lání lúngua, Búngiu íchugubalin ubáraü weíriguti le lun queí buga laríñaguni lun.

Niraú amúrü,
rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádiri amúrü lun sun dan,
le líbe Melquisedéc.

⁷ Dán meja le laganoúnbei Crístu ya ubouágu, ayúmuraguati meja láu umálali jéreti lúma sarágu águiraü lun Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagáambuni Búngiu ladúga derégeguñu líña lan Crístu lúngua lun lugúndan Búngiu. ⁸ Láu sun Liraú lan Búngiu Crístu, chülúti dan lun larúfuduni lagáambadi láu lawánduni asúfuriruni. ⁹ Núbinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñúdüntiña láu le lubeíbei. ¹⁰ Ába lanúgüni Búngiu Crístu quei fádiri íñutimaati líbe Melquisedéc.

Wuríbani le líchugubei lígirúniwa afíñeni

¹¹ Gíbeti lúnti waríñaguni jun luágu Crístu lúma Melquisedéc, jénreenguti laríñawagún furáangu, lugúndun siñá lan gunfaráanda jumáni. ¹² Sügújali sarágu dan lúmagiñe jasálbarun, lúnti jamúga gayáraajali lan jarúfudajani Lerérun Búngiu joun ámu, áni busén mémegidün narúfudajaniya buri cátei létima ménreengúnbei lídaangiñe Lerérun Búngiu jun. Irájüñügüdün lídan jafíñen, queísi irájüñü ja gásubaña játun míligi lubáragiñe jamúga jeígin eígin le dúgüdati. ¹³ Afíñetiña ja buséngiñabaña larúfudajóuniwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña—úgíli gunfaráanda jamáni Lerérun Búngiu buídu. ¹⁴ Ja weínamujañábaña lídan jafíñen, subúdi Lerérun Búngiu joun buídu, subúdi jameí arúfudajani le buídubei lúmoun le mabuídunbei.

6

¹ Queímoun méme lubeíti wabáruaguóun lídan wasúbudin luágu Lerérun Búngiu, ígira wamámugei arúfudajani le ménreengúnbei libúgürü Crístu lun watúriajani lujúlilin-ágei. Marítagua wamá luágurügü lébu wafíñen, queí buri ligirún binádu igáburi le málati, lúma buri afíñeni luágu Búngiu, ² arúfudajani luágu badísei, líchugúniwa újabu jábulugu afíñetiña, jásaarun jiláaña lídaangiñe ouweni, lúma lagúmujoún lagúseragüdüniña Búngiu gürígia, ³ queímoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gürígia ja resíbi jamáalíbei larúgouna ában weíyaasu, resíbi jameí Crístu queísi jasálbaragüle, resíbi jameí gíñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu— ⁶ ánjein jíchiga janágan luágun Crístu lárigiñe sun cátei líra, ába jagíribudun járigoun lídoun binádu jagáburi, siñáalime jaságüríjan, siñáalime gíñe lánigu jamá Crístu. Lun jamúga jíchuguni janágan luágun Liraú Búngiu lárigiñe jafíñerun luágu, queísigubeirügü jamúga jádaraguñeinya lan luágu gurúwa, jéjerajaña gíñe láu jagíbugiñe gürígia. ⁷ Gürígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladúga binílaali lán buga Búngiu múa ligía. ⁸ Gürígia ja íchugubaña janágan luágun Crístu, ítara

jáña quei múa le ñí lumuti lájücha jýyu lúma lagúbüri jíduru, úati ju lan lun ni cáta. Láburujaba lábun líñaragun Búngiu, ábame lagudún.

Eménigini le adügübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, affñetiwa luágu ítara júba lan quei múa le íchugubei inádiri buíti, áni jibíjubei sun abíniruni le ñúbinbei woun luágu wasálbarun. ¹⁰ Lugúndun úaraguati Búngiu, áni mabúlieidun lubei le adúga jumáalibei, lúma ínsiñejabuni le arúfuda jumáalibei lun láu jíderaguniña jidújeñu luágu affñeni, cátei le anjúnjaguabei adúgei. ¹¹ Buséntiwa lun ítara méme lan cáda ában jídaangiñe, arúfudei affñeni le darí lúmoun joúnwen, lun gayáraabei lan jibíjini le jagúrabubei—lun jebélurun siélun. ¹² Mabúseerúntiwa lun jamágualigudun lídan cátei le láni Búngiu, busénrügütiwa lun jáyeijani jagáburi já meja affñebaña buídu buídu luágu Búngiu, awánda jamei sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guánarügü líri ladúga úa lan ámu weírigutimáati luei lun láfiñurun luágu, ¹⁴ ába laríñagun. “Nabínirubadibu sarágu, níchuguba gíñe sarágu adúgawaguni bun.” ¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun. ¹⁶ Dan le jáfiñurun gürígia, luágu ában le weírigutimáati jawei jáfiñura, áni choúrujaña ligíati ában cátei láu fiñún, úaali ámu cátei lun laríñawagún. ¹⁷ Ligía lachoúrurunbalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúnfulirubei lan lerérun luágu wasálbarun, masáansirunga ni cáta lídaangiñe. ¹⁸ Rúlaali Búngiu lerérun woun, rúlei láfiñurun luágu, bián cátei ligía, gayáraati wemenigidun luágu, ladúga siñá lan leyéjean Búngiu. Áni láu cátei ligía, sun ja ñúbinbaña lun Búngiu lun jasálbarun, gayáraati janúgün gurásu, gayáraati jasúbudiruni le tímatimaati luágu jasálbaruba lan áni jebéluruba siélun. ¹⁹ Ágüdaja lumútu eménigini le wawáni derégüdagu, choúruñu, queisi lágüdajanun oúnguru ugúnein derégüdagu. Choúruwañu líña eménigiruni le wabíjubei buídu buídu, ragúñu líña luágu Búngiu lídan fulásu sándutimáati siélu, ²⁰ le ñíjin lubei lebéllura Jesúsu ában weíyaasu wawágu lun ladáraruni úma wabá. Níjein ñi guetó afádirija wawágu ligíbugiñe Búngiu queisi ában fádiri iñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribei Sálem, lufádiriñein gíñe Búngiu le iñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” quei mejati lurúeite lubei Sálem, áni “darángilau” míni lan Sálem, ítara líña lubeiti “lurúeite darángilau” Melquisedécbei. ³ Ibídiñewati ca lan lagúbüriegubaña, ibídiñeti gíñe ca lan linébaanfaangubaña, ibídiñewati ni cáta libúgürü lagúriajóun ni libúgürü loúnwen, liyáwa Liraú Búngiu ligía, ában fádiri lun sun dan.

⁴ Aríja jumeiti luágu weírigu lán meja Melquisedéc. Abrahám guánarügü lé meja binádu wadúje, rulumuti ában lídaangiñe cáda díisi lun lídaangiñe le lagídarubei jawei urúeigu lídan wuríbu. ⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jamagiñe gürígia lídaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidísin cátei luei Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñáti lasígeneruni ni ában luágu weírigutima lan le abínijabei sügü

láu le abínirúabei. ⁸ Ya wádan, fádirigu ja erésibirubalin cáda lidísin cátei, wügúriña gouwedaditiña, ánjeinti luágu Melquisedéc, tadímurejan Lerérun Búngiu luágu quei luágu ában le wíngwili. ⁹ Áni gayáraati lariñawagún luágu Leví jáu sun fádirigu ja linébaanfaangu ja agúburajabalin cáda lidísin cátei guetó, luágu fáyei jamáni gíñe lun Melquisedéc lídan óra le lafáyeirunbalin Abrahám lun, ¹⁰ lugúndun lídan ában oubaü, barú lumutiña buga Abrahám linébaanfaangu ja magúriajoungiñabaña lídan lúgubu dan le láfuridunbei Melquisedéc lubároun.

¹¹ Jádaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibeí jafádirin. Gürígia ja afálarubalin lúrudu ligía, lun jamúga gayára lan jasálbarun le tímatimaati lueígiñe, memégeirunwali jamúga lachúlaagun ámuya fádiri, máma líbe Aarón, líbe Melquisedéc. ¹² Lugúndun dan le liábin fádiri lídaangiñe ámu adúgawaguni, sáansiwati gíñe lúrudu lé buga lábugiñebei lafádirija. ¹³ Wabúreme Jesucrístu, queísi fádiri lídaangiñe ámu adúgawaguni queísi Melquisedéc, sáansiguati gíñe lúrudu le lábugiñebei lafádirija. Tariñajare Lerérun Búngiu luágu lídaangiñeti lan ámu liraú Israel lueí Leví liábin Crístu—ában adúgawaguni le úagilibei ni ában jádaangiñe afádirijati. ¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni mariñagunti Moisés ni cáta jawágu adúgawaguni ja dan le ladímurejaanbei jawágu fádirigu.

¹⁵ Áni furángutimáati le dan le liábin Jesucrístu lun lafádirijan queísi Melquisedéc, ¹⁶ máma láu ában lúrudu le aríñagubei cába lan ídaangiñe adúgawaguni liábin, liábin lun fádiribeí lan lugúndun gabáfu lan lun labágaridun lun sun dan. ¹⁷ Niján le lariñagubei Búngiu luágu Jesucrístu.

Ában fádiri amúrú lun súnwandan,
le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebei jafádirijan Levítagu, lugúndun nírein lan mégeiti luágu, ¹⁹ mabáfuti lúrudu ligía lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le ídaangiñebei gayára lan wayárafadun lun Búngiu.

²⁰ Áni láu ában fiñún ladúgei Búngiu aráanseruni le lun Jesúsuba lan wafádiriñe. ²¹ Ja jíbiri fádirigu, máfiñurunwati dan le líchugunbei jafúlasun joun, ánjeinti luágu Jesúsú, le láubei fiñún líchugúa lufúlasun lun, lariñajare tídan Lerérun Búngiu.

Áu Búngiu le Abúremeinbei, fiñújadina bun,
masáansiragun nubeí narítangun.

“Ában fádiri amúrú lun súnwandan,
le líbe Melquisedéc.”

²² Ligía Jesúsú lubeí achoúrurubei ában darádu buítimaati lueí le furúmiñeti. ²³ Já meja jíbiri fádirigu, chülútiña agíbedagua lugúndun quei ába lán buri jounwen, siñáti jasígirun, ²⁴ ánjeinti Jesúsú, quei mounwen lan, másügürünbei lifísiute queísi fádiri lúmoun ámu. ²⁵ Ligía gayára lubeí lasálbaruniña ja ayárafadubaña lun Búngiu lídaangiñe le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsú lubeíti fádiribeí íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gáfígountiña, iñurúa ligía íñutima lueí sun cátei siélu lun lañúurun luma Búngiu. ²⁷ Mítaraanti quei jíbiri fádirigu íñutimaatiña ja gásubei jáfarun ánimaalu lun jadágaragüdüniña quei sacrificísiu ságü wéyu, furúmiñe luágu jafígoun guánarügü, lárigiñe luágu jafígoun jíbiri gürígia. Lubáragiñe líra, adúga lumúti Jesúsú sacrificísiu ábanrügü weíyaasu dan le líchaagunbei lúngua lun lounwen luágu jafígoun gürígia. ²⁸ Wügúriña ja débilibaña, jagía líchugubaña lilúrudun Moisés queísi fádirigu, ánjeinti lárigiñe lidáni lúrudu, ába láfiñurun Búngiu luágu Liraú lun ladúgüni fádirime, le buídubei adúgün le gumúti lun súnwandan.

Jesúsu búyei lun ában iséri darádu

8

¹ Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduña queísi fádiri lídan fulásu le sándutimáabei le ladúgübei Wabúreme Búngiu yágüta siélu, máma fulásu le sándutimáabei le jadúgübei gürígia ya uboúagu. ³ Sun fádiri íñutimaati líchugúniwa lun líchugun edéweejani luma adágaragüdüni lun Búngiu, ligía gásu lubei gíñe njein lan som cátei lúnti ladágaragüdüni Jesucrístu lun Búngiu. ⁴ Lun jamúga yáñein lan Jesucrístu uboúagu, mámañein jamúga fádiri, lugúndun añájeingua fádirigu adágaragüdütiña le uágubei laríñaga lilúrudun Moisés. ⁵ Fádirigu ja, jadúgüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladúgünun Moisés lúban Búngiu, ába laríñagun Búngiu lun. “Adúgabeítia sun cátei queísi iyáwaü to narúfuduboun bun luágu wúbü.” ⁶ Weíriguti lafádirijan Jesucrístu sügú láu jafádirijan fádirigu uboúagu, queísigubeirügü buítima lan darádu le uágubei labúyeija luma Búngiu luágu jáni gürígia fuleísei uboúagu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladúgübei Búngiu jáma binádu wagúbürigu lídaangiñe Moisés, memégeirúnwati jamúga ábanya libíaman darádu. ⁸ Magúndaatí buga Búngiu laú furúmiñeti darádu ladúga mabáfu jamá binádu wagúbürigu lun jagúnfulirun luma darádu ligía. Ába laríñagun tídan Lerérun.

Laríñajare Jabúreme Búngiu. Lachúlürüba wéyu lun nadúgün iséri darádu jáma buri linásiñun Judá luma Israél.

⁹ Mítaraanbei quei darádu le nadúgübei jáma binádu jagúbürigu le wéyu le nárügüdünbalin jájabu lun naságaruniña Ejíptogiñe, magúnfulirun jamúti meja nidáradun ligía, ligíati nígirunbáliña jóungua, líña laríñagun Búngiu.

¹⁰ Niján darádu le lúnbei nadúgüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítangun, ábame nabúrújani tídan janígi.

Áubati Jabúngiute, jagíame nánigu.

¹¹ Memégeirúnwabei lun larúfudajóuniwa nuágu, maríñagunbei wügúri ni lun lidúje ni lun libíri lun jasúbudiruni Búngiu le Jabúremebei, lugúndun jasúbudirubadina súngubei, lúmagiñe le ñúraütimaabei darí lúmoun le weíritimaabei jádaangiñe.

¹² Ferúduna nubeí wuríbani le jadúgübei, nabúlieidubei jafígoun lun sun dan.

¹³ Adímurejaali ligía Búngiu luágu ában iséri darádu, rúlaalírügü líña le furúmiñeti quei binádu, áni cátei le binádujalibe, mayúsurunwadügüyaali.

9

Lúban Búngiu to uboúaguna túma Lúban Búngiu to siéluna

¹ Lídan meja le furúmiñeti darádu le ladúgübei Búngiu jáma binádu wagúbürigu, rúlumuti meja gumádi joun ída lúba lan jájuduragun lun, ñíñoun gíñe ában múna to sánduboun ya uboúagu to lúbanboun Búngiu. ² Ítara líña ligáburi taráanserún múna tugúya. Múnada, ñíñein bián rúmu, lídan furúmiñeti rúmu le gíribei Fulásu Sándu, ñíñein lébu sanúdelu luma dábu la le ñí tubei fein to biníwaboun. ³ Ñíñoun ában bélu labádinagua bián rúmu ligía, Fulásu le Sándutimáabei líribei libíaman rúmu. ⁴ Lídan rúmu ligía, ñíñein ában latárü gólu lun lágudajoún cupáli ñi, túma bágüsi to lánina

darádu, gólu sun touba. Turágeirugu bágüsi tugúya, ññein ában ágeidinaú gólu le gádaanbalin eígini le gíribei maná, ññein gíñe luwénwen Aarón le ájüchagubei, lúma dúbü le uágubei labúrújoúa díisi gumádi le líchugubei Búngiu lun Moisés. ⁵ Tougiñe bágüsi tugúya, ññoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ññein lan Búngiu lídan fulásu ligía. Darúguatiña táu bágüsi tugúya, le ñí lubei ferúdunawa lan figoú, láu jarúna. Mabúseerúntiwa wadímurejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lídoun Fulásu le Sándubei ságü wéyu lun jafádirijan. ⁷ Ánjeinti lídoun Fulásu le Sándutimáabei, fádiri rügüñein íñutimaati ebélura ñíjin ában weíyaasu lídan irúmu, áni dan le lebélorun, gásu lanúgün játa anímaalu lun ladágaragüdün luágu lifígoun guánarügÜ lúma luágu jafígoun gürígia. ⁸ Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügúbei ñi, madárarúngili úma lídoun Fulásu Sándutimáati. ⁹ Sun igáburi lé meja adügúwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilibei lídan dan le. Cátei lé buri meja íchugúbei lun Búngiu, lúma cátei le adágarawagüdúwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara. ¹⁰ Lúrudu buri lánina binádu darádu luágu jagúnfulirun lúma Búngiu, luáguti eígini le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹ Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügú láu le binádubei. Lúban Búngiu le ñí lubei lafádirija, buítimaatu sügú táu tó meja ubouaguboun. úati mégeiti tuágu, ladúga máma jadúga gürígia múna to siéluboun, to uáguboun nadímureja. ¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñúbürigiña luágu jafígoun gürígia, dagágüda lumúti líta guánarügü. Láu ábanrügü lebélorun, ligía íbjaali asálbaruni magúmuchaditi woun. ¹³ Inárüni luágu lábugiñe lan binádu darádu, gabáfuti meja játa bágasu jáma gábara, lúma jabáligin bágasu ñúbürigiña, lé buri áturawagúbei jawágun ja marúmanbaña, lun ledéregeruniña lúma lun larúmadagüdüniña bougdügiñe jabíti ligíbugiñe Búngiu. ¹⁴ Áni ánjein ítara líña lubeí, jgúbumégia gabáfutima lan líta Crístu! Lídaangiñe Sífiri Sándu le magúmuchadibei, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri arítangun luágu wagúnfulirun lúma binádu darádu, adúga lumútiwa lun wabúseerun wesériwidun lun Búngiu le wínwanbei.

¹⁵ Ligía Jesucrístu lubeí býeibeí lun ában iséri darádu le adúga láalibeí Búngiu wáma. Loúnwenbei Crístu lun ferúdunawa lan figoú le adügúbei lábugiñe binádu darádu, lun gíñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queísi alágan. ¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya darí lun lasúbudirúniwa luágu jiláali lan gürígia ligía. ¹⁷ Mebégitu gárada tugúya dan le wíngwángili gürígia ligía, darí dan le jiláali. ¹⁸ Ligía gíñe láu lubeí léserun jítaü ladügúwa furúmiñeti lidáradun Búngiu jáma lumútuniña. ¹⁹ Subúdigüda lumúti Moisés sun lugúmadina lúrudu joun sun gürígia, lárigiñe, ába lanúgün gamísa funátu lúma lilímun isópo, ába ladúduragüdüni lídan dúna lúma játa bágasu ñúbürigiña jáma gábara, ába labájichagunun lilíburuna lúrudu jáma gíñe sun gürígia. ²⁰ Ábati laríñagun joun. “Niján jítaü le achoúrurubalin lidáradun Búngiu júma.” ²¹ Bajígua lumútu gíñe Moisés Lúban Búngiu lúma sún buri cátei le ayúsurubei lídan jájuduragun lun. ²² Según lúrudu ligía, jarúmagüdúwati sun líbe-ágei cátei láu jítaü, áni úati ferúdunawa lan figoú ánjein

úa láwiyurun jítaü.

Lachíbuni loúnwen Crístu wafígoun

²³ Busénwati lubeí mejati ladágaragüdúniwa játa anímaalu lun larúmadawagüdün buri cátei le, sun líra, iyáwaü rügúñein lun cátei le inárüniti le siélubei, le ñí tubei Lúban Búngiu tímatimaatu, áni busénwati ladágaragüdúniwa jítaü le buídutimaati sügú láu játa anímaalu luágu cátei lánina siélu. ²⁴ Mebéluti Crístu tídoun Lúban Búngiu tugúra to jadúga wügúriña ya ubouágu, to meja tiyáwarügüboun Lúban Búngiu to tímatimaatu siélu, siélun méme lebélera, le ñí lubei larúfudagua lúngua guetó ligíbugiñe Búngiu lun lafádirijan luágu wafúlesein. ²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan irúmu lun ladágaragüdün jítaü le máma líta, ánjeinti Crístu, míchaagunti lúngua quei adágaragüdúni sarágu weíyaasu lun lachíbuni figoú. ²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügún uboú. Masúseredunti ítara, lubáragiñe líra, dan le lagúnfuliruña lán buri dan, chülúguaali Crístu ábanrügü weíyaasu, íchaagueina lúngua lun lagídaruni figoú. ²⁷ Ítara quei sun lan gürígia lúnti lan jóunwen ábanrügü weíyaasu, lárigiñeme ábame jagúserawagüdün, ²⁸ Ítara líña gíñe líchaagun Crístu lúngua ábanrügü weíyaasu lun lagídaruni jafígoun gürígia. Lachúlürüba wéyu lun lagíribudun Crístu ubouágun, mámaalime lun lagídaruni figoú liábin, liábinba lun lanúgüniña sun ja agúrabubalin liábin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügúñein méja buri cátei buíti lé meja lúnbei lanúgüni Crístu joun gürígia, le lásiñerubei lúrudu íchiga joun. Ja lubeíti ayárafadubaña lun Búngiu lídaangiñe játa anímaalu le adágaragüdúwabei lun Búngiu según lilúrudun Moisés, lé buri adágaragüdúwabei ságü irúmu, siñáti meja jadáriruni jabuídurun le gumúti ítara. ² Lun jamúga gayára lan labuíduragüdúniña lúrudu le gumúti ligíbugiñe Búngiu, ába jamúga madügúnjali lan adágaragüdúni buri le, lugúndun ja adúgübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figoú. ³ Seríwiti adágaragüdúni buri le lun larítaguagüdúniña luágun jafígoun ságü irúmu, ⁴ quei siñá lubei lagídaruni játa bágasu luma játa gábara figoú.

⁵ Ligía laríñagunbei Crístu lun Búngiu dan le lebélurunbei ubouágun.

Mabúseerúntibu adágaragüdúni ni anímaalu íchugúti bun, aráanserügütibu ában úgubu nun lun nedégereruni bun.

⁶ Magúndaantibu láu buri jagudún anímaalu luágu latárü bun, ní buri láu adágaragüdúni lun ladáuragun figoú.

⁷ Ábati naríñagun. “Ñúbinjadina ubouágun lun nadúgüni bugúndan, Nubúngiute, ítara queísi bürúwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdúni, ni jáu anímaalu íchugúti lun, ni anímaalu gudáwati luágu latárü, ni adágaragüdúni lun ladáuruni figoú, láu sun lán buri cátei le uágubei laríñaga Búngiu lídaangiñe Moisés joun gürígia lun jadúgüni. ⁹ Laríñaga Crístu lárigiñe. “Ñúbinjadina lun nadúgüni bugúndan, Búngiu.” Laníchigu líra, ñúbinjali Crístu ubouágun lun lagúmuchaguagüdúni igáburi le ladágaragüdúniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüdúniwa ligíbugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádirigu juríu, ságü wéyu jadúgüni buri ában méme adágaragüdúni, láu sun siñá lan lagídaruni adágaragüdúni ligía figoú. ¹² Ánjeinti Jesucrístu, ában rügúñein weíyaasu líchaagun lúngua luágu figoú lun sun dan, ábati lagíribudun siélun, ába lañúurun lueígiñe loúnwenren Búngiu. ¹³ Níjein ñi guetó agúrabaja líchuguniña Búngiu láganiñu

lábugiñoun lubáfu. ¹⁴ Láu loúnwen ábanrügü weýyaasu, ába labuíduragüdüniña lánigu Búngiu, le gumúti, lun sun dan. ¹⁵ Choúru lumúti gíñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadúgüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi,

ábame nabúrüdüni jarítangunrugu.

¹⁷ Lárigiñe laríñaga.

Marítagundügúyaadináme luágu jafígoun ni luágu wuríbati buri le jadúgübei.

¹⁸ Dan lubeíti le ferúdunawaali figoú lun sun dan, memégeirunwali ámu adágaragüdüni luágu figoú.

Lúnti wayárafadun lun Búngiu

¹⁹⁻²⁰ Ligía lubeíti nidújeñu, láu loúnwen Crístu luágu wafígoun, gayáraajali wayábin ligíbugiñe Búngiu manúfudeiga. Úaaru bélu lun teréderuníwa lueí webélurun lídoun Fulásu le Sándutimáabei, le ñí lubei Búngiu, gidá lumutu Crístu bélu tugúya láu loúnwen. Junrénti ában iséri úma woun lúmoun Búngiu, ában úma le anúgübalíwa lídoun ibágarí magúmuchaditi. ²¹ Jesúsu wafádiriñebei íñutimaati tídan Lúban Búngiu siélu, ²² ligía lúnti lubeí wayárafadun lun Búngiu láu tarúma wanígi, lúma láu sun wafíñen derégüdagü luágu. Jarúmagüda láaru wanígi lun masándiragun wamá woúngua láu dúru luágu figoú lárigiñe lachibúniwa, badíseijadiwa láu dúna jarúmati. ²³ Ítara méme wamá derégüdagü lídan wafíñen, masáansiragúnga, lugúndun gayára lan wemenigidun luágu Búngiu lun lagúnfuliruni lerérun lun líchuguni ibágarí magúmuchaditi woun. ²⁴ Lúnti gíñe wáfaagun wíderaguniña wíbirigu lun jínsiñejabu jamá, lúma lun jadúgüni le buídubei. ²⁵ Mouñ lumuti wafálaruni jémpulu jáni ja jéchubaña lun mídin jamá lídan wadámuridagun, wagía afíñetiña, le lúnbei wadúgüni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucrístu lun lagíribudun uboúagun.

²⁶ Lugúndun ánjawa afígounja láu wíchuguni wanágan luágu Crístu lárigiñe wasúbudiruni luágu ligía rügúñein lan agídarei figoú, úaali ámu luwúyeri lun wasálbarun lídaangiñe wafígoun. ²⁷ Ában rügáali cátei lun wagúrabajani, lun lagúseragüdüniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu geméti. ²⁸ Dan le ladúraaguni ában gürígia lilúrudun Moisés, áni añájein biáma o úrúwa geféentiña luágu, ába laríñagun lilúrudun Moisés luágu lúnti lan loúnwen gürígia ligía, magúdemejabuti lúrudu lun. ²⁹ Weíritimaati súfuri le jadúnabei ja mebéresenbaña láu Liraú Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achoúrurubalin lidáradun Búngiu wáma, le adúgübalíwa jarúma ligíbugiñe. ³⁰ Subúdi wamúti ligáburi Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagati gíñe. “Nagúseragüdübaña numútuniña.” ³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítagua jumá luágu buri wéyu le sügújalíbei dán meja le jerésibirubalin larúgounga luágu Jesucrístu. Weíríti meja jasúfurirun lídoun meja dan ligía, áni awánda jumúti sun cátei láu gurásu. ³³ Añájein jídaangiñe, anabúatiña, ouserúa jagía wuríba ligíbugiñe guríriguaü ladúga jeíbugun lúma Crístu, jíbiri, súfuritiña ladúga gamádagua jamá jáma ja wuríbabaña ouserúniwa. ³⁴ Gudémejabutün meja joun ja furísunrugubaña, ásta láu ugúndani ígiraguagüdatün júngua lun lagídarún le júmabei jueí, subúdiñu jumeín luágu níjein lan cátei júma siélu le buítimaati, le siñábei lagídarún jueí. ³⁵ Guetóti, meféridira jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu. ³⁶ Gagúraasun jumá, lun lárigiñeme lan jawánduni asúfuriruni queísi

labúseerun Búngiu, gayára lámuga jerésibiruni le lúnbei líchuguni Búngiu jun, siélu.
³⁷ Taríñajare Lerérun Búngiu luágu lagríbudun Crístu uboúagun.

Málüjali ánjein ñúbin le lúnbei liábin,
 madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu laffñerun nuágu, líña laríñagun Búngiu.

Ánjein lefériDIRA laffñen, magúndaanbadina lúma.

³⁹ Wagía, mítaraanbádiwa queí güriGIA ja eféridirubalin jaffñen luágu Búngiu, ába jeféridirun, wasígiruba láu sun waffñen luágu daríme wounwen, belú támuga wawáni siélun.

Luáguti affñeni

11

¹ ¿Cáteigi affñenibei? Affñeni, achoúrurúni le gumúti luágu wabíjibei lan le wagúrabubei, lúma wachóúruruni le gumúti luágu nírein lán buri cátei láu sun maríjin wamáni. ² Niján luwúyeribei meja jaffñen jádaangiñe binádu wagúbürigu luágu Búngiu, ába lagúndaarun jáma.

³ Láu waffñen, wasúbudirei luágu Búngiu lan adúgübalin uboú láurügü lerérun, le lubeíti uboú le waríjubei guetó, máma lídaangiñe cátei lé meja arijúabei ladügüwa.

⁴ Láu laffñen Abél, dagágüda lumúti le labúseerúbei Búngiu sügü láu le ladágaragüdübei Caín, ligía lerésibirunbalin Búngiu queísi richáguati, ába lerésibiruni ladágaragüdün lun. Láu sun lubeíti jilá lan Abél, nijángua luwúyeri laffñen queísi jémpulu woun.

⁵ Láu laffñen Enóc, lanügüwa siélun moúnwenga, áni madárirúnwati lúgubu lugúndun barú lani meja Búngiu. Áni taríñajare Lerérun Búngiu luágu, luágu lubáragiñebei lán meja lanügün Enóc, gúndan lan Búngiu láu ya uboúagu. ⁶ Ánjeinti wagía, siñáti gúndan lan Búngiu wáu ánjein maffñen wabeí luágu, lugúndun lun wayárafadun lun, gásu waffñerun luágu níjein lan áni líchuguba jafáyeiruája ja áluajabalin.

⁷ Láu laffñen Noé, dan le lawísarunbalin Búngiu luágu ladágaruba lan ában oúnwenbun gúnran, láu sun maríjijnajagili lan gúnran, ába ladügüni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian. Arúfuda lumúti laffñen Noé oúnwenbun maffñeni le jawágubei jíbiri güriGIA uboúagu. Ába lanügüni Búngiu Noé queísi ában wügüri richáguati lúma, luágu laffñen.

⁸ Láu laffñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei láni lan, ába ladügüni le lubeíbei Búngiu, ába láfuridun lageíragiñe, ibídiñounga lun jalíñounbei lan. ⁹ Ába laganóun lídan iséri fulásu ligía, láu sun teréncha lan ñi, ladúga laffñen luágu lerérun Búngiu lun luágu líchugubei lan fulásu ligía lun. Laganóua tídan múna adügútu láu jára anímaalu, ligía méme gíñe jadügübei Isác, le liraú, lúma Jacób, le libári, ladúga jalágaante lan fulásu ligía lúmagiñe Búngiu. ¹⁰ Adúga lumúti Abrahám sun líra ladúga agúrabaja lan lebéLurun lídoun lubuídun ubúrugu siélu le ladügübei Búngiu, le adúrarubei lun sun dan.

¹¹ Láu gíñe taffñen Sára, láu sun meja weíyaaru tan lun tagáraüdü, resíbi tumúti ubáfu lúmagiñe Búngiu lun tagáraüdü, garaútu ában irájü ladúga taffñerun luágu lagúnfulirubei lan Búngiu le laríñagubei. ¹² Láu sun lubeíti weíyaali lan Abrahám lun garaú lan, ñúbinti lun ganébaanfaangubei lan sarágu, quei warúguma ja siélubaña, quei gíñe lágu buri ságoun le lárubei béya le siñábei labájüdü.

¹³ Jiláguatiña Abrahám jáma lirájüñü láu jaffñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lerérun, ába jagúndaaragun luágu.

Subúdi jamúti luágu máma lan jageíra ubou le, jayábin rügúña ebéluja queísi teréncha ya. ¹⁴ Gürígia ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵ Lun jamúga fulásu lan le nígiñe lubeí jáfurida ageíraübei le jáluajabei, gayáraayati jamúga jagíribudun járigoún ñjin. ¹⁶ Ában buga ageíraü buítimaati jabúseerúbei, ageíraü le siélubei. Ladúga níjein lan jarítangun luágu cátei le lánina siélu, ligía úa lubeí nibúsigari lan Búngiu lun Jabúngiutebei lan, ába laráanserun ában fulásu joun siélu.

¹⁷ Dán meja le louchagunbalin Búngiu Abrahám láu laríñangun lun lun láfaruni liraú le Isáac jilágubei lun ladágaragüdüni lun, affíne mémeti luágu Búngiu, rúguatí yebe lúngua lun ledégeruni liraú le ábanrügüti, ¹⁸ láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac. ¹⁹ Subúdirügü liñáali Abrahám luágu gabáfu lan Búngiu ásta lun lásaaragüdüni Isáac lídaangiñe ouweni, áni ítagaraúyebe ladúgüni Búngiu láu líchuguni Isáac lárigoún lun Abrahám lubáragiñe yebe láfaruni.

²⁰ Afíñeti Isáac luágu ladúgübei lán Búngiu le laríñagubei, ába laríñangun joun lirájüñü ja Jacób luma Esaú luágu labínirubaña lan Búngiu lídan dan le lúnbei liábin. ²¹ Láu lafíñen Jacób, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luweírigun Búngiu, ragúñu luágu lígiri lubádun. ²² Láu lafíñen José, lubáragiñe louñwen, aríñagati luágu jáfuriduba lan Israelítagu Ejíptogiñe, aríñaga ligía lun janúgüni lábu jáma dánme le jígiruni fulásu ligía.

²³ Láu jafíñen lagúbürigu Moisés, dan le lagúriajoúnbei, ába jarámuduni luágu úrüwa játi, ladúga jaríjin luágu buídumeraü lan, janúfudetiña lueí lúrudu le líchugubei urúei lun jañáradawagüdúniwa wügúriña irájüñü. ²⁴ Láu lafíñen Moisés, dan le wügúrijali, májati lun lanügúniwa queísi tiraú liraú lurúeite Ejípto, ²⁵ jímein lumúti lasúfurirun jáma lánigu Búngiu lubáragiñe laganoun buídu tídan lúban urúei, to lánina figou. Subúdi lumúti luágu madúra lan luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun únabuni lueígiñe Crístu le lúnbei liábin, sügú láu laganoun lídan sun lirisin Ejípto, lugúndun luágu afáyeiruaiaü le lúnbei líchuguni Búngiu lun, líchigei larítangun. ²⁷ Láu lafíñen Moisés luágu Búngiu, ába lígiruni Ejípto, manúfudeiga lueí ligáñi urúei, reídeiti derégüdagu lídan larítangun camá jamuga aríagu líña lun Búngiu le marijínbei.

²⁸ Láu lafíñen Moisés ladúgei fédu le gíribei páscua, ába louñajan abájichaguei tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraú Israelítagu le íbugañaü. ²⁹ Ladúga jafíñen Israelítagu luágu Búngiu, ába ladúgün Búngiu úma joun lídaangiñe dúna le gíribei Barána Funáti, lun gayára lan já sügürün eíbugeina camá jamuga múa le mábeiti. Dánti le jabúseerúnbei Ejíptona lun gíñe já sügürün quei jagía, ába ladáuragun dúna jáu, ába jañáradagun.

³⁰ Láu jafíñen Israelítagu luágu Búngiu, ába jamácharun geyégua láu lubárierun ubúrugú Jericó ságü bináafin luágu sédü wéyu, ába leíguadun louba lubárierun ubúrugú ligía. ³¹ Afíñetu Raháb, tó meja jóru, luágu Búngiu, ába tarámuduniña Israelítagu aríaaajatiña túbiñe. Ladúga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

³² ¿Cába ámu cátei naríñaga? Louguabei dan nun lun nabúriñan luágu Gedeón, Bárac, Sansón, Jetté, Davíd, Samuél luma jawágu profétagu. ³³ Láu jafíñen, siríguatiña buri fulásu, agúmadija jagía buídu, íderagua lumútiña Búngiu queísi laríñaguni joun. Darú lumuti Búngiu jayúma liñún jaweí, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jeredun ja mérebaña, ñúbintiña lun gabáfubaña lan wuríburugu, ába jásiiragúniña jáganiñu. ³⁵ Níñanu wúriña ásaaragüdúwatiña jadújeñu lídaangiñe ouweni joun.

Añájein gíne jíbiri, jiláguatiña lídan luweírín asúfuriruni ladúga jamájan jíchuguni janágan luágun Búngiu lun jamúga gayáraabei lan jígirawagüdúniwa. Jímein jamúti jáfarawagún jilágubei luágu líri Búngiu lun gayáraabei lan jásügürün lídaangiñe ouweni lídoun ában ibágari le buídutimaati siélu. ³⁶ Jíbiri, áfagatiña léjerajóun jáu, abeichúni, agúrrowagúni láu güríngüri, lúma adaürúni furísunrugu. ³⁷ Áfarawagúatiña láu dúbü, asíarajóuatiña jamídan jámagua, ouchwagúatiña lun jígiruni Búngiu, áfarawagúatiña táu efeín, anúrajatiña jábiñegiñe, ába jeréderun eíbugañajádügü, darúgu jóugua láurügü jára mudún lúma jára gábara, fugiábugu, láu idíjeri, ouserúa wuríba. ³⁸ Gürígia buri jagía ja ní lubei ubou madúna lumútiña, eíbugañajádügü jáña buga lídan buri fulásu mageírawati, áraabu, lídan buri lilúlun dúbü weínamuti lúma lídan buri júyu le múaruguti. ³⁹ Sun jagía, láu sun buídu lan afíñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladúga machúlü lan Wasálbaragüle ubouágun lídan jadáni, ⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

12

Rúwamei waríjin luágun Jesúsu

¹ Ítara líña meja jagáburidun sun jíbe gürígia jagía lídan dan le sügújalibe, láu jafíñen luágu Búngiu. Ában jémpulu jagía woun lun ítara méme lan wagáburi. Ibágari le, queísigubeirügü ában eíbaaguni, gidáwamei sun le erédejabaliwa wawáriua, lúma figou le agúrrowagubalíwa, adúga wamei eíbaaguni le wabáragiñebei láu gurásu, láu sun wafíñen luágu Jesucrístu. ² Rúwamei waríjin luágun Jesúsu, le ídaangiñebei liábin wafíñen, le gíne abuíduragüdübalin wafíñen le gumúti. Súfuriti Jesúsu luágu gurúwa, mebésenga ligía láu nibúsigarídüna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun lueígiñe louwenren Búngiu.

³ Lídan le jóuchawagúniwa, samína jumá lubeíti luágu lání Jesúsu jémpulu, luágu lawánduni sarágu súfuri jámagiñe gafígountiña, ligía mabúchadalá lubei juágu, máburujan ligíame jarúna. ⁴ Machúlügidün lúmoun ouweni lídan jageíndagun lúma figou queí ligía. ⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tídan Lerérun.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi,

máburujan ligíame barúna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beílumutiña gíne ja lerésibirubaña queísi lirájüñü.

⁷ Áfaga jumei abeichúni lúmagiñe Búngiu, lugúndun louseruñadün queísi lirájüñü. ¿Níjein funági isáani mabeíchun lumúti lúguchi? ⁸ Ánjaün mabeíchun lan Búngiu, queísi labeíchuniña sun lisáanigu, mámarügü jíña lisáanigu ja tímatimaatiña, bástadi jugúya.

⁹ Dán meja le núbürigidiwa, beíjamutiwa meja wagúbürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan. ¹⁰ Jabeíchuniwa meja wagúbürigu ya ubouágu lúnrügü murúsun ibágari le, lun jagúriajaníwa buídu según jabáfu, ánjeinti Búngiu, lun waságarun buíti lídaangiñe labeíchuniwa, labeíchawa lun ladúgüniwa lun buídu wamá ítara quei buídu lan. ¹¹ Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, ibíjatiña ában ibágari lánina ísuruni lúma darángilau lídaangiñe abeichúni ligía, lárigiñe.

Mamájara wamá lun Búngiu

¹² Rújuma lubeíti iséri érei lun jarúna le bucháalibei uágu lárigi asúfuriruni, lúma lún buri jigáchürügü le débíljalibei, ¹³ áluaja jumeí úma le surúbei. Mígira jumá lébuna chugéguauí lídan úma lueí jeíguadun ja débiligiñabaña lídan jaffñen, íderaguarügü jumáña lun jóúdin jabáruaguóun lídan jaffñen.

¹⁴ Joúcha jumá lun lídan jumá darángilaü jáma sun gürígia, abágarideina ában ibágari le jarúmati, lugúndun le wíyebei igáburí, siñábei lachúlürün lúmoun Búngiu. ¹⁵ Toúnigi jumá lueí níjein lan ában jídaangiñe meíbugunti buídu lúma Búngiu, ábame leféridiragüdüni jaffñen jíbiri queísi ladúgüni jíduru gífiti le abíñaragubalin sun le agúurubei luágu. ¹⁶ Úa la ni ában jídaangiñe agámariduti mamáriedunga, míchugun ligíame mebéreseni luágu cátei le lánina Búngiu. Ligía cátei le meja ladúgübei Esaú, ába lalúguruni lirícha queísi íbugañaü luágu ában asíedu eígini. ¹⁷ Subúsite jun luágu lárigiñe lán buga ladúgüni, buséngili yebe lerésibiruni labínirun lúguchi queísi íbugañaü, mabíjin láali, siñáali lasáansiraguni lúguchi le adúga láalibei láu sun layájuajan Esaú láu igárigu.

¹⁸ Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wúbü le Sión, le durúngubei láu wátu geméti, le ñí lubei níjein lán meja lubúriga lúma luríbouga, ¹⁹ magáambun jumúti gíñe lamúri fídu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun. ²⁰ Jadúgünbalin líra lugúndun luweírin janúfude lueí lagúmadijan Búngiu, ladúga laríñajare. “Le íchuguti lugúdi luágu wúbü, afarúalá jilágubei láu dúbü o táu lan ában efeín, íbini ában lan anímaalu”, ladúga fulásu ligía, níjein Búngiu ñi. ²¹ Weíríti lanúfunejabu cátei le jaríjubei, darí lun laríñagun Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, ñúbinjadün lun cátei weíríti sügú láu le únbei jayábin já buga lábugiñebaña binádu darádu. Yaráfaadün lun wúbü Sión le siélubei, lílanaadün lubúrugute Búngiu le wíwanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweíríguni lun Búngiu. ²³ Lídaañadün jadámurin lirájüñü Búngiu ja bürúwañubaña íri siélu. Lun Búngiu le agúseragüdübaliña sun gürígia jayárafada, lídaañadün ában jáma ja oúwegubaña ja buídubaña igáburí ubouágu, áni buíngüda lumúti Búngiu lubuídun jagáburí siélu. ²⁴ Ñúbinjadün lun Jesúsu, le búyei lun iséri darádu, bajíwaguaadün láu líta Jesúsu lun lachibúniwa jifígoun, le ábanbei cátei weírítimaati sügú láu le labúseerúbei líta Abél—lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubei jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja lerérunbei joun lídaangiñe Moisés, le ábanbei lílana ubou, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraú, le lílana siélu. ²⁶ Jingígüda lumúti meja lumálali Búngiu ubou lídan dan ligíra, ánjeinti guetó laríñajare. “Nánjingichagüdübeiya mámarügü ubou, ásta gíñe siélu.” ²⁷ Dan le laríñagun “nánjingichagüdübeiya”, míni lan luágu lagídarúba lán buri cátei le márügüdüñbei luágu ébuu derébuguti, ábame leréderun le siñábei lánjingichúniwa. ²⁸ Arúejani le líchugubei Búngiu woun siñáti lánjingichún. Rúwama lubeíti eteíngiruni lun Búngiu luágu líra, judúgua wamá lun láu inébesei lúma gúnfuli queísi labúseerun, ²⁹ lugúndun lagúmuchaguagüdübei Wabúngiute sun cátei le mabuídunti queísi lagúmuchaguagüdüñ wátu geméti cátei.

¹ Jínsiñegua méme jumá júmagua queísi idújeñu lueígiñe Jesucrístu. ² Mabúlieida jumeí lun jebélaagüdúniña achúlürütiña júbiñoun láu ugúndani. Sarágu jáña gürígia, rújaña ubáraü joun ánjeligu láu jadúgüni cátei le, ibídiñoun joun.

³ Jarítagua jumá jawágu adaürútiña, queísigubeirügü jamúga gíñe jadaürúña lan jáma. Jarítagua jumá jawágu ja ouserúabaña wuríba, quei níjein lan gíñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmagua jumá darí lun joúnwen. Ja asáansi-jatiña jámari lagúseragüdúbaña Búngiu, lagúseragüdúbaña gíñe ja adúgübaña salúfuri.

⁵ Míchiga jumeí jínsiñejabu luágun seínsu, gúnda jumá láu le júmati, lugúndun líchugubei Búngiu le jemégeirubei jun. Aríñagaali. “Natoúnigirubadibu, mígirun nábume.” ⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina.

Siñáti jadúgün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu láni Búngiu jun, samína jumá luágu buíti le ñúbinjalibeí lídaangiñe jabágari, falájumei jémpulu le láni jafíñen.

⁸ Masáansiragunti ligáburi Jesucrístu, ligía meme gúñaarü, ugúñe, lúma súnwandan.

⁹ Mafálara jumá arúfudajani le ámuñegueinarügüti lueí le larúfudajabei Jesúsu. Resíbitá wawáni érei lúmagiñe línsiñejabu Búngiu, siñáti terésibirun wawáni ni cáta lúmagiñe lúrudu buri luáguti eígni. Igáburi ligía, miábinti lun ladúgüba lan buíti joun ja afálarubalin.

¹⁰ Wagía afíñetiña luágu Crístu, ibíjatiwa gíñe ában latárü, le gurúwabei le uágubei louwe Crístu luágu wafígoun. Ja asígirubaña láu binádu jagáburi juríu, siñáti gafánran jamá lídan le líchugubei loúnwen Crístu. ¹¹ Jafádirin juríu le íñutimaabei belúgüda lumúti játa anímaalu lídoun Fulásu Sándutimaati quei adágaragüdüni luágu figou, jágubu anímaalugu jagía, bougudi lueí ubúrugu lágudúa. ¹² Ítara líña gíñe jiláti Jesúsu bougudi lueí ubúrugu lun lachíbuni wafígoun láu líta guánarügü. ¹³ Queímoun lubeíti lun Jesúsu, bougudin lueí fulásu, bougudin lueí binádu igáburi, asúfurireína únabuni luágu líri queísi lasúfurirun wawágu. ¹⁴ Lídan ubou le, úati ni ában fulásu wáma le adúraruti lun sun dan, wáluajañein ubúrugu le lúnbei ñíjinbadiwa lan lárigiñe ibágari le. ¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucrístu le wafádiríñebei. Eteíngiruni ligía, ligía luwúyeribeí adágaragüdüni le labúseerúbei Búngiu wámagiñe. ¡Rúwama lubeíti uweíriguni lun láu wayúma! ¹⁶ Mabúlieida jumá jadúgüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía ouñigirubarun juwáni, áni quei jasúbudiruni, gásu jagúserun ligíbugiñe Búngiu luágu jatoúnigirunün. Joúcha jumá lun medéreragüdün jumáni jawádigimari, lugúndun mabuídunbei jamúga gíñe líra jun.

¹⁸ Ayúmuragua jumá lun Búngiu wawágu, chouuru wamúti luágu darángilañu líña lan warítangun quei busén wabeí buídu lan wouserun lídan sun cátei. ¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugaü

²⁰ Ayúmuraguatina lun Búngiu, le íchugubalin darángilaü, le gíñe ásaraagüdúbalin Wabúreme Jesucrístu lídaangiñe ouweni, lun líchuguni sun ubáfu le busénwabei jun, lun jadúgüni lugúndan. Wabúreme Jesucrístu ában le atoúnigiruti lumútuniña buídu queísi ában atoúnigiruti mudún. Ítara líña ladúga líta, le achoúrurubalin lidáradun Búngiu, le adúrarubei lun sun dan, wáma. ²¹ Ayúmuraguatina gíñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndani lun. ¡Uweíriguni lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abúrüja náalibei jun tídan murúsun gárada to. ²³ Niján ában ugánu jun— jfuríjali wadúje Timotéo furísunrugugiñe! Ánjein ñúbin yájoun, nanúgübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lídan waffínen. Mábuga jáña wadújeñu ja Itálianu jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labúrujan Santiágo joun tilana ligilisi buri ja chagágubaña

¹ Áu Santiágo, esériwiduti lun Búngiu lúma lun Wabúreme Jesucrístu áu, mábuga níña joun ja jadúgawagubaña dúusu lirájjuñü Israél ja chagágubaña lídan sun ubou.

Subúdi le ñúbinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü oúchwagúni. ³ Subúdi jumáli luágu dan lan le louchwagún jafñen, furéndeitimaatün gagúraasuni. ⁴ Ítara líña lubeíti, maríbadalá jarítangun lueígiñe jóchwagún, lubáragiñe líra, ígira jumeí oúchwagúni ligía lun líchugun lánwoun jugúraasun, lun loustarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadúga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadúga. Rúlumuti Búngiu subúdi le jamúriajan lánigu lúma joun, quei jamúriajani, maríñagunga ni cáta joun luágu. ⁶ Lúnti jamúriajan láu afñeni luágu líchugubei lan Búngiu le jemégeirubei jun, máma láu liloúguan afñeni, le lougua taffñen, ítara líña quei ában lugúdi barána le lanúgübei garábali lueígiñe ában oúbaü lun luágun ámu. ⁷ Gürígia le medéraaguagüdünti laffñen, marítagonalá luágu libíjuba lan ni cáta lúmagiñe Wabúreme. ⁸ Lugúndun gürígia le afñe líñabei, mafñen, siñáti lasígirun ában igáburi le derégüdaguati luágu ni cáta.

⁹ Idújei le gudémebei, majírudalá luágu, gúndaalá luágu irisini le siélubei lubá. ¹⁰ Léti idújei le rísibeí, manáangualá lúngua luágu, gúndaalá luágu larúfuduni Búngiu lun luágu mebégi lan lirísun lun ni cáta lídan cátei le lánina siélu. Lugúndun ítara líña rísiti quei lufúlurin jóduru, le siñábei ladúrarun. ¹¹ Dan le láfuridun wéyu, ába lásüdüñ sarágu, ába lásüdüñ jóduru, ába leíguadun lufúlurin, ába lagúmuchun lubuídunmeraü. Ítara lúba gíñe rísiti. lachúlürüba wéyu lun loúnwen, ábame lígiruni sun láfaagun luágu seínsu.

Oúchwagúni lúma adúndeijóuni lun wuríbani

¹² Gúndaati gürígia le awándubalin oúchwagúni láu gurásu, lugúndun dánme le láfuridun láu buídu, libíjubei ibágari magúmuchaditi le uágubei laríñaga Búngiu luágu líchugubei lan joun ja jínsiñejabúbaña lun, queísi ában afáyeiruajaü, queísi ában rídi. ¹³ Dan le lebélorun lun ában gürígia lun ladúgün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladúgün wuríbani, máda lumúti gíñe jádoun gürígia lun jadúgüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladúgün le wuríbabei. ¹⁵ Lídaangiñe buri luríban ayúmajani le, liábin figou, ában ibágari lánina figou barúti ouweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugúbei woun, le úabei mégeiti luágu, lúmagiñe Búngiu le adúgübalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei. ¹⁸ Ligía lugúndaabei lun ladúgüniwa lirájjuñüme láu wafñerun luágu lerérun le inárünibeí, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladúgübei.

Ligáburi agúnfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰ lugúndun gürígia le gáñibeí, madúgün lumúti le áubei lagúndaara Búngiu. ²¹ Ígira jumeí lubeíti sun

iwíyeni lúma luríban igáburí le jídaangilibei, resíbi jumeí ugánu le bunáwaalibei tídan janígi láu únabuni, lugúndun gabáfuti ugánu ligía lun lasálbarunun juwáni.

²² Adúga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágu buídurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügübalin, madúgün lumúti le lubeíbei, ítara líña quei ában güri-gia le aríagubei lúngua tídan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti güri-gia le jéhubei atúriajei Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adúga lumúti le laríñagubei Lerérun Búngiu áni gúndaati le tímatimaati.

²⁶ Güri-gia le jarítagubei luágu gúnfuli lan lúma Búngiu áni siñá lumutu liñéne erédera, leyéedaguña lúngua áni úati ju lan ligáburí lagúnfulirun lun ni cáta. ²⁷ Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magúbürigujaaña jáma wúriña ja jiláaña úmari lídan jadíjeri, lúma lun madáseirun wamá láu buri cátei wuríbati le láni uboú le.

2

Lúnti ában lan láu janügün sun güri-gia

¹ Nidújeñu, queísi jugúya lan güri-gia ja afíñebaña luágu Wabúreme Jesucrístu le weírigubei, moún lumuti ámu lan janügün ában güri-gia jaweí jíbiri. ² Queí buri jamúga, lun jamúga lebélurun ában wügúri lídoun jadámurin láu bágü gólu túma anáanguni fínutu, belú ligía gíñe ában gudémeti táu anáanguni juchécheeru, ³ ánjaün eténira lun le fínubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amúrü, reídeibá rára, o ñurúba ya múarugu”, ⁴ janügüña ában güri-gia ámu lueí le ában, áni jagúseragüdüña láu luríban arítaguni.

⁵ Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan uboú le lun rísi jamá lídan jafíñen, lun gíñe jerésibiruni arúejani le uágubei laríñaga Búngiu joun ja jínsiñejabúbaña lun luágu líchugubei lan joun queísi jalágaante. ⁶ Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei jóuserunün, áni barújamaün adúruujeina ligíbugiñoun lúruðu? ⁷ ¿Máma jagía adímurejabaña wuríba luágu líri Crístu, le inébebei jun, le únbei jedéregeragua júngua?

⁸ Ánjein inárüni lubeí luágu gúnfuli jumáni líñun-ágei lúruðu queísi taríñaguni Lerérun Búngiu. “Jínsiñelá güri-gia bíledi bun quei bínsiñegua búngua”, buíti jadúga. ⁹ Ánjein máma lubeí ában láu janügüniña sun güri-gia, jadúgüña figoú, dürúgua jumúti lilúrudun Búngiu. ¹⁰ Lugúndun ánjein agúnfulira ában güri-gia láu sun lúruðu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúruðu. ¹¹ Lugúndun Búngiu méme le aríñagubei. “Madúgabá salúfuri”, aríñagati gíñe. “Máfarajabá.” Ánjein lubeíti madúgün güri-gia salúfuri, áni áfarajati, mídinti láu le lubeíbei lúruðu. ¹² Jugúya, lúnti jadímurejan, agáburida jugúyame queísi lúntiña jagúserawagüdün láu lúruðu le furáangugüdabaliwa lueí lubáfu figoú. ¹³ Ja magúdemejabubaña joun ámu, magúdemejabubei gíñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáni agúseruni.

Afíñeni lúma wadágimanu

¹⁴ Nidújeñu, ¿cásan ju lan laríñagun güri-gia luágu afíñe lan luágu Crístu ánjein madúgün ni cáta lun larúfuduni? ¿Gayáraati funági lasálbaruni afíñeni ligía? ¹⁵ Queí jamúga guetó, níjein ában idújei wügúri o wúri emégeiruti anáanguni lúma eígini, ¹⁶ laríñaga ában jídaangiñe lun. “Buídulá lídin bun, darúguabá boúgua, jou amúrúme,” áni míchu lumúti le lemégeirubei lun, ¿cági ju lan líra? ¹⁷ Ítara líña lasúseredun lúma

afíñeni. ánjein marúfudun jamá gürígia láu cátei le jadúgübei, afíñeni lábuguarügü, ítara líña quei ában cátei jiláali.

¹⁸ Fágua níjeinbei aríñaguti. “Amúrü afíñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti bafíñen nun bougudin lueí buíti le badúgübei, narúfudeime nafíñen bun láu buíti le nadúgübei.” ¹⁹ Afíñetibu luágu ában rügúñein lan Búngiu, buíti badúga, afíñetiña gíñe máfianu luágu líra, adádagara jagía láu anúfudei lueí. ²⁰ ¿Májatibu bafíñerun, ibídiougua táu amúrü le, luágu jiláñu líña lan lafíñen gürígia ánjein marúfudun lan láu le ladúgübei? ²¹ Resíbi lumúti Búngiu Abrahám, le binádu wáguchi, queísi richáguati ligíbugiñe luágu le ladúgübei dan le lánjarun lún yebe láfaruni Isáac le liraú jilágubei queísi adágaragüdüni lun Búngiu. ²² Aríja báali luágu arúfuda láni Abrahám lafíñen láu cátei le ladúgübei, áni ñúbinti lafíñen lun dayárubei lan láu cátei le ladúgübei. ²³ Ítara líña lagúnfulirun le bürúwañubei tídan Lerérun Búngiu. “Afíñeti Abrahám luágu Búngiu, áni luágu lafíñen, ába lerésibiruni Búngiu queísi wügúri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáali lubeíti, luágu resíbi láni gíñe Búngiu wügúri luágu buíti le ladúgübei, úara lúma lafíñen, áni mámarügü luágu lafíñen. ²⁵ Ligía méme meja asúseredubei tun Raháb, to jóru lídan dan le sügújalibeí. resíbi lumútu Búngiu queísi richáguatu ligíbugiñe dán meja le tarúfuduni tafíñen luágu láu cátei le tadúgübei—safá tumútiña loúnagülegu Josué, ába tíderaguniña lun jagíribudun lídaangiñe ámu úma. ²⁶ Ítara quei jiláñu líña lan úgubu ánjein úa tubeí uwáni lídan, jiláñu líña gíñe jafíñen ánjein marúfudun jumá láu cátei buíti le jadúgübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégüdatimaabei lan wagúserawagüdún. ² Sun wagía adúgatiwa cátei charáti, ánjein níjein lubeí ában gürígia madúgünti ni murúsun charáti lídan le laríñagubei, ában wügúri buíti le gumúti ligía, le gíñe gayáraabei labúguruni sun lúgubu. ³ Dan le wagúrüni jayúma anímaalugu lun jagáambuníwa, gayáraati wabúguruni sun jágubu. ⁴ Aríja jumóun buri gíñe ugúnein, láu sún buri weínamu tan áni jéreburi garábali le ádajabarun, abúgura lumútu abúguruti láu ában liraúraü simúnu le ñíjin lumúti labúseera. ⁵ Ítara líña gíñe lasúseredun lúma wayúma, ában cátei ñúraüraüti, áni gayáraati ladúgün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati wadúgün sarágu wuríbani láu, gayáraati lagádeiruni sun le wagíabei. Gayáraati líchuguníwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügúri jagáñi sun jawúyeri anímaalugu gáñitiña—dunúru, jéwe, jáma anímaalugu baránajana—áni adúga láali. ⁸ Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdünbei lúngua, áni buin líña láu peísini le gáfarajati. ⁹ Láu méme wayúma wadímureja buíti luágu Wáguchi Búngiu, láu gíñe wíñaraguaña gürígia ja ladúga Búngiu lenége. ¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagíindun ában tídibu fígi fáluma, ódi gayáraati tagíindun tídibu beíbei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibeí

¹³ Ánjein níjein lubeí ában chu táu jídan, gunfaráanda ligía, arúfudaleí láu lubuídun louuserun, láu únabugubuni le líchugubei lisúbudin lun. ¹⁴ Ánjein níjein lubeí gimúgaü tídan janígi, áni jadúgüni cátei láu jarítangun juágun guánarügü, moún lumútiti janáangun júngua luágu jisúbudin, lugúndun iyéeni líra. ¹⁵ Máma niján luwúyeri subúdi le ñúbinbei lúmagiñe Búngiu, ában subúdi le lánina uboú líra, le lánina jasáminan güriquia, le láni méme Máfia. ¹⁶ Lugúndun le ñí lumuti gimúgaü lúma marítawaguni jawágun ámu, níjein chagáguauí ñi lúma sun luwúyeri wuríbani. ¹⁷ Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmami jawágu, gálumatiña, areídatiña, gagáambaditiña, gudémejabutiña, adúga jamúti le buídubei, ában lábu janúgüniña sun güriquia, furáangutiña. ¹⁸ Ja áluajabalin darángilaü, bunáguatiña ílaü lun lalúbajouniwa ában ibágari le richáguati jídan, lúma jídan ámu.

4

Gamádaguaü lúma uboú

¹ ¿Cá buri ueígiñe jabúseera jawúribujan, lúma jageíndagun? Ladúga buri lagúbüri ayúmajani le jídaanbei súnwandan. ² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu. ³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagúbüri jugúndan. ⁴ ¿Güriquia múaraantiña! ¿Ibídinetísan jun luágu ánjein lan gamádagua jubeí lúma uboú, jáganiñein lan Búngiu? ⁵ ¿Jarítaguatúnsan luágu mála lan le tariñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Tariñajare Lerérun Búngiu. “Rúlumuti Búngiu lanágan jawágun ja barúguabaña jóungua, áni íderagua lumútiña ja únabugubaña, láu lareíni.” ⁷ Rúgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸ Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu lúma lun uboú, gafígounjadün, ítara líña lubeíti, jarúmagüda jumeí jigáburu túma gíñe janígi. ⁹ Lídan le jayárafadun lun Búngiu, aságürija jumá luágu jifígoun láu águirauí. Gáritá janígi luágu luríban jigáburu lúma Búngiu, sáansigualá jugúndan lun íruni luágu jifígoun. ¹⁰ Únabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbiri. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Crístu le aríñagubei luágu moun láni ladügüniwa, áni ladáriruña mégeiti luágu. Ánjein jadúga líra lubáragiñe jadúgüni le lubeíbei lúrudu, jíchaaguña júngua queísi agúseragüdüti. ¹² Ában rügüñein agúseragüdüti, le íchugubalin lúrudu ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadíbugi lun badárirun lidúnrun ámu?

Machoururunwalá luágu jarúga

¹³ Guetó, agáamba jumeí cátei le, jugúya le aríñagubei. “Ugúñe o jarúga wóudiba lídan ítaga fulásu, ábame webélujan ñi ában írúmu, wawádigimaribei waseínsun lun wabíjin lánwoun.” ¹⁴ ¿Ída líñasan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméreedu le asálrágubei luágu murúsun dan, lárigiñe ába lagúmuchagun. ¹⁵ Aríñagarügütün jamúga. “Ánjein busén Búngiu, wabágariduba, ábame wadúgüni le o líra.” ¹⁶ Ánjeinti jugúya, jadímurejan láu pántaü luágu cátei le

jarítagubei lun jadúgüni, áni sun pántaü le, mabuídunti. ¹⁷ Afíñetina luágu ánja jumá lun sun le, wel, le subúdíjabubei lun ladúgün buíti áni madúgün lumúti, ladúgüña figoú.

5

Ewéridijani joun rísitiña

¹ ¡Agáamba jumeí cátei le, jugúya rísitiña le wuríbabei igáburi! Chúlújali óra lun jayájuajan, wágua jugúyame luágu buri lamíselu le lúnbei jasúfuriruni. ² Ñaláali buri jirísini, jou jamáaru jamútiri janáangun to fínuboun. ³ Gájüjali jigólun lúma jáni pláta, áni láu cátei méme le, arijúati jarúgüren, ábame jagúnrinchawagún lueígiñe camá jamuga láu wátu geméti. Oúndaraguaadün sarágu irísini lídoun buri lagúmujoún dan le. ⁴ ¿Ánti fáyeiti le míchu jubeí joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúri-ajan ñadágimeintiña jagía juágu. ⁵ Rúguaadün júngua lun ában ibágari lánina wéndeí lúma ugúndani ya uboúagu, ibíja jumáali sun le jabúseerúbei quei jadíbunedagüdüniwa anímaalu lubá jáfarun, yaráfaali gíñe jagúnrinchawagún sun jugúya. ⁶ Rújadün jadúnrun ja madúnrunbaña, áfaragua jumáña jilágubei, madúgünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesús. Ábunaguti le agúrabubei ladúgün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸ Gagúraasun jumá gíñe, máburujan ligíame jarúna, lugúndun madíseeli liábin Wabúreme. ⁹ Nidújeñu, mequéjera jumá jawágu jidújeñu lueígiñe Jesucristu, magúserawagüdüñ jumámuga, yaráfaali lidáani Búngiu lun lagúseragüdüñ. ¹⁰ Nidújeñu, barú jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹ Wagía, barú wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáali gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Lougiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoururuni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu. ¹⁴ Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵ Dánmeti le jayúmuragun láu afíñeni, ábame lareídagun sánditi, áni ánjein gíñe affgounjaali lubeí, ferúdnawabei lífígoun. ¹⁶ Ligía, gúfese jumeí lubeí jífígoun joun jidújeñu lueígiñe Jesucristu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladúgübei gürígia le buíti táu sun lanígi. ¹⁷ Proféta Elías ában meja wügúri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga úrúwa-irúmu-dimí. ¹⁸ Lárigiñe, dánya le layúmuragun, ábaya lájuyun júya, ábaya tájüchün sun inádirigu uboúagu.

¹⁹ Nidújeñu, ánjein egéyeda ában jídaangiñe lueí úma le richábei, liábin ámu lun lagíribudagüdüni, ²⁰ subúdi jumeí luágu furúmieguarügü lan agíribudagüdüti le affgounjabei lídaangiñe luríban lémeri, lasálbaruboun lan luwáni affgounjati ligía lueí tídin máfiougati, áni ferúdnagüdaleíme sarágu lífígoun gürígia lé yebe acháragadubei.

FURÚMIÑETU LIGÁRADAN PÉDRO

Labúrïjan Pédro joun afñetiña ja chagágubaña boúgudi lueí jageíra

¹ Áu Pédro, ában lání Jesucrístu apóstolu áu, nabúrïjañoun gárada to jun, jugúya lánigu Búngiu ja chagágubaña boúgudi lueí jageíra loúbawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja bináriu lun lánigu jumá, áni subúdi lumúti meja luágu lachúlürüba lan ában wéyu lun ítara lúba lan, ladúga ligía lan lugúndaanbei. Ligía larúmadagüdañajañoun lubeí Sífiri Sándu janígi láu líta Jesucrístu, adúgalaún lun gagáambadi jumá. Ibíja jumá lubeíti sarágu abíniruni lúma darángilaü lúmagiñe Búngiu.

Louchawagüba jafñen, ábame liábin buíti lídaangiñe

³ Rúwama uweíriguni lun Búngiu, le Lúguchibeí Wabúreme Jesucrístu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe ouweni lúnya labágaridun. ⁴ Queísi lirájüñü wabeí, gayáraati weménigidun le gumúti luágu wabíjubei lan ubuíduni le aráanse láalibeí wabá, gayáraati weménigidun luágu werésibirubei lan alágan le areídañu lubeí Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféridiruni lubuídun. ⁵ Goúnigi lumútiwa Búngiu láu lubáfu lugúndun afñe wamá luágu, lun gayáraabei lan wabíjini asálbaruni lídaangiñe asúfuriruni lánina uboú le, le aráanseñu lubeí wabá larigiñeme lagúmuchun uboú.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu ouchwagúni luágu murúsun dan. ⁷ Lúnti jasúfuriruni ouchwagúni ladúga ítara líña lan jafñen quei gólu—lúnti louchúniwa láu wátu geméti lun larijíniwa ca lan luwúyeribeí. Afñeni le awánduti ouchwagúni ligía, buíti sügú láu gólu, lugúndun gagúmuchaditi gólu. Láu lubeíti jawánduni louchawagún jafñen, ladímurejaba Jesucrístu buíti juágu dánme le lagíribudun uboúagun, jibíjuba gíñe uweíriguni lúma inébesei lúmagiñe.

⁸ Jínsiñeti Jesucrístu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában oúnwenbun ugúndani le siñá jumuti aríñaga láu dimúrei. ⁹ Ladúga méme luweírin jafñen luágu Crístu, jerésibiruñein tasálbarun juwáni.

¹⁰ Lídan meja dan le sügújalibeí, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútija lání Crístu Espíritu joun wügúriña jagía le lúnbei lasúfuriruni Crístu lubáramegiwa, lúma uweíriguni le lúnbei liábin larigiñe. Jagíati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáni lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le ñúbinbei siéluñe. Ásta ánjeligu, buséñtiña jamúga gíñe gunfaráanda jamáni buri cátei le.

Buséñti Búngiu lun wabágaridun ában ibágari le jarúmati

¹³ Quei jagúrabajañein lubeí jerésibiruni jalágaante siélu, gidájumei samínaü málati jarítangunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu uboúagun. ¹⁴ Queísi isáanigu gagáambaditiña, mabágarida jumá queí meja ligáburu jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá,

jarúmati lídan sun cátei. ¹⁶ Tariñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janúgüni Búngiu quei Júguchi, Búngiu le ábanbei lábu ligáburu lagúser-agüdüni jagáburu sun güriquia, lúnti júaradun lúma láu ában goúnigi sun dan le lúnbei jabágariduni ya ubouágu. ¹⁸ Sálba láadün Búngiu lídaangiñe lagúbüri ibágari lé meja jafúnrendeirubei jámagiñe binádu jagúbürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta, ¹⁹ láu líta Crístu le gebégibeí sügú láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladúgüni Búngiu ubou, ába laráanserun lun Crístuba lan Wasálbaragüle, luágu lubeíti wafúleisein lachúlaagua Crístu lídoun lagúmujoún dan le, lun lasálbaruniwa. ²¹ Lídaangiñe Crístu, ába jiyábin lun jafíñerun luágu Búngiu le ásaaragüdúbalin Crístu lídaangiñe ouweni, ru ligía uweíriguni lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére, ²³ lugúndun iséri güriquia jugúya. Mámaadün jasáanigu agúbürigu ja goúwedaditiña, lirájüñüjadün Búngiu láu jagáambuni lerérun le íchugubei ibágari, le gíñe adúrarubei lun sun dan. ²⁴ Tariñajare Lerérun Búngiu.

Ítara jáña sun güriquia quei jíduru,
liábin jaweírigun quei lufúlurin jíduru.
Dan le lásaurün jíduru, ába láburujan lufúlurin,
²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítara lá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu. ³ Subúdijadiün murúsun luáguti luweírin lubuídun louseruniwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribeí. Rútiña güriquia mebéreseni luágu, ánjeinti lun Búngiu, ítara líña Crístu quei ában dúbü le gebégiti sarágu, le lanúadirunbei lun ligíaba lan ébuu tun lilígilisin, áni sun ja afiñebaña luágu Crístu, jagía lilígilisinbaña Búngiu. ⁵ Ítara líña lubeíti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadügúniwa ában témpulu buítu lun Búngiu jídaangiñe, lun gíñe ítara jumá quei fádirigu ja derégeguatiña joúngua lun Búngiu, ja íchugubalin cátei le áubei lagúndaara lun, lídaangiñe Jesucrístu. ⁶ Ligía gíñe tariñagunbei Lerérun Búngiu. Nounajañein Crístu lun ligíaba lan dúbü le weírigutimaabei tuágu nilígilisin lídan fulásu le gíribei Sión.

Áni ja afíñerutiña luágu, buídubei lídin joun.

⁷ Weíriti lebégi Crístu jun, jugúya le afíñebeí luágu, ánjeinti joun ja mafíñebaña, mebégitu quei dúbü le únbei jamájara ábunagutiña. Láu sun líra, gúnfulijali le tariñagubei Lerérun Búngiu.

Dúbü le únbei jamájara ábunagutiña,
ñúbinja lun ligíaba lan furúmiñeti lídan bunáguai.

⁸ Joun ja mafíñebaña luágu Crístu, gúnfuliti gíñe le aríñawagúbei.

Ában dúbü achúgeraguágülei ligía, le eíguadagüdüti gürígia.

Ja madúgünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña gíñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le affñebei luágu Crístu, ában família anúadajouátiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladúgübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queísi teréncha lídan uboú le, aganoútiña boúgudi lueí jageíra, ayúmuraguátina jun lun mígiraguagüdün jumá júngua lun lagúbüri buri ayúmajani le ageíndagubei túma juwáni. ¹² Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadúgübei, ábame jíchugun uweíriguni lun Búngiu dánme lachúlürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúagu. Gúnfuli jumá lúma lugúmadin urúei, queí ligía lántima íñubei ufúlasun, ¹⁴ gúnfuli jumá gíñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúrudu, lúma lun jíchugun uweíriguni joun ja adúgübaña buíti. ¹⁵ Busénti Búngiu lun jadúgüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, ousera jumá queísi gürígia ja mámabaña idámuni lun ni ában gürígia, máma lueígiñe líra lun jadúgüni le wuríbabei, lubáragiñe líra, abágarida jumá queísi lidámun Búngiu. ¹⁷ Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaña. ¹⁹ Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu. ²⁰ Ánjaün adúga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadúgün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, queí súfuri lubeí Crístu juágu láu gurásu, íchiga ában jémpulu jun lun jafálaruni. ²² Madúgünti Crístu ni ában figoú, meyéeragun ligía gürígia ni ában weíyaasu. ²³ Dan le janábuni, moúnabunti láu anábajani, dan le jasúfuriragüdüni, masádirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni. ²⁴ Barú lumuti Crístu guánarügü wafígoun luougua luágu gurúwa lun weréderun queí jiláñu lun figoú, lun wabágaridun ában ibágari le lánina ísuruni. Buleíseiwati lun wareídagun. ²⁵ Ítara jíña meja queí mudún ja féridijaña, ánjein guetó, ñúbinjadün lun Crístu le oúnigirubalün queísi jóuniri mudún, toúnigiloún juwáni.

3

Ligáburi jabágaridun maréitiña

¹ Ítara gíñe jugúya würiña gámaritiña, derégegua jumá júngua joun júmarigu, lun ánjein lan mánjagiña lubeí lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni, ² láurügü jaríjini lubuídun jóuseruniña láu inébesi lúma larúman igáburi. ³ Mámala láu

buri cátei boúguditi jibíti jewéndeda, queí buri lanárime aroúraguni, arígeilaü lúma buri bángüli le gólu, anáanguni wéndegutu, ⁴ tídaanlá janígi jewéndeda, le ábanbei ubuíduni le meféridirawadibei. Ában igáburi bímeti, darángila, ligía cátei gebégibei sarágu ligíbugiñe Búngiu. ⁵ Ítara líñá meja ligáburi jewéndedun wúriña já meja derégeguañaña jóungua lun Búngiu lídan meja dan le sügújalibei. Jeménigitiña meja luágu Búngiu, derégegua jagía jóungua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadúga le buídubei, manúfudeiga lueí ni cáta.

⁷ Jugúya gíñe wügúriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima wúri, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adúga jumei ítara, úa lámuga ni cáta lun leréderunün lueí jayúmuragun lun Búngiu.

Ja asúfurirubaña lueígiñe jadúgüni le buídubei

⁸ Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

¹⁰ Le busénti labágaridun ában ibágari buíti, lúma gíñe ában ibágari lánina ugúndani, lúnti loúnigiruni liyúma lueí ladímurejan wuríbani, mariñagun ligíame iyéeni.

¹¹ Lúnti ladisedun lueí wuríbani lun ladúgüni buíti, láluajani darángilaü lun labágariduni súnwandan.

¹² Lúnti ítara lan ligáburi, ladúga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adúgübaña wuríbati, magúndaati Búngiu jáu.

¹³ ¿Cábagi gayára ladúgün wuríbati jun, ánjaün íchaagua júngua lun jadúgüni buíti súnwandan? ¹⁴ Áni íbini jasúfurirun ladúga lísurun jibágari, gúnda jumá ladúga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligíame jarítangun. ¹⁵ Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun jóunabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesei. ¹⁶ Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburi queísi afíñetiña luágu Crístu, nibúsigari jamámuga luágu jerérun guánarügü. ¹⁷ Buítimaati lun jasúfurirun lueígiñe jadúgün buíti, ánjein ítara líña lubeí labúseeruni Búngiu, sügú láu lun jasúfurirun lueígiñe jadúgün wuríbati.

¹⁸ Jarítagua jumá luágu luweírin lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanúgüniwa lun Búngiu. Áfarúati jilágubei, wínwantu láni Espíritu.

¹⁹ Quei Espíritu, ñúdünti gíñe apúrichija joun espíritugu ja lídaanbaña jafúlasun jiláaña.

²⁰ Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírin lugúraasun joun lídan le lagúrabajani tagúmuchún árca to ladúgüboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírin gúnran ligía. ²¹ Dúna ligía, ítara líña quei lidúnarina badísei guetó, le ídaangiñebei wanúgúwa lun wasálbarun. Mára lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun. ²² Múdeiti Crístu siélun, áni níjein

guetó ñun lueígiñe louñwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei súfuri lubeí Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu. ² Le súfurijalibei luágu Crístu, ígira láali figou lun labágariduni líbiri libágarí quei sí lugúndan Búngiu, máma lun líchugun ugúndani lun lagúburi ayúmajani. ³ Lídan meja dan le sügújalibei, adúga jumúti meja luríban buri cátei le jínsiñebei joun ja ibídiñejabubaña lun Búngiu, jaganouña meja lídan ibágarí nibúsigarídunati, gúnfulitün meja luma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladúgúniwa. Buídurügaali dan le abágarida jumáalibei ítara. ⁴ Guetó, weírítí janígi já meja jumádagubaña láu mafála jumáaña lan lídan lagúburi ibágarí le, ligía jadímurejanbei wuríba juágu. ⁵ Ánjeinti jagía, jagúfesseruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse. ⁶ Ligía apúrichijoúa lubeí meja luáguti asálbaruni joun ja jiláguañaña guetó, lun gayáraabei lan gabágarí tan jawáni láu libágarí Búngiu, láu sun jilá lan jágubu quei sí lasúseredun joun sun güri-gia.

⁷ Yaráfaali lagúmuchun ubou, ligía lúnti lubeí aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸ Lougiñe sun cátei, níjeinlá sarágu ínsiñeni jídan joun jíbiri-gu, lugúndun ánjaün jínsiñejabu, ferúduna jubeí jafígoun ámu juágu, láu sun gíbe lan. ⁹ Resíbi jumáña güri-gia júbiñe láu sun jugúndan. ¹⁰ Rújali Búngiu ában ubáfu lun ságü affñeti luágu Crístu, ítara líña lubeítí, seríwi jumá joun jíbiri-gu láu ubáfu le rúlaalíbei Búngiu jun, quei sí oúniri buítíña lánina ubáfu buri le líchugubei Búngiu. ¹¹ Le gabáfubei lun lapúrichijan, lúnti ladúgüni quei sí ában le adímurejati dimúrei lúmagiñe Búngiu. Le esériwiduti, adúgaleí láu sun érei le líchugubei Búngiu lun. Sun cátei le jadúgübei, adúga jumeí lídan ában igáburi le lúnti líchugúniwa uweíriguni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweíriguni lun sun dan. Ítaralá.

Wasúfurirun quei sí lánigu Crístu

¹² Nidújeñu jínsiñetiña nun, maweíridalá janígi láu buri lidíjeri ouchawagúni le jibíjubei, camá jamuga ába cátei ámuti asúseredubei jun. ¹³ Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágun láu sun luweírigun. ¹⁴ Fuleíseiwatün ánjaün anabúga lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírigubei, jídan. ¹⁵ Ánjein asúfurira ában jídaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúru-du, ni lueígiñe leméterun lídoun cátei le miábinti lun, mídin. ¹⁶ Ánjeinti asúfurira mútu lueígiñe lánigu lan Crístu, moún lumuti lanúgün busíganu, lúnti líchugun eteíngiruni lun Búngiu luágu lánigu lan Crístu.

¹⁷ Chülújali dan lun lagúmeserun luweírín asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weírítí-maabei jasúfurirun ja mánjabaña jerésibiruni lerérun Búngiu. ¹⁸ Ánjeinti jénreengu lubeí jasálbarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹ Ja lubeítí asúfurirubaña quei sí labúseeruni Búngiu, lúnti ítara méme jamá adúgei le buídubei, derége jamóunme jawáni lújaburugun Búngiu le adúgübaliña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afíñetiña

¹ Níchuguñein nerérun jun, jugúya ja ábutigubaña lídan jadámurin afíñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabáradina gíñe quei jugúya lídan uweíriguni le lúnbei liábin. ² Toúnigi jumáña lirájüñü Búngiu ja lábugiñebaña jaríaajan queísi joúnigiruniña joúniri mudún mudún. Adúga jumeí láu ugúndani queísi labúseeruni Búngiu, máma ladúga jafósuruña lan, adúga jumeí ladúga busén jumá jesériwidun lun Búngiu, máma ladúga línsiñegu seínsu. ³ Mousera jumá camá jamuga jabúriña ja lábugiñebaña jaríaajan jugúya, joucharügü jumá lun ában jumá jémpulu buíti joun. ⁴ Ítara lúba, dánmeti le liábin Jesucrístu, le joúniri mudún le tímatimaati, jibíjuba ában uweíriguni le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵ Jugúya güriña núbürigiña, rúgua jumá júngua lábun jagúmadin weíyaaña mútu. Lúnti jesériwidagun súnigubei joúnigua láu manáanguni únguaü, lugúndun taríñajare Lerérun Búngiu.

Magúndaanti Búngiu jáu ja barúguabaña joúngua, áni íderagua lumútiña ja manáangunbaña joúngua, láu lareíni.

⁶ Rúgua jumá lubeíti júngua únabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachúlürün dan ligía. ⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragúguañu jumá júngua, lugúndun eíbugañajádügü líña Máfia le jágani queísi líñún gáñiti áluaja cába lan lagúnrinchagua. ⁹ Mígiraguagüda jumá júngua lun, derégüdagu jumá lídan jafíñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰ Lárigiñeme súfurijadün lan luágu murúsun dan, ladúgübadün Búngiu lun úa lan mégeiti luágu lubuídun jigáburi, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmchadibeí, lídan ában lúma Jesucrístu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugaü

¹² Noúnajañoun tiraúraü gárada to jun lúma Silváno, le nanúgübei queísi ában idújei úaraguati, lun níchugun dúgüdaguaü lun jafíñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña afíñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü. ¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labürüjan Pédro joun afiñetiña

¹ Áu Simón Pédro, ában esériwiduti lun Jesucrístu áu, ában gíñe láni apóstolu. Nabürüjañoun gárada to jun, jugúya le ñúbinjalibei lun gafánran jumá lídan luweírin asálbaruni le wabíjubei lídaangiñe Wasálbaragüle Jesucrístu, le méme Wabúngiute, lugúndun úaragua lan. ² Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesús.

Igáburi le lúnbei jóuseruni afiñetiña

³ Rúlaali Búngiu sun le wemegeirubei woun lun wabágaridun lúma lun wesériwidun lun, láu lasúbudiragüdüni Jesucrístu le agúarubei woun lun gafánran wamá lídan luweírigun lúma lubuídun cátei le ladúgübei. ⁴ Gúnfuliti Búngiu láu lerérun, lídaangiñe Jesucrístu, láu líchuguni le buídutimaabei lúma le weíritimaabei woun. Láu líra, gabáfu wamá lun wanúrajan lueí lagúburi ayúmajani lánina ubouú le, ibíja wamámugei ligáburi Búngiu wádan. ⁵ Ligía lúnti lubeí jáfaagun lun jíchugun lubuídun igáburi lánwoun jafíñen, ⁶ subúdi luágu Búngiu lánwoun lubuídun jigáburi, ragúguaü únguaü lánwoun jisúbudin luágu Búngiu, gurásu lánwoun ragúguaü únguaü, ederegeraguni únguaü lun Búngiu lánwoun gurásu, ⁷ areíduni lánwoun ederegeraguni únguaü lun Búngiu, ínsiñejabuni lánwoun areíduni.

⁸ Ánjein njein buri lubeí igáburi líra jídan le tímatimaati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu. ⁹ Ánjeinti le mítaraanbei ligáburi, ítara líña queísi ában maríjinti o ában lan madíse taríjin, bulleilá luágu chibáwaali lan binádu lífígoun. ¹⁰ Ligía lubeíti nidújeñu, quei wájali lubeí Búngiu jun, anúadajalaún lun lánigu jumá, áfaagua jumá lun lájüchün buri cátei le jídan, ánjein jadúga ítara, máburujabadün lídoun féridi. ¹¹ Ítara lúba úa lan ni cáta ásiñeragüdüti jebélurun lídoun larúeijan Wabúreme Wasálbaragüle Jesucrístu, le magúmuchadíbei.

¹² Ligía narítaguagüda mémebadün lubeí luágu, láu sun subúdi jumáali lan, áni jeibuguña lan lídan inárüni ligía. ¹³ Láu sun líra, sun wínwangidina lan, afiñetina luágu buídu lan lun nagúaruni jarítangun lun luwúyeri ibágari le lúnbei jabágariduni queísi lánigu Crístu. ¹⁴ Subúdigüda láali Wabúreme Jesucrístu nun luágu yaráfali lan wéyu lun noúnwen, ¹⁵ ítara líña lubeíti, nadúgübei nuáraati lun íbini lánme lárigiñe jiláadina lan, lun súnwandan lan jarítangun luágu buri cátei le.

Já buri arjúbalin luweírigun Crístu

¹⁶ Arúfudajani le wíchugubei jun luágu lagíribudun Wabúreme Jesucrístu ubouúagun láu sun luweírin lubáfu máma meja úraga, aríja wamúti meja luweírigun láu wágu. ¹⁷ Aríja wamúti dan le líchugunbei Búngiu Úguchili inébesi lúma uweíriguni lun, ába laríñagun lumálali Búngiu lun lídaangiñe uweíriguni lánina siélu. “Niraú le jínsiñebei nun le, le áubei oúnwenbun lan nugúndan.” ¹⁸ Agáamba wamúti ladímurejan Búngiu ítara luágu Wabúreme Jesucrístu dán meja ñíñadiwa lan lúma Wabúreme luágu wúbü le biníwabei.

¹⁹ Níjein gíñe ában cátei chouúrutimaati wáma luágu liábin Wasálbaragüle ubouúagun —ligía ugánu le jabürüjabei profétagu. Buíti jadúga lun jatúriajani jerérun wügúriña jagía, ladúga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagíribudun Crístu ubouúagun, le ítara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía. ²⁰ Lougiñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le bürü

jamaalbei profétagu láu láni lúngua. Busénwati lubáfu Sífiri Sándu lun gunfaráandawa lan, ²¹ lugúndun madímurejaantiña meja wügúriña jagía láu jáni joúngua. Jagía, queí meja wügúriña jabeí derégeguatiña joúngua lun Búngiu, dimúrei buri lúmagiñeti Búngiu jadímurejabei lugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárünibeí lun lagádeiruni jafíñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janúgüba agúnrichaguni furése joun guánarügü. ² Gíbeebaña afálarutiña lídan liwíye jémeri, áni ladímurejóba wuríba luágu úma le inárünibeí jadúga. ³ Láu línsiñe seínsu joun, jaságaruba seínsu jueí láu jarúfudajan le málabei, le ñúbinbei lídaangiñerügü jachúgü, chóuruti luágu jagúseragüdúwaba lan luágu luríban jadúga, yaráfati jeféridirun queísi laráanserúniwa jabá lúmagiñe binári.

⁴ Úati ferúduna lániña Búngiu ánjeligu já meja afígounjabaña, ába lachágaraguniña máfiougatin, ába lígiruniña adaürúwa lídan lubúriga ñi agúrabajeí wéyu lánina lagúseragüdúniña. ⁵ Úati gíñe ferúduna lániña Búngiu mútu wuríbatiña já meja aganoúbaña uboúagu lídan lidáni Noé. Ába loúnajani gúnran jawágu gürígia jagía, Noé rügúñein le apúrichijabei joun gafígountiña lun jasáansiruni jagáburi, jámaya sédü gürígia lánwoun asálbara. ⁶ Darí lumuti gíñe meja jadúnrun gürígia ja aganoúbaña ubúrugú Sodóma lúma Gomorra. Ába láguduni fulásu buri ligía darí lun ladáagun balígime, lun larúfudajan joun gürígia wuríbatiña ja lúnbaña jayábin járigiñe ca lan lafáyeijabei figoú. ⁷ Séfu lumúti meja Lot, ában meja wügúri buíti, le weírubei lidíjeri luágu liwíye jagáburi gürígia wuríbatiña lídan fulásu ligía. ⁸ Ságüja wéyu lasúfurirun wügúri buíti ligía tídan lanígi láu laríjini lúma lagáambuni cátei buri wuríbati le jadúgübei. ⁹ Sun le, ában jémpulu luágu ligáburi lasálbaruniña Búngiu ja derégeguabaña joúngua lun lueí ouchawagúni, ígira láña ja wuríbabaña lábugiñe asúfuriruni lubá jasáadirúniwa lun sun dan lídaanme wéyu lánina agúserawagüdúni.

¹⁰ Lasúfuriragüdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barúguatiña joúngua, mebéresentiña láu ni cáta, marúfudun jagía inébesei joun ja weírígubaña, anábarügü jamáña. ¹¹ Ánjañati ánjeligu, láu sun jéretima jamá, gabáfu jagía sügú jáu arúfudajatiña jagía, míchuguntiña jadúnrun ánjeligu wuríbatiña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi anímaalugu úati gunfaráanda jamá, jagúriajoún lun járiügüdún lun jafarún. Adímurejatiña wuríba luágu buri cátei le úati gunfaráanda jamáni, joúweguba queísi joúwegun anímaalugu, ¹³ asúfurireina lueígiñe jasúfuriragüdún ámu. Nibúsigarídünati jabágaridun, adáagua jamúti lagúburi jayúmajan lídan larúgounga, ligíbugiñe laríjin sun uboú, darí lun júaradagun júma lídan jufédun queísi jamúga gürígia buítiña, wíyeti jabágari.

¹⁴ Siñáti jaríjin ában wúri lun úa lan suámei jamánun, mabúchati jawágu adáagua figoú. Acháwaja jamútiña débilitiña lídoun figoú, bíbutiña luágu meménijabuni. Chóuruti luágu jagúnrinchagúba lan. ¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraú Beór, jémpulu, lé meja álugubei lagáñeirun seínsu láu ladúgüni le wuríbabei. ¹⁶ Ábati ladeínjan ában burígü maríñagaditi lun luágu

lifígoun, adímureja ligía lun láu jamálali gürígia, ába mígirun láni lun lasígirun láu lilúlun láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanúgün garábali, siádiwaaña lun jásiügürün sun dan lídan luweírin-ágei lubúriga máfiougati. ¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jameí furúmieguaügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina bulfeiguaü, lun jagíribudun járigoun lídoun liwíye ibágarí. ¹⁹ Aríñagatiña joun jánigu luágu jabágariduba lan ában ibágarí le ní lumuti gayára lan jadúgüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámuñein cátei le árügüdübalin. ²⁰ Ja subúdi jamáalibei Wabúreme Jesucrístu le Wasálbaragüle, ani séfujaña lídaangiñe iwíyei le lánina ubou le, ánjañaya áburuja lídoun buri cátei le lúnya lárügüdüniña, wuríbatimaabei le lúnbei gádan láníña sügú láu meja furúmiñe. ²¹ Buítimaati jamúga meja joun lun masúbudirungubei jamáni úma le surúbei, sügú láu lárigiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewéran, léchun búruju le sun liñábei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucrístu ubouágun

¹ Nidújeñu jínsiñetiña nun, nuján tibíaman gárada nabúrújan jun. Tídan biángubei gárada, jóchatina lun narítaguagüdünün luágu arúfudajani inárüniti le furéndeí jumáalibei, lun gayáraabei lan jasáminarun buídu luágu. ² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warúfudajabei wagía apóstolugu jun.

³ Lídaangiñe sún buri cátei le waríñagubei, rútima jumeí le jarítangunrugun. luágu lídoun lánme lagúmujoún dan, añájeinbaña gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun, ⁴ ábame jaríñagun. “¿Másan jaríñajare luágu liábinyaba lan Crístu ubouágun? ¿Jalíñañeinsan? Lúmagiñe jówegun furúmiñetiña afíñetiña luágu Jesucrístu, ítara mémegili sun cátei queí meja lúmagiñe ladúgünbei ubou.” ⁵ Mabúseeruntiña jasúbudiruni luágu ladúgüni Búngiu sun cátei lídan lidáani lun ladúgüniwa. Adúga lumúti meja siélu lúma ubou lúmagiñe binárü láu lugúmadin, adúgaleí múa lídaangiñe dúna, geyégu líña gíñe múa ligía láu dúna. ⁶ Ába lachúlürün dan lun lagúnrinchaguni Búngiu ubou meja ligíra láu lidúnarina gúnran. ⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdün. Lídaanme wéyu ligía, lágudubei Búngiu siélu lúma ubou le gumúti láu lugúmadin. Ja madúgünbaña gásu láu Búngiu, jágudúba lídan wátu ligía.

⁸ Mabúlieida jumeí gíñe, nidújeñu jínsiñetiña nun, luágu ítara líña lan ában wéyu ligíbugiñe Búngiu queí mílu irúmu, mílu irúmu queí ában wéyu. ⁹ Mára jamúgatiña lugúndun ladárasarun lagúnfulirun Búngiu láu lerérun, queísi jarítangun sarágu, gagúraasunrügüti jabá gürígia lugúndun mabúseerúnti lun leféridirun ni ában jádaangiñe, labúseerun lun jaságüríjan sun gürígia lídaangiñe jafígoun, gayára lámuga jasálbarun.

¹⁰ Lachúlürüba wéyu ligía lun lagíribudun Wabúreme Jesucrístu ubouágun dánme le magúrabúniwa lan, queísi lachúlürün jíweruti árieibu. Ábanmeti lagúmuchagun siélu láu ában lanárime ireíni, rúrúguagüdaleíme wátu geméti sun cátei le níbei—játi, warúguma, wéyu—gudáme ubou láu sun cátei le lídaanbei.

¹¹ Queísiti lagúnrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumeí lachúlürün luwéyuri

Búngiu, adúgañu jumeí le juáraati lun jóufudajani. Lídaanme wéyu ligía, lagúnrinch-aguba siélu láu wátu geméti, ábame larúrüdagun sun cátei. ¹³ Ánjeinti wagía, agúraba wamúti iséri siélu lúma iséri uboú le uágubei laríñaga Búngiu woun, sun cátei ñi, úaraguabei, áni buídubei gíñe.

¹⁴ Ligía lubeíti, nidújeñu jínsiñetiña nun, sun anjúnja lan agúrabajeí buri cátei le, jóucha jumá lun ladárirunün Búngiu lídan úaraguni ligíbugiñe, jarúmañu, úouga mégeiti juágu. ¹⁵ Subúdi jumeítia luágu lagúrabaja rügúña lan Wabúreme Jesucrístu jasálbarun gürígia lubá lagíribudun uboúagun. Ítara líña gíñe labúrújan wadúje Pábulo le jínsiñebei woun sarágu, jun, láu subúdi le líchugubei Búngiu lun. ¹⁶ Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja loúguabaña afíñe, garábaguati laníchigu labúrújan Pábulo según jagía, ítara quei jadúga tún buri tíbiri líburu to Lerérun Búngiu. Jeféridiruba lun sun dan ladúga cátei le.

¹⁷ Ligía lubeíti, nidújeñu jínsiñetiña nun, queísi subúdi jumáli lubeí buri cátei le lubáramegiwa, toúnigigua jumá júngua lueí jeyéedunün gürígia wuríbatiña, ígiragüdei arúfudajani le inárüniti luáguti Búngiu jun. ¹⁸ Jóucha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan línsiñejabu. ¡Uweírighuni lun, guetó lúma súnwandan! Ítaralá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

¹ Wabúrújaña jun luágu Búngiu Irájü lé buga njeinjalibei dan le lagúmeserunbei sun cátei. Ába liabin Búngiu Irájü ubouágun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladúgübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíríbei “Dimúrei”.
² Ába liábin ubouágun, quei nubeíbei jun, aríja wamúti, geféen wagía luágu, áni guetó wabúrújaña jun luágu. Níñein Búngiu Irájü luma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni.
³ Wafúraanguagüdüñein lubeíti jun le aríja wamáalibei ladúgün, luma le agáamba wamáalibei laríñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában luma Búngiu Úguchili luma Jesucrístu le Búngiu Irájü, queísi wagía. ⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabei Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta luma lubúriga. ⁶ Ánjawa aríñaga luágu lídaañadiwa lan ában luma áni madúgün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában luma, lugúndun múaran lan wagáburí luma linárün. ⁷ Ánjein úaragua lubeí wagáburidun luma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchatí le waríñagubei. ⁹ Ánjein wagúfesera wafígoun, gayáraabei weménigidun luágu Búngiu luágu ladúgübei lan le úaraguabei—ferúduna lubeí wafígoun, jarúmagüda lówame lídaangiñe sun wuríbani. ¹⁰ Ánjawa aríñaga luágu madúgüngidiwa lan figou, wadúgüñein Búngiu camá yéeti, áni merésibirun wamágili lerérun tídan wanígi.

2

Adímurejati Crístu lueígiñe wafúleisein ligíbugiñein Búngiu

¹ Nirájüñü, nabúrújañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúleisein ligíbugiñe Wáguchi Búngiu, ladúga ligía rügüñein richágua ligíbugiñe Búngiu. ² Lídaangiñe Jesucrístu ferúdnawa lan wafígoun, áni mámarügü wafígoun, ferúdnawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülújadiwa lan asúbudirei Búngiu. ⁴ Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun. ⁵ Ánjeinti gürígia le adúgübalin le lubeíbei Búngiu, chülújali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában luma. ⁶ Le aríñaguti luágu lídaañein lan ában luma Búngiu, lúnti labágaridun quei meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabúrújabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua luma ugánu ligía. ⁸ Guetó narítaguagüdüñadün luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá woúniwagua. Ítara

líña meja labágaridun Jesucrístu, jabágariduña gíñe ítara lugúndun jeíbuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucrístu, lídaañein larúgounga, subúditi Crístu lun, áni úati ni cáta lun láburugüdúni lídoun figoú. ¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabúrüjaña jun lugúndun ferúduna láali Búngiu jifígoun ladúga Crístu. ¹³ Agúbürigu, nabúrüjaña jun lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nñúbürigiña, nabúrüjaña jun lugúndun gáñei jumáli lan wuríbu luágu Máfia.

Nabúrüjanbei jun, nirájüñü, lugúndun subúdi jumáli lan Búngiu Úguchili. ¹⁴ Nabúrüjaña jun, agúbürigu, lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nabúrüjanbei jun, nñúbürigiña, lugúndun jére jumá, áni resíbi jumáli lerérun Búngiu tídan janígi, lugúndun gíñe gáñei jumáli lan wuríbu luágu Máfia.

¹⁵ Mínsiñedalá ligáburi uboú jun, ní buri cátei le lánina uboú. Siñáti lajínsiñedun cátei lánina uboú jun, jínsiñeme Búngiu jun, ¹⁶ lugúndun úati ni cáta lídaangiñe cátei le líchugubei uboú nñúbinti lúmagiñe Búngiu, lúmagiñe guánarügü uboú liábin. Luríban jayúmajan gürígia, ayúmajani lun jabíjini cátei le jaríjibe le uágubei jarítagua luágu buídu lan, lúma pántaü luágu cátei le jabíjibe, ligía buri cátei le líchugubei uboú. ¹⁷ Áni uboú, agúmucheina líña láu buri sun luríban ayúmajani le lídaanbei, ánjeinti le adúgüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülújali lagúmujoún dan. Agáambaadün luágu iníte lan Lágani Crístu, quei chülúguaaña lubei sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun larijiniwa furáangu luágu máma lan wánigu le tímatimaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun. ²¹ Nabúrüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesús Crístubei le loúnajabei Búngiu uboúagun lun lasálbaruniña gürígia, jagía láganiña Crístu, mafíñetiña ni luágu Búngiu Úguchili, ni luágu Búngiu Irájü. ²³ Sun ja májabaña lun jasúbudiruni Jesús queísi Búngiu Irájü, ibídiñegili Búngiu Úguchili joun, ja aríñagubaña luágu Jesús lan Búngiu Irájü, subúditi gíñe Búngiu Úguchili joun.

²⁴ Ligía, areída jumeí lubei ugánu le jagáambubei lúmagiñe furúmiñeti, tídan janígi. Ánjein jadúga ítara, jeréderuba gíñe lídan ában lúma Búngiu Irájü lúma lúma Búngiu Úguchili, ²⁵ jerésibiruba gíñe ibágari le magúmuchaditi, queísi laríñaguni Jesús woun. ²⁶ Ligía nerérunbei jun jawágu láganiñu Crístu jagía já yebe busénbaña jayéedagunün. ²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu

wawágu ligíbugiñe. ²⁹ Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

¹ Aríja jumá luweírin wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu ubou gunfaráanda lugúndun ibídiñetí meja Jesucrístu joun lídan linárün cátei dán meja le ya lan ubouágu. ² Nidújeñu jínsiñetiña nun, lirájüñüjadiwa Búngiu guetó, áni marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí. ³ Áni sun le agúrabajabálin buri cátei le, jarúmagüda lumúti ligáburi ítara quei jarúma lan ligáburi Crístu.

⁴ Ánjeinti sun le afígounjabei, dürügua lumúti lilúrudun Búngiu, lugúndun luágu cátei figoubei ladúraawagún lilúrudun Búngiu. ⁵ Subúdi jumáli luágu lun lan lagídaruni Jesucrístu wafígoun liábin ubouágun, luágu gíñe úa lan ni murúsun figou luágu. ⁶ Sun lubeíti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudirun lágili gíñe. ⁷ Nirájüñü, mayéedawagua jumá, ában gürígia richáguati ligíbugiñe Búngiu adúga lumúti le richábei, queísi richágua lan Jesucrístu. ⁸ Ánjeinti le eíbugubei lídan figou, lánigu Máfia, lugúndun afígoujati Máfia lúmagiñe furúmiñeti dan, ába liábin Liraú Búngiu lun lagúnrinchaguni luwádigimari Máfia.

⁹ Úati ni ában le liraúti Búngiu asígiruti lídan figou, lugúndun níjein ibágari le líchugubei Búngiu lun lídan, siñáti lasígirun lídan figou lugúndun liraú lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madúgünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladúgübei Caín, áni buíti le ladúgübei lamúlen, ligía lagímugajanbei.

¹³ Nidújeñu, maweíridalá janígi ánjaün eyéreeguda joun lánigu ubou. ¹⁴ Wagía, ítara wáña meja queísi jiláaña, guetó ibíjaadiwa ibágari magúmuchaditi, áni subúdi wamúti líra lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. ¹⁶ Subúdi wamúti cátei lan ísiñenibei. luágu líchuguni Jesucrístu libágari wawágu. Lúnti giñetí wánjarun lun wíchuguni wabágari jawágu wíbirigu. ¹⁷ Ánjein níjein lubeí lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ida lubági níjein lan ínsiñeni tídan lanígi lun Búngiu? ¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjin lídan cátei le wadúgübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibei, gayáraabei gíñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, ²² luágu líchugubei lan sun le wamúriajabei lúma woun, lugúndun gúnfuljadiwa

láu lugúmadin áni adúga wamáali le áubei lagúndaara. ²³ Lugúmadin Búngiu, lun wafínerun luágu Jesucrístu le Liraú, lun gíñe jínsiñegua wamá wámagua queísi meja laríñaguni Jesúsú woun. ²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, mafíñera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. ² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, níjein Sífiri Sándu lídan áni láu lubáfu Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibei Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouúagu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdünün lueí arúfudajani le inárüntibei, gáñei jumáña lugúndun gabáfutimaati Sífiri Sándu le jídaanbei sügú láu láni Máfia espíritu le jádaanbei. ⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja gíñe lánigubaña ubouú. ⁶ Ánjein wagía, lánigu Búngiu wagía. Le subúdijabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburi Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraú Búngiu, áni subúdi gíñe Búngiu lun. ⁸ Le mínsiñejabuti, ibídiñegili Búngiu lun, lugúndun ligáburi Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraú le ábanrügüti ubouúagun lun loúnwen, lun gabágari wamá lídaangiñe. ¹⁰ Niján ínsiñenibei. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraú le ábanrügüti lun loúnwen, lun lébuname ferúdunawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti gíñe jínsiñegua wamá wámagua. ¹² Úagili ni ában aríjiti Búngiu, láu sun líra, ánjava jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wádaañein lan gíñe. ¹⁴ Wagía guánarügü aríja wamáali Liraú Búngiu, aríñaga wameí luágu lun lan lasálbaruniwa loúnajei Búngiu ubouúagun. ¹⁵ Furúmieguarügü le afíñerubei luágu Liraú lan Búngiu Jesúsú, labágariduña lídan Búngiu, áni labágariduña gíñe Búngiu lídan.

¹⁶ Ítara líña wayábin asúbudirei lúma afíñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun gürígia ladúga wagáburiduña lan ya ubouúagu queísi Jesucrístu. ¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladúgüni woun, láu luweírín línsiñe Búngiu woun, gidáti sun anúfudei waweí. Ánjein janúfude wabeí lueí

Búngiu, ladúga wagúrabajaña lan láburujan ligáñi wawágun. Ligía, ánjein janúfude lubeí ában gürígia, machúlúgilirügü líña Búngiu ínsiñeda lun le tímatimaati.

¹⁹Wagía, jínsiñeti Búngiu woun lugúndun wínsiñedun lun furúmiñe. ²⁰Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubeí. ²¹Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

5

Wagáñeiruni wuríbu lúma ubou

¹Sun ja afiñebaña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu. ²Subúdi wamúti luágu dan lan le jínsiñe lan Búngiu woun áni adúga wameí le lubeíbei, jínsiñe jamá gíñe lirájüñü Búngiu woun. ³Ladügúniwa le lubeíbei Búngiu, ligía ínsiñejabunibei lun, áni majúrúti lugúmadin, ⁴lugúndun sun le liraúbei Búngiu, mabáfuti cátei lánina ubou luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubou. ⁵Le afíñebei luágu Jesúsu lan Liraúbei Búngiu, ligía rügúñein gayára lagáñeirun luágu cátei lánina ubou.

Geféenwa lan luágu Liraú Búngiu

⁶Jesucrístu ligía ñúbinbei láu bián seíni luágu ligía lan Liraúbei Búngiu. bián seíni ligía, dúna le lánina labásterun, lúma jítaü le lánina loúnwen. Mámarügü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun. ⁷Añajein úrúwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía, ⁸níjein gíñe úrúwa cátei geféenti múarugu luágu Jesúsu lan Liraúbei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen. ⁹Resíbi wamúti le jaríñagubei wügúriña, gúbuméti lúnti lan werésibiruni le laríñagubei Búngiu guánarügü luágu Liraú lan Jesucrístu. ¹⁰Le afíñeti luágu cátei le, choúru lumúti tídan lanígi luágu inárüni lan, le mafíñebei, adúga lumúti Búngiu camá yéeti, lugúndun mafíñen lan luágu le laríñagubei Búngiu luágu Liraú. ¹¹Le laríñagubei Búngiu, luágu rújali lan ibágari magúmuchaditi woun, áni lídaangiñe lan Liraú liábin ibágari ligía. ¹²Le níjeinbei Liraú Búngiu lúma, níjein gíñe ibágari le lúma, ánjeinti le úabei Liraú Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

¹³Nabúrújañein cátei le jun, jugúya le afíñebei luágu Liraú Búngiu, lun jasúbudiruni luágu gabágari jumá le magúmuchaditi.

¹⁴Jeménigitiwa luágu Búngiu, lugúndun subúdi wamúti luágu ánjawa lan amúri-aja furúmieguarügü cátei queísi labúseerun, lagáambubadiwa. ¹⁵Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

¹⁶Ánjein aríja ában gürígia luágu ladúgüña lan ában libíri ában figou le mámabei lúnti lanúgüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figou anúgüti gürígia lídoun féridi magúmuchaditi, málati lun layúmurawagúniwa lun Búngiu luágu figou ligía. ¹⁷Sun wuríbani figou, máma sun figou lun lanúgüni gürígia lídoun féridi magúmuchaditi.

¹⁸Subúdi wamúti luágu gürígia lan le anúgübalin Búngiu queísi Lúguchi, meíbugunti lídan figou, lugúndun toúnigi lumúti Liraú Búngiu, siñáti ladúgün Máfia ni cáta lun.

¹⁹Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña ubou.

²⁰ Subúdi wamúti gíñe luágu ñúbinjali lan Liraú Búngiu ubouágun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraú, le Jesucristubei. Ligía Búngiubei le tímatimaati, ligía gíñe le íchugubei ibágari le magúmuchaditi woun.

²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Áu le weíriei mútu, nabúrüjañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu. ² Jínsiñetün woun ladúga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³ Búngiu Úguchili, lúma Wabúreme Jesucrístu le Liraú Úguchili, jabínirubadún, jíchugubei jagúdemejabu lúma jadárangilan jun lídan jabúruchaguagüdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun. ⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabúrüjabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja maffínebaña luágu quei lan güriquia tímatimaati liábin Jesucrístu ubouágun. Le ítarabei, ligía le yéebi, le láganibei Crístu. ⁸ Duári jumá jaweí, lueí jeféridiruni le ñúbinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰ Ánjein achúlüra ában güriquia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹ lugúndun le abúsuruti lun, gádan lumúti gíñe wuríbani le ladúgübei.

Lagúmujoún buri dimúrei

¹² Níjein sarágu cátei lúnti naríñaguni jun, mabúseerúntina abúrüjarügü náni jun, agúrabatina nídin aríjaün lun nayánujan júma, lun lagúnfulirun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÚRÜWAN LIGÁRADAN APÓSTOLU JUAN

Buíti ladímurejoun luágu wügüri le gíribei Gáyo

¹ Áu le weírei mútu, nabúrújañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun gíñe magádie ban ítara queísi buídu lan lídin bun lídan beíbugun lúma Crístu. ³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájüdagun nun luágu bugúnfulin quei babágariduña lubeí úaragu lúma larúfudajan Crístu. ⁴ Úati ámu cátei agúndaaraguagüdütiña queísi dan le nagáambun luágu jabágariduña lan nirájüñü lídan úarani lúma larúfudajan Crístu.

⁵ Numáda jínsiñeti nun, buíti bouuserun lídan esériwiduni le badúgübei joun wadújeñu lueígiñe Jesucrístu, joúntima ja lílana ámu fulásu. ⁶ Abájüdaguatiña ligíbugiñe adámurini le yábei luágu bínsiñejabu joun. Adúgabeí fuleísei le. íderagua báña láu le jemégeirubei lun jasígiruni jaweyasun lídan ában igáburi le áuti lagúndaara Búngiu. ⁷ Furítiña lun jesériwidun lun Crístu, merésibirutiña ni cáta jámagiñe ja ibídiñejabubaña lun Búngiu. ⁸ Ligía lúnti lubeí weténirun joun, lun wíderaguniña lídan lapúrichijoun lerérun Búngiu.

Luríban louuserun Diótrefes

⁹ Abúrújatina buga ában gárada joun tílana ligílisi, májati Diótrefes lídin láu le wabeíbei lugúndun busénti ábuti lan jádan súnwandan. ¹⁰ Ánjana lubeíti ñúdüñ, neréruba lun luágu le ladúgübei, adáagua marásualugu lúma iyéeni wawágu. Bougudin lueí líra, merésibirun lumútiña wadújeñu ja achúlürütiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabeí jémpulu wuríbati le, adúgamemebeí le buídubei. Le adúgüti buíti, lánigu Búngiu, ánjein le adúgüti wuríbati, ibídiñegili Búngiu lun.

Lubuídun láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburi. Geféentiwa gíñe luágu cátei le, áni subúdi jumúti luágu inárüni lan le waríñagubei.

Lagúmujuún buri dimúrei

¹³ Gíbeti yebe lúnti naríñaguni bun, mabúseerúntina abúrújarügü náni, ¹⁴ lugúndun agúrabatina naríjinibu madíse, ábameti wayánujan.

¹⁵ Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labúrrijan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Crístu áu, áni lamúlen gíñe Jacóbo, nabúrrijañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucrístu séfuñu lueí buri cátei lánina uboú le. ² Resíbi jumá sarágu gudémejabu, darángilaü, luma ínsiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weírjali nabúseerun nabúrrijan jun luágu asálbaruni le wabíjibei, dándu jugúya queísi áu, guetó sandíguatina núngua luágu lúnti lan nabúrrijan jun lun nayúmurgun jun lun jáfaagun luágu affiñeni le ledéregerubei Búngiu ában weíyaasu lun sun dan joun lánigu. ⁴ Naríñagubalin le jun lugúndun añajein lan arúfudajatiña yéetiña ádaragutiña joúngua jagánaguóun. Gürígia buri jagía, arúfuda táña Lerérun Búngiu lúmagiñe binárün luágu lúnti lan jasúfuriruni lafáyeiragüle jaríban, buídu. Wügúriña wuríbatíña jagía, minébenti Búngiu joun, arúfudaja jagía luágu gayára lan jadúgün gürígia furúmieguarügü cátei mabuídunti, mabeíchun lubáña lan Búngiu lueígiñe, ladúga luweírín lareíni, ayéedagua jagía gíñe luágu Jesucrístu, Wabúreme le ligárügüti, le únbei wesériwida.

⁵ Láu sun subúdi jumáali lan, buséntina narítaguagüdünün luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmuchaguagüdüniña ja mafíñerunbaña jádan. ⁶ Ánjeligu ja mareídunbalín jabára, ígirarügü jameí jábiñe siélu lun jagárabaagun luágun Búngiu, añajein adaürúwañu lurúma Búngiu, gürágu lídan lubúriga láu güríngüri magúmuchaditi, agúrabajei oúnwenbun wéyu le lánina agúseruni. ⁷ Ja lílana buri ubúrugu Sodóma luma Gomórra, luma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun joúngua lun salúfuri, ába jígiraguagüdün joúngua lun sun luwúyeri wuríbani darí lun lagámaridun wügúri wügúri líledi, wúri wúri tíledi. Ába lagúmuchaguagüdüniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburi ída lúba lan lafáyeijan Búngiu luágu figoú.

⁸ Ánjeinti láu sun jémpulu líra, wügúriña buri gíñe ja jagánaguabaña, láu jafálaruni arúfudajani le maríchabei, wíyedaguatiña joúngua, májatiña lun lugúmadin Búngiu, anába jamáña ubáfu buri ja íñugutimaabaña. ⁹ Ánjeinti arcánjel méme Miguél, dan le lasígenejanbei luma Máfia lueígiñe lúgubu Moisés, moúchunti lun líñaragun láu anabúni, aríñagarügüti lun. “Ébecha lábu Wabúreme Búngiu.” ¹⁰ Ánjaña wügúriña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasámdiruni queísi jasúbudiruni anímaalu úouga gunfaráanda jamá, ligía buri cátei le jadúgübei, ába janúgün gürínguaü jawoúguoún láu jóuserun.

¹¹ ¡Fugíábugu jagía! Falá jamaali lání Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le ouwebei luágu lumágaambadin lun lerérun Búngiu. ¹² Nibúsigaridünatiña lídan buri jufédun le lánina jínsiñegua júmagua, le ní lubei jeíga, gurá jagía láu ugúndani, minébenejábuga. Ítara jáña queísi jóuniri mudún ja joúnguarügübei jóunigiragua. Ítara jáña queísi juánriñu magánati dúna le lanúgübei garábali, tídíbu wéwe to magíinduntu lídan tidáani, ítara jáña queísi tídíbu wéwe to ájulutu láu sun tílagüle, úaali ju jamá. ¹³ Ítara jáña queí lanárima buri lugúdi barána, arúfudei jagáburigu le nibúsigarídünati quei jacútaü. Ítara jáña quei warúguma buri ja féridi jamáali jémeri, íñarawagúaaña lun jeréderun lídan líwurín-ágei lubúriga lun sun dan.

¹⁴ Enóc gíñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme liábin jáma sarágu mílu jádaangiñe láni ánjeligu ¹⁵ lun lagúseragüdüniña sun ja wuríbabaña luágu sun wuríbani le adúga jamáalibei, lúma luágu buri dimúrei deréti le aríñaga jamáalibei luágu. Lasíadirubaña sun gafígountiña jagía luágu le jadúgübei.” ¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadúgübei ámu, lún rügúñein jagúnfulirun lúma lagúbüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lúnrügü jaságarun cátei buíti joúngua jádaangiñe.

Lererún joun afíñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucrístu jádaangiñe láni apóstolugu luágu buri cátei le lúnbei lasúseredun. ¹⁸ Jaríñajare. “Lídoun buríme lagúmujoún dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebei.” ¹⁹ Jadúga buri ja, níjein lubeí fánreinguaü, falá jamuti jagúndan le lánina uboú, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu. ²¹ Mabúlieida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucrístu ibágari magúmuchaditi woun láu lugúdemejabu.

²² Afíñegüda jumáña ja loúguabaña afíñe. ²³ Sálba jumáña jíbiri camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígountiña jun, láu sun, goúnigi jumá lueí jadúgüni wuríbani le jadúgübei, iyéreegulá jaríban jun queísi gamísa wíyetu, lueí gíñe jeíguadun lídoun luríban úma quei jagía.

Lagúmujoún buri ladímurejoún luágu luweírigun Búngiu

²⁴⁻²⁵ Búngiu le ábanrügübei, le sábiubei, le Wasálbaragüle lídaangiñe Wabúreme Jesucrístu, gabáfuti lun loúnigirunün lueí jeíguadun lídoun figoú, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucrístu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucrístu

¹ Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga láalibei Jesucrístu.

³ Gúndaatiña gürígia ja alíjabin ja agáambubalin laliijoún ugánu le, le erésibirúabei lúmagiñe Búngiu, adúga jagía gásu láu cátei le bürúwañubei ya, ladúga yaráfaali dan lun lasúseredun.

Labúrüjan Juan joun tılana sédügubei ligílisi

⁴ Áu Juan, nabúrüjaña joun tılana sédü ligílisi to Ásiaboun. Resíbi jumá abíniruni lúma darángilaü lúmagiñe Búngiu le wınwanbei lúmagiñe lubáragiñe furúmiñeti dan, wınwan ligía guetó, wınwan ligíame sun dan. Resíbi jumá gíñe abíniruni lúma darángilaü jámagiñe sédü espíritugu ja ligíbugiñebaña lála, ⁵ lúma lúmagiñe Jesucrístu le aríñagubalin cátei le inárüti, le furúmiñebebei ásaaruti lídaangiñe ouweni áni gabáfu ligía jawágu urúeigu ja ubouágubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adúga láadiwa urúeigumé lúma fádirigumé lun wesériwidun lun Lubúngiute, le méme Lúguchibei. ¡Rúalá uweíríguni lúma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jaríjubei sun gürígia ásta gíñe ja áfarubalin! Jayájuba sun gürígia ja ubouágubaña dánme le jaríjini luágu wuríbani le adúga jamáalibei. Ítara lúba.

⁸ “Áu lagúmesejabei sun cátei, áu lagúmuchagülebei, quei létüra ‘A’ lúma ‘Z’”, líña laríñagun Búngiu le Súnti Gabáfu, le wınwanbei lúmagiñe lubáragiñe furúmiñeti dan, wınwan ligía guetó, wınwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucrístu áu, gafánraantina júma lídan larúeijan Búngiu, súfurijadina úara júma luágu Crístu, resíbijadina gíñe gurásu lúmagiñe Crístu. Reídeitina adaürüwa luágu ubouju le gírubei Pátmos lueígiñe napúrichijani Lerérun Búngiu, lúma lueígiñe napúrichijan luágu Jesucrístu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanáangiñe quei lumálali fídu, ¹¹ laríñaga umálali ligía nun.

—Áu furúmiñebebei lúma agúmujóuni, quei létüra ‘A’ lúma ‘Z’. Abúrüjabeí sun le baríjubei, ábame bouñajanun gárada tugúya joun tılana sédü ligílisi to louábawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹² Ába nagáragun lun naríjin ca lan adímurejabei nun, ába naríjin sédü lébu sanúdelu gólu, ¹³ labádinagua sédü lébu sanúdelu ligía ába naríjin ában camá jamuga Wügúri Garaúwarügüti—le Jesucrístubei—táu ában anáanguni chÜlútu luágun lugúdi, lúma ában béliiti gólu yaráfa lun laníguagu. ¹⁴ Jarúti lídiburi quei líyu mudún, quei mouuru, ítara líña lágu quei wátu geméti. ¹⁵ Miríti lugúdi quei brónse le írichawagúali, le dáwaali lídoun órno, reínti lumálali quei lireín leíbaagun sarágu dúna. ¹⁶ Níñanu sédü warúguma lídan lújabu le loúnwenren, níñoun ában efeín gágiritu liyúmulugugiñe, bíangua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjibalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu le ní jabei jiláguaaña. ¹⁹ Abúrújabei lubeíti le baríjubei, le guetóbei lúma le lúnbei liábin. ²⁰ Niján laníchigubei jawáguti sédü warúguma ja baríjubaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü jouniri tílana sédü ligílisi, sédüti lébu sanúdelu, jagía sédü ligílisi.

2

Ugánu joun tílana sédü ligílisi. Ugánu joun tílana ligílisi Éfeso

¹ ‘Babúrúja lun jouniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédü warúguma lídan nújabu le noúnwenren, le gíñe eíbugubei labádinagua sédü lébu sanúdelu le gólu. ² Subúdi numúti sun le jadúgübei, subúdi numúti lidere juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni sífuri jugúya sarágu lídan juwádigimari nuágu, mabúcharunga juágu. ⁴ Láu sun líra, níjein ában cátei jadúga magúndaantina láu. maweírinjali nínsiñe jun queí meja furúmiñe. ⁵ Ligía lubeíti, jarítagua jumá ída jíña lán meja, sáansi jumeí jigáburi, adúga jumeí cátei lé meja jadúgübei furúmiñe. Ánjein madúgün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilígilisin, ánjein gubeírügü jasáansira jigáburi, ligíaba madúgün náni ítara. ⁶ Láu sun líra, luáguñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadúgübei, le gíñe iyéreegubei nun. ⁷ Le garígeirugubei lun lagáambun, agáambaleí le laríñagubei Sífiri Sándu joun tílana buri ligílisi. Ja ásiiragúbalin wuríbani, neígagüdübaña lídaangiñe lin tídíbu wéwe to lánina ibágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babúrúja lun jouniri tílana ligílisi to Esmírnaboun, baríñagame lun lun laríñagun joun gürígia jagía. “Ítara líña naríñagun, áu le furúmiñeti lúma agúmujóuni, lé meja ouwebei áni wínwanyaali. ⁹ Subúdi numúti sun le jadúgübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun louchawagúniwa jafíñen sun jugúya, áni jasúfuriruba sarágu luágu díisi wéyu. Derégüdagu jumá lídan jafíñen nuágu darí jounwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le laríñagubei Sífiri Sándu joun buri tílana ligílisi. Ja ásiiragúbalin wuríbani, másügürünbaña lídaangiñe libíaman ouweni.”

Ugánu joun tílana ligílisi to Pérgamoboun

¹² ‘Babúrúja lun jouniri tílana ligílisi to Pérgamoboun, baríñagame lun lun laríñagun joun gürígia jagía. “Ítara líña naríñagun, áu le gámabarun efeín to gágiriboun, to bíanguaboun amána. ¹³ Subúdi numúti sun le jadúgübei, subúdi numúti gíñe luágu Máfia lántima gabáfubei jádan gürígia ja ní lubei jagánawa, áni láu sun líra, númamemeñadün. Mígirun jumágili jafíñen nuágu, ni íbini lídan dan le láfarúnbei Antipás le geféenbei buíti nuágu ní lídan fulásu le ní jubei, le ní lubei lagúmadija Máfia. ¹⁴ Láu sun líra, níjein buri cátei jadúga, magúndaantina láu. luágu añajein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafígoungüdüniña Israelítagu láu jeígin eígini le adágarawagüdüti joun sándu, lúma láu jabágaridun lídan salúfuri. ¹⁵ Ítara méme gíñe, añajein ja májabaña jígiruni cátei lé

buri jarúfudajabei nicoláitagu júma ñi, cátei le iyéeregubei nun. ¹⁶ Ligía, sáansi jumeí lubeí jigáburí, ánjein madúgün jumá ítara, nídiba juágu madíse, ábame nageíndagun jáma güriquia ja adúgübalin cátei buri le, táu efeín to áfuriduboun niyúmulugugiñe. ¹⁷ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dúbü jarúti lun láu ában íri iséri búrúwañu luágu le ibídiñeti ni ca un lueídügüya lun le erésibirubalin.”

Ugánu joun tílana ligílisi to Tiatíraboun

¹⁸ ‘Babúrüja lun jóuniri tilana ligílisi to Tiatíraboun, baríñagame lun lun laríñagun joun güriquia jagía. “Ítara líña naríñagun, áu le Liraú Búngiu, le ítaraabei águu quei wátu geméti, liábin lugúdi quei brónse le írichawagúaaali. ¹⁹ Subúdi numúti sun le jadúgübei, subúdi numúti jísiñejabu, jafñen, jesériwidun láu jugúraasun, subúdi numúti gíñe luágu jadúgüña lan cátei buíti guetó lueí meja furúmiñe. ²⁰ Láu sun líra, níjein ában cátei jadúga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña güriquia láu tarúfudajan joun nánigu lun jaganoún lídan salúfuri lúma lun jeígin eginí le adágarawagúdúti joun sándu. ²¹ Rújadina dan tun lun tasáansiruni tigáburí, májagiru tígiruni tisálufurin. ²² Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében arítaguni lúma tében anígi, ábame nafáyeiruni cára ában jídaangiñe según le ladúgübei. ²⁴ Ja jíbiri ja Tiatírabaña, ja mafálarubalin arúfudajani ligía, machúlügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anúgüni jawágu. ²⁵ Ragújumei lubúidun jigáburí darí niábin. ²⁶ Ja ásiiragúbalin wuríbani, adúga méme jameíme le nabúseerúbei ladúgün darí lun jóunwen, níchuguba ubáfu joun luágu buri fulásu, ²⁷ ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi sóudieru le láuti múa. ²⁸ Níchuguboun gíñe warúguma to lánina bináafin joun. ²⁹ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi.”

3

Ugánu joun tílana ligílisi to Sárdisboun

¹ ‘Babúrüja lun jóuniri tílana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei sédü espíritugu láni Búngiu jáma sédü warúguma. Subúdi numúti sun le jadúgübei, subúdi numúti luágu jiláñu jíña lan lún buri cátei le nuáguti, láu sun aríñawagúaa lan luágu wínwan jumá. ² Agágudúa jumá, rújuma érei lún buri cátei le níjeinguabei, lubáragiñe loúnwen, aríja náali luágu múaran lan le jadúgübei ligíbugiñe Búngiu. ³ Jarítagua jumeí lubeíti le arúfudajoúbei jun, falájumei, sáansi jumeíme jigáburí. Ánjaün magágudun, nídiba juágu quei liábin ában jíweruti ibídiñoun óra jun. ⁴ Láu sun líra, añajein fiú güriquia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladúga yúuti joun. ⁵ Ja ásiiragúbalin wuríbani, jadáuraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini ibágari magúmuchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶ Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiaboun

⁷ ‘Babúrüja lun jouniri tílana ligílisi to Filadélfaboun baríñagame lun lun laríñagun joun. “Ítara líña naríñagun, áu le sándubei, le gíñe inárünibei, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸ Subúdi numúti sun le jadúgübei. Rújadina ában béna júnren jigíbugiñe le lásíñerun ni ában adáura, ladúga láu sun loúgua lan jére, adúgaadün gásu láu nugúmadin, áni meyéeraguntün luágu nánigu jumá. ⁹ Aríja jumá, nadúgüba lun jayábin lánigu Máfia ja yéebaña, ja aríñagubaña luágu jurú jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu. ¹⁰ Areída jumáli nugúmadin lun gagúraasun jumá, ligía nareídubadún lubeí lueí lidáni ouchwagúni le lúnbei liábin luágu sun ubouú lun jouchúniwa sun ja ubouágubaña. ¹¹ Madísebei niábin, mógira jumeí ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügüyaañame ñígiñe, ábame nabúrüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugú le láni Nubúngiute, le iséri Jerusalén le ñúbinbei siéluigiñe lúmagiñe Nubúngiute, nabúrüdübei gíñe iséri níri jawágu. ¹³ Le garígeiruguti lun lagáambun, agáambaleí le laríñagubei Sífiri Sándu joun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babúrüja lun jouniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibei, le gaféenbei buídu, le aríñagubalin inárüni, le ídaangiñebei liábin sun cátei le ladúgübei Búngiu. ¹⁵ Subúdi numúti sun le jadúgübei, subúdi numúti luágu madlí jumá lídan jesériwidun nun, másü jugúya. ¡Dilígubeijadün jamúga o sújuma! ¹⁶ Quei bachárügü jubeí, madlítün, másü, newérebabadün niyúmulugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña. ¹⁸ Ligía níchugunbei dimúrei jun lun jagáñijan gólu le afínujóuaali láu wátu geméti númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburí. ²⁰ Anája bénabu, nagúajaña, le agáambutí numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹ Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárígiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé buri lúnbei lasúseredun lárígiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³ Ítara líña camá ában dúbü miríti, le jáspe o cornalína, ñíñoun ában jerémuuru geyégu láu jalaú ligía, mirítu quei ában dúbü le esmerálda. ⁴ Geyégu láu lála urúei ligía aríjayatina ában wein-gádürü lála urúei, ñíñanu wein-gádürü gürígia ja weírigutiña ñun luágu, táu jadáuragun jarútu lúma rídi gólu jábulugu. ⁵ Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñíñein sédü lámpu geméñu, jagía sédü láni Búngiu Espíritugu. ⁶ Ñíñein gíñe ában cátei ligíbugiñe lála camúga ában barána le láuti bídiriu jarúgongati.

Lamídaangua, geyégua láu lála Búngiu, ññanu gádürü cátaña gabágaritiña buin láu águu, dándu jagíbugiñe quei janágangiñe. ⁷ Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügúri, le júruwan, ítara líña ligíbu quei ligíbu ában wügúri, le jagádürün, ítara líña quei ában ágila ájamajatu. ⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebu jáu agúaraja.

Sáandu, sáandu, sáandu,

Wabúreme Búngiu, le Súnti Gabáfu,

le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

⁹ Ságüti jíchugun cátaña gabágaritiña ja inébesi lúma eteíngiruni lun Búngiu le ñúnbei luágu lála, le gabágaribeí lun sun dan, ¹⁰ ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaribeí lun sun dan, ába jíchuguni jarídin ligíbugiñe, ába jagúarajan.

¹¹ Wabúreme, Wabúngiute, garíchatibu lun berésibiruni uweíríguni, inébesi, lúma ubáfu,

ladúga Amúrü adúgübalin sun cátei,

láu bugúndan badúgei, láu giñe bugúndan níjein lubeí sun le níjeinbei.

5

Líburu lúma Mudún

¹ Ábati naríjin ában líburu lújaburugu Búngiu le ñúnbei luágu lála, abúrújóuatu líburu tugúya turágeirugu lúma tigíbuagu, darúatu láu sédü séyu. ² Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchati lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchati. ⁴ Ába nayájun sarágu ladúga úa lan ni ában garíchati lun ladáranunun líburu tugúya, ni lun lalíjanun, ni íbini lun laríjinun. ⁵ Ábati laríñagun ában jádaangiñe weíyaaña mútu nun.

—Jebé bayájun, ladúga Jesucrístu, le “liñún” le jádaangiñebeí ladúgawagun Judá, le linébaanfan urúei Davíd, sirígua láali wuríbani lun gayára lan ladáranunun líburu lúma lun lajeíriduni sédü tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajoúbaña lídoun sun ubou.

⁷ Núbinti Mudún ligía, le Jesucrístubei, ába lanúgünun líburu tugúya lújaburugugiñe Búngiu. ⁸ Dan le lárügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ññoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹ Niján urému iséri le jerémujabei.

Garíchatibu lun banúgünun líburu, lun bajeíridunun tiséyun,

ladúga áfarúa ban, ába bagáñijaniña gürígia lídaangiñe sun rása, sun luwúyeri dimúrei, fulásu lúma néchaani.

¹⁰ Adúga báña urúeigumé jáma fádirigumé

lun jesériwidun lun Wabúngiute,

lúma lun jagúmadijan ubouágu.

¹¹ Lídan le naríagun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Níñanu míñun míñun ánjeligu, ¹² jaríñaga láu umálali jéreti.

Yúuti ubáfu lúma irísini, subúdi lúma érei,

uweíríguni lúma inébesi, lúma eteíngiruni lun Jesucrístu, Mudún le áfarúbei.

¹³ Agáamba numúti gíñe jaríñaguni sun cátei le ladúgübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesei, uweíríguni, lúma ubáfu lun Búngiu le ñúnbei luágu lála, lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédü séyu

¹ Ábati naríjin dan le lajeíridúnbarun Mudún furúmiñetu tídaangiñe sédü séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában rídi lánina ásiiraguni lun ladúga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeíridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouágugiñe, lúma lun láfaraguágüdüniña wügúriña jámagua jilágubei, ába tíchugún ában oúnwenbun efeín lun.

⁵ Dan lajeíridunbarun Mudún túrüwan séyu, ába nagáambun laríñagun júrüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu.

⁶ Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügüla kílo túrígu luágu lebégi ában wéyu wadágimanu, úrüwa kílo sebáda ligía méme ebégi, áni toúnigi jumeíme aáli lúma bínu buídu.

⁷ Dan lajeíridunbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸ Ába naríjin ában gabáyu amaríyu, le waríñubei luágu, ouweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe ubou lun láfarajan láu wuríbu, láu ilámaiü, láu sándi, lúma jáu anímaalugu janárimetiña ja ubouágubaña.

⁹ Dan lajeíridunbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucrístu, lábugiñeñanu latárü. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun ubouágu, luágu wounwen? ¿Ídamésan bafáyeigüdaña luágu jáfaruniwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan darí jóústarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisisin séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü,

¹³ Ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali. ¹⁴ Ába lagúmuchagun siélu quei ában gárada dan le tabáruchawagún, ába ladíñuragunga sun wúbü lúma uboúju lídáangiñe jabára. ¹⁵ Ába jarámudagun urúeigu ja lánina uboú lídan júyu lúma buri labádinagua dúbü le luágubei wúbü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügúriña ja mabúremetiña. ¹⁶ Jaríñagati lun wúbü lúma lun dúbü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárime ligáñi Mudún.

¹⁷ Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

¹ Lárigiñe sun cátei le, ába naríjin gádürü ánjeligu rára luágu gádürü larígei uboú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ² Aríjatina gíñe ábanya ánjeli ñúbinti lueígiñe oubau le ñígiñe lubeí láfuara wéyu láu liséyun Búngiu le wíwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadúgün wuríbani lun múa lúma barána.

³ —Madúga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaan-faangu Israél.

⁵ Dúusu míluñanu jádaangiñe ladúgawagun Judá,

dúusu mílu jádaangiñe ladúgawagun Rubén,

dúusu mílu jádaangiñe ladúgawagun Gad,

⁶ dúusu mílu jádaangiñe ladúgawagun Áser,

dúusu mílu jádaangiñe ladúgawagun Neftalí,

dúusu mílu jádaangiñe ladúgawagun Manasés,

⁷ dúusu mílu jádaangiñe ladúgawagun Simeón,

dúusu mílu jádaangiñe ladúgawagun Leví,

dúusu mílu jádaangiñe ladúgawagun Isacár,

⁸ dúusu mílu jádaangiñe ladúgawagun Zabulón,

dúusu mílu jádaangiñe ladúgawagun José,

jáma dúusu mílu jádaangiñe ladúgawagun Benjamín.

Sarágu gürígia jarútu jadáüragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdún, jarútu jadáüragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíríti Búngiu, le ñúnbei luágu lála,

weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteíngiruni,

inébesei, ubáfu lúma érei

lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴ Naríñaga lun.

—Amúrü jamúga aríñagei nun.

Laríñaga nun.

—Ja súfuriñañabaña sarágu ja, ja chibá jamaalíbei jafígoun láu líta Mudún, jarúmagüda jamoún janígi láu. ¹⁵ Ligía ligíbugiñeñanu lubeí lála Búngiu esériwida lun, wéyuagu áriebe títan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lároura, ¹⁷ ladúga loúnigirubaña lan Mudún le lubádubei lála Búngiu, ábame lanúgüniña lárún dúna le íchugubei ibágari magúmuchaditi, ábame larágajani Búngiu sun águiraü lueígiñe jágu.

8

Tisédün séyu lúma lágei cupáli le gólu

¹ Dan lajeíridúnbarun Mudún tisédün séyu to tuáguboun líburu, ába ñi lan maníguauí siélu queí buri luágu dimí óra. ² Ába naríjiniña sédü ánjeligu ja rárabaña ligíbugiñe Búngiu, ába líchugúniwa sédü fídu joun. ³ Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürúbün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴ Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵ Ábati lanúgüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachúrüni luágun uboú, ába lagaambún wayújururu, ireíni, labíríjaníga, lúma ában járabaganáli.

Lé buri fídu

⁶ Ábati jaráanserun sédü ánjeligu ja láubaña sédü fídu lun jínwiruni.

⁷ Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu gíñe jítaü, ába lachágarúniwa luágun uboú. Ába lágudun lúrúwan murúsun lídaangiñe uboú, ígirúati bián murúsun mágudúnti, gudáwati gíñe lúrúwan murúsun lídaangiñe buri tídíbu wéwe lúma jíduru.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasáliragun lúrúwan murúsun lídaangiñe barána jítaüme. ⁹ Jiláguatiña sun úduraü ja lídaanbaña barána le asáliragubei lun jítaüme, gürínguatü gíñe sun ugúnein to ñíboun lídan barána ligía.

¹⁰ Ába línwiruni júrúwan ánjeli lifídun, ába teíguadun ában oúnwenbun warúguma siéluigiñe, durúngu queí ában tóchi. Táburuja luágun lúrúwan murúsun lídaangiñe dúna lúma líseesen dúna. ¹¹ Igífi tíribei warúguma tugúya, ába lagífidun lúrúwan dúna, ába jóúwegun sarágu gürígia ladúga lagífidun dúna ligía.

¹² Ába línwiruni jagádürün ánjeli lifídun, ába lagúrinchagun lúrúwan murúsun lídaangiñe líbiri wéyu, láu sun játi, jáma warúguma. Le oúbaü le agúrinchagubei jawágu, ába labúridun, marúgoungadunti wéyuagu ni áriebe.

¹³ Lárigiñe, ába naríjin ában dunúru weírüti ájamaja lamídaangua siélu, aríñageina ligía láu umálali jéreti.

—¿Fugiábugume ja aganoúbaña uboúagu luágu úrüwa lanárimeníga lé buri lúnbei láburuja jawágun dánme jínwiruni ja jíbiri úrüwa ánjeligu jafídun!

9

¹ Ába línwiruni jaseíngün ánjeli lifídun, ába naríjin ában warúguma eíguadutu siélugiñe lun múarugun, ába líchugún ligélen júyu le mébejabei tun. ² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³ Lídaangiñe gumúlali ligía ába jachúlaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴ Ába laríñawagún joun lun madúgün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun gürígia ja úabei liseíni Búngiu jeréberugu. ⁵ Majoúati lun jáfaraguniña chigángaru jagía gürígia, lueídügü lun jásjüjaniña gürígia luágu seíngü játi, ítara líñati ligári jásjüjan quei jásjüjan águru. ⁶ Lídaanme buri wéyu ligía, jáluajabei gürígia oúweni, madárijabei, busén jagía yebéme jóúwegun, ladíseduba oúweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügüri. ⁸ Ítara líña jádiburi quei jádiburi würiña, liábin jári, quei lári liñún. ⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Ñíñein ubáfu luágu jáli lun jadúgün wuríbani joun gürígia luágu seíngü játi. ¹¹ Ñíñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebreó, lídan güriégu, Apolión o Agúnrinchaguti.

¹² Sügüja furúmiñeti lanárimeníga, mégeigili bián.

¹³ Ába línwiruni jasísin ánjeli lifídun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligía lun jasísin ánjeli le láubei fídu.

—Farára báña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jafáragadún gádürü ánjeligu jagía lun jáfaragun ában jádaangiñe cáda úrüwa gürígia jilágubei, ladúga aráanserúaña lubá óra ligía, wéyu ligía, játi ligía, lúma irúmu ligía. ¹⁶ Ába nagáambuni átiriñanu lan jasúdaaranigu ja luágutiña gabáyu. bián-san miñun.

¹⁷ Ítara líña ligáburi jayáwadagun gabáyu jagía jáma ja waríñubaña jawágu nun. Ñíñein ában cátei janíguagu, funáti licólorun, dínkuti, lúma amaríyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe.

¹⁸ Ába láfaraguniña úrüwa wuríbani le áfuridubei jayúmulugugiñe gabáyu jagía ában jádaangiñe cáda úrüwa gürígia jilágubei, úrüwa wuríbani ligía. wátu geméti, gumúlali, lúma súfuru. ¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadúga wuríbani.

²⁰ Ja jíbiri gürígia ja moúwegunbaña láu wuríbani le, mígirun meme jamúti jadáaguni cátei lé buri meja jadúgübei, mígirun jameí jájuduragun joun espíritugu wuríbatíña lúma joun sándu ja gólu, pláta, brónse, dúbü, wéwe—ja siñáti jaríjin, ni jagáambun, ni jeíbugun. ²¹ Mígirun jameí jáfarajan, jabíñarajan, jasálufurijan, lúma jíwerujan.

10

Ánjeli táu tiraúraü líburu

¹ Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru lougiñe lichúgü. Miríti ligíbu quei wéyu, liábin lúruna camá durúngu líña. ² Ñíñoun ában tiraúraü líburu junréngu lújaburugu. Ába líchuguni lugúdi le loúnwenren lougiñe barána, le lubaúna lougiñe múa. ³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladúrügüdün sédü

wayújururu. ⁴ Lárigiñe ladúrügüdün sédü wayújururu ligía, ába yebe nabúrújaali lan le laríñagubei, ába nagáambun laríñagun ában umálali nun siélugiñe.

—Maríñagubei le laríñagubei sédü wayújururu, mabúrújabeí gíñe.

⁵ Ánjeli bugáti le naríjubei lougiñe barána luma lougiñe múa, ába liñúrui lújabu le lounwenren siélun, ⁶ ába láfiñurun luágu le gabágaribeí lun sun dan, le adúgübalin uboú láu sun siélu, barána luma sun cátei le lídaanbei, ába laríñagun.

—Úadügüyaali darásaü. ⁷ Dánme le lachúlürün dan lun lagúmeserun jasédün ánjeli ínwirei lifídun, gúnfulijalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siélugiñe, ába laríñagun nun.

—Beíba, banúgounme tiraúraü líburu to daráguboun, to lújaburuguboun ánjeli le rárabei lougiñe barána luma múa.

⁹ Ába nídín, ába namúriajanun líburu tugúya luma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanúgünun tiraúraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, luma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu luma latárü, abájüda báñame átiriñanu lan ja ájuduragutiña ñi. ² Mamísurajabei bürürü le bougudibeí tibíti ligílisi ladúga derégewaali joun ja terénchabaña lun Búngiu, ja lúnbaña jagúnrinchaguni ubúru le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san úrüwa-wein wéyu, táu jadáuragun lúdu.

⁴ Bián geféentiña jagía, jagía gayáwabalin bián tídibu wéwe to olívo luma bián lébu sanúdelu le ligíbugiñebei Búngiu, le Labúremebei sun uboú. ⁵ Ánjein ñi abúseerúti ladúgün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le busénti ladúgün wuríbani joun.

⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadúgüni dúna jítaüme, lun gíñe jasúfuriragüdüni uboú láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúru le Jerusalén le ñi lubei ládarawagúa Jesúsu luágu gurúwa, fulásu meme le, camá Sodóma luma Ejípto. ⁹ Ábame jaríaguniña gürígia ja lídaangiñetiña sun fulásu, sun rása, sun luwúyeri dimúrei, luma néchaani luágu úrüwa wéyu dimí, mígirunbaña lun jábunún. ¹⁰ Ábame jagúndaaragun ja uboúagubaña láu jóüwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan úrüwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíríti janúfudedagun. ¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában múna tídaangiñe ságü dísi to ubúruguboun, ába jóúwegun sédü mílu güriña ladúga járabaganáli ligía. Ja jíbiri güriña, ába jíchugun inébesi lun Búngiu le siélubei ladúga luweírin janúfude.

¹⁴ Sügúja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lifídun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu lúma lidáani Crístu

lun jarúeijan lídan sun uboú,

áni jarúeijaba sun dan.

¹⁶ Ábati jélemuchunga weín-gádürü güriña ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu,

amúrü le Súnti Gabáfu,

amúrü le wínwanbei lúmagiñe lubáragiñe furúmiñeti dan, wínwan amúrü guetó,
wínwan amúrüme sun dan.

Teínqui wamútibu ladúga ragúbaali lan oúnwenbun bubáfu.

áni guméseedibu arúeija.

¹⁸ Gáñiburija néchaanigu,

chülúja wéyu lun babeíjan,

chülúja gíñe dan lun bagúseragüdüniña jiláguaaña,

ábame bíchuguni jafáyeiruaja báni profétagu joun,

jáma jíbiri ja deréguabaña jóungua bun, jáma sun jawúyerigu güriña ja íchubaña inébesi lun bíri.

Chülúja óra lun bagúnrinchaguniña ja agúnrinchagubalin uboú.

¹⁹ Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labírijaníga, ireíni, wayújururu, ában járabaganáli, lúma láburujan lúbara júya deréguati le weínamuti.

12

Wúri lúma anímaalu le dragón

¹ Ábati lasáliragun ában oúnwenbun seíni siélu. ában wúri darúgu líña wéyu táu camá jamuga ában dínu, láu játi lábugiñe tugúdi, lúma ában rídi jáu dúusu warúguma tábulugu. ² Wúri tugúya dageíñañoun, tagúaraja láu igári le lánina agáriduni, ladúga súfuru lun tagúriajan. ³ Ábaya lasáliragun ábaya seíni siélu. ában oúnwenbun anímaalu le dragón funáti, sédüñein lábulugu, dísi ligáanchun, lúma ában rídi luágu cáda lábulugu. ⁴ Ába ladúrugudun dragón ligía ában jádaangiñe ságü úrüwa warúguma láu líli, ába lajúnruniña múarugun. Ába laráramun dragón ligía tigíbugiñe wúri to lúnboun tagúriajan, lun leígini tiraú dánme le tagúriajan. ⁵ Ába tagúriajan wúri tugúya ában wügúri irájü le lúnbei ledéraagüdüñ lagúmadíjan lídan sun fulásu queísi láu ában murúsun gürábu. Ába lagídarúniwa tiraú tueí, ába lanügúniwa lun Búngiu luágun lála. ⁶ Ába tanúrajan wúri tugúya lídoun fulásu mageírawati le ñí lubei aráanseeli lan Búngiu ubáraü tubá, lun toúnigirúniwa ñi luágu mílu bián-san úrüwa-wein wéyu.

⁷ Lárigiñe, ába ñi lan ában wuríbu siélu, ñí lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu, ⁸ ába jeféridiruni wuríbu, ába mabáraaña lan siélu. ⁹ Ába lubeíti laságarún oúnwenbun dragón, le binádu jéwe ligíra le gíribei Máfia, o Satanási, le ayéejabalin sun uboú, siélugiñe. Ligía jáu sun láni ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siélugiñe.

—Gáñei láali Búngiu Máfia láu luweírin lubáfu. Chülújali asálbaruni joun gürígia ubouágun, chülújali larúeijan Búngiu lúma lagúmadijan Crístu, ladúga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, áriebeu ligíbugiñe Wabúngiute. ¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügútiña lun joúnwen. ¹² Gúndaalá lubeíti siélu, gúnda jumá jugúya le aganoúbei ñi. ¡Áni fugiábugu ja aganoúbaña ubouágu, lúma baránaja! Núdünja Máfia júmoun láu oúnwenbun igáñi, ladúga subúdi lumúti luágu murúsun rügáali lan lidáani.

¹³ Dánti laríjinbei dragón luágu fíwaali lan ubouágun, ába leíbaajanun wúri tó buga agúriajaboun. ¹⁴ Ába líchugún bián larúna dunúru le weínamuti tun wúri tugúya lun gayára lan tájamarun lídoun fulásu mageírawati díse lueí dragón ligía, le ñíba lubeí tounigirúa luágu úrüwa irúmu dimí. ¹⁵ Ába lewérajan dragón ligía sarágu dúna liyúmulugugiñe lun lañaradaguagüdünun wúri tugúya. ¹⁶ Ába líderagunun múa wúri tugúya, ába lánjunrenchun múa, ába lachúruni sun dúna le lígiragüdübei dragón liyúmulugugiñe. ¹⁷⁻¹⁸ Gáñitimaati dragón túma wúri tugúya, ába lídin ageíndagua jáma tirájüñü ja núdübaña láu le lubeíbei Búngiu, falájamei ugánu le láni Jesucrístu.

13

Ja mónsturugu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lúblugú, díisi ligáanchun. Níñein rídi luágu cáda ligáanchun lúma ában íri le áubei lanábaguei Búngiu luágu cáda lúblugú. ² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Níñein ában chaúnti luágu ában lídaangiñe lúblugú mónsturu ligía, weíruti lún yebe láfaruni jilágubei, ába lareídagun lichaúntin. Weíruti janígi sun gürígia láu mónsturu ligía. ⁴ Ába jájuduragun lun dragón luágu líchugun gumádi lun mónsturu, ába gíñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵ Ígirúati gíñe mónsturu ligía lun ladímurejan dimúrei buíti luougua lúma lun lanábaguni Búngiu, lúma lun lagúmadijan luágu bián-wein-bián játi. ⁶ Ába ladúgün ítara, adímurejati wuríbati luágu Búngiu, anábaleí líri, lúban, jáma ja siélubaña. ⁷ Ígirúati gíñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸ Ába jájuduragun sun ja aganoúbaña ubouágu lun mónsturu ligía, ja úbaña jírri bürúwañu lúmagiñe ladúgün ubou títan líburu to lánina íbágari, to lúmaboun Jesucrístu, le Mudún le ouwebei.

⁹ Le garígeiruguti lun lagáambun, agáambalá. ¹⁰ Ja adáürütiña ámu, jadáürawagúba gíñe, ja áfarajatiña táu efeín, jáfarawagúba gíñe táu efeín. Ligía busén jabei lánigu Búngiu gurásu lúma affñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Níñein bián gánchu luágu camá ligáanchun mudún, áni ítara líña ladímurejan camá ában dragón. ¹² Níñein sun ubáfu le láni furúmiñeti mónsturu lúma lun ladúgüni cátei lueígiñe loúbadina furúmiñeti mónsturu. Ába ladúgün lun jájuduragun sun gürígia ja ubouagubaña lun furúmiñeti mónsturu, le lareídagugüdübei lueígiñe chaúnti le luágubei. ¹³ Adúgati gíñe oúnwenbun buri miláguru, áburujagúdati wátu geméti siélugiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugú ubáfu lun ladúgüni lueígiñe loúbadina furúmiñeti mónsturu, ába leyéeduniña ja aganoúbaña ubouágu, ába

ladúgagüdün ában liyáwa mónsturu le gawágubalin chaúnti ába lareídagun, joun. ¹⁵ Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adúgati gíñe lun sun lan gürígia—weínamujaña, ñúbürigiña, rísitiña, gudémetiña, idámuni, máma idámuni—lun labúrüdún líri mónsturu luágu jájabu le jóunwenren o luágu lan jerébe. ¹⁷ Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu. ¹⁸ Buséntitia cátei le lichú áu, le gunfaráandati, atúriajaleí linúmerun mónsturu, le ábanbei quei líri wügúri, áni niján número le asálirubei lídaangiñe lilétürana íri ligía. sísi-san úrüwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába naríjini Jesucrístu, le Mudún, rára lábulugu wúbü le Sión, le siélubei. Ñíñanu san bián-wein-gádürü mílu gürígia lúma, ja bürúwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri ñúbinti siélugiñe camá lamúri barána, camá gíñe ladúrügüdün ában wayújururu le jéreti, ítara líña gíñe camá jamuga tamúri sarágu gidára. ³ Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürü mílu ja asálbarúabaña jádaangiñe ja ubouágubaña — ⁴ jagía ja mádaragúnbaña jóungua jámoun würíña, reídeitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma lun Mudún. ⁵ Madárirúnwati ni murúsun iyéeni luágu jayumáru ladúga jarúmatiña ligíbugiñe Búngiu.

Ugánu buri le jíchubei úrüwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoubaña ubouágu—joun sun néchaanigu, rása, luwúyerigu dimúrei lúma sun fulásu. ⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülúja dan lun lagúseragüdün. Judúgua jumá lun le adúgübalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíriguboun, ladúga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya júrüwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labúrüdúniwa líri mónsturu luágu lújabu o leréberugu, ¹⁰ látubei bínu le lánina lanárime ligáni Búngiu le lúnbei láburujan le gumúti luágun, ábame lasúfurirun láu wátu lúma sáfuru ligíbugiñe Jesucrístu lúma jagíbugiñe ánjeligu ja sándubaña. ¹¹ Laweínruba lugúmulalin wátu le asúfuriragüdúbaliña lun sun dan, úabei eméraguni ni wéyuagu ni áriebu joun ja ájuduragubaña lun mónsturu lúma tun liyáwa, o ja bürúwañubei líri jawágu. ¹² Ligía lébubei lúnti lan gagúraasun jamá lánigu Búngiu ja ñúdünbaña láu le lubeíbei áni falájamei Jesúsú surúñu, lun ítara meme jamá derégüdagu lídan jafíñen darí lúmoun jóunwen.

¹³ Ábati nagáambun laríñagun ában umálali ñúbinti siélugiñe nun.

—Abúrújabeí le. “¡Gúnda jamá ja ouwetiña láu jafíñen luágu Jabúreme Jesucrístu!” Lúmagiñe óra ligía, jeméraguba lídaangiñe jawádigimari, ábame lídin le jadúgübei úara jáma, líña Sífiri Sándu.

Lalúbajóuniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügúri Garaúwarügüti. Ñíñein ában rídi gólu lábulugu túma ában alúbagülei jamánatu lújaburugu. ¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladúga chülúja dan lun alúbajani, ladúga funáali nádü.

¹⁶ Ába lásügüragüdünun le ñúnbei luágu juánriñu lalúbagüle múarugugíñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu. ¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboún tirésini beíbei to múaruguboun, ladúga funáaru.

¹⁹ Ába lásügüragüdünun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weírüti lun taríbichawagúniwa. (Míni lan líra, lanárime abeichúni le lúnbei liábin lúmagíñe Búngiu.) ²⁰ Ába taríbichawagún beíbei bougudi libíti ubúru, ába láfuridun jítaü lídaangiñe tágei chülú lúmoun líñun jafúrenun gabáyu, úrüwa-san kilómetro geyégua.

15

Ánjeligu jáma jagúmujoún sédü ígei

¹ Ába naríjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Aríjatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun. ³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weírüti áni buíti sun le adúga báalibeí,

Wabúreme Búngiu, Súnti Gabáfu,

surúñu líña sun le badúgübei, úaragua,

amúrü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buíti buágu?

Amúrü rügúñadibu maffgounjan,

jayábinba lílana sun fulásu, ábame jájuduragun bun,

ladúga arijúaaali luágu buídu lan sun le badúgübei.

⁵ Lárigíñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü ánjeligu ja jáubaña sédü ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu. ⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírin ligáñi Búngiu le gabágaribeí lun sun dan. ⁸ Ába labuínchun fulásu le sándutimaabei láu gumúlali le ñúbinbei lídaangiñe luweírigun Búngiu lúma lubáfu. siñátiti lebélorun ni ában ñíjin darí jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu ubouágun.

² Ába lídin furúmiñeti ánjeli, ába láturuni licópun ubouágun, ába lasálirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasáliragun barána queísi játa jiláaña, ába jóúwegun sun cátaña ja gabágaribaña lídan.

⁴ Ába láturuni júruwan ánjeli licópun luágun buri dúna lúma líseesen dúna, ába lasáliragun jítaúme. ⁵ Ába nagáambun laríñagun láni dúna ánjeli.

—Úaragatibu láu bagúseragüdün ítara, Búngiu sándu, amúru le wínwanbei lúmagiñe lubáragiñe furúmiñeti dan áni wínwan amúru guetó, ⁶ ladúga jagía, aseíñeigüda jamúti játa profétagu jáma ja deréguabaña jóungua bun, guetóti gurágüdaadibu jítaü joun, yúuti joun.

⁷ Agáambatina gíñe laríñawagun luegiñe latáru.

—Anja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña güriquia láu lísü, ⁹ ába jachúrarun súngebui. Láu sun lira, masáansiragunti jagáburi, madímurejan jagía buíti luágu Búngiu, anábaguearügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun güriquia jañeñe láu igári. ¹¹ Ni ítara, masáansiragunti jagáburi lun jígiruni wuríbati léñaja jadúgübei, anábaguearügü jameí Búngiu le siélubei luágu jagárigu lúma jagúmeín.

¹² Ába láturuni jasísín ánjeli licópun luágun oúnwenbun dúna le Eufrátes, ába lamábeidun lun ñi lan úma lun jásügürün urúeigu ja ñúbinbaña luegiñe oúbaü le ñígiñe lubei labouácha wéyu.

¹³ Ábati naríjin jáfuridun úruwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yébeí, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouágubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵ (“Toúnigi jumátia ladúga sódinibei niábin quei líabin jíweruti árieü. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini güriquia le mabúseerun lubeí lun jaríjini luágu,” líña laríñagun Jesucrístu.) ¹⁶ Ábati jóúndaraguniña urúeigu lídan fulásu le gíribei Armagedón lídan dimúrei le hebréo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

—Adügúwaali.

¹⁸ Ába ñi lan labíríjaníga, ireíni, lúma wayújururu, ába lánjingichun múa láu ában jarabaganáli, jéreti sügú láu sun jarabaganáli le dagáalibei lúmagiñe ñi jamá güriquia ligíbuagu ubou. ¹⁹ Ába lafánreinragun ubúru gu weíruti le Babilónia lídan úruwa murúsun, ába buri lagúluludun ubúru gu le ubouágubei, ába larítangun Búngiu luágu ubúru gu weíruti le Babilónia lun lájuluchagüdüni bínu le lánina abeichúni le loúnajabei lun lídan ligáñi. ²⁰ Sun uboujú lúma sun wúbü, ába lagúmuchagun. ²¹ Ába gíñe láburujan oúnwenbun buri lúbara júya deréguati siélugiñe jawágun güriquia, júruburiti chülú lúmoun san líburu, ába janábaguni güriquia Búngiu luágu, ladúga ában lan abeichúni janárimeti.

17

Tasíadirúniwa óunwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun. —Jigábu, narúfudaali tabeichún óunwenbun jóru to ñúnboun ligíbuagu barána bun. ² Agánawaaña urúeigu ja uboúagubaña lídan salúfuri túma, bachárua jagía ja uboúagubaña láu bínu le lánina tisálufurin.

³ Ába lanúgünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában wúri waríñu luágu ában mónsturu funáti, bürúwañu líña sun luwúyeri dimúrei le anábaguti Búngiu tuágu, sédüñein lichúgü mónsturu le uágubei tañúura, díisi ligáanchun. ⁴ Wúri tugúya, gúchu lúma funáti ticólorunbei tanáangun, liábin tuwénden, gólu, dúbü buíduburiti, lúma pérla. Ñíñein ában cópu gólu tújaburugu buin láu tisálufurin lúma liwíye tadáangun. ⁵ Bürúwañu líña ában íri teréberugu láu ában aníchigu arámudaguati. Íri le teréberugubei. “Babilónia to weíriboun, jáguchu jóru lúma sun luwúyeri iwíyeni uboúagu.” ⁶ Ába nasúbudiruni luágu bacháruañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinbalin cátei le, ába laweíridun nanígi. ⁷ Ábati laríñagun ánjeli ligía nun.

—¿Cá uágu laweírda banígi? Nasúbudiragúdaali míni tan wúri to bun, láu sun mónsturu le anúgübarun, le sédübei ichúgü, díisi ligáanchun. ⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún loúnwen. Ja aganoúbaña uboúagu, ja úabei jíri bürúwañu tídan líburu to lánina ibágarí lúmagiñe ladügún uboú, laweíriduba janígi dánme jaríjini mónsturu lé meja gabágaribei áni úaali, ábaya liábin.

⁹ Níjein cátei ya joun ja gayáraabei gunfaráanda jamáni. Sédü ichúgü ligía, míni lan sédü wúbü le uágubei ñun tan wúri tugúya, ¹⁰ sédü méme ichúgü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujoún, larúeijaba murúsurügü dan. ¹¹ Le mónsturu lé meja gabágaribei áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹² Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu. ¹⁴ Jageíndaguba lúma Jesucrístu, láfaragubaña jilágubei, ladúga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába gíñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le baríjubei luágu mónsturu, le méme díisibei urúeigu, teyéereguduba jóru joun, ábame jígirunun fíwañu, surúsu, jeígubei túgürügü, ábame jágudunun láu wátu geméti. ¹⁷ Rúlaali Búngiu tídoun janígi lun jadúgüni le labúseerubei láu júaradun lun jedéregeruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu. ¹⁸ Wúri to baríjuboun, tugúya weíruti ubúruugu le agúmadirubaliña lurúeitegu uboú, le gíríbei Babilónia.

18

Teíguadun Babilónia

¹ Lárigiñe sun cátei le, ába naríjin ábanya ánjeli larárirun siéluigiñe láu sarágu ubáfu, ába larúgoungadun uboú láu límírin. ² Lagúaraguati láu umálali jéreti.

—Gumúgua, gumúgua Babilónia to weíriboun, guetó jábiñejaru máfianu, jarámudaguagüle sun jawúyeri espíritugu wuribatíña, jádibu dunúru wíyetiña queísi wadúbi. ³ Ladúga sun lan néchaanigu bacháruaaña láu bínu le lánina tisálufurin, áni agánawaaña lurúitegu ubou túma lídan tisálufurin, alúgurajatiña buri ja ubouagubaña, rísijaña lídaangiñe luwénden touseragun túngua.

⁴ Ábayati nagáambun laríñagun ábanya umálali ñúbinti siélugiñe.

—Furjúma Babilóniagiñe, jugúya le nánigu, mafánran jumámuga lídan tifígoun luma lídan tabeichúniwa. ⁵ Gíbeguaali tifígoun darí lun lachúlürün siélu, áni jarítaguaali Búngiu luágu luríban touserun. ⁶ Adúga jumá tun Babilónia quei tadúga joun ámu, fáyei jumoún dóbüli lueí le tadúgübei. Rújuma ában uníñein le jéretimaati bián weíyaasu tun sügú láu le tíchugubei joun ámu. ⁷ Súfurigüda jumoún quei méme tederegeragun túngua lun anáanguni únguaü luma lun agúnrinchaguni, ladúga aríñaga tan tídan tanígi. “Ñun nína ya quei ában urúei, máma nugúya ában jíñáru mámaritu, masúfurirubadina gíñe.” ⁸ Ligía liábinba lueí tabeichún lídan ában meme wéyu—ouweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asiadirubarun.

⁹ Lurúitegu ubou ja aganoubaña túma lídan salúfuri luma irísini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúругu le weíribei, Babilónia ubúругu le gabáfubei, lídaanrügü murúsun óra liábin babeíchun!

¹¹ Ja alúgurajatiña buri ja ubouagubaña, ayájuatiña gíñe, gudémegua ligía ubúругu ligía joun ladúga úaaña lan cába lan agáñjei ebégidinaü le janáajabei— ¹² ebégidinaü lé buri gólu, pláta, dúbü buíduburitu, pérlas, gamísa to líno to fínutu, séda, colóru buri gúchu luma funáti, luma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, luma dúbü miríti, ¹³ canéla, cátei lé buri jémeti, cupáli, mírra, ibíñei, bínu, aáli, fulúwaaru fínutu, luma türígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoun. ¹⁴ Jaríñaguba lun ubúругu ligía.

—¡Úaaru frúta buri to seméboun búma to jínsiñeñajáboun bun sarágu, féridi báali gíñe sun irísini luma wéndei le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúругu le, jeréderuba díse le janúfude lueí labeichún, ayájuajeina, aságürjeina. ¹⁶ Ábame jaríñagun.

—¡Fugiábu ubúругu weíríti! Ítara liñá meja quei ában wúri táu tadáúragun to líno fínutu túma anáanguni to colóru gúchu luma funáti, láu tuwénden gólu, dúbü buíduburiti luma pérla. ¹⁷ ¡Lídan murúsun óra gumúja sarágu irísini!

Sún buri tarúne ugúnein, pasajéругu, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúругu, ába jagúaragun.

—¿Cásan meja ámu ubúругu ñíbei quei oúnwenbun ubúругu le?

¹⁹ Ába jíchaagun múa jábulugu, ayájuaja, aságürja, agúaragua.

—¡Fugiábu Babilónia lé buga weíribei! Rísijañá yebe sun ja gagúnebaña wapóru baránaja láu lirísin, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amúrü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu gúsei jun láu lasiadiruni.

²¹ Ábati liñúrún ában ánjeli gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laríriragüdúniwa Babilónia, ubúругu le weíribei, marijíndügüyawalime. ²² Magaambúndügüyawalime tamúri gidára, fídu, bémerirugu, úaaname gíñe

ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan.
²³ Madúnraagúnjalime larúgounga lámpu bídan, magaambúndügüýáwalime areínjani le lánina maríei bídan, láu sun gabáfugüda bániña meja báni alúgurajatiña lídan sun ubou, eyéedagua báña sun néchaani láu babíñarajan.

²⁴ Daríwaali játa profétagu, jáma ja lánigu Búngiu, lúma játa sun ja áfarawagúañabaña ubouágu, daríwaali játa sun jagía lídan ubúrugú lé meja Babilónia.

19

¹ Lárigiñe cátei le, ába nagáambuni jamálali sarágu gürígia, jagúarajan.
 ¡Alelúya! Weíriti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru ouñwenbun jóru to agádeirubalin ubou láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü gürígia ja weírigutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu.
 Rújuma uweíriguni lun Búngiu,
 sun jugúya ja esériwidubalin,
 áni inébelá jun,
 weíyaaña, ñúbürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buíñwama láu ugúndani, ru wagíame uweíriguni lun, ladúga chülúja óra lun lídan jamá ában lánigu Jesucrístu lúma, le gumúti.
 Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babúrüja. “Gúnda jamá ja amísurajoubaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüni le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madúgabeí le, esériwiduti áu lun Búngiu quei amúrü jáma bibíriña ja afálarubalin láni Jesúsú ugánu derégüdagüñu, lun Búngiu lun bájuduragun.

Ugánu le lanügübei Jesúsú lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junréñu, ába lasáliragun ában gabáyu jarúti, léti aweínjabalin, Gúnfuliti lúma Inárüni, ligía líribei, ladúga láu ísuruni lagúmadija, láu gíñe ísuruni lageíndagua. ¹² Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürúwañu luágu, ligía rügüñein asúbudirei. ¹³ Anáanguni to luáguboun, feíndiwatu láu jítaü. Lerérün Búngiu líribei. ¹⁴ Jafálaréiti súdeara ja siélubaña táu jadáüragun líno to fínutu, jarútu, jarúma, waríñu jagía jawágu gabáyu

jarútiña. ¹⁵ Níñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbachagubarun beſbei láu lugúdi, gurágüdaleíme bínu le lánina lanárime ligáñi Búngiu joun. ¹⁶ Bürúwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, oúndaragua jumá lun oúnwenbun ladíneragüdün Búngiu, ¹⁸ jou jumámuga jágürügü urúeigu, gumádimatiña, jáma wügúriña ganígitiña, jágürügü gabáyu jáu sun ja aweínjabaliña, jágürügü sun jawúyeri wügúriña dándu ja jónguatiña quei ja idámuni, dándu núbürigiña quei weínamujaña.

¹⁹ Ábati naríjini mónsturu jáma lurúeitegu uboú jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu. ²⁰ Ába ladaürún mónsturu úara lúma proféta yéeti lé buga adúgübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóngua lun labúrüdún líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma súfuru. ²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

20

Le mílu irúmu

¹ Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güríngüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. ³ Ába láguruni lídoun júyu le mébejabei le ní lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdúwaba luágu murúsun dan.

⁴ Ába naríjini jála buri ja ibíjubaña ubáfu lun jagúseragüdün, ñun jáña luágu. Aríja numútiña gíñe jawáni já meja adúrürúbaña ichúgü lueígiñe japúrichijani Lerérun Búngiu lúma lueígiñe jadímurejan luágu Jesucrístu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe oúweni lúnya jabágaridun, ába jagúmadijan úara lúma Crístu luágu mílu irúmu. ⁵ Ánjeinti ja jíbiri jiláguaaña, másaaruntiña lídaangiñe oúweni daríme lárigiñe mílu irúmu. Niján furúmiñetibeí ásaaruni lídaangiñe oúweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe oúweni! Mabáfuti libíaman oúweni jawágu, lubáragiñe líra, fádirigubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sügújali mílu irúmu ligía, ligíame lígirawagüdün Máfia lídaangiñe júyu le mébejabei, ⁸ ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu. ⁹ Ítara líña lubeíti, ába jáfuridun súdaara jagía lídaangiñe sun uboú, ába jegéyedaguni fulásu le ní jabei lánigu Búngiu lúma ubúru gu le jínsiñebeí lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei. ¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma súfuru, le níjin lubeí jágurúa mónsturu lúma proféta yéeti. Jasúfuriruba ní wéyuagu, árie bu lun sun dan.

Wísiyu ligíbugiñe oúnwenbun jalau jarúti

¹¹ Ábati naríjin ában oúnwenbun jalaú jarúti, ñíñein Búngiu ñun luágu. Ába lagúmuchagun siélu lúma uboú ligíbugiñe, ába marijínjali lan. ¹² Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdún jiláguaaña luágu buri cátei lé meja jadúgübei, según le bürúwañubei tídan líburu buri tugúya. ¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe oúweni, ába jagúserawagüdún luágu buri cátei lé meja jadúgübei. ¹⁴ Ába lágurúniwa oúweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei oúweni, ¹⁵ ñíjin jagurúa ja úabei jíri tídan líburu to lánina ibágari lun jasúfurirun ñi gumúgua dan.

21

Iséri siélu lúma iséri uboú

¹ Lárigiñe, ába layáwadagun iséri siélu lúma ában iséri uboú nun, gumúgua buga furúmiñeti siélu lúma furúmiñeti uboú áni úaali buga barána. ² Áu Juan, aríja numúti ubúrugu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári. ³ Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan güriña guetó. Laganoúba jáma, jagíaba lánigu, Búngiu mémeba jáma lun ligía lan Jabúngiute. ⁴ Larágajabei sun jáguira, úaalíme oúweni ni ayájuni ni íruni ni igárigu, ladúga sügúja sún meja cátei le níjeinbei.

⁵ Ábati laríñagun Búngiu.

—Aríjabá, adúga numúti sun cátei isérimé.

Aríñagati gíñe.

—Babürüja, ladúga inárüni dimúrei buri le, áni gayáraati lafíñerún luágu.

⁶ Lárigiñe, ába laríñagun nun.

—Súnja nadúgüni sun cátei le. Áu lagúmesejabei sun cátei, áu gíñe lagúmujoúnbei, quei létüra ‘A’ lúma ‘Z’. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu. ⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸ Ánjañati ja janúfudebaña, ja mafíñebaña, ja iyéeejabúbaña, ja gáfarajadibaña, ja adágubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbéi láu wátu geméti lúma sáfuru, le libíamabei oúweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagüdüni Sífiri Sándu ában wúbü nun, weíriti, íñu, ába larúfuduni oúnwenbun ubúrugu biníwati le Jerusalén nun, larárirun siélugiñe lúmagiñe Búngiu.

¹¹ Ámirijati ubúrugu ligía láu larúgounga Búngiu, ítara líña límirin quei límirin ában dúbü buídumeraüti, quei dúbü le jáspe, jarúgoungati quei bídiriu. ¹² Níñein ában baríeru weíriti, íñu, láu dúusu béna geyégu láu ubúrugu ligía, ában ánjeli luágu cáda béna, lúma jíri dúusu türíbu ladúgawagun Israél bürúwañu luágu buri béna. ¹³ Úrüwañein béna lueígiñe le ñígiñe lubeí laboúcha wéyu, úrüwa lueígiñe nóрте, úrüwa lueígiñe sur lúma úrüwa lueígiñe oúbaü le ñígiñe lubeí lálüda wéyu. ¹⁴ Baríeru ligía, ligíbuaguñein dúusu dúbü lidérebuguñein, láu jíri dúusu láni Crístu apóstolugu bürúwañu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúrugu, lubéneri, lúma lubárierun. ¹⁶ Ubúrugu ligía, ába lábu lidábuberen lúma

limígifen. Ába lamísurajani ánjeli ligía ubúrugú láu lumáburu, bián-mílu bián-san kilómetros luweírin, ába lábu limígifen lúma líñun, lúma lidábuberen. ¹⁷ Lárigiñe, ába lamísurajani baríeru, úrúwa-wein-gádürü méetros luweírin según jamísuraagüle gürígia le layúsurubei ánjeli ligía.

¹⁸ Láu dúbü le jáspe ladügúwa baríeru ligía, ubúruguti ligía, láuti gólu le tímatimaati, miríti queisi bídiriu le jarúmati. ¹⁹ Wéndegüdáwati lébu baríeru ligía láu sun luwúyeri dúbü buíduburiti. le furúmiñeti, láu jáspe, le libíaman, láu safíro, le lúruwan, láu ágata, le ligádürün, láu esmerálda, ²⁰ le liseíngün, láu ónise, le lisísín, láu cornalína, le lisédün, láu crisólito, le liwídün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta. ²¹ Dúusugubei béna ligía, dúusu pérlas, cáda béna láu ábanrügü pérla ladügúwa. Léti úma buri láni ubúrugú ligía, láuti gólu jarúgoungati quei bídiriu.

²² Marjintina ni ában ligílisi lídan ubúrugú lídan, ladúga añajein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñi jabei. ²³ Memégeirunti ubúrugú ligía larúgounga lúmagiñe wéyu ni lúmagiñe játi, ladúga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúrugú ligía. ²⁴ Jeíbuguba sun néchaanigu ja sálbawañabaña lídan lilámpun ubúrugú ligía, ábame janúgüni lurúeit-egu uboú jaweírigun ñíjin, lun jíchuguni lun Búngiu. ²⁵ Madáurawagunbei lubéneri wéyuagu, úabei gíñe áriebu ñi. ²⁶ Lanügúba jaweírigun néchaanigu ñíjin, láu sun jarísín, ²⁷ mebélubei ni cáta wíyeti ñíjin, ni le adügüti cátei le wuríbati o gayéeraguati. Ja rügúbaña bürúwañubaña íri tídan líburu to lánina ibágari to lúmaboun Jesucrístu, jagía rügúbaña ebélura.

22

¹ Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiriu, lídaangiñe lála Búngiu lúma lála Jesucrístu láfurida. ² Níñein dúna ligía lamídaangua lémeri ubúrugú ligía, áni luágu bián louba dúna ligía ñi laweírda buri tídibu wéwe le íchugubei ibágari, le agíindubei dúusu wéyaasu lídan irúmu. Ságü játi lagíindun, léti lubána, seríwiti lun lagáranijóun joun néchaanigu. ³ Úaalíme ni cáta ñi lun lábugiñe lan líñaragun Búngiu. Níbei lála Búngiu lúma lála Jesucrístu lídan ubúrugú ligía, ábame jájuduragun lánigu lun. ⁴ Jagágibudaguba lúma Búngiu, níbei gíñe líri jeréberugu. ⁵ Úaalíme áriebu ñi, ja aganoúbaña ñi, memégeirunbaña ligémeri lámpu ni ligémeri wéyu, ladúga larúgoungadagüdüba Wabúreme Búngiu jáu, ábame jagúmadijan sun dan.

Madíseeli liábin Jesúsu

⁶ Lárigiñe, ába laríñagun ánjeli ligía nun.

—Inárüiniti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu ónaja láadina lun narúfuduni le lúnbei lasúseredun joun lánigu madíse.

⁷ —¡Aríja jumá! ¡Anáte madíse! líña laríñagun Jesucrístu.

¡Gúndaalá le adügübei gásu láu ugánu le láni Búngiu le bürúwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába laríñagun nun.

—Madúgabeí le, esériwiduti lun Búngiu áu quei amúrü jáma bibíriña ja profétagu, jáma sun ja adügúbaña gásu láu le bürúwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabeí láni Búngiu ugánu le bürúwañubei tídan líburu to ladúga yaráfaali dan lun lagúnfulirún. ¹¹ Ígirabeí le wuríbabei lun lasígirun adáagua wuríbani, le wíyebei, lun lasígirun lídan liwíye, ánjeinti le buídubei, buídumemelá, áni le wügúri le derégeguabei lúngua lun Búngiu, gúnfulimemelá.

¹² —Ánja, madíseeli niábin, líña laríñagun Jesucrístu, áni barú numuti afáyeiruajaü le lúnbei níchuguni lun cáda ában según buri cátei le ladúgübei. ¹³ Áu furúmiñetibei lúma agúmujoúni, lagúmeseja sun cátei lúma lagúmujoún quei létúra ‘A’ lúma ‘Z’.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubei ibágari, gayára lámuga jebélurun luegiñe lubéneri ubúrugu. ¹⁵ Ánjaña ja mafiñeradibaña luágu Jesucrístu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba boúgudi.

¹⁶ —Áu Jesús, oúnaja náali náni ánjeli lun lasúbudiragüdüni sún buri cátei le joún buri tílana liglisi. Áu linébaanfan urúei Davíd, áu gíñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubei, aríñagalá.

—Jigábu lun Jesucrístu, sálba bámuga.

Le mágürabubei, ánjein busén, ñúbinlá, gurála lídaangiñe dúna le íchugubei ibágari, mafáyeijaanga luágu.

¹⁸ Sun ja agáambubalin láni Búngiu ugánu le bürúwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labúrújoúa tídan líburu to, luágu. ¹⁹ Le gíñe agídaruti som cátei lídaangiñe láni Búngiu ugánu le bürúwañubei tídan líburu to, lagídarubei gíñe lufánran lídaangiñe lin tídibu wéwe le íchugubei ibágari, lúma lídaangiñe ubúrugu sándu lé buri bürúwabei uágu tídan líburu to.

²⁰ Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesús!

²¹ Binílaün Wabúreme Jesucrístu sun jugúya. Ítaralá.